

আনন্দ মঠ ।




শ্রীবঙ্কিমচন্দ্র চট্টোপাধ্যায়

প্রণীত ।

স্বাদীতম নবম সংস্করণ
কলিকাতা ।

জন্সন্ প্রেসে শ্রীরাধানাথ বন্দ্যোপাধ্যায় কর্তৃক


মুদ্রিত ।



১২৮৯ ।

(১৪৪২)

মূল্য ২০% এক টাকা দুই আনা মাত্র ।



উৎসর্গ পত্র ।

* * *

কু নু মাং হৃদধীনজীবিতং
বিনিকীর্য্য ক্ষণভিন্নসৌহৃদং ।
নলিনীং ক্ষতসেতুবন্ধনো
জলসংঘাত ইবামি বিদ্রুতঃ ॥

* * *

স্বর্গে মর্ত্যে সম্বন্ধ আছে । সেই সম্বন্ধ^{টি} অখি-
বার নিমিত্ত এই গ্রন্থের এইরূপ উৎসর্গ হইল ।

যেতু সৰ্ব্বাণি কৰ্ম্মাণি ময়ি সংন্যাস্য মৎপরাঃ
 অনন্যোনৈব যোগেন মাং ধ্যায়ন্ত উপাসতে ।
 তেষামহং সমুদ্বৰ্ত্তা মৃত্যুসংসারসাগরাৎ
 ভবামি ন চিরাৎ পার্থ ময্যাবেশিত চেতসাং ।
 মযোব মন আধৎস্ব ময়ি বুদ্ধিং নিবেশয় ०
 নিবসিষ্যসি মযোব অত উদ্ধং ন সংশয়ঃ ।
 অথ চিত্তং সমাধাতুং ন শক্ৰোষি ময়িস্থিরং
 অভ্যাসযোগেন ততো মামিচ্ছাপ্তং ধনঞ্জয় ।

শ্রীমদ্ভগবদ্গীতা । ১২ । অধ্যায় ।

বিজ্ঞাপন ।

বাঙ্গালীর স্ত্রী অনেক অবস্থাতেই বাঙ্গালীর
প্রধান সহায় । অনেক সময়ে নয় ।

সমাজবিপ্লব, অনেক সময়েই আত্মপীড়ন মাত্র ।
বিদ্রোহীরা আত্মঘাতী ।

ইংরেজেরা বাঙ্গালা দেশ অরাজকতা হইতে
উদ্ধার করিয়াছেন ।

এই সকল কথা এই গ্রন্থে বুঝান গেল ।

আনন্দ মঠ ।



উপক্রমণিকা ।

অতি বিস্তৃত অরণ্য । অরণ্যমধ্যে অধিকাংশ বৃক্ষই শাল, কিন্তু তন্মিত্তি আরও অনেকজাতীয় গাছ আছে । গাছের মাথায় মাথায় পাতায় পাতায় মিশামিশি হইয়া অনন্ত শ্রেণী চলিয়াছে । বিচ্ছেদশূন্য, ছিদ্রশূন্য, আলোকপ্রবেশের পথ-মাত্র শূন্য ; এইরূপ পল্লবের অনন্তসমুদ্র, ক্রোশের পর ক্রোশ, ক্রোশের পর ক্রোশ, পবনে তরঙ্গের উপরে তরঙ্গ বিক্ষিপ্ত করিতে করিতে চলিয়াছে । নীচে ঘনাক্ষর । মধ্যাহ্নেও আলোক অক্ষুট, ভয়ানক ! তাহার ভিতরে কখন মনুষ্য যায় না । পাতার অনন্ত মর্মর এবং বন্য পশুপক্ষীর রব ভিন্ন অন্য শব্দ তাহার ভিতর শুনা যায় না ।

একে এই বিস্তৃত অতি নিবিড় অন্ধতমসময় অরণ্য । তাহাতে রাত্রিকাল । রাত্রি দ্বিতীয় প্রহর । রাত্রি অতিশয় অন্ধকার । কাননের বাহিরেও অন্ধকার ; কিছু দেখা যায় না । কাননের ভিতরে তমোরাশি ভূগর্ভস্থ অন্ধকারের স্থায় ।

পশুপক্ষী একেবারে নিস্তব্ধ । কত লক্ষ লক্ষ কোটি কোটি পশু, পক্ষী, কীট, পতঙ্গ সেই অরণ্যমধ্যে বাস করে । কেহ কোন শব্দ করিতেছে না । বরং সে অন্ধকার অহভব

করা যায়—শব্দময়ী পৃথিবীর সে নিস্তরুভাব অনুভব করা
যাইতে পারে না ।

সেই অন্তঃশূন্য অরণ্যমধ্যে, সেই স্ফূর্তিভেদ্য অন্ধকারময়
নিশীথে, সেই অননুভবনীয় নিস্তরু মধ্যে শব্দ হইল,
“আমার মনস্কাম কি সিদ্ধ হইবে না ?”

শব্দ হইয়া আবার সে অরণ্যানী নিস্তরুে ডুবিয়া গেল ।
তখন কে বলিবে যে এ অরণ্যমধ্যে মনুষ্যশব্দ শুনা গিয়াছিল ?
কিছুকাল পরে আবার শব্দ হইল, আবার সেই নিস্তরু
মথিত করিয়া মনুষ্যকণ্ঠ ধ্বনিত হইল, “আমার মনস্কাম
কি সিদ্ধ হইবে না ?”

এইরূপ তিনবার সেই অন্ধকারসমুদ্র আলোড়িত হইল ।
তখন উত্তর হইল, “তোমার পণ কি ?”

প্রত্যুত্তরে বলিল, “পণ আমার জীবন সর্বস্ব ।”

প্রতিশব্দ হইল, “জীবন তুচ্ছ ; সকলেই ত্যাগ করিতে
পারে ।”

“আর কি আছে ? আর কি দিব ।”

তখন উত্তর হইল, “ভক্তি ।”

প্রথম খণ্ড ।



প্রথম পরিচ্ছেদ ।

১১৭৬ সালে গ্রীষ্মকালে একদিন পদচিহ্ন গ্রামে রৌদ্রের উত্তাপ বড় প্রবল। গ্রামথানি গৃহময়, কিন্তু লোক দেখি না। বাজারে সারি সারি দোকান, হাটে সারি সারি চালা, পল্লীতে পল্লীতে শত শত মৃগয় গৃহ, মধ্যে মধ্যে উচ্চ নীচ অট্টালিকা। আজ সব নীরব। বাজারে দোকান বন্ধ, দোকানদার কোথায় পলাইয়াছে ঠিকানা নাই। আজ হাটবার, হাটে হাট লাগে নাই। ভিক্ষার দিন, ভিক্ষকেরা বাহির হয় নাই। ওস্তবায় তাঁত বন্ধ করিয়া গৃহপ্রান্তে পড়িয়া কাঁদিতেছে, ব্যবসায়ী ব্যবসা ভুলিয়া শিশু ক্রোড়ে করিয়া কাঁদিতেছে, দাতারা দান বন্ধ করিয়াছে, অধ্যাপকে টোল বন্ধ করিয়াছে; শিশুও বুঝি আর সাহস করিয়া কাঁদে না। রাজপথে লোক দেখি না, সরোবরে স্নাতক দেখি না, গৃহদ্বারে মনুষ্য দেখি না, বৃক্ষে পক্ষী দেখি না, গোচারণে গোরু দেখি না, কেবল শ্মশানে শৃগাল কুকুর। এক বৃহৎ অট্টালিকা—স্নানঘর বড় বড় ছড়ওয়ালা থাম দূর হইতে দেখা যায়—সেই গৃহারণ্যমধ্যে শৈলশিখরবৎ শোভা পাইতেছিল। শোভাই বা কি, দ্বার রুদ্ধ, মনুষ্যসমাগমশূন্য, শব্দহীন, বায়ুপ্রবেশের পক্ষেও বিঘ্নময়। তাহার অভ্যন্তরে ঘরের ভিতর মধ্যাহ্নে অন্ধকার, অন্ধকারে নিশীথকুলকুসুমমৃগলবৎ এক দম্পতী বসিয়া ভাবিতেছে। তাহাদের সম্মুখে মনস্তর।

১১৭৪ সালে ফসল ভাল হয় নাই, স্মৃতরাং ১১৭৫ সালে চাল কিছু মহার্ঘ্য হইল—লোকেৱ ক্লেশ হইল, কিন্তু রাজা রাজস্ব কড়ায় গণ্ডায় বুঝিয়া লইল। রাজস্ব কড়ায় গণ্ডায় বুঝাইয়া দিয়া দরিদ্রেরা একসন্ধ্যা আহার করিল। ১১৭৫ সালে বর্ষাকালে বেশ বৃষ্টি হইল। লোকে ভাবিল, দেবতা বৃষ্টি রূপা করিলেন। আনন্দে আবার রাখাল মাঠে গান গাইল, কৃষক-পত্নী আবার রূপার টুপুটার জন্য স্বামীর কাছে দৌরাড্যা আরম্ভ করিল। অকস্মাৎ আশ্বিন মাসে দেবতা বিমুখ হইলেন। আশ্বিনে কার্তিকে বিন্দুমাত্র বৃষ্টি পড়িল না, মাঠে ধান্য সকল শুকাইয়া একেবারে খড় হইয়া গেল। যাহার ছুই এক কাহন ফলিয়াছিল, রাজপুত্রবেরা তাহা সিপাহীর জন্য কিনিয়া রাখিলেন। লোকে আর থাইতে পাইল না। প্রথমে একসন্ধ্যা উপবাস করিল, তার পর একসন্ধ্যা আধপেটা করিয়া থাইতে লাগিল, তার পরে দুই সন্ধ্যা উপবাস আরম্ভ করিল। যে কিছু চৈত্র ফসল হইল, কাহারও মুখে তাহা কুলাইল না। কিন্তু মহম্মদ রেজা খাঁ রাজস্ব আদায়ের কর্তা, একে দেশী তাহাতে মুসলমান, মনে করিল, আমি এই সময়ে সরফরাজ হইব। একেবারে শতকরা দশ টাকা রাজস্ব বাড়াইয়া দিল। বাঙ্গালার বড় কান্নার কোলাহল পড়িয়া গেল।

লোকে প্রথমে ভিক্ষা করিতে আরম্ভ করিল, তার পর, কে ভিক্ষা দেয়!—উপবাস করিতে আরম্ভ করিল। তার পরে রোগাক্রান্ত হইতে লাগিল। গোকুর বেচিল, লাঙ্গল জোয়াল বেচিল, বীজধান খাইয়া ফেলিল, ঘরবাড়ী বেচিল। জ্যোতজমা বেচিল। তার পর মেয়ে বেচিতে আরম্ভ করিল। তার পর ছেলে বেচিতে আরম্ভ করিল। তার পর স্ত্রী বেচিতে আরম্ভ করিল। তার পর মেয়ে, ছেলে, স্ত্রী কে কেনে? খরিদদার

মাই, সকলেই বেচিতে চায়। খাদ্যাভাবে গাছের পাতা খাইতে লাগিল, ঘাস খাইতে আরম্ভ করিল, আগাছা খাইতে লাগিল। ইতর ও বন্যেরা কুক্কুর, ইন্দুর, বিড়াল খাইতে লাগিল। অনেকে পলাইল, যাহারা পলাইল, তাহারা বিদেশে গিয়া অনাহারে মরিল। যাহারা পলাইল না, তাহারা অখাদ্য খাইয়া, না খাইয়া, রোগে পড়িয়া প্রাণত্যাগ করিতে লাগিল।

রোগ সময় পাইল, জ্বর, ওলাউঠা, ক্ষয়, বসন্ত। বিশেষতঃ বসন্তের বড় প্রাদুর্ভাব হইল। গৃহে গৃহে বসন্তে মরিতে লাগিল। কে কাহাকে জল দেয়, কে কাহাকে স্পর্শ করে। কেহ কাহার চিকিৎসা করে না; কেহ কাহাকে দেখে না; মরিলে কেহ ফেলে না। অতি রমণীয় বপু অট্টালিকামধ্যে আপনা আপনি পচে। যে গৃহে একবার বসন্ত প্রবেশ করে, সে গৃহবাসীরা রোগী ফেলিয়া ভয়ে পলায়।

মহেন্দ্র সিংহ পদচিহ্ন গ্রামে বড় ধনবান—কিন্তু আজ ধনী নির্ধনের এক দর। এই দুঃখপূর্ণকালে ব্যাধিগ্রস্ত হইয়া তাঁহার আত্মীয়স্বজন, দাসদাসী সকলেই গিয়াছে। কেহ মরিয়াছে, কেহ পলাইয়াছে। সেই বহু পরিবারमध्ये এখন তাঁহার ভাৰ্যা ও তিনি স্বয়ং আর এক শিশুকন্যা। তাহাদেরই কথা বলিতেছিলাম।

তাঁহার ভাৰ্যা কল্যাণী চিন্তা ত্যাগ করিয়া গো-শালে গিয়া স্বয়ং গো-দোহন করিলেন। পরে দুগ্ধ তণ্ড করিয়া, কন্যাকে খাওয়াইয়া, গোরকে ঘাস জল দিতে গেলেন। ফিরিয়া আসিলে মহেন্দ্র বলিল, “এরূপে কদিন চলিবে?”

কল্যাণী বলিল, “বড় অধিক দিন নয়। যতদিন চলে; আমি যতদিন পারি চালাই, তার পর তুমি মেয়েটী

লইয়া, নগরে * বাইও ।” নগরে মহেন্দ্রের পিতৃস্বা বাস করেন ।

• মহেন্দ্র । নগরে যদি বাইতে হয়, তবে, তোমায় বা কেন এত ছুঃখ দিই । চল না এখনই যাই ।

পরে দুইজনে অনেক তর্ক বিতর্ক হইল ।

ক । নগরে গেলে কিছু বিশেষ উপকার হইবে ।

• ন । সেস্থান হয় ত এমনি জনশূন্য, প্রাণরক্ষার উপায়শূন্য হইয়াছে ।

ক । যদি তাহাই হইয়া থাকে, তবে মুরশিদাবাদ, কাশিম-বাজার বা কলিকাতার গেলে প্রাণরক্ষা হইতে পারিবে । এস্থান ত্যাগ করা সকল প্রকারে কর্তব্য ।

• মহেন্দ্র বলিল, “এই বাড়ী বহুকাল হইতে পুরুষানুক্রমে সঞ্চিত ধনে পরিপূর্ণ; ইহা যে সব চোরে লুণ্ঠিয়া লইবে ।”

ক । লুণ্ঠিতে আসিলে আমরা কি দুইজনে রাখিতে পারিব ? প্রাণে না বাঁচিলে ধন ভোগ করিবে কে ? চল, এখনও বন্ধ সন্দ করিয়া যাই । যদি প্রাণে বাঁচি ফিরিয়া আনিয়া ভোগ করিব । মহেন্দ্র জিজ্ঞাসা করিলেন, “তুমি পথ হাঁটিতে পারিবে কি ? বেহারা ত সব মরিয়া গিয়াছে, গোরু আছে ত গাড়েয়ান নাই, গাড়েয়ান আছে ত গোরু নাই ।”

ক । আমি পথ হাঁটিব, তুমি চিন্তা করিও না ।

• কল্যাণী মনে মনে স্থির করিলেন যে, না হয় খুঁথে মরিয়া পড়িয়া থাকিব, তবু ত ইহারা দুইজন বাঁচিবে ।

• পরদিন প্রভাতে দুইজনে কিছু অর্থ সঙ্গে লইয়া, ঘরদ্বারের চাবি বন্ধ করিয়া, গোরুগুলি ছাড়িয়া দিয়া, কন্যাটিকে কোলে

• নগর বা রাজনগর—সাবেক বীরভূম রাজ্যের রাজধানী ।

লইয়া, রাজধানীর উদ্দেশে যাত্রা করিলেন। যাত্রাকালে মহেন্দ্র বলিলেন, “পথ অতি দুর্গম। পায়ে পায়ে ডাকাত, লুঠেড়া ফিরিতেছে। শুধু হাতে যাওয়া উচিত নয়।” এই বলিয়া মহেন্দ্র গৃহে ফিরিয়া আসিয়া বন্দুক, গুলি, বাক্স লইয়া গেলেন।

দেখিয়া কল্যাণী বলিলেন, “যদি অস্ত্রের কথা মনে করিলে, তবে তুমি একবার স্কুয়ারীকে ধর। আমিও হাতিয়ার লইয়া আসিব।” এই বলিয়া কল্যাণী কন্যাকে মহেন্দ্রের কোলে দিয়া গৃহমধ্যে প্রবেশ করিলেন।

মহেন্দ্র বলিলেন, “তুমি আবার কি হাতিয়ার লইবে?” এই বলিয়া মহেন্দ্র তাহার পাছু পাছু গৃহপ্রবেশ করিলেন। আসিয়া দেখিলেন, কল্যাণী একখানা রূপাবাঁধা ছোরা কোথা হইতে বাহির করিয়া আবার তাহা রাখিল। বলিল, “এ অস্ত্র স্ত্রী-জাতির নয়।” এই বলিয়া আর কি খুঁজিতে লাগিল।

মহেন্দ্র বলিল, “আবার কি?”

কল্যাণী বলিল, “কিছু না।” এই বলিয়া কল্যাণী একটা বিবের ক্ষুদ্র কোঁটা বস্ত্রমধ্যে লুকাইল। ছুঃখের দিনে কবে কপালে কি হয় বলিয়া কল্যাণী পূর্বেই বিষ সংগ্রহ করিয়া রাখিয়াছিলেন।

জ্যৈষ্ঠ মাস, দারুণ রোদ্র, পৃথিবী অগ্নিময়, বায়ুতে অগ্নিশূন্য ছড়াইতেছে, আকাশ তপ্ত তামার চাঁদোয়ার মত, পথের ধূলিসকল অগ্নিস্ফুলিঙ্গবৎ। কল্যাণী ঘামিতে লাগিল, কখনও বাবলা গাছের ছায়ায়, কখনও খেজুরগাছের ছায়ায় বসিয়া বসিয়া, শুষ্ক পুষ্করিণীর কর্দমময় জল পান করিয়া কত কষ্টে পথ চলিতে লাগিল। মেয়েটী মহেন্দ্রের কোলে—এক একবার মহেন্দ্র মেয়েকে বাতাস দেয়। একবার এক নিবিড় শ্যামল-পত্ররঞ্জিত সুগন্ধ কুম্ভমসংযুক্ত লতাবেষ্টিত বৃহৎ বৃক্ষের ছায়ায়

বসিয়া ছইজনে বিশ্রাম করিল। মহেন্দ্র কল্যাণীর শ্রমসহি-
স্তুতা দেখিয়া বিস্মিত হইলেন। বস্ত্র ভিজাইয়া মহেন্দ্র নিকটস্থ
পুলুল হইতে জল আনিয়া আপনার ও কল্যাণীর মুখে, হস্তে,
পদে, কপালে জলসেক করিলেন।

কল্যাণী কিঞ্চিৎ স্নিগ্ধ হইলেন বটে, কিন্তু ছইজনে ক্ষুধায়
বড় আকুল হইলেন। তাও সহ্য হয়—মেয়েটির ক্ষুধা তৃষ্ণা
সহ্য হয় না। অতএব আবার তাঁহারা পথ বাহিয়া চলিলেন।
সেই অগ্নিতরঙ্গ সন্তরণ করিয়া সন্ধ্যার পূর্বে এক চটীতে
পৌঁছিলেন। মহেন্দ্রের মনে মনে বড় আশা ছিল, চটীতে
গিয়া স্ত্রী কন্যার মুখে শীতল জল দিতে পারিবেন, প্রাণ
রক্ষার জন্য মুখে আহার দিতে পারিবেন। কিন্তু কই ? চটীতে
ত নুহা নাই ! বড় বড় ঘর পড়িয়া আছে, মানুষসকল
পলাইয়াছে। মহেন্দ্র ইতস্ততঃ নিরীক্ষণ করিয়া স্ত্রী কন্যাকে
একটা ঘরের ভিতর শোয়াইলেন। বাহির হইয়া উঠেঃস্বরে
ডাক হাঁক করিতে লাগিলেন। কাহারও উত্তর পাইলেন
না। তখন মহেন্দ্র কল্যাণীকে বলিলেন, একটু তুমি সাহস
করিয়া একা থাক, দেশে যদি গাই থাকে, শ্রীকৃষ্ণ দয়া করুন,
আমি ছুধ আনিব। এই বলিয়া একটা মাটির কলসী হাতে
করিয়া মহেন্দ্র নিষ্ক্রান্ত হইলেন। কলসী অনেক পড়িয়াছিল।

দ্বিতীয় পরিচ্ছেদ ।

• মহেন্দ্র চলিয়া গেল। কল্যাণী একা বালিকা লইয়া সেই
জন্মশূন্যস্থানে প্রায়-অন্ধকার কুটারমধ্যে চারিদিক্ নিরীক্ষণ
করিতেছিলেন। তাঁহার মনে মনে বড় ভয় হইতেছিল। কেহ
কোথাও নাই, নুহামাত্রের কোন শব্দ পাওয়া যায় না, কেবল

শুগল কুকুরের রব । ভাবিতেছিলেন, কেন তাঁহাকে বাইতে দিলাম, না হয় আর কিছুক্ষণ ক্ষুধা তৃষ্ণা সহ্য করিতাম । মনে করিলেন চারিদিকের দ্বার রুদ্ধ করিয়া বসি । কিন্তু একটা দ্বারেও কপাট বা অর্গল নাই । এইরূপ চারিদিক চাহিয়া দেখিতে দেখিতে সম্মুখস্থ দ্বারে একটা কি ছায়ার মত দেখিলেন । মনুষ্যাকৃতি বোধ হয়, কিন্তু মনুষ্যও বোধ হয় না । অতিশয় শুক, শীর্ণ, অতিশয় কৃষ্ণবর্ণ, উলঙ্গ, বিকটাকার মনুষ্যের মত কি আসিয়া দ্বারে দাঁড়াইল । কিছুক্ষণ পরে সেই ছায়া যেন একটা হাত তুলিল, অস্থিচর্খাবশিষ্ট, অতি দীর্ঘ, শুক হস্তের দীর্ঘ শুক অঙ্গুলি দ্বারা কাহাকে যেন মঞ্চত করিয়া ডাকিল । কল্যাণীর প্রাণ শুকাইল । তখন সেইরূপ আর একটা ছায়া—শুক, কৃষ্ণবর্ণ, দীর্ঘাকার, উলঙ্গ,—প্রথম ছায়ার পাশে আসিয়া দাঁড়াইল । তার পর আর একটা আসিল । তার পর আরও একটা আসিল । কত আসিল । ধীরে ধীরে নিঃশব্দে তাহারা গৃহমধ্যে প্রবেশ করিতে লাগিল । সেই প্রায়-অন্ধকার গৃহ নিশীথ শ্মশানের মত ভয়ঙ্কর হইয়া উঠিল । তখন সেই প্রেতবৎ মূর্ত্তিসকল কল্যাণী এবং তাঁহার কন্যাকে ঘেরিয়া দাঁড়াইল । কল্যাণী প্রায় মূচ্ছিতা হইলেন । কৃষ্ণবর্ণ শীর্ণ পুরুষেরা তখন কল্যাণী এবং তাঁহার কন্যাকে ধরিয়া তুলিয়া, গৃহের বাহির করিয়া, মাঠ পার হইয়া এক জঙ্গলমধ্যে প্রবেশ করিল ।

কিছুক্ষণ পরে মহেন্দ্র কলসী করিয়া ছুটু লইয়া সেই খানে উপস্থিত হইল । দেখিল কেহ কোথাও নাই, ইতস্তত অনুসন্ধান করিল, কন্যার নাম ধরিয়া শেষ স্ত্রীর নাম ধরিয়া অনেক ডাকিল, কোন উত্তর, কোন সন্ধান পাইল না ।

তৃতীয় পরিচ্ছেদ ।

যে বনমধ্যে দস্যুরা কল্যাণীকে নামাইল সে বন অতি মনোহর। আলো নাই, শোভা দেখে এমন চক্ষুও নাই, দরিত্রের হৃদয়ান্তর্গত মৌল্যের ন্যায় সে বনের মৌল্য অদৃষ্ট রহিল। দেশে আহার থাকুক বা না থাকুক—বনে ফুল আছে, ফুলের গন্ধে সে অন্ধকারেও আলো বোধ হইতেছিল। মধ্যে পরিত্রস্ত অকোমলশস্যাবৃত ভূমিখণ্ডে দস্যুরা কল্যাণী ও তাহার কন্যাকে নামাইল। তাহারা তাহাদিগকে ঘেরিয়া বসিল। তখন তাহারা বাদ্যবাদ্য করিতে লাগিল যে ইহাদিগকে লইয়া কি করা যায়—যে কিছু অলঙ্কার কল্যাণীর সঙ্গে ছিল, তাহা পূর্বেই তাহারা হস্তগত করিয়াছিল। একদল তাহার বিভাগে ব্যতিব্যস্ত। অলঙ্কারগুলি বিভক্ত হইলে, একজন দস্তু বলিল, “আমরা সোণারূপা লইয়া কি করিব, একথানা গহনা লইয়া কেহ আমাকে একমুটা চাল দাও, ক্ষুধায় প্রাণ যায়—আজ কেবল গাছের পাতা খাইয়া আছি।” একজন এই কথা বলিলে সকলেই সেইরূপ বলিয়া গোল করিতে লাগিল। “চাল দাও”, “চাল দাও”, “ক্ষুধায় প্রাণ যায়, সোণারূপা চাহি না।” দলপতি তাহাদিগকে থামাইতে লাগিল, কিন্তু কেহ থামে না, ক্রমে উচ্চ উচ্চ কথা হইতে লাগিল, গালাগালি হইতে লাগিল, মারামারির উপক্রম। যে, যে অলঙ্কার ভাগে পাইয়াছিল, সে, সে অলঙ্কার রাগে তাহার দলপতির গায়ে ছুড়িয়া মারিল। দলপতি ছুই একজনকে মারিল, তখন সকলে দলপতিকে আক্রমণ করিয়া তাহাকে আঘাত করিতে লাগিল। দলপতি অনাহারে শীর্ণ এবং ক্লিষ্ট ছিল, ছুই এক

আধাতেই ভূপতিত হইয়া প্রাণত্যাগ করিল। তখন ক্ষুধিত, কষ্ট, উত্তেজিত, জ্ঞানশূন্য দস্যাদলের মধ্যে একজন বলিল, “শূগল কুকুরের মাংস খাইয়াছি, ক্ষুধায় প্রাণ যায়, এস ভাই, আজ এই বেটাকে খাই।” তখন সকলে “জয় কালি” বলিয়া উচ্চনাদ করিয়া উঠিল। “বম্ কালি! আজ নরমাংস খাইব! এই বলিয়া সেই বিশীর্ণদেহ কৃষ্ণকায় প্রেতবৎ মূর্ত্তিসকল অন্ধকারে খল খল হাস্য করিয়া, করতালি দিয়া নাচিতে আরম্ভ করিল। দলপতির দেহ পোড়াইবার জন্য একজন অগ্নি জ্বালিতে প্রবৃত্ত হইল। শুষ্ক লতা, কাষ্ঠ, তৃণ আহরণ করিয়া চক্ৰমকি সোলায় আগুন করিয়া, সেই তৃণকাষ্ঠ জ্বালিয়া দিল। তখন অগ্নি অগ্নি জ্বলিতে জ্বলিতে পার্শ্ববর্ত্তী আম্র, জম্বীর, পনস, তাল, তিস্তিড়ী, খর্জুর প্রভৃতির শ্যামল পল্লব-রাজি, অগ্নি অগ্নি প্রভাসিত হইতে লাগিল। কোথাও পাতা আলোতে জ্বলিতে লাগিল, কোথাও ঘাস উজ্জ্বল হইল। কোথাও অন্ধকার আরও গাঢ় হইল। অগ্নি প্রস্তুত হইলে, একজন মৃতশবের পা ধরিয়া টানিয়া আগুনে ফেলিতে গেল। তখন আর একজন বলিল, “রাখ ভাই রাখ, রও, রও, যদি মহামাংস খাইয়াই আজ প্রাণ রাখিতে হইবে, তবে এই বুড়ার শুকন মাংস কেন খাই? আজ যাহা লুটিয়া আনিয়াছি তাহাই খাইব; এস ঐ কচি মেয়েটাকে পোড়াইয়া খাই।” আর একজন বলিল, “যাহা হয় পোড়া বাপু, আর ক্ষুধা সয় না।” তখন সকলেই লোলুপ হইয়া যেখানে কল্যাণী কন্যা লইয়া গুইয়াছিল, সেই দিকে চাহিল। দেখিল যে, সেস্থান শূন্য, কন্যাও নাই, মাতাও নাই। দস্যাদিগের বিবাদে সমস্ত সন্ধ্যোগ দেখিয়া, কল্যাণী কন্যা কোলে করিয়া, কত্নার মুখে স্তনটি দিয়া, বনমুখে পলাইয়াছে।

শিকার পলইয়াছে দেখিয়া, মার মার শব্দ করিয়া, সেই
প্রেতমূর্তি দস্যাদল চারিদিকে ছুটিল। অবস্থাবিশেষে মনুষ্য
হিংস্র জন্তুমাত্র।

চতুর্থ পরিচ্ছেদ।

• বন অত্যন্ত অন্ধকার, কল্যাণী তাহার ভিতর পথ পায়
না। বৃক্ষলতাকণ্টকের ঘনবিশ্রাসে একে পথ নাই, তাহাতে
আবার ঘনান্ধকার। বৃক্ষলতাকণ্টক ভেদ করিয়া কল্যাণী
বনমধ্যে প্রবেশ করিতে লাগিল। মেয়েটার গায়ে কাঁটা
ফুটিতে লাগিল, মেয়েটি মধ্যে মধ্যে কাঁদিতে লাগিল, শুনিয়া
দস্যুরা আরও চীৎকার করিতে লাগিল। কল্যাণী এইরূপে
কুধিরাক্তকলেবর হইয়া অনেকদূর বনমধ্যে প্রবেশ করিলেন।
কিয়ৎক্ষণ পরে চন্দ্রোদয় হইল। এতক্ষণ কল্যাণীর মনে
কিছু ভরসা ছিল যে, অন্ধকারে তাঁহাকে দস্যুরা দেখিতে
পাইবে না, কিয়ৎক্ষণ খুঁজিয়া নিরস্ত হইবে; কিন্তু এক্ষণে
চন্দ্রোদয় হওয়ায়, সে ভরসা গেল। চাঁদ আকাশে উঠিয়া
বনের মাথার উপর আলো ঢালিয়া দিল—ভিতরে বনের
অন্ধকার, আলোতে ভিজিয়া উঠিল। অন্ধকার উজ্জ্বল হইল।
মাঝে মাঝে ছিদ্দের ভিতর দিয়া, আলো বনের ভিতর
প্রবেশ করিয়া, উঁকিঝুঁকি মারিতে লাগিল। চাঁদ যত
উঁচুতে উঠিতে লাগিল, তত আরও আলো বনে ঢুকিতে
লাগিল, অন্ধকার সকল আরও বনের ভিতর লুকাইতে
লাগিল। কল্যাণী কত্না লইয়া আরও বনের ভিতর
লুকাইতে লাগিল। তখন দস্যুরা আরও চীৎকার করিয়া

চারিদিক্ হইতে ছুটিয়া আসিতে লাগিল—কথাটি ভয় পাইয়া আরও চীৎকার করিয়া কাদিতে লাগিল । কল্যাণী তখন নিরস্ত হইয়া আর পলায়নের চেষ্টা করিলেন না । এক বৃহৎ বৃক্ষতলে কণ্টকশূন্য তৃণময়স্থানে বসিয়া কথাকে ক্রোড়ে করিয়া কেবল ডাকিতে লাগিলেন, “কোথায় তুমি ! বাঁহাকে আমি নিত্য পূজা করি, নিত্য নমস্কার করি, বাঁহার ভরসায় এই বনমধ্যেও প্রবেশ করিতে পারিয়াছিলাম, কোথায় তুমি হে মধুসূদন !” সেই সময়ে ভয়ে, ভক্তির প্রগাঢ়তায়, ক্ষুধা তৃষ্ণার অবসাদে, কল্যাণী ক্রমে বাহুজ্ঞানশূন্য, আভ্যন্তরিক চৈতন্যময় হইয়া শুনিতে লাগিলেন, অন্তরীক্ষে স্বর্গীয় স্বরে গীত হইতেছে—

“হরে মুরারে মধুকৈটভারে

গোপাল গোবিন্দ মুকুন্দ সৌরে

হরে মুরারে মধুকৈটভারে ।”

কল্যাণী বাল্যকালাবধি পুরাণে শুনিয়াছিলেন, যে দেবর্ষি গগনপথে বীণাযন্ত্রে হরিনাম করিতে করিতে ভুবন ভ্রমণ করিয়া থাকেন ; তাঁহার মনে সেই কল্পনা জাগরিত হইতে লাগিল । মনে মনে দেখিতে লাগিলেন, শুভ্রশরীর, শুভ্রকেশ, শুভ্রশ্রী, শুভ্রবসন, মহাশরীর, মহামুনি বীণাযন্ত্রে চন্দ্রালোকপ্রদীপ্ত নীলাকাশপথে গাইতেছেন,

“হরে মুরারে মধুকৈটভারে ।”

ক্রমে গীত নিকটবর্তী হইতে লাগিল, আরও স্পষ্ট শুনিতে লাগিলেন, “হরে মুরারে মধুকৈটভারে” ক্রমে আরও নিকট—
আরও স্পষ্ট—

“হরে মুরারে মধুকৈটভারে ।”

শেষে কল্যাণীর মাথার উপর বনস্থলী প্রতিধ্বনিত করিয়া

• গীত বাজিল,

“ হরে মুরারে মধুকৈটভারে । ”

কল্যাণী তখন নয়নোন্মীলন করিলেন । সেই অর্দ্ধক্ষুট বনাক্কারবিমিশ্র চন্দ্ররশ্মিতে দেখিলেন, সম্মুখে সেই শুভ্রশরীর, শুভ্রকেশ, শুভ্রশ্রী, শুভ্রবসন, ঋষিমূর্তি ! অন্যমনে তথাভূত-চেতনে কল্যাণী মনে করিলেন প্রণাম করিব, কিন্তু প্রণাম করিতে পারিলেন না, মাথা নোয়াইতে একেবারে চেতনাশূন্য হইয়া ভূতলশায়িনী হইলেন ।

পঞ্চম পরিচ্ছেদ ।

সেই বনমধ্যে এক প্রকাণ্ড ভূমিখণ্ডে ভগ্নশিলাখণ্ড সকলে পরিবেষ্টিত হইয়া একটা বৃহৎ মঠ আছে । পুরাণতত্ত্ববিদেরা দেখিলে বলিতে পারিতেন, ইহা পূর্বকালে বৌদ্ধদিগের বিহার ছিল—তার পরে হিন্দুর মঠ হইয়াছে । অট্টালিকাশ্রেণী দ্বিতল—মধ্যে বহুবিধ দেবমন্দির এবং সম্মুখে নাট্যমন্দির । সকলই প্রায় প্রাচীরে বেষ্টিত আর বহিঃস্থিত বন্যাবৃক্ষশ্রেণী দ্বারা একপা আচ্ছন্ন যে দিনমানে অনতিদূর হইতেও কেহ বুঝিতে পারে না যে এখানে কোঠা আছে । অট্টালিকা সকল অনেক স্থানেই ভগ্ন কিন্তু দিনমানে দেখা যায় যে সকল স্থান সম্প্রতি মেরামত হইয়াছে । দেখিলেই জানা যায় যে, এই গভীর দুর্ভেদ্য অরণ্য-মধ্যে মনুষ্য বাস করে । এই মঠের একটি কুঠারী মধ্যে একটা বড় কুঁদো জুলিতেছিল, তাহার ভিতর কল্যাণীর প্রথম চৈতন্য হইলে দেখিলেন, সম্মুখে সেই শুভ্রশরীর, শুভ্রবসন মহাপুরুষ । কল্যাণী বিস্মিতলোচনে আবার চাহিতে লাগিলেন, এখনও স্মৃতি পুনরাগমন করিতেছিল না । তখন মহাপুরুষ বলিলেন,

“মা, এ দেবতার ঠাই, শঙ্কা করিও না। একটু দুধ আছে তুমি খাও তার পর তোমার সহিত কথা কহিব।”

কল্যাণী প্রথমে কিছুই বুঝিতে পারিলেন না, তার পর ক্রমে ক্রমে মনের কিছু স্তৈর্য্য হইলে, গলায় আঁচল দিয়া তাঁহাকে একটি প্রণাম করিলেন। তিনি স্তম্ভল আশীর্বাদ করিয়া গৃহান্তর হইতে একটি স্বর্ণক মুণ্ডপাত্র বাহির করিয়া সেই জ্বলন্ত অগ্নিতে দুধ উত্তপ্ত করিলেন। দুধ তপ্ত হইলে কল্যাণীকে তাহা দিয়া বলিলেন,

“মা, কন্যাকে কিছু খাওয়াও আপনি কিছু খাও, তাহার পর কথা কহিব।” কল্যাণী হৃষ্টচিত্তে কন্যাকে দুধপান করাইতে আরম্ভ করিলেন। তখন সেই পুরুষ “আমি যতক্ষণ না আসি, কোন চিন্তা করিও না।” বলিয়া মন্দির হইতে বাহিরে গেলেন। বাহির হইতে কিয়ৎকাল পরে ফিরিয়া আসিয়া দেখিলেন যে, কল্যাণী কন্যাকে দুধ খাওয়ান সমাপন করিয়াছেন বটে, কিন্তু আপনি কিছু খান নাই; দুধ যেমন ছিল প্রায় তেমনই আছে, অতি অল্পই ব্যয় হইয়াছে। সেই পুরুষ তখন বলিলেন “মা তুমি দুধ খাও নাই, আমি আবার বাহিরে যাইতেছি, তুমি দুধ না খাইলে ফিরিব না।”

সেই ক্ষণিক পুরুষ এই বলিয়া বাহিরে যাইতেছিলেন, কল্যাণী আবার তাঁহাকে প্রণাম করিয়া যোড়হাত করিলেন—

বনবাসী বলিলেন, “কি বলিবে?”

তখন কল্যাণী বলিলেন, “আমাকে দুধ খাইতে আজ্ঞা করিবেন না—কোন বাধা আছে, আমি খাইব না।”

তখন বনবাসী অতি করুণস্বরে বলিলেন, “কি বাধা আছে, আমাকে বল—আমি বনবাসী ব্রহ্মচারী, তুমি আমার কন্যা, তোমার এমনকি কথা আছে যে, আমাকে বলিবে না।

আমি যখন বন হইতে তোমাকে অজ্ঞান অবস্থায় তুলিয়া আনি, তৎকালে তোমাকে অত্যন্ত ক্ষুৎপিপাসাপীড়িতা বোধ হইয়াছিল, তুমি না খাইলে বাঁচিবে কি প্রকারে ? ”

কল্যাণী তখন গলদশ্ফলোচনে বলিলেন, “আপনি দেবতা, আপনাকে বলিব—আমার স্বামী এ পর্য্যন্ত অভুক্ত আছেন, তাঁহার সাক্ষাৎ না পাইলে, কিম্বা তাঁহার ভোজনসম্বাদ না শুনিলে, আমি কি প্রকারে খাইব ? ”

ব্রহ্মচারী স্খিজ্ঞাসা করিলেন, “তোমার স্বামী কোথায় ? ”

কল্যাণী বলিলেন, “তাহা আমি জানি না—তিনি হৃৎকের সন্ধানে বাহির হইলে পর দস্যুরা আমাকে চুরি করিয়া লইয়া আসিয়াছে।” তখন ব্রহ্মচারী একটি একটি করিয়া প্রশ্ন করিয়া কল্যাণী এবং তাঁহার স্বামীর বৃত্তান্ত সমুদয় অবগত হইলেন। কল্যাণী স্বামীর নাম বলিলেন না, বলিতে পারেন না, কিন্তু আর আর পরিচয়ের পরে ব্রহ্মচারী বুঝিলেন। স্খিজ্ঞাসা করিলেন, “তুমিই মহেন্দ্রের পত্নী ? ” কল্যাণী নিরন্তর হইয়া যে অগ্নিতে হৃৎক তপ্ত হইয়াছিল, অবনতমুখে তাহাতে কাষ্ঠ প্রদান করিলেন। তখন ব্রহ্মচারী বলিলেন, “তুমি আমার বাক্য পালন কর, হৃৎক পান কর, আমি তোমার স্বামীর সংবাদ আনিতেছি তুমি হৃৎক না খাইলে আমি ঘাইব না।” কল্যাণী বলিলেন, “একটু জল এখানে আছে কি ? ” ব্রহ্মচারী জলকুলস দেখাইয়া দিলেন। কল্যাণী অঞ্জলি পাতিলেন, ব্রহ্মচারী অঞ্জলি পুরিয়া জল ঢালিয়া দিলেন। কল্যাণী সেই জলাঞ্জলি ব্রহ্মচারীর পদমূলে লইয়া গিয়া বলিলেন, “আপনি ইহাতে পদরেণু দিন।” ব্রহ্মচারী অঙ্গুষ্ঠের দ্বারা জল স্পর্শ করিলে কল্যাণী সেই জলাঞ্জলি পান করিলেন এবং বলিলেন “আমি অমৃত পান করিয়াছি—আর কিছু খাইতে বলিবেন না—স্বামীর

সংবাদ না পাইলে আর কিছু খাইব না ।” ব্রহ্মচারী তখন বলিলেন, “তুমি নির্ভয়ে এই দেউল মধ্যে অবস্থিতি কর, আমি তোমার স্বামীর সন্ধানে চলিলাম ।”

যষ্ঠ পরিচ্ছেদ ।

রাত্রি অনেক । চাঁদ মাথার উপর, পূর্ণচন্দ্র নহে, আলো তত প্রথর নহে । এক অতি দিস্তীর্ণ প্রান্তরের উপর সেই অন্ধকারের ছায়াবিশিষ্ট অম্পষ্ট আলো পড়িয়াছে । সে আলোকে মাঠের এপার ওপার দেখা যাইতেছে না, মাঠে কি আছে, কে আছে দেখা যাইতেছে না । মাঠ যেন অনন্ত, জন-শূন্য, ভয়ের আবাসস্থান বলিয়া বোধ হইতেছে । সেই মাঠ দিয়া মুরসিদাবাদ যাইবার রাস্তা । রাস্তার ধারে একটি ক্ষুদ্র পাহাড় । পাহাড়ের উপর অনেক আশ্রাদি বৃক্ষ । গাছের মাথা সকল, চাঁদের আলোতে উজ্জ্বল হইয়া সর্বসর্ব করিয়া কাঁপিতেছে । তাহার ছায়া কালো পাথরের উপর কালো হইয়া তর্তুর্ করিয়া কাঁপিতেছে । ব্রহ্মচারী সেই পাহাড়ের উপর উঠিয়া শিখরে দাঁড়াইয়া শুদ্ধ হইয়া শুনিতে লাগিলেন—কি শুনিতে “লাগিলেন বলিতে পারি না । সেই অনন্ততুল্য প্রান্তরেও কোন শব্দ নাই—কেবল বৃক্ষাদির মর্ম্মরশব্দ । একস্থানে পাহাড়ের মূলের নিকটে বড় জঙ্গল । উপরে পাহাড়, নীচে রাজপুথ, মধ্যে সেই জঙ্গল । সেখানে কি শব্দ হইল বলিতে পারি না—ব্রহ্মচারী সেই দিকে গেলেন । নিবিড় জঙ্গল মধ্যে প্রবেশ করিলেন, দেখিলেন, সেই বন মধ্যে বৃক্ষরাজির অন্ধকারতল-দেশে সারি সারি সারি গাছের নীচে মানুষ বসিয়া আছে ।

তাহার স্ত্রী কন্যাকে উদ্ধার করিয়াছি। এখন তাহাদিগকে মঠে রাখিয়া আসিয়াছি। এখন তোমার উপর ভার যে মহেন্দ্রকে খুঁজিয়া তাহার স্ত্রী কন্যা তাহার জিন্মা করিয়া দেও। এখানে জীবানন্দ থাকিলে কার্যোদ্ধার হইবে।”

ভবানন্দ স্বীকৃত হইল। ব্রহ্মচারী তখন স্থানান্তরে গেলেন।

সপ্তম পরিচ্ছেদ ।

চটীতে বসিয়া ভাবিয়া কোন ফলোদয় হইবে না বিবেচনা করিয়া মহেন্দ্র গাত্রোথান করিলেন। রাজনগরে গিয়া রাজপুরুষদিগের সহায়তায় স্ত্রী কন্যার অনুসন্ধান করিবেন এই বিবেচনায় সেই দিকেই চলিলেন। কিছু দূর গিয়া পশ্চিমধ্যে দেখিলেন, কতকগুলি গোবর গাড়ী ঘেরিয়া অনেকগুলি সিপাহী চলিয়াছে। “রাজনগর, বা নগর” কি তাহা বুঝাইতে হইতেছে।

১১৭৬ সালে বীরভূম প্রভৃতি প্রদেশ ইংরেজের শাসনাধীন হইয়াও হয় নাই। ইংরেজ তখন বাঙ্গালার দেওয়ান। তাহারা খাজনার টাকা আদায় করিয়া লন, কিন্তু তখনও প্রাণ সম্পত্তি প্রভৃতি রক্ষণাবেক্ষণের কোন ভার লয়েন নাই। তখনও টাকা লইবার ভার ইংরেজের, আর প্রাণ সম্পত্তি রক্ষণাবেক্ষণের ভার পাগিষ্ঠ নরাদম, বিশ্বাসহস্তা মজুমদারকুলকলক মীরজাফরের উপর। মীরজাফর আয়রফার অফিস, বাঙ্গালা রক্ষা করিবে কি প্রকারে। মীরজাফর গুলি খায় ও ঘুমায়ে।

ইংরেজ টাকা আদায় করে ও ডেস্‌পাচ্‌ লেখে। বাঙ্গালি কান্দে আর উৎসন্ন যায়।

বাঙ্গালার পক্ষে সাধারণ নিয়ম এই। কিন্তু বীরভূম প্রভৃতি প্রদেশ সম্বন্ধে একটু স্বতন্ত্র বন্দোবস্ত ছিল। বীরভূম প্রদেশ বীরভূমের রাজার অধীনে। রাজনগর বা নগর—তাহারই রাজধানী। বীরভূমের রাজারা পূর্বে স্বাধীন ছিলেন, সম্প্রতি মুরশিদাবাদের অধীন হইয়াছিলেন। পূর্বে বীরভূম হিন্দুরাই স্বাধীন রাজা ছিলেন। কিন্তু আধুনিক রাজবংশ মুসলমান। যে সময়ের কথা লিখিতেছি, তাহার পূর্বে রাজা আলিনকি খাঁ বাহাজুর সিরাজ উদ্দৌলার সহায়তায় কিছু লম্বাই চৌড়াই করিয়া কলিকাতা লুটিয়া অসিয়াছিলেন। তার পর ক্লাইবের পাজুকাম্পর্শে মুসলমানজন্ম সার্থক করিয়া, বেহেশ্তে যাত্রা করিবার উন্মুখ হইয়াছিলেন। বাঙ্গালার অন্যান্য অংশের ন্যায় বীরভূমের কর ইংরেজের প্রাপ্য। কিন্তু শাসনের ভার বীরভূমের রাজার উপর। যেখানে যেখানে ইংরেজেরা আপনাদিগের প্রাপ্য কর আপনারা আদায় করিতেন, সেখানে তাঁহারা এক এক কালেক্টার নিযুক্ত করিয়াছিলেন। কিন্তু বীরভূম প্রদেশে এ পর্য্যন্তও কালেক্টার নিযুক্ত হয় নাই। রাজাই ইংরেজের কর আদায় করিয়া কলিকাতায় পাঠাইয়া দিতেন।

অতএব বীরভূমের খাজনা কলিকাতায় যায়। লোক না প্লাইয়া মজুক, খাজনা আদায় বন্ধ হয় না। তবে তত আদায় হইয়া উঠে নাই—কেন না মাতা বজ্রমতী ধন প্রসব না করিলে ধন কেহ গড়িতে পারে না। যাহা হুউক, বাহা কিছু আদায় হইয়াছে, তাহা গাড়ী বোঝাই হইয়া সিপাহীর পাহারায় কলিকাতায় কোম্পানির ধনাগারে যাইতেছিল। আজিকার দিনে

দহ্যভীতি অতিশয় প্রবল, এজন্য পঞ্চাশ জন সশস্ত্র সিপাহী গাড়ীর অগ্রপশ্চাৎ শ্রেণীবদ্ধ হইয়া সঙ্গীন খাড়া করিয়া যাইতে ছিল। তাহাদিগের অধ্যক্ষ একজন গোরা। সে কোম্পানীর চাকর নহে। দেশীয় রাজগণের সৈন্যগণমধ্যে তখন অনেক গোরা অধ্যক্ষতা করিত। গোরা সর্বপশ্চাৎ ঘোড়ায় চড়িয়া চলিয়াছিল। রৌদ্রের জন্য দিনে সিপাহীরা পথ চলে না, রাত্রে চলে। চলিতে চলিতে সেই খাজনার গাড়ী ও সৈন্য সামন্তে মহেন্দ্রের গতিরোধ হইল। মহেন্দ্র সিপাহী ও গোলন্দাজ গাড়ী কর্তৃক পথরুদ্ধ দেখিয়া, পাশ দিয়া দাঁড়াইলেন। তথাপি সিপাহীরা তাহার গা ঘেসিয়া যায়—দেখিয়া, এবং এ বিবাদে সময় নয় বিবেচনা করিয়া, তিনি পথপার্শ্বস্থ জঙ্গলের ধারে গিয়া দাঁড়াইলেন।

তখন একজন সিপাহী বলিল, “এহি একঠো ডাকু ভাগতা হ্যায়।” মহেন্দ্রের হাতে বন্দুক দেখিয়া এ বিশ্বাস তাহার দৃঢ় হইল। সে তাড়াইয়া গিয়া মহেন্দ্রের গলা ধরিল। এবং “শালা—চোর—” বলিয়াই সহসা এক ঘুষা মারিল, ও বন্দুক কাড়িয়া লইল। মহেন্দ্র রিক্ত হস্তে কেবল ঘুষাটি ফিরাইয়া মারিল। মহেন্দ্রের একটু রাগ যে বেশী হইয়াছিল তাহা বলা বাহুল্য। ঘুষাটি খাইয়া সিপাহী মহাশয় ঘুরিয়া অচেতন হইয়া রাস্তায় পড়িলেন। তখন তিন চারি জন সিপাহী আসিয়া মহেন্দ্রকে ধরিয়া জোরে টানিয়া সেনাপতি সাহেবের নিকট লইয়া গেল, এবং সাহেবকে বলিল যে, এই ব্যক্তি একজন সিপাহীকে খুন করিয়াছে। সাহেব পাইপ খাইতেছিলেন, মদের ঝোঁকে একটুখানি বিহ্বল ছিলেন, বলিলেন, “শালাকে পাকড়লেকে সাদি করো।” সিপাহীরা বুঝিতে পারিল না যে, বন্দুকধারী ডাকাতকে তাহার কিপ্ৰকারে ধিবাছ করিবে। কিন্তু

নেশা ছুটিলে মাহেবের মত ফিরিবে, বিবাহ করিতে হইবে না, বিবেচনায় তিন চারিজন সিপাহী গাড়ীর গোরুর দড়ি ধিয়া মহেন্দ্রকে হাতে পায়ে বাঁধিয়া গোরুর গাড়ীতে তুলিল। মহেন্দ্র দেখিলেন, এত লোকের সঙ্গে জোর করা বুঝা, জোর করিয়া মুক্তিলাভ করিয়াই বা কি হইবে। স্ত্রী কন্যার শোকে তখন মহেন্দ্র কাতর, বাঁচিবার কোন ইচ্ছা ছিল না। সিপাহীরা মহেন্দ্রকে উত্তম করিয়া গাড়ীর চাকার সঙ্গে বাঁধিল। পরে সিপাহীরা খাজানা লইয়া যেমন চলিতেছিল, তেমনি মৃদুগন্তীরপদে চলিল।

অফিম পরিচ্ছেদ ।

ব্রহ্মচারীর আঞ্জা পাইয়া ভবানন্দ মৃদু মৃদু हरिनाम করিতে করিতে, যে চটীতে মহেন্দ্র বসিয়াছিল, সেই চটীর দিকে চলিলেন। সেইখানেই মহেন্দ্রের সন্ধান পাওয়া সম্ভব বিবেচনা করিলেন।

পাঠক এইস্থানে দিগ্ভিরূপণ করুন। সে সময়ে ইংরেজের কৃত আধুনিক রাস্তা সকল ছিল না। রাজনগর হইতে কলিকাতায় আসিতে হইলে, মুসলমান সম্রাটনির্দ্ভিত অপূর্ব বস্ত্র দিয়া আসিতে হইত। মহেন্দ্রও পদচিহ্ন হইতে রাজনগর যাইতে দক্ষিণ হইতে উত্তর দিকে যাইতে ছিলেন। এইজন্য পথে সিপাহীদিগের সঙ্গে তাঁহার সাক্ষাৎ হইয়াছিল। ভবানন্দ তালপাহাড় হইতে যে চটীর দিকে চলিলেন, সেও দক্ষিণ হইতে উত্তর। যাইতে যাইতে কাজে কাজেই অতিরিক্ত ধনরক্ষাকারী সিপাহীদিগের সহিত সাক্ষাৎ হইল। তিনিও মহেন্দ্রের ন্যায় সিপাহীদিগকে

পাশ দিলেন । একে সিপাহী দিগের সহজেই বিশ্বাস ছিল, যে এই চালান লুঠ করিবার জন্য ডাকাইতেরা অবশ্য চেষ্টা করিবে, তাতে আবার পথমধ্যে একজন ডাকাইতকে গ্রেপ্তার করিয়াছে । কাজে কাজেই ভবানন্দকে আবার রাত্রিকালে পথে পাশ দিতে দেখিয়াই তাহাদিগের বিশ্বাস হইল, যে এও আর একজন ডাকাত । অতএব সিপাহীরা তৎক্ষণাৎ তাহাকেও ধৃত করিল ।

ভবানন্দ মুখ হাসিয়া বলিলেন, “কেন বাপু ।”

সিপাহী বলিল, “তোম শালা ডাকু হো ।”

ভবা । দেখিতে পাইতেছ, গেরুয়াবসন পরা ব্রহ্মচারী আমি । ডাকাত কি এই রকম ।

সিপাহী । অনেক শালা ব্রহ্মচারী সন্ন্যাসী ডাকাতী করে । এই বলিয়া সিপাহী ভবানন্দের গলাধাক্কা দিয়া, টানিয়া আনিল । ভবানন্দের চক্ষু সে অন্ধকারে জ্বলিয়া উঠিল । কিন্তু আর কিছু না বলিয়া অতি বিনীতভাবে বলিলেন, “প্রভু কি করিতে হইবে আজ্ঞা করুন ।”

সিপাহী ভবানন্দের বিনয়ে সন্তুষ্ট হইয়া বলিল, “লেও শালা, মাথে পর একঠো মোট লেও ।” এই বলিয়া সিপাহী ভবানন্দের মাথার উপর একটা তন্নী চাপাইয়া দিল । তখন আর এক জন সিপাহী তাহাকে বলিল, “না, পলাবে, আর এক শালাকে যেখানে বেঁধে রেখেছ, এ শালাকেও গাড়ীর উপর, সেইখানে বেঁধে রাখ ।” ভবানন্দের তখন কৌতূহল হইল ; যে কাহাকে বাঁধিয়া রাখিয়াছে দেখিব । তখন ভবানন্দ মাথার তন্নী ফেলিয়া দিয়া, যে সিপাহী তন্নী মাথায় তুলিয়া দিয়াছিল, তাহার গালে এক চড় মারিল । সুতরাং সিপাহীরা ভবানন্দকেও বাঁধিয়া গাড়ীর উপর তুলিয়া মহেশ্বরের নিকট ফেলিল । ভবানন্দ চিনিলা যে মহেন্দ্র সিংহ ।

সিপাহীরা পুনরায় অনামনস্বে কোলাহল করিতে করিতে চলিল, আর গোরুর গাড়ীর চাকার কচকচ শব্দ হইতে লাগিল, তখন ভবানন্দ ধীরে ধীরে কেবল মহেন্দ্র মাত্র গুনিতে পায় এইরূপ স্বরে বলিলেন, “মহেন্দ্র সিংহ, আমি তোমায় চিনি, তোমার সাহায্যের জন্যই আমি এখানে আসিয়াছি। কে আমি তাহা এখন তোমার গুনিবার প্রয়োজন নাই। আমি যাহা বলি সাবধানে তাহা কর। তোমার হাতের বান্ধনটা গাড়ীর চাকার উপরে রাখ।”

মহেন্দ্র বিস্মিত হইলেন। কিন্তু বিনা বাক্যব্যয়ে ভবানন্দের কথামত কাজ করিলেন। অন্ধকারে গাড়ীর চাকার নিকট একটুখানি সরিয়া গিয়া, হস্তবন্ধনরজ্জু চাকায় স্পর্শ করাইয়া রাখিলেন। চাকার ঘর্ষণে ক্রমে দড়িটি কাটিয়া গেল। তার পর পায়ের দড়ি ঐরূপ করিয়া কাটিলেন। এইরূপে বন্ধন হইতে মুক্ত হইয়া ভবানন্দের পরামর্শে নিশ্চেষ্ট হইয়া গাড়ীর উপরে পড়িয়া রহিলেন। ভবানন্দও সেইরূপ করিয়া বন্ধন ছিন্ন করিলেন। উভয়ে নিস্তক্কা।

যেখানে সেই জঙ্গলের কাছে যে রাজপথে দাঁড়াইয়া, ব্রহ্মচারী চারিদিক্ নিরীক্ষণ করিয়াছিলেন সেই পথে ইহাদিগের যাইবার পথ। সেই পাহাড়ের নিকট সিপাহীরা পৌঁছিলে দেখিল যে, পাহাড়ের নীচে একটা ঢিপির উপর একটি মানুষ দাঁড়াইয়া আছে। চন্দ্রদীপ্ত নীল আকাশে তাহার কালো শরীর চিত্রিত হইয়াছে দেখিয়া, হাওলদার বলিল, “উহাকে ধরিয়া আন। মোট বহিবে।” তখন একজন সিপাহী তাহাকে ধরিতে গেল। সিপাহী ধরিতে যাইতেছে, সে ব্যক্তি স্থির দাঁড়াইয়া আছে—নড়ে না। সিপাহী তাহাকে ধরিল, সে কিছু বলিল না। ধরিয়া তাহাকে হাওলদারের নিকট লইয়া আসিল, তখনও

কিছু বলিল না। হাওলদার বলিলেন, “উহার মাথায় মোট দাও।” সিপাহী তাহার মাথায় মোট দিল, সে মাথায় মোট লইল। তখন হাওলদার পিছন ফিরিয়া, গাড়ীর সঙ্গে চলিল। এই সময়ে হঠাৎ একটি পিস্তলের শব্দ হইল, হাওলদার মস্তকে বিদ্ধ হইয়া ভূতলে পড়িয়া প্রাণত্যাগ করিল। “এহি শালা হাওলদারকো মারা” বলিয়া একজন সিপাহী মুটিয়ার হাত ধরিল। মুটিয়ার হাতে তখনও পিস্তল। মুটিয়া মাথার মোট ফেলিয়া দিয়া পিস্তল উল্টাইয়া ধরিয়া সেই সিপাহীর মাথায় মারিল, সিপাহীর মাথা ভাঙ্গিয়া গেল, সে নিরস্ত হইল। সেই সময়ে “হরি! হরি! হরি!” শব্দ করিয়া দুইশত শত্ৰুধারী লোক আসিয়া সিপাহীদিগকে ঘেরিল। সিপাহীরা তখন সাহেবের আগমন প্রতীক্ষা করিতেছিল। সাহেবও ডাকাত পড়িয়াছে বিবেচনা করিয়া সত্তর গাড়ীর কাছে আসিয়া লাইন ফরম করিবার আজ্ঞা দিলেন। তখনই সিপাহীরা চারিদিকে সম্মুখ ফিরিয়া চতুষ্কোণ করিয়া দাঁড়াইল। অধ্যক্ষের পুনর্ব্বার আজ্ঞা পাইয়া তাহারা বন্দুক তুলিয়া ধরিল। এই সময়ে হঠাৎ সাহেবের কোমর হইতে তাঁহার অসি কে কাড়িয়া লইল। লইয়াই একাঘাতে তাঁহার মস্তকচ্ছেদন করিল। সাহেব ছিন্নশির হইয়া অখ হইতে পড়িয়া গেলে আর তাহার ফায়ারের হুকুম দেওয়া হইল না। সকলে দেখিল যে, এক ব্যক্তি গাড়ীর উপরে দাঁড়াইয়া তরবার হস্তে হরি হরি শব্দ করিতেছে এবং “সিপাহী মার, সিপাহী মার,” বলিতেছে। সে ভবানন্দ।

সহসা অধ্যক্ষকে ছিন্নশির দেখিয়া এবং রক্ষার জন্য কাহারও নিকটে আজ্ঞা না পাইয়া সিপাহীরা কিয়ৎকণ্ণ ভীত ও নিশ্চেষ্ট হইল। এই অবসরে তেজস্বী দস্তারা তাহাদিগের স্নানেককে হত ও আহত করিয়া গাড়ীর নিকটে আসিয়া টাকার

বান্ধসকল হস্তগত করিল । সিপাহীরা ভগ্নোৎসাহ ও পরাভূত হইয়া পলায়নপর হইল ।

তখন যে ব্যক্তি চিপির উপর দাঁড়াইয়াছিল, এবং শেষে যুদ্ধের প্রধান নেতৃত্ব গ্রহণ করিয়াছিল, সে ভবানন্দের নিকট আসিল । উভয়ে তখন আলিঙ্গন করিলে ভবানন্দ বলিলেন, “ভাই জীবানন্দ সার্থক ব্রত গ্রহণ করিয়াছিলে ।”

জীবানন্দ বলিল, “ভবানন্দ ! তোমার নাম সার্থক হউক !” অপহৃত ধন বথায়স্থানে লইয়া যাইবার ব্যবস্থা করণে জীবানন্দ নিযুক্ত হইলেন, তাঁহার অনুচরবর্গ সহিত শীঘ্রই তিনি স্থানান্তরে গেলেন । ভবানন্দ একা দাঁড়াইয়া রহিলেন ।

নবম পরিচ্ছেদ ।

মহেন্দ্র শকট হইতে নামিয়া একজন সিপাহীর প্রহরণ কাড়িয়া লইয়া যুদ্ধে যোগ দিবার উদ্যোগী হইয়াছিলেন । কিন্তু এমন সময়ে তাঁহার স্পষ্টই বোধ হইল যে ইছারা দস্তা ; ধনাগহরণ জন্যই সিপাহীদিগকে আক্রমণ করিয়াছে । এইরূপ বিবেচনা করিয়া তিনি যুদ্ধস্থান হইতে সরিয়া গিয়া দাঁড়াইলেন । কেননা দস্তাদের সহায়তা করিলে তাহাদিগের ছুরাচারের ভাগী হইতে হইবে । তখন তিনি তরবারি ফেলিয়া দিয়া ধীরে ধীরে সে স্থান ত্যাগ করিয়া যাইতেছিলেন, এমন সময়ে ভবানন্দ আসিয়া তাঁহার নিকটে দাঁড়াইল । মহেন্দ্র জিজ্ঞাসা করিল, “মহাশয় আপনি কে ?”

ভবানন্দ বলিল, “তোমার তাতে প্রয়োজন কি ?”

মহে । আমার কিছু প্রয়োজন আছে । আজ আমি আপনার দ্বারা বিশেষ উপকৃত হইয়াছি ।

ভবা । সে বোধ যে তোমার আছে এমন বুঝিলাম না—
অস্ত্র হাতে করিয়া তফাত রহিলে—তুমি কি কাপুরুষ মে যুদ্ধে
ভয় পাও ?

ভবানন্দের কথা কুরাইতে না কুরাইতে, মহেন্দ্র দুগার সহিত
বলিলেন “যুদ্ধ কই—এ যে ডাকাতি ।” ভবানন্দ বলিল, “ইউক
ডাকাতি, আমরা তোমার কিছু উপকার করিয়াছি । আরও কিছু
উপকার করবার ইচ্ছা রাখি ।”

মহেন্দ্র । তোমরা আমার কিছু উপকার করিয়াছ বটে,
কিন্তু আর কি উপকার করিবে ? আর ডাকাতির কাছে এত
উপকৃত হওয়ার চেয়ে আমার অনুপকৃত থাকাই ভাল ।

ভবা । উপকার গ্রহণ কর না কর, তোমার ইচ্ছা । যদি
ইচ্ছা হয় আমার সঙ্গে আইস । তোমার স্ত্রীকন্যার সঙ্গে
সাক্ষাৎ করাইব ।

মহেন্দ্র ফিরিয়া দাঁড়াইল । বলিল, “সে কি ?”

ভবানন্দ সে কথার উত্তর না করিয়া চলিল । অগত্যা
মহেন্দ্র সঙ্গে সঙ্গে চলিল—মনে মনে ভাবিতে লাগিল, এরা
দস্যু না দেবতা ?

দশম পরিচ্ছেদ ।

সেই জ্যোৎস্নাময়ী রজনীতে দুইজনে নীরবে প্রান্তর পার
হইয়া চলিল । মহেন্দ্র নীরব, শোককাতর, গর্ষিত, কিছু
কোতূহলী ।

ভবানন্দ সহসা ভিন্মমূর্তি ধারণ করিলেন । সে স্থিরমূর্তি,
বীরপ্রকৃতি সন্ন্যাসী আর নাই ; সে রণনিপুণ বীরমূর্তি—সৈন্যা-
ধ্যক্ষের মুণ্ডধাতীব মূর্তি আর নাই—এখনই যে গর্ষিতভাবে

মহেন্দ্রকে তিরস্কার করিতেছিলেন সে মূর্তি আর নাই। যেন জ্যোৎস্নাময়ী, শান্তিশালিনী, পৃথিবীর প্রান্তর কানন-নগ-নদীময় শোভা দেখিয়া তাঁহার চিত্তের বিশেষ স্ফূর্তি হইল—সমুদ্র যেন চত্ৰোদয়ে হাসিল। ভবানন্দ হাস্যমুখ, বাস্তব, প্রিয়সঙ্গী হইলেন। কথাবার্তার জন্য বড় ব্যগ্র। ভবানন্দ কথোপ-কথনের অনেক উদ্যম করিলেন, কিন্তু মহেন্দ্র কথা কহিল না। তখন ভবানন্দ নিরুপায় হইয়া আপন মনে গীত আরম্ভ করিলেন,—

“বন্দে মাতরং”

সুজলাং সুফলাং, মলয়জশীতলাং,

শস্যশ্যামলাং, মাতরং।*

মহেন্দ্র গীত শুনিয়া কিছু বিস্মিত হইল, কিছু বুঝিতে পারিল না—সুজলা সুফলা মলয়জশীতলা শস্যশ্যামলা মাতা কে,—জিজ্ঞাসা করিল “মাতা কে?”

উত্তর না করিয়া ভবানন্দ গায়িতে লাগিল।

“শুভ্র-জ্যোৎস্না-পুলকিত-সামিনীঃ—

ফুল-কুসুমিত-ক্রমদল-শোভিনীঃ

সুহাসিনীঃ সুমধুরভাষিনীঃ

সুখদাং বরদাং মাতরং।

মহেন্দ্র বলিল, “এ ত দেশ, এ ত মা নর—”

ভবানন্দ বলিল, “আমরা অন্য মা মানি না—জননী জন্নভূমিষ্ট স্বর্গাদপি গরীয়সী। আমরা বলি, জন্নভূমিই জননী; আমাদের মা নাই, বাপ নাই, ভাই নাই, বন্ধু নাই,—স্ত্রী নাই, পুত্র নাই, ঘর নাই, বাড়ী নাই, আমাদের আছে

০ ১ × ১

* মজার—কাওয়ালী ভাল যথা—বন্দে মাতরং ইত্যাদি।

দশম পরিচ্ছেদ ।

২৩

কেবল সেই স্রজলা, স্রফলা, মলয়জশীতলা, শমশ্যামলা,—”

তখন বুঝিয়া মহেন্দ্র বলিল, “তবে আবার গাও।”

ভবানন্দ আবার গায়িল :—

বলে মাতরং

স্রজলাং, স্রফলাং, মলয়জশীতলাং,

শমশ্যামলাং, মাতরং ।

স্রজকোটি পুলকিত-বামিনীং

স্রফলমিত-ক্রমদল-শোভিনীং

মলয়জশীতল-স্রজমিত-বামিনীং

স্রফলমিত-ক্রমদল-শোভিনীং

মলয়জশীতল-স্রজমিত-বামিনীং

স্রফলমিত-ক্রমদল-শোভিনীং

মলয়জশীতল-স্রজমিত-বামিনীং

স্রফলমিত-ক্রমদল-শোভিনীং

মলয়জশীতল-স্রজমিত-বামিনীং

স্রফলমিত-ক্রমদল-শোভিনীং

মলয়জশীতল-স্রজমিত-বামিনীং

স্রফলমিত-ক্রমদল-শোভিনীং

স্বংহি প্রাণাঃ শরীরে ।

বাহতে তুমি মা শক্তি

সদয়ে তুমি মা ভক্তি

ভোমারই প্রতিমা গড়ি

—মন্দিরে মন্দিরে ।

স্বংহি দুর্গা দশপ্রহরণ-ধারিণী

কমলা কমল-দল-বিশারিণী

বাণী বিদ্যাদায়িনী

নমামি স্বং

নমামি কমলাং অমলাং অতুলাং

সুভ্রলাং সুফলাং মাতরং

বন্দে মাতরং

শ্যামলাং সরলাং সুস্মিতাং ভূষিতাং

ধরণীং ভরণীং মাতরং ।

মহেন্দ্র দেখিল, দম্ভ্য গায়িতে গায়িতে কান্দিতে লাগিল ।

মহেন্দ্র তখন সবিস্ময়ে জিজ্ঞাসা করিল “তোমরা কারা ?”

ভবানন্দ বলিল, “আমরা সন্তান ।”

মহেন্দ্র । সন্তান কি ? কার সন্তান ?

ভবা । মায়ের সন্তান ।

মহেন্দ্র । ভাল—সন্তানে কি চুরি ডাকাতি করিয়া মায়ের
পূজা করে ? সে কেমন মাতৃভক্তি ?

ভবা । আমরা চুরি ডাকাতি করি না ।

মহে । এই ত গাড়ি লুঠিলে ।

ভবা । সে কি চুরি ডাকাতি ? কার টাকা লুঠলাম ?

মহে । কেন ? রাজার ।

ভবা । রাজা বেটাকে ? এই যে টাকাগুলি সে লইবে
এ টাকায় তার কি অধিকার ?

মহে । রাজার রাজভাগ ।

ভবা । হিন্দুর রাজ্যে আবার মুসলমান রাজা কি ?

মহে । তোমরা সিপাহীর তোপের মুখে কোন দিন উড়িয়া
যাইবে দেখিতেছি ।

ভবা । অনেক শালা সিপাহী দেখিয়াছি—আজও
দেখিলাম ।

মহে । ভাল করে দেখনি, একদিন দেখিবে ।

ভবা । না হয় দেখুনাম, একবার বই ত হুবার মধ্ব না ।

মহে । তা ইচ্ছা করিয়া মরিয়া কাজ কি ?

ভবা । মহেন্দ্র সিংহ, তোমাকে মানুষের মত মানুষ বলিয়া আমার কিছু বোধ ছিল, কিন্তু এখন দেখিলাম, সবাই না তুমিও তা । দেখ সাপ মাটিতে বুক দিয়া হাঁটে, তাহার অপেক্ষা নীচ জীব আমি ত আর দেখি না ; সাপের ঘাড়ে পা দিলে সেও ফণা ধরিয়া উঠে । তোমার কি কিছুতেই ধৈর্য্য নষ্ট হয় না । দেখ যত দেশ আছে,—মগধ, মিথিলা, কাশী, কান্ধী, দিল্লী, কাশ্মীর, কোন্ দেশের এমন ছদ্মশা, কোন্ দেশে মানুষ খেতে না পেয়ে ঘাস খায় ? কাঁটা খায় ? উইমাটি খায় ? বনের লতা খায় ? কোন দেশে মানুষ শিয়াল কুকুর খায়, মড়া খায় ? কোন দেশের মানুষের সিঁদুকে টাকা রাখিয়া শোয়াস্তি নাই, সিংহাসনে শালগ্রাম রাখিয়া শোয়াস্তি নাই, ঘরে ঝি বউ রাখিয়া শোয়াস্তি নাই, ঝি বউয়ের পেটে ছেলে রেখে শোয়াস্তি নাই ? পেট চিরে ছেলে বার করে । সকল দেশে রাজার সঙ্গে রক্ষণাবেক্ষণের সম্বন্ধ । আমাদের রাজা রক্ষা করে কই ? ধর্ম্ম গেল, জাতি গেল, মান গেল, কুল গেল, এখন ত প্রাণপর্য্যন্তও যায় । এ নেড়েদের না তাড়াইলে আর কি হিন্দু হিন্দুনানী থাকে ?

মহে । তাড়াবে কেমন করে ?

ভবা । মেরে ।

মহে । তুমি কি একা তাড়াবে ? এক চড়ে না কি ?

দস্ত্য গায়িল :—

“সপ্তকোটীকণ্ঠ-কলকল-নিবাদ করালে

দ্বিসপ্তকোটীভূজৈর্ধ্বতথর করবালে

কে বলে না তুমি অবলে—”

মহে । কিন্তু দেখিতেছি তুমি একা ?

ভবা । কেন এখনি ত হুশ লোক দেখিয়াছ ।

মহে। তাহারা কি সকলে সন্তান?

ভবা। সকলেই সন্তান।

মহে। আর কত আছে?

ভবা। এমন হাজার হাজার, ক্রমে আরও হবে।

মহে। না হয় দশ বিশ হাজার হল, তাতে কি মুসলমানকে রাজ্যচ্যুত করিতে পারিবে?

ভবা। পলাশীতে ইংরেজের কজন ফৌজ ছিল?

মহে। ইংরেজ আর বাঙ্গালীতে?

ভবা। নয় কি দে? গায়ের জোরে কত হয়—গায়ের জিয়াদা জোর থাকিলে গোলা কি জিয়াদা ছোটে?

মহে। তবে ইংরেজে মুসলমানে এত তফাৎ কেন?

ভবা। ধর, এক ইংরেজ পলায় না, মুসলমান গা ঘামিলে পলায়—শরবত খুঁজিয়া বেড়ায়—ধর তার পর, ইংরেজের জ্বিদ আছে—যা ধরে তা করে, মুসলমানের এলাকাড়ি। টাকার জন্য প্রাণ দেওয়া, তাও সিপাহীরা মাহিয়ানা পায় না। তার পর শেষ কথা সাহস,—কামানের গোলা এক জায়গায় বই দশ জায়গায় পড়বে না—মুতরাং একটা গোলা দেখে দশ জন পলাইবার দরকার নাই। কিন্তু একটা গোলা দেখিলে মুসলমানের গোপীশুদ্ধ পলায়—আর গোপীশুদ্ধ গোলা দেখিলে ভ
 ০ একটা ইংরেজ পলায় না।

মহে। তোমাদের কি এ সব গুণ আছে?

ভবা। না। কিন্তু গুণ গাছ থেকে পড়ে না। অভ্যাস করিতে হয়।

মহে। তোমরা কি অভ্যাস কর?

ভবা। দেখিতেছ না আমরা সন্ন্যাসী? আমাদের সন্ন্যাস। এই সন্ন্যাসের জন্য। কার্য উদ্ধার হইলে—অভ্যাস সম্পূর্ণ ০

ঠইলে—আমরা আবার গৃহী হইব। আমাদেরও জ্ঞী কন্যা আছে ।

মহে । তোমরা সে সকল ত্যাগ করিয়াছ—মায়া কাটাইতে পারিয়াছ ?

ভবা । সম্ভ্রান্তকে মিথ্যা কথা কহিতে নাই—তোমার কাছে মিথ্যা বড়াই করিব না । মায়া কাটাইতে পারে কে ? যে বলে আমি মায়া কাটাইয়াছি, হয় তার মারা কখন ছিল না, বা সে মিছা বড়াই করে । আমরা মায়া কাটাই না—আমরা ব্রত রক্ষা করি । তুমি সম্ভ্রান্ত হইবে ?

মহে । আমার জ্ঞীকন্যার সম্বাদ না পাইলে আমি কিছু বলিতে পারি না ।

ভবা । চল, তবে তোমার জ্ঞীকন্যাকে দেখিবে চল ।

এই বলিয়া দুইজনে চলিল । ভবানন্দ আবার “বন্দে মাতরং” গায়িতে লাগিল । মহেন্দ্রের গলা ভাল ছিল, সম্ব্রীতে একটু বিদ্যা ও অহুরাগ ছিল—সুতরাং সঙ্গে গায়িল—দেখিল যে গায়িতে গায়িতে চক্ষু জল আইসে । তখন মহেন্দ্র বলিল,

“যদি জ্ঞীকন্যা ত্যাগ না করিবে হয় তবে এ ব্রত আমাকে গ্রহণ করাও ।”

ভবা । এ ব্রত যে গ্রহণ করে সে জ্ঞীকন্যা পরিত্যাগ করেণ । তুমি যদি এ ব্রত গ্রহণ কর, তবে জ্ঞী কন্যার সঙ্গে সাক্ষাৎ করা হইবে না । তাহাদিগের রক্ষা হেতু উপযুক্ত বন্দোবস্ত করা যাইবে; কিন্তু ব্রতের সফলতা পর্য্যন্ত তাহাদিগের মুখঃ দর্শন নিষেধ ।

মহেন্দ্র । আমি এ ব্রত গ্রহণ করিব না ।

একাদশ পরিচ্ছেদ ।

রাত্রি প্রভাত হইয়াছে । সেই জনহীন কানন,—এতক্ষণ অন্ধকার, শব্দহীন ছিল—এখন আলোকময়—পক্ষিকুজনশব্দিত হইয়া আনন্দময় হইল । সেই আনন্দময় প্রভাতে আনন্দময় কাননে, “আনন্দমঠে,” সত্যানন্দ ঠাকুর হরিণচর্যে বসিয়া সন্ধ্যাহিক করিতেছেন । কাছে বসিয়া জীবানন্দ । এমন সময়ে ভরানন্দ মহেন্দ্র সিংহকে সঙ্গে লইয়া আসিয়া উপস্থিত হইল । ব্রহ্মচারী বিনাবাকাবায়ে সন্ধ্যাহিক করিতে লাগিলেন, কেহ কোন কথা কহিতে সাহস করিল না । পরে সন্ধ্যাহিক সমাপন হইলে, ভবানন্দ, জীবানন্দ উভয়ে তাঁহাকে প্রণাম করিলেন এবং পদধূলি গ্রহণ পূর্বক বিনীত ভাবে উপবেশন করিলেন । তখন সত্যানন্দ ভরানন্দকে ইঙ্গিত করিয়া বাহিরে লইয়া গেলেন । কি কথোপকথন হইল, তাহা আমরা জানি না । তাহার পর উভয়ে মন্দিরে প্রত্যাবর্তন করিলে, ব্রহ্মচারী সঙ্করূপ সহাস্য বদনে মহেন্দ্রকে বলিলেন, “বাবা তোমার হুঃখে আমি অত্যন্ত কাতর হইয়াছি, কেবল সেই দীনবন্ধুর রূপায় তোমার স্ত্রী কন্যাকে কাল রাত্রিতে আমি রক্ষা করিতে পারিয়াছিলাম ।” এই বলিয়া ব্রহ্মচারী কল্যাণীর রক্ষাবৃত্তান্ত বর্ণিত করিলেন । তার পর বলিলেন যে, “চল তাহারা যেখানে আছে তোমাকে সেখানে লইয়া যাই ।”

এই বলিয়া ব্রহ্মচারী অগ্রে অগ্রে মহেন্দ্র পশ্চাৎ পশ্চাৎ দেবালয় অভ্যন্তরে প্রবেশ করিলেন । প্রবেশ করিয়া মহেন্দ্র দেখিল অতি বিস্তৃত, অতি উচ্চ প্রকোষ্ঠ । এই নরাকর্ণোদিত প্রান্তঃকালে, যখন নিকটস্থ কানন সূর্যালোকে হীরকখচিতবৎ জ্বলিতেছে তখনও সেই বিশাল কক্ষায় প্রায় অন্ধকার । ঘরের

ভিতর কি আছে মহেন্দ্র প্রথমে তাহা দেখিতে পাইল না—
দেখিতে দেখিতে, দেখিতে দেখিতে ক্রমে দেখিতে পাইল,
এক প্রকাণ্ড চতুর্ভুজ মূর্তি, শঙ্খচক্রগদাপদ্মধারী, কৌমুভাশো-
ভিত-হৃদয়, সম্মুখে সূদর্শনচক্র ঘূর্ণমানপ্রায় স্থাপিত । মধুকৈটভ-
স্বরূপ দুইটা প্রকাণ্ড ছিন্নমস্ত মূর্তি রুধিরপ্লাবিতবৎ চিত্রিত হইয়া
সম্মুখে রহিয়াছে । বামে লক্ষ্মী আলুলায়িতকুস্তলা শতদলমালা-
মণ্ডিতা ভয়ত্রস্তার ন্যায় দাঁড়াইয়া আছেন । দক্ষিণে সরস্বতী
পুস্তক, বাদ্যযন্ত্র, মূর্তিমান্ রাগ রাগিনী প্রভৃতিপরিবেষ্টিত হইয়া
দাঁড়াইয়া আছেন । সর্বোপরি, বিষ্ণুর মাথার উপরে উচ্চ মঞ্চে
বহল রত্নমণ্ডিত আসনোপবিষ্টা এক মোহিনী মূর্তি—লক্ষ্মী
সরস্বতীর অধিক সুন্দরী, লক্ষ্মী সরস্বতীর অধিক ঐশ্বর্য্যাবিতা ।
গন্ধর্ব্ব, কিন্নর, দেব, যক্ষ, ব্রহ্ম তাহাকে পূজা করিতেছে ।
ব্রহ্মচারী অতি গম্ভীর, অতি ভীত স্বরে মহেন্দ্রকে জিজ্ঞাসা
করিলেন, “সকল দেখিতে পাইতেছ ?” মহেন্দ্র বলিল,
“পাইতেছি ।”

ব্রহ্ম । উপরে কি আছে দেখিয়াছ ?

মহে । দেখিয়াছি, কে উনি ?

ব্রহ্ম । মা ।

মহে । মা কে ?

ব্রহ্মচারী বলিলেন, “আমরা যার সন্তান ।”

মহেন্দ্র । কে তিনি ?

ব্রহ্ম । সময়ে চিনিবে । বল—বন্দে মাতরং । এখন
চল, দেখিবে চল ।

তখন ব্রহ্মচারী মহেন্দ্রকে কক্ষান্তরে লইয়া গেলেন । সেখানে

মহেন্দ্র দেখিলেন এক অপরূপ সর্বাঙ্গসম্পন্ন সর্বাভরণভূষিত
জগদ্ধাত্রী মূর্তি । মহেন্দ্র জিজ্ঞাসা করিলেন, “ইনি কে ?”

স্ব। মা—যা ছিলেন ।

ম। সে কি ?

ব। ইনি কুঞ্জর কেশরী প্রভৃতি বন্যপশু সকল পদতলে দলিত করিয়া, বন্যপশুর আবাস স্থানে আপনার পদ্মাসন স্থাপিত করিয়াছিলেন । ইনি সর্বলঙ্কারপরিভূষিতা হাস্যময়ী সুন্দরী ছিলেন । ইনি বালার্কবর্ণাভা সকলঐশ্বর্যশালিনী । ইহাকে প্রণাম কর ।

‘মহেন্দ্র ভক্তিভাবে ভগদ্ধাত্রীকৃপণী মাতৃভূমিকে প্রণাম করিলে পর, ব্রহ্মচারী তাঁহাকে এক অঙ্ককার হরঙ্গ দেখাইয়া বলিলেন “এই পথে আইস ।” ব্রহ্মচারী স্বয়ং আগে আগে চলিলেন । মহেন্দ্র সভয়ে পাছু পাছু চলিলেন ! ভূগর্ভস্থ এক অঙ্ককার প্রকোষ্ঠে কোথা হইতে সামান্য আলো আসিতেছিল । সেই ক্ষীণালোকে এক কালীমূর্তি দেখিতে পাইলেন ।

ব্রহ্মচারী বলিলেন,

“দেখ মা যা হইয়াছেন ?”

মহেন্দ্র সভয়ে বলিল, “কালী ?”

ব। কালী—অঙ্ককারসমাচ্ছন্ন কালিমাযয়ী । হৃতসর্বস্বা, এই জন্য নগ্নিকা । আজি দেশের সর্বত্রই ক্ষণান—তাই মা কঙ্কালমালিনী । আপনার শিব আপনার পদতলে দলিতে-ছেন—হায় মা !

ব্রহ্মচারীর চক্ষে দর দর ধারা পড়িতে লাগিল । মহেন্দ্র জিজ্ঞাসা করিলেন—“হাতে খেটক খর্পর কেন ?”

ব্রহ্ম। আমরা সন্তান, অস্ত্র মার হাতে এই দিয়াছি মাত্র—বল বন্দে মাতরং ।

“বন্দে মাতরং” বলিয়া মহেন্দ্র কালীকে প্রণাম করিল তখন ব্রহ্মচারী বলিলেন, “এই পথে আইস ।” এই বলিয়া

তিনি দ্বিতীয় সুরঙ্গ আরোহণ করিতে লাগিলেন । সহসা তাঁহা-
দিগের চক্ষে প্রাতঃসূর্য্যের রশ্মিরাশি প্রভাসিত হইল । চারিদিক্
হইতে মধুরকণ্ঠ পক্ষিকুল গাইয়া উঠিল । দেখিলেন এক মন্দির
প্রস্তরনির্ম্মিত প্রশস্ত মন্দিরের মধ্যে স্বর্ণনির্ম্মিতা দশভূজা
প্রতিমা নবাকর্ণকিরণে জ্যোতির্ম্ময়ী হইয়া হাসিতেছে । ব্রহ্মচারী
প্রণাম করিয়া বলিলেন ।

“এই মা যা হইবেন । দশভূজ দশদিকে প্রসারিত,—
তাহাতে নানা আয়ুধরূপে নানা শক্তি শোভিত, পদতলে শত্রু-
বিমর্দিত, পদাশ্রিত বীরকেশরী শক্রনিপীড়নে নিযুক্ত । দিগ্-
ভূজা”—বলিতে বলিতে সত্যানন্দ গদগদকণ্ঠে কাদিতে লাগিল ।
“দিগ্ভূজা—নানা প্রহরণধারিণী শত্রুমর্দ্দিনী—বীরেন্দ্রপৃষ্ঠবিহা-
রিণী—দক্ষিণে লক্ষ্মী ভাগ্যরূপিণী—বামে বাণী বিদ্যাবিজ্ঞানদা-
রিণী—সঙ্গে বলরূপী কার্ত্তিকেয়, কার্য্যসিদ্ধিরূপী গণেশ । এস
আমরা মাকে উভয়ে প্রণাম করি ।” তখন হুই জনে যুক্তকরে
উর্দ্ধমুখে, এক কণ্ঠে ডাকিতে লাগিল, “সর্ব্বমঙ্গল-মঙ্গল্যে শিবে
সর্ব্বার্থ-সাধিকে, শরণ্যে ত্রাষকে গৌরি নারায়ণি নমোস্ততে ।”

উভয়ে ভক্তিতাবে প্রণাম করিয়া গাজোথান করিলে, মহেন্দ্র
দলদ কণ্ঠে জিজ্ঞাসা করিল, “মার এ মূর্ত্তি কবে দেখিতে
পাইব ?”

ব্রহ্মচারী বলিল, “যবে মার সকল সন্তান মাকে মা বলিয়া
ডাকিবে । সেই দিন উনি প্রসন্ন হইবেন ।”

মহেন্দ্র সহসা জিজ্ঞাসা করিল, “আমার জ্যৈষ্ঠ কন্যা
কোথায় ?”

ব্রহ্ম । চল—দেখিবে চল ।

মহেন্দ্র । তাহাদের একবারমাত্র আমি দেখিয়া বিদায়
দিব ?

ব্রহ্ম। কেন বিদায় দিবে?

ম। আমি এই মহামন্ত্র গ্রহণ করিব।

ব্রহ্ম। কোথা বিদায় দিবে?

মহেন্দ্র কিয়ৎক্ষণ চিন্তা করিয়া কহিলেন, “আমার গৃহে কেহ নাই, আমার আর স্থানও নাই। এ মহামারীর সময় আর কোথায় বা স্থান পাইব।”

ব্রহ্ম। যে পথে এখানে আসিলে, সেই পথে মন্দিরের বাহিরে যাও। মন্দিরদ্বারে তোমার স্ত্রী কন্যাকে দেখিতে পাইবে। কল্যাণী এ পর্য্যন্ত অভুক্ত। যেখানে তাহার বসিয়া আছে, সেইখানে ভক্ষ্য সামগ্রী পাইবে। তাহাকে ভোজন করাইয়া তোমার যাহা অভিকৃতি তাহা করিও, এক্ষণে আমা-দিগের আর কাহারও সাক্ষাৎ পাইবে না। তোমার মন যদি এইরূপ থাকে, তবে উপযুক্ত সময়ে, তোমাকে দেখা দিব।

তখন অকস্মাৎ কোন পথে ব্রহ্মচারী অন্তর্হিত হইল। মহেন্দ্র পূর্বপ্রদৃষ্ট পথে নির্গমনপূর্বক দেখিলেন, নাটমন্দিরে কল্যাণী কন্যা বসিয়া বসিয়া আছে।

এ দিকে সত্যানন্দ অন্য সুরঙ্গ দিয়া অবতরণপূর্বক এক নিভৃত ভূগর্ভকক্ষায় নামিলেন। সেখানে জীবানন্দ ও ভবানন্দ বসিয়া টাকা গণিয়া থরে থরে সাজাইতেছে। সেই ঘরে স্তূপে স্তূপে স্বর্ণ, রৌপ্য, তাম্র, হীরক, প্রবাল, মুক্তা সজ্জিত রাখিয়াছে। গত রাত্রের লুণ্ঠের টাকা, ইহার সাজাইয়া রাখিতেছে। সত্যানন্দ সেই কক্ষমধ্যে প্রবেশ করিয়া বলিলেন, “জীবানন্দ! মহেন্দ্র আসিবে। আসিলে সন্তানের বিশেষ উপকার আছে। কেন না তাহা হইলে উহার পুরুষাত্মকমে সজ্জিত অর্থরাশি মার সেবায় অর্পিত হইবে। কিন্তু যতদিন সে কায়মনোবাক্যে মাতৃভক্ত না হয়, ততদিন তাহাকে গ্রহণ

করিও না । তোমাদিগের হাতের কাজ সমাপ্ত হইলে, তোমরা ভিন্ন ভিন্ন সময়ে উহার অনুসরণ করিও । সময় দেখিলে, উহাকে শ্রীবিষ্ণুৰূপে উপস্থিত করিও । আর সময়ে হউক, অসময়ে হউক, উহাদিগের প্রাণরক্ষা করিও । কেন না যেমন ত্রুষ্টির শাসন সন্তানের ধর্ম, শিষ্টের রক্ষাও সেইরূপ ধর্ম ।”

দ্বাদশ পরিচ্ছেদ ।

অনেক দুঃখের পর মহেন্দ্র আর কল্যাণীতে সাক্ষাৎ হইল । কল্যাণী কাদিয়া লুটাইয়া পড়িল । মহেন্দ্র আরও কাদিল । কাদাকাটার পর চোখমুছার ধূম পড়িয়া গেল । যতবার চোখ মুছা যায়, ততবার আবার জল পড়ে । জলপড়া বন্ধ করিবার জন্য কল্যাণী খাবার কথা পাড়িল । ব্রহ্মচারীর কে অহুচর খাবার রাখিয়া গিয়াছে, কল্যাণী মহেন্দ্রকে তাহা খাইতে বলিল । ত্রুর্ভিক্ষের দিন অন্ন ব্যঞ্জন পাইবার কোন সম্ভাবনাই নাই, কিন্তু দেশে যাহা আছে, সন্তানের কাছে তাহা সুলভ । সেই কানন সাধারণ মহুষ্যের অগম্য । যেখানে যে গাছে, যে ফল হয়, উপবাসী মনুষ্যগণ তাহা পাড়িয়া খায় । কিন্তু এই অগম্য অরণ্যের গাছের ফল, আর কেহ পায় না । এই জন্য ব্রহ্মচারীর অহুচর বহুতর বন্যফল ও কিছু ছদ্ম আনিয়া রাখিয়া যাইতে পারিয়াছিল । কল্যাণীর অনুরোধে মহেন্দ্র প্রথমে কিছু ভোজন করিলেন । তাহার পর ভুক্তাবশেষ কল্যাণী বিরলে বসিয়া কিছু খাইল । ছদ্ম কন্যাকে কিছু খাওয়াইল, কিছু সঞ্চিত করিয়া রাখিল, আবার খাওয়াইবে । তার পর নিদ্রায় উভয়ে পীড়িত হইলে, উভয়ে শ্রমদূর করিল । পরে নিদ্রাভঙ্গের পর উভয়ে আলোচনা করিতে লাগিলেন,

এখন কোথায় যাই। কলাগী বলিল, “বাড়ীতে বিপদ বিবেচনা করিয়া গৃহত্যাগ করিয়া আসিয়াছিলাম, এখন দেখিতেছি, বাড়ীর অপেক্ষা বাহিরে বিপদ অধিক। তবে চল, বাড়ীতেই ফিরিয়া যাই।” মহেন্দ্রেরও তাহা অভিপ্রেত। মহেন্দ্রের ইচ্ছা কলাগীকে গৃহে রাখিয়া কোন প্রকারে একজন অভিভাবক নিযুক্ত করিয়া দিয়া এই পরম রমণীয় অপার্থিব পবিত্রতায়ুক্ত মাতৃসেবা ব্রত গ্রহণ করেন। অতএব তিনি সহজেই সম্মত হইলেন। তখন দুইজনে গতক্লম হইয়া কন্যা কোলে তুলিয়া পদচিহ্নাভিমুখে যাত্রা করিলেন।

কিন্তু পদচিহ্নে কোন পথে যাইতে হইবে, সেই দুর্ভেদ্য অরণ্যানীমধ্যে কিছুই স্থির করিতে পারিলেন না। তাঁহারা বিবেচনা করিয়াছিলেন, যে, বন হইতে বাহির হইতে পারিলেই পথ পাইবেন। কিন্তু বন হইতে বাহির হইবার ত পথ পাওয়া যায় না। অনেকক্ষণ বনের ভিতর ঘুরিতে লাগিলেন, ঘুরিয়া ঘুরিয়া সেই মঠেই ফিরিয়া আসিতে লাগিলেন, নির্গমের পথ পাওয়া যায় না। সম্মুখে একজন বৈষ্ণববেশধারী অপরিচিত ব্রহ্মচারী দাঁড়াইয়া হাসিতেছিল। দেখিয়া মহেন্দ্র রুষ্ট হইয়া জিজ্ঞাসা করিলেন, “গোঁসাই হাস কেন?”

গোঁসাই বলিল, “তোমরা এ বনে প্রবেশ করিলে কি প্রকারে?”

মহেন্দ্র। যেপ্রকারেই হউক, প্রবেশ করিয়াছি।

গোঁসাই। প্রবেশ করিয়াছ ত বাহির হইতে পারিতেছ না কেন? এই বলিয়া বৈষ্ণব আবার হাসিতে লাগিল।

রুষ্ট হইয়া মহেন্দ্র বলিলেন, “তুমি হাসিতেছ, তুমি বাহির হইতে পার?”

বৈষ্ণব বলিল, “আমার সঙ্গে আইস, পথ দেখাইয়া

দিতেছি । তোমরা অবশ্য কোন সন্ন্যাসী ব্রহ্মচারীর সঙ্গে প্রবেশ করিয়া থাকিবে । নচেৎ এ মঠে আসিবার বা বাহির হইবার পথ আর কেহই জানে না ।”

গুনিয়া মহেন্দ্র বলিল, “আপনি সন্তান ?”

বৈষ্ণব বলিল, “হাঁ আমিও সন্তান, আমার সঙ্গে আইস । তোমাকে পথ দেখাইয়া দিবার জন্যই আমি এখানে দাঁড়াইয়া আছি ।”

মহেন্দ্র জিজ্ঞাসা করিল, “আপনার নাম কি ?”

বৈষ্ণব বলিল, “আমার নাম ধীরানন্দ গোস্বামী ।”

এই বলিয়া ধীরানন্দ অগ্রে অগ্রে চলিলেন, মহেন্দ্র, কল্যাণী পশ্চাৎ পশ্চাৎ চলিলেন । ধীরানন্দ অতি ছুগ্মপথ দিয়া তাঁহা-দিগকে বাহির করিয়া দিয়া, একা বনমধ্যে পুনঃপ্রবেশ করিলেন ।

আনন্দারণ্য হইতে তাহারা বাহিরে আসিলে কিছু দূরে সবুক্ষপ্রান্তর আরম্ভ হইল । প্রান্তর এক দিকে রহিল, বনের ধারে ধারে রাজপথ । একস্থানে অরণ্যমধ্য দিয়া একটি ক্ষুদ্র নদী কলকল শব্দে বহিতেছে । জল অতি পরিষ্কার, নিরিড মেঘের মত কালো । দুইপাশে শ্যামল শোভাময় নানা জাতীয় বৃক্ষ নদীকে ছায়া করিয়া আছে, নানা জাতীয় ঐক্ষী বৃক্ষে বসিয়া নানাবিধ রব করিতেছে । সেই রব—সেও মধুর—মধুর নদীর রবের সঙ্গে মিশিতেছে । তেমনি করিয়া বৃক্ষের ছায়া আর জলের বর্ণ মিশিয়াছে । কল্যাণীর মনও বুঝি সেই ছায়ার সঙ্গে মিশিল । কল্যাণী নদীতীরে এক বৃক্ষমূলে বসিলেন, স্বামীকে নিকটে বসিতে বলিলেন । স্বামী বসিলেন, কল্যাণী স্বামীর কোল হইতে কন্যাকে কোলে লইলেন ; স্বামীর হাত হাতে লইয়া কিছুক্ষণ নীরবে বসিয়া রহিলেন ।

পূরে জিজ্ঞাসা করিলেন, “তোমাকে আজি বড় বিমর্ষ দেখি-
তেছি ? বিপদ যাহা তাহা হইতে উদ্ধার পাইয়াছি—এখন এত
বিষাদ কেন ?”

মহেন্দ্র দীর্ঘনিশ্বাস ত্যাগ করিয়া বলিলেন—“আমি আর
আপনার নহি—আমি কি করিব বুদ্ধিতে পারি না।”

ক। কেন ?

মহে। তোমাকে হারাইলে পর আমার যাহা যাহা
ঘটিয়াছিল শুন। এই বলিয়া যাহা যাহা ঘটিয়াছিল মহেন্দ্র
তাহা সবিস্তারে বলিল।

কল্যাণী বলিলেন, “আমারও অনেক কষ্ট, অনেক বিপদ
গিয়াছে। তুমি শুনিয়া কি করিবে ? অতিশয় বিপদেও আমার
কেমন করে ঘুম আসিয়াছিল বলিতে পারি না—কিন্তু আমি
কাল শেষ রাত্রে ঘুমাইয়াছিলাম। ঘুমাইয়া স্বপ্ন দেখিয়া-
ছিলাম। দেখিলাম—কি পুণ্যবলে বলিতে পারি না—আমি
এক অপূর্ণস্থানে গিয়াছি। সেখানে মাটি নাই। কেবল
আলো, অতি শীতল মেঘভাঙ্গা আলোর মত বড় মধুর আলো।
সেখানে মনুষ্য নাই কেবল আলোময় মূর্তি, সেখানে শব্দ নাই
কেবল অতিদূরে যেন কি মধুর গীত বাদ্য হইতেছে এমন
একটা শব্দ। সর্বদা যেন নূতন ফুটিয়াছে এমন লক্ষ লক্ষ মল্লিকা
মালতী গন্ধরাজের গন্ধ। সেখানে যেন সকলের উপরে সক-
লের দর্শনীয়স্থানে কে বসিয়া আছেন, যেন নীল পর্বত অগ্নি-
প্রভ হইয়া ভিতরে মন্দ মন্দ জ্বলিতেছে। অগ্নিময় বৃহৎ কিরীট
তাহার মাথায়। তাঁর যেন চারিহাত। তাঁর দুই দিকে কি
আমি চিনিতে পারিলাম না—বোধ হয় স্ত্রীমূর্তি, কিন্তু এতরূপ,
এত জ্যোতিঃ, এত সৌরভ, যে আমি সেদিকে চাহিলেই বিহবল
হইতে লাগিলাম ; চাহিতে পারিলাম না, দেখিতে পারিলাম না।

যে কে । যেন সেই চতুর্ভুজের সম্মুখে দাঁড়াইয়া আর এক স্ত্রী মূর্তি! সেও জ্যোতির্ময়ী কিন্তু চাঙ্গি দিকে মেঘ, আভা ভাল বাহির হইতেছে না, অস্পষ্ট বুঝা যাইতেছে যে অতি শীর্ণা কিন্তু অতি রূপবতী মন্মথপীড়িতা কোন স্ত্রী মূর্তি কাদিতেছে । আমাকে যেন স্নগন্ধ মন্দ পবন বহিয়া বহিয়া ঢেউ দিতে দিতে সেই চতুর্ভুজের সিংহাসনতলে আনিয়া ফেলিল । যেন সেই মেঘ-মণ্ডিতা শীর্ণা স্ত্রী আমাকে দেখাইয়া বলিল, ‘এই সে—ইহা এই জনা মহেন্দ্র আমার কোলে আসে না ।’ তখন যেন এক অতি পরিস্কার স্নমধুর বাঁশীর শব্দের মত শব্দ হইল । সেই চতুর্ভুজ যেন আমাকে বলিলেন, ‘তুমি স্বামীকে ছাড়িয়া আমার কাছে এস । এই তোমাদের মা, তোমার স্বামী এঁর সেবা করিবে । তুমি স্বামীর কাছে থাকিলে এঁর সেবা হইবে না ; তুমি চলিয়া আইস ।’—আমি যেন কাদিয়া বলিলাম, ‘স্বামী ছাড়িয়া আসিব কি প্রকারে ।’ তখন আবার সেই বাঁশীর শব্দ শব্দ হইল ‘আমি স্বামী, আমি মাতা, আমি পিতা, আমি পুত্র, আমি কন্যা, আমার কাছে এস ।’ আমি কি বলিলাম মনে নাই । আমার ঘুম ভাঙ্গিয়া গেল ।’ এই বলিয়া কল্যাণী নীরব হইয়া রহিলেন ।

মহেন্দ্র বিস্মিত, স্তম্ভিত, ভীত হইয়া নীরবে রহিলেন । মার্থার উপর দোয়েল বান্ধার করিতে লাগিল । পাপিয়া স্বরে আকাশ প্রাবিত করিতে লাগিল । কোকিল দিবাগুল প্রতিধ্বনিত করিতে লাগিল । ভীমরাজ কলকণ্ঠে কানন কম্পিত করিতে লাগিল । পদতলে তটিনী মুছ কল্লোল করিতে ছিল । বায়ু বন্যপুষ্পের মুছ গন্ধ আনিয়া দিতেছিল । কোথাও মধ্যে মধ্যে নদীজলে রৌদ্র ঝিকমিকি করিতেছিল । কোথাও ভালপত্র মুছ পবনে মন্মথ শব্দ করিতেছিল । দূরে নীল পর্ব-

তশ্চেষ্টা দেখা যাইতেছিল। দুই জনে অনেকক্ষণ মুগ্ধ হইয়া নীরবে রহিলেন। অনেকক্ষণ পরে কল্যাণী পুনরপি জিজ্ঞাসা করিলেন “কি ভাবিতেছ?”

মহে। কি করিব তাহাই ভাবি—স্বপ্ন কেবল বিভীষিকা—মাত্র, আপনার মনে জন্মিয়া আপনি লয় পায়, জীবনের জল-বিন্দু—চল গৃহে যাই।

ক। যেখানে দেবতা তোমাকে যাইতে বলেন তুমি সেই-
খানে যাও—এই বলিয়া কল্যাণী কন্যাকে স্বামীর কোলে
দিলেন।

মহেন্দ্র কন্যা কোলে লইয়া জিজ্ঞাসা করিলেন “আব
তুমি—তুমি কোথায় যাইবে”—

কল্যাণী দুই হাতে দুই তোক ঢাকিয়া মাথা টিপিয়া ধরিয়া
বলিল, “আমাকেও দেবতা যেখানে যাইতে বলিয়াছেন আমিও
সেইখানে যাইব।”

মহেন্দ্র চমকিয়া উঠিল, বলিল “সে কোথা, কি প্রকারে
যাইবে?”—

কল্যাণী বিষের কোটা দেখাইলেন।

মহেন্দ্র বিস্মিত হইয়া বলিলেন, “সে কি? বিষ খাইবে?”

ক। “খাইব মনে করিয়াছিলাম, কিন্তু—” কল্যাণী নীরব
হইয়া ভাবিতে লাগিলেন। মহেন্দ্র তাঁহার মুখ চাহিয়া রহিল।
প্রতিপলকে বৎসর বোধ হইতে লাগিল। কল্যাণী আর কথা
শেষ করিল না দেখিয়া মহেন্দ্র জিজ্ঞাসা করিলেন,

“কিন্তু কি বলিতেছিলে?”

ক। খাইব মনে করিয়াছিলাম—কিন্তু তোমাকে রাখিয়া—
সুকুমারীকে রাখিয়া—বৈকুণ্ঠেও আমার যাইতে ইচ্ছা করে না।
আমি মরিব না।

এই কথা বলিয়া কল্যাণী বিষের কোটা মাঠিতে রাখিলেন । তখন দুই জনে ভূত ও ভবিষ্যৎসম্বন্ধে কথোপকথন করিতে লাগিলেন । কথায় কথায় উভয়েই অনামনস্ক হইলেন । এই অবকাশে মেয়েটি খেলা করিতে করিতে বিষের কোটা তুলিয়া লইল । কেহই তাহা দেখিলেন না ।

সুকুমারী মনে করিল, এটি বেশ খেলিবার জিনিস । কোটাটা একবার বাঁ হাতে ধরিয়া দাহিন হাতে বেশ করিয়া তাহাকে চাপড়াইল, তার পর দাহিন হাতে ধরিয়া বাঁ হাতে তাহাকে চাপড়াইল । তার পর দুই হাতে ধরিয়া টানাটানি করিল । স্মরণ্য কোটাটি খুলিয়া গেল—বড়িটি পড়িয়া গেল ।

বাপের কাপড়ের উপর ছোট গুলিটি পড়িয়া গেল—সুকুমারী তাহা দেখিল । মনে করিল, এও আর একটা খেলিবার জিনিস । কোটা ফেলিয়া দিয়া থাবা মারিয়া বড়িটি তুলিয়া লইল ।

কোটাটা সুকুমারী কেন গালে দেয় নাই বলিতে পারি না—কিন্তু বড়িটি সম্বন্ধে কালবিলম্ব হইল না । প্রাপ্ত মাত্রেণ ভোক্তব্য—সুকুমারী বড়িটি মুখে পুরিল । সেই সময়ে তাহার উপর মার নজর পড়িল ।

“কি খাইল ! কি খাইল ! সৰ্কানাশ !” কল্যাণী ইহা বলিয়া, কন্য়ার মুখের ভিতর আঙ্গুল পুরিল । তখন উভয়েই দেখিলেন যে, বিষের কোটা খালি পড়িয়া আছে । সুকুমারী তখন আর একটা খেলা পাইয়াছি মনে করিয়া দাঁত চাপিয়া—সবে গুটিকত দাঁত উঠিয়াছে—মার মুখপানে চাহিয়া হাসিতে লাগিল । ইতিমধ্যে বোধ হয় বিষবড়ির স্বাদ মুখে কদর্যা লাগিয়াছিল—কেন না কিছু পরে মেয়ে আপনি দাঁত ছাড়িয়া দিল, কল্যাণী বড়ি বাহির করিয়া ফেলিয়া দিলেন । মেয়ে কাঁদিতে লাগিল ।

বটিকা মাটিতে পড়িয়া রহিল । কল্যাণী নদী হইতে আঁচল ভিজাইয়া জল আনিয়া মেয়ের মুখে দিলেন । অতি সকাতের মহেন্দ্রকে জিজ্ঞাসা করিলেন, “একটু কি পেটে গেছে ?”

মন্দটাই আগে বাপ মার মনে আসে—যেখানে অধিক ভালবাসা সেখানে ভয়ই অধিক প্রবল । মহেন্দ্র কখন দেখেন নাই যে বড়িটা আগে কত বড় ছিল । এখন বড়িটা হাতে লইয়া অনেকক্ষণ ধরিয়া নিরীক্ষণ করিয়া বলিলেন, “বোধ হয় অনেকটা থাইয়াছে ।”

কল্যাণীরও কাজেই সেই বিশ্বাস হইল । অনেকক্ষণ ধরিয়া তিনিও বড়ি হাতে লইয়া নিরীক্ষণ করিলেন । এদিকে, মেয়ে যে ছই এক চোক গিলিয়াছিল, তাহারই গুণে কিছু বিকৃতাবস্থা-প্রাপ্ত হইল । কিছু ছটফট্ করিতে লাগিল—কাঁদিতে লাগিল—শেষ কিছু অবসন্ন হইয়া পড়িল । তখন কল্যাণী স্বামীকে বলিলেন, “আর দেখ কি ? যে পথে দেবতার ডাকিয়াছে, সেই পথে সুকুমারী চলিল—আমাকেও যাইতে হইবে ।”

এই বলিয়া, কল্যাণী বিষের বড়ি মুখে ফেলিয়া দিয়া মুহূর্ত-মধ্যে গিলিয়া ফেলিলেন ।

মহেন্দ্র রোদন করিয়া বলিলেন, “কি করিলে—কল্যাণি ও কি করিলে ।”

কল্যাণী কিছু উত্তর না করিয়া স্বামীর পদধূলি মস্তকে গ্রহণ করিলেন, “বলিলেন প্রভু, কথা কহিলে কথা বাড়িবে, আমি চলিলাম ।”

“কল্যাণি কি করিলে” বলিয়া মহেন্দ্র চীৎকার করিয়া কাঁদিতে লাগিল । অতি মুহূর্তেরে কল্যাণী বলিতে লাগিল, “আমি ভালই করিয়াছি । ছার স্ত্রীলোকের জন্য পাছে তুমি দেবতার কাছে অযত্ন কর ! দেখ আমি দেববাক্য লঙ্ঘন

করিতেছিলাম—তাই আমার মেয়ে গেল। আর অবহেলা করিলে পাছে তুমিও যাও ?”

মহেন্দ্র কাদিয়া বলিলেন, “তোমায় কোথাও রাখিয়া আসিতাম—আমাদের কাজ সিদ্ধ হইলে আবার তোমাকে লইয়া সুখী হইতাম। কল্যাণী, আমার সব ! কেন তুমি এমন কাজ করিলে ! যে হাতের জোরে আমি তরবার ধরিতাম, সেই হাতই ত কাটিলে ! তুমি ছাড়া আমি কি !”

কল্যাণী। “কোথায় আমায় লইয়া যাইতে—স্থান কোথা আছে ? মা, বাপ, বন্ধুবর্গ এই দারুণ দুঃসময়ে সকলি ত মরিয়াছে। কার ঘরে স্থান আছে, কোথায় যাইবার পথ আছে, কোথায় লইয়া যাইবে ? আমি তোমার গলগ্রহ। আমি মরিলাম ভালই করিলাম। আমায় আশীর্বাদ কর, যেন আমি সেই—সেই আলোকময় লোকে গিয়া আবার তোমার দেখা পাই।” এই বলিয়া কল্যাণী আবার স্বামীর পদরেণু গ্রহণ করিয়া মাথায় দিলেন। মহেন্দ্র কোন উত্তর না করিতে পারিয়া আবার কাদিতে লাগিলেন। কল্যাণী আবার বলিলেন,—অতি মৃদু অতি মধুর অতি স্নেহময় কণ্ঠ—আবার বলিলেন, “দেখ, দেবতার ইচ্ছা কার সাধ্য লঙ্ঘন করে। আমরা দেবতায় যাইতে আস্তা করিয়াছেন, আমি মনে করিলে কি থাকিতে পারি—আপনি না মরিতাম ত অবশ্য আর কেহ মারিত। আমি মরিয়া ভালই করিলাম। তুমি যে ব্রত গ্রহণ করিয়াছ, কায়মনোবাক্যে তাহা সিদ্ধ কর, পুণ্য হইবে। আমার তাহাতে স্বর্গলাভ হইবে। দুইজনে একত্রে অনন্ত স্বর্গ ভোগ করিব।”

এদিকে বালিকাটি একবার দুধ তুলিয়া সামলাইল—তাহার পেটে বিষ যে অল্প পরিমাণে গিয়াছিল, তাহা মারাত্মক নহে।

কিন্তু সে অময়ে সে দিকে মহেন্দ্রের মন ছিল না। তিনি

কন্যাকে কল্যাণীর কোলে দিয়া উভয়কে গাঢ় আলিঙ্গন করিয়া
 অবিরত কাদিতে লাগিলেন । তখন যেন অরণ্যমধ্য হইতে মৃদু
 অথচ মেঘগন্তীর শব্দ শুনা গেল ।

“হরে মুরারে মধুকৈটভারে

গোপাল গোবিন্দ মুকুন্দ সৌরে ।”

কল্যাণীর তখন বিষ ধরিয়া আসিতে ছিল, চেতনা কিছু
 অপহৃত হইতেছিল, তিনি মোহভরে শুনিলেন, যেন সেই
 বৈকুণ্ঠে ঐশ্বর্য অপরূপ বংশীধ্বনিতে বাজিতেছে—

“হরে মুরারে মধুকৈটভারে

গোপাল গোবিন্দ মুকুন্দ সৌরে ।”

তখন কল্যাণী অঙ্গরানন্দিত কণ্ঠে মোহভরে বলিতে
 লাগিলেন,

“হরে মুরারে মধুকৈটভারে ।”

আর বলিলেন, “প্রাণাধিক বল,

হরে মুরারে মধুকৈটভারে ।”

কানননির্গত মধুর স্বর আর কল্যাণীর মধুস্বরে বিমুক্ত হইয়া
 কাতরচিত্তে ঈশ্বর মাত্র সহায় মনে করিয়া মহেন্দ্র ডাকিল,

“হরে মুরারে মধুকৈটভারে”

তখন চারিদিক্ হইতে ধ্বনি হইতে লাগিল,

“হরে মুরারে মধুকৈটভারে”

তখন যেন গাছের পাখীরাও বলিতে লাগিল,

“হরে মুরারে মধুকৈটভারে”

নদীর কলকলেও যেন শব্দ হইতে লাগিল,

“হরে মুরারে মধুকৈটভারে”

তখন মহেন্দ্র শোকতাপ ভুলিয়া গেলেন—উন্মত্ত হইয়া

কল্যাণীর সহিত একতানে ডাকিতে লাগিলেন,

“হরে মুরারে মধুকৈটভারে”

কানন হইতেও যেন তাঁহাদের সঙ্গে একতানে শব্দ হইতে

• লাগিল,

“হরে মুরারে মধুকৈটভারে”

কল্যাণীর কণ্ঠ ক্রমে ক্ষীণ হইয়া আসিতে লাগিল, তবু ডাকিতেছেন,

“হরে মুরারে মধুকৈটভারে”

তখন ক্রমে ক্রমে কণ্ঠ নিস্তব্ধ হইল, কল্যাণীর মুখে আর শব্দ নাই, চক্ষুঃ নিমিলিত হইল, অঙ্গ শীতল হইল, মহেন্দ্র বুঝিলেন যে, কল্যাণী “হরে মুরারে” ডাকিতে ডাকিতে বৈকুণ্ঠ-ধামে গমন করিয়াছেন। তখন পাগলের ন্যায় উচ্চৈঃস্বরে কানন বিকম্পিত করিয়া, পশুপক্ষিগণকে চমকিত করিয়া মহেন্দ্র ডাকিতে লাগিলেন,

“হরে মুরারে মধুকৈটভারে”

সেই সময়ে কে আসিয়া তাঁহাকে গাঢ় আলিঙ্গন করিয়া তাঁহার সঙ্গে তেমনি উচ্চৈঃস্বরে ডাকিতে লাগিল,

“হরে মুরারে মধুকৈটভারে”

তখন সেই অনন্তের মহিমা, সেই অনন্ত অরণ্যমধ্যে, অনন্তপথগামিনীর শরীরসম্মুখে ছুইজনে অনন্তের নাম গীত করিতে লাগিলেন। পশু পক্ষী নীরব, পৃথিবী অপূর্ব শোভা-ময়ী—এই চরমগীতির উপযুক্ত মন্দির। সত্যানন্দ মহেন্দ্রকে কোলে লইয়া বসিলেন।

ত্রয়োদশ পরিচ্ছেদ ।

এদিকে রাজধানীতে রাজপথে বড় হলস্থল পড়িয়া গেল । রব উঠিল যে রাজসরকার হইতে কলিকাতায় যে খাজনা চালান যাইতেছিল, সন্ন্যাসীরা তাহা মারিয়া লইয়াছে । তখন রাজাজ্ঞানুসারে সন্ন্যাসী ধরিতে সিপাহী বরকন্দাজ ছুটিতে লাগিল । এখন সেই দুর্ভিক্ষ-পীড়িত প্রদেশে সে সময়ে প্রকৃত সন্ন্যাসী বড় ছিল না কেন না তাহারা ভিক্ষাপঞ্জীবী ; লোকে আপনি থাইতে পায়না, সন্ন্যাসীকে ভিক্ষা দেবে কে ? অতএব প্রকৃত সন্ন্যাসী বাহারা তাহারা সকলেই পেটের দায়ে কাশী প্রয়াগাদি অঞ্চলে পলায়ন করিয়াছিল । কেবল সম্ভ্রান্তেরা ইচ্ছানুসারে সন্ন্যাসিবেশ ধারণ করিত, প্রয়োজন হইলে পরিত্যাগ করিত । আজ গোলযোগ দেখিয়া, অনেকেই সন্ন্যাসীর বেশ পরিত্যাগ করিল । এজন্য বৃত্তান্ত রাজানুচরবর্গ কোথাও সন্ন্যাসী না পাইয়া কেবল গৃহস্থদিগের হাড়ি কলসী ভাঙ্গিয়া উদর অর্দ্ধপূরণপূর্ব্বক প্রতিনিবৃত্ত হইল । কেবল সত্যানন্দ কোন কালে গৈরিকবসন পরিত্যাগ করিতেন না ।

সেই কষ্টকল্লোলিনী ক্ষুদ্র নদীতীরে সেই পথের ধারেই বৃক্ষতলে নদীতটে কল্যাণী পড়িয়া আছে, মহেন্দ্র ও সত্যানন্দ পরস্পরে আলিঙ্গন করিয়া শাস্ত্রলোচনে ঈশ্বরকে ডাকিতেছেন, নজরদী জমাদার সিপাহী লইয়া, এমন সময়ে সেইখানে উপস্থিত । একেবারে সত্যানন্দের গলদেশে হস্তার্পণপূর্ব্বক বলিল, “এই শালা সন্ন্যাসী ।” আর একজন অমনি মহেন্দ্রকে ধরিল—কেন না, যে সন্ন্যাসীর সঙ্গী সে অবশ্য সন্ন্যাসী হইবে । আর এক জন শব্দোপরি লম্বমান কল্যাণীর মৃত-দেহটাও ধরিতে যাইতেছিল । কিন্তু দেখিল যে, একটা জ্বীলো-

কের মৃতদেহ—সন্ন্যাসী না হইলেও হইতে পারে। আর ধরিল না। বালিকাকেও ঐরূপ বিবেচনায় ত্যাগ করিল। পরে তাহারা কোন কথাবার্ত্তা না বলিয়া দুইজনকে বাঁধিয়া লইয়া চলিল। কল্যাণীর মৃতদেহ আর তাহার বালিকাকন্যা বিনারক্ষকে সেই বৃক্ষমূলে পড়িয়া রহিল।

প্রথমে শোকে অভিভূত এবং ঈশ্বরপ্রেমে উদ্ভ্রান্ত হইয়া মহেন্দ্র বিচেতনপ্রায় ছিলেন। কি হইতেছিল, কি হইল বুঝিতে পারেন নাই, বন্ধনের প্রতি কোন অপত্তি করেন নাই, কিন্তু দুই চারিপদ গেলে বুঝিলেন যে, আমাদিগকে বাঁধিয়া লইয়া যাইতেছে। কল্যাণীর শব পড়িয়া রহিল সংকার হইল না, শিশুকন্যা পড়িয়া রহিল, এইক্ষেণে তাহাদিগকে হিংস্র পশু খাটতে পারে, এই কথা মনোমধ্যে উদয় হইবামাত্র মহেন্দ্র দুইটি হাত পরস্পর হইতে বলে বিস্ত্রিষ্ট করিলেন, একটানে বাঁধন ছিঁড়িয়া গেল। সেই মুহূর্ত্তে এক পদাঘাতে জমাদার সাহেবকে ভূমিশয়া অবলম্বন করাইয়া একজন সিপাহীকে আক্রমণ করিতেছিলেন। তখন অপর তিনজন তাঁহাকে তিন-দিক্ হইতে ধরিয়া পুনর্বার বিজিত ও নিশ্চেষ্ট করিল। তখন দুঃখে কাতর হইয়া মহেন্দ্র সত্যানন্দ ব্রহ্মচারীকে বলিলেন, যে “আপনি একটু সহায়তা করিলেই এই পাঁচজন দুরাঙ্গাকে বধ করিতে পারিতাম।” সত্যানন্দ বলিলেন, “আমার এই প্রাচীন শরীরে বল কি—আমি যাঁহাকে ডাকিতেছিলাম, তিনি ভিন্ন আমার আর বল নাই—তুমি, যাহা অবশ্য ঘটবে তাহার বিরুদ্ধাচরণ করিও না! আমরা এই পাঁচজনকে পরাভূত করিতে পারিব না। চল কোথায় লইয়া যায় দেখি। জগদীশ্বর সকল দিক্ রক্ষা করিবেন।” তখন তাহার দুইজনে আর কোন মুক্তির চেষ্টা না করিয়া সিপাহীদের পশ্চাৎ পশ্চাৎ

চলিল। কিছু দূর গিয়া সত্যানন্দ সিংহীদিগকে জিজ্ঞাসা করিলেন, “বাপু আমি হরিনাম করিয়া থাকি—হরিনাম করার কিছু বাধা আছে?” সত্যানন্দকে ভালমাহুষ বলিয়া জমাদারের বোধ হইয়াছিল, সে বলিল, “তুমি হরিনাম কর, তোমায় বাধণ করিব না। তুমি বুড়া ব্রহ্মচারী, বোধ হয় তোমায় খালাসের হুকুমই হইবে, এই বদমাস ফাঁসি যাইবে।” তখন ব্রহ্মচারী মুছ মুছরে গান করিতে লাগিলেন।

ধীরসমীরে, যমুনাতীরে,
বসতি বনে বনমালী ।

ইত্যাদি

নগরে পৌঁছিলে তাহারা কোতয়ালের নিকট নীত হইল। কোতয়াল রাজসরকারে এতলা পাঠাইয়া দিয়া ব্রহ্মচারী ও মহেন্দ্রকে সম্প্রতি ফাটকে রাখিলেন। সে কারাগার অতি ভয়ঙ্কর, যে যাইত, সে প্রায় আর বাহির হইত না, কেন না বিচার করিবার লোক ছিল না। ইংরেজের জেল নয়—তখন ইংরেজের বিচার ছিল না। আজ নিয়মের দিন—তখন অনিয়মের দিন। নিয়মের দিনে আর অনিয়মের দিনে তুলনা কর।

চতুর্দশ পরিচ্ছেদ ।

রাত্রি উপস্থিত। কারাগারমধ্যে বদ্ধ সত্যানন্দ মহেন্দ্রকে বলিলেন, “আজ অতি আনন্দের দিন। কেন না আমরা কারাগারে বদ্ধ হইয়াছি। বল হরে মুরারে!” মহেন্দ্র কাতর স্বরে বলিল, “হরে মুরারে!”

সত্য। কাতর কেন বাপু? তুমি এ মহাব্রত গ্রহণ করিলে,

এ স্ত্রী কন্যা ত অবশ্য ত্যাগ করিতে । আর ত কোন সম্বন্ধ থাকিত না ।

মহে । ত্যাগ এক, বন্দগু আর । যে শক্তিতে আমি এ ব্রত গ্রহণ করিতাম, সে শক্তি আমার স্ত্রী কন্যার সঙ্গে গিয়াছে ।

সত্য । শক্তি হইবে । আমি শক্তি দিব । মহামন্ত্রে দীক্ষিত হও, মহাব্রত গ্রহণ কর ।

মহেন্দ্র বিরক্ত হইয়া বলিল যে “আমার স্ত্রী কন্যাকে শৃগালে কুকুরে খাইতেছে—আমাকে কোন ব্রতের কথা বলিবেন না ।”

সত্য । সে বিষয়ে নিশ্চিত থাক । সন্তানগণ তোমার স্ত্রীর সংকার করিয়াছে—কন্যাকে লইয়া উপযুক্ত স্থানে রাখিয়াছে ।

মহেন্দ্র বিস্মিত হইল, বড় বিশ্বাস করিল না, বলিল, “আপনি কি প্রকারে জানিলেন ? আপনি ত বরাবর আমার সঙ্গে ।”

সত্য । আমরা মহাব্রতে দীক্ষিত । দেবতারা আমাদের প্রতি দয়া করেন । আজি রাত্রেই তুমি সে সম্বাদ পাইবে । আজি রাত্রেই তুমি এ কারাগার হইতে মুক্ত হইবে ।

মহেন্দ্র কোন কথা কহিল না । সত্যানন্দ বুঝিলেন, যে মহেন্দ্র বিশ্বাস করিতেছে না । তখন সত্যানন্দ বলিলেন, “বিশ্বাস করিতেছ না—পরীক্ষা করিয়া দেখ ।” এই বলিয়া সত্যানন্দ কারাগারের দ্বার পর্য্যন্ত আসিলেন । কি করিলেন, অন্ধকারে মহেন্দ্র কিছু দেখিতে পাইলেন না । কিন্তু কাহার সঙ্গে কথা কহিলেন ইহা বুঝিলেন । ফিরিয়া আসিলে, মহেন্দ্র জিজ্ঞাসা করিল “কি পরীক্ষা ?”

সত্য । তুমি এখনই কারাগার হইতে মুক্তিলাভ করিবে ।

এই কথা বলিতে বলিতে কারাগারের দ্বার উন্মোচিত হইল ।

একব্যক্তি ঘরের ভিতর আসিয়া বলিল,

“মহেন্দ্র সিংহ কাহার নাম ?”

মহেন্দ্র বলিল “আমার নাম ।”

আগন্তুক বলিল, “তোমার খালাষের হুকুম হইয়াছে—
মাইতে পার ।”

মহেন্দ্র প্রথমে বিস্মিত হইল—পরে মনে করিল মিথ্যা কথা ।
পরীক্ষার্থ বাহির হইল । কেহ তাহার গতিরোধ করিল না ।
মহেন্দ্র রাজপথ পর্য্যন্ত চলিয়া গেল ।

এই অবসরে আগন্তুক সত্যানন্দকে বলিল, “মহারাজ !
আপনিও কেন যান না ? আমি আপনাই জন্য আসিয়াছি ।”

সত্য । তুমি কে ? ধীরানন্দ গোঁসাই ?

ধীর । আজ্ঞা হাঁ ।

সত্য । প্রহরী হইলে কি প্রকারে ?

ধীর । ভবানন্দ আমাকে পাঠাইয়াছেন । আমি নগরে
আসিয়া আপনারা এই কারাগারে আছেন শুনিয়া এখানে
কিছু ধুতুরা মিশান সিদ্ধি লইয়া আসিয়াছিলাম । যে খাঁ সাহেব
পাহারার ছিলেন, তিনি তাহা সেবন করিয়া ভুমিশষায় নিদ্রিত
আছেন । এই জামা জোড়া পাকড়ী বর্ষা যাহা আমি পরিয়া
আছি, সে তাঁহারই ।

সত্য । তুমি উহা পরিয়া নগর হইতে বাহির হইয়া বাও ।
আমি এক্ষণে যাইব না ।

ধীর । কেন—সে কি ?

সত্য । আজ সন্তানের পরীক্ষা ।

মহেন্দ্র ফিরিয়া আসিল । সত্যানন্দ জিজ্ঞাসা করিলেন,
“কিরিলে যে ?”

মহেন্দ্র । আপনি নিশ্চিত সিদ্ধ পুরুষ । কিন্তু আমি আপ-
নার সঙ্গে ছাড়িয়া যাইব না ।

সত্য । তবে থাক । উভয়েই আজ রাত্রে অন্য প্রকারে
মুক্ত হইব ।

ধীরানন্দ বাহিরে গেল । সত্যানন্দ ও মহেন্দ্র কারাগার
মধ্যে বাস করিতে লাগিলেন ।

পঞ্চদশ পরিচ্ছেদ ।

ব্রহ্মচারীর গান অনেকে শুনিয়াছিল । অন্যান্য লোকের
মধ্যে জীবানন্দের কাণে সে গান গেল । মহেন্দ্রের অনুবর্তী
হইবার তাহার প্রতি আদেশ ছিল, ইহা পাঠকের অরণ্য থাকিতে
পারে । পশ্চিমধ্যে একটি জীলোকের সঙ্গে সাক্ষাৎ হইয়াছিল ।
সে সাতদিন খায় নাই, রাস্তার ধারে পড়িয়াছিল । তাহার
জীবনদান জন্য জীবানন্দ দণ্ড দুই বিলম্ব করিয়াছিলেন ।
মাগীকে বাঁচাইয়া তাহাকে অতি কদর্যা ভাষায় গালি দিতে
দিতে (বিলম্বের অপরাধ তার) এখন আসিতেছিলেন ।
দেখিলেন, প্রভুকে মুসলমানে ধরিয়া লইয়া যাইতেছে—প্রভু
গান গায়িতে গায়িতে চলিয়াছেন ।

জীবানন্দ মহাপ্রভু, সত্যানন্দের সহিত সকল বুঝিলেন ।

“কুক মম বচনং সত্ত্বরচনং”—কি করিতে হইবে ?

“ধীরসমীরে, যমুনাতীরে,

বসতি বনে বনমালা ।”

নদীর ধারে কেহ আছে নাকি ? ভাবিয়া চিন্তিয়া, জীবানন্দ

নদীর ধারে ধারে চলিলেন । জীবানন্দ দেখিয়াছিলেন, যে

ব্রহ্মচারী স্বয়ং মুসলমান কর্তৃক নীত হইতেছেন। এস্থলে, ব্রহ্মচারীর উদ্ধারই তাঁহার প্রথম কাজ। কিন্তু জীবানন্দ ভাবিলেন, “এ সম্বন্ধেতর সে অর্থ নয়। তাঁর জীবনরক্ষার অপেক্ষাও তাঁহার আজ্ঞাপালন বড়—এই কথাই তাঁহার কাছে প্রথম শিখিয়াছি। অতএব তাঁহার আজ্ঞাপালনই করিব।”

নদীর ধারে ধারে জীবানন্দ চলিল। যাইতে যাইতে সেই বৃক্ষতলে নদীতীরে দেখিল যে এক স্ত্রীলোকের মৃতদেহ আর ঐক জীবিতা শিশুকন্যা। পাঠকের স্মরণ থাকিতে পারে মহেন্দ্রের স্ত্রীকন্যাকে জীবানন্দ একবারও দেখেন নাই। মনে করিলেন, হইলে হইতে পারে যে ইহারাই মহেন্দ্রের স্ত্রী কন্যা। কেন না প্রভুর সঙ্গে মহেন্দ্রকে দেখিলাম, তাহার স্ত্রী কন্যা দেখিলাম না। বাহা হউক মাতা মৃত, কন্যাটা জীবিতা। আগে ইহার রক্ষাবিধান করা চাই—নহিলে বাঘ ভালুক খাইবে। জীবানন্দ ঠাকুর এইখানেই কোথায় আছেন, তিনি স্ত্রীলোকটির সংকার করিবেন, এই ভাবিয়া জীবানন্দ বালিকাকে কোলে তুলিয়া লইয়া চলিলেন।

মেয়ে কোলে করিয়া জীবানন্দ গৌসাই সেই নিবিড় জঙ্গলের অভ্যন্তরে প্রবেশ করিলেন। জঙ্গল পার হইয়া একখানি ক্ষুদ্র গ্রামে প্রবেশ করিলেন। গ্রামখানির নাম ভৈরবীপুর। লোকে বলিত ভরুইপুর। ভরুইপুরে কতকগুলি সামান্য লোকের বাস, নিকটে আর বড় গ্রাম নাই, গ্রাম পার হইয়াই আবার জঙ্গল। চারিদিকে জঙ্গল—জঙ্গলের মধ্যে একখানি ক্ষুদ্র গ্রাম, কিন্তু গ্রামখানি বড় সুন্দর। কোমলতৃণাবৃত গোচারণভূমি, কোমল শ্যামল পল্লবযুক্ত আম, কাঁটাল, জাম, তালের বাগান, মাঝে নীলজলপরিপূর্ণ স্বচ্ছ দীর্ঘিকা, তাহাতে জলে বক, হংস, ডাইক; তীরে কোকিল, চক্রবাক, কিছু দূরে

ময়ূর উচ্চরবে কেকাধ্বনি করিতেছে। গৃহে গৃহে, প্রান্তরে গাভী, গৃহের মধ্যে মরহী, কিন্তু আজ কাল হুর্ভিক্ষে ধান নাই— কাহারও চালে একটি ময়নার পিঞ্জরে, কাহারও দেয়ালে আলিপনা—কাহারও উঠানে শাকের ভূমি। সকলই হুর্ভিক্ষপীড়িত, ক্লশ, শীর্ণ, সস্তাপিত। তথাপি এই গ্রামের লোকের একটু শ্রীচাঁদ আছে—জঙ্গলে অনেক রকম মহুবাখাদ্য জন্মে, এজন্য জঙ্গল হইতে খাদ্য আহরণ করিয়া সেই গ্রামবাসীরা প্রাণ ও স্বাস্থ্য রক্ষা করিতে পারিয়াছিল।

একটা বৃহৎ অশ্রুকানন মধ্যে একটা ছোট বাড়ী। চারিদিকে মাটির প্রাচীর, চারিদিকে চারিখানি ঘর। গৃহস্থের গোক আছে, ছাগল আছে, একটা ময়ূর আছে, একটা ময়না আছে, একটা টিয়া আছে। একটা বাঁদর ছিল, কিন্তু সেটাকে আর খাইতে দিতে পারে না বলিয়া ছাড়িয়া দিয়াছে। একটা ঢেঁকি আছে, বাহিরে খামার আছে, উঠানে লেবুগাছ আছে, গোটাকতক মল্লিকা বুঁইয়ের গাছ আছে, কিন্তু এবার তাতে ফুল নাই। সব ঘরের বারাণ্ডায় একটা একটা চরকা আছে; কিন্তু বাড়ীতে বড় লোক নাই। জীবানন্দ মেয়ে কোলে করিয়া সেই বাড়ীর মধ্যে প্রবেশ করিল।

বাড়ীর মধ্যে প্রবেশ করিয়াই জীবানন্দ একটা ঘরের বারাণ্ডায় উঠিয়া একটা চরকা লইয়া ঘেনর ঘেনর আরম্ভ করিলেন। সে ছোট মেয়েটী কখন চরকার শব্দ শুনে নাই, বিশেষতঃ মা ছাড়া হইয়া অবধি কাঁদিতেছে, চরকার শব্দ শুনিয়া ভয় পাইয়া আরও উচ্চ সপ্তকে উঠিয়া কান্দিতে আরম্ভ করিল। তখন ঘরের ভিতর হইতে একটা ১৭।১৮ বৎসরের মেয়ে বাহির হইল। মেয়েটি বাহির হইয়াই দক্ষিণ গণ্ডে দক্ষিণ হস্তের অঙ্গুলী সন্নিবিষ্ট করিয়া ঘাড় বাকাইয়া দাঁড়াইল। “এ

কি এ ? দাদা চরকা কাটো কেন ? মেয়ে কোথা পেলেন ? দাদা তোমার মেয়ে হয়েছে না কি—আবার বিয়ে করেছে না কি ? ”

জীবানন্দ মেয়েটি আনিয়া সেই যুবতীর কোলে দিয়া তাহাকে কীল মারিতে উঠিলেন, বলিলেন, “ বাঁদরী, আমার আবার মেয়ে, আমাকে কি হেজিপেজি পেলি না কি ? ঘরে দুধ আছে ? ”

তখন সে যুবতী বলিল, “ দুধ আছে বইকি, খাবে ? ”

জীবানন্দ বলিল “ হাঁ খাব । ”

তখন সে যুবতী ব্যস্ত হইয়া দুধ জ্বাল দিতে গেল । জীবানন্দ ততক্ষণ চরকা ঘেনর ঘেনর করিতে লাগিলেন । মেয়েটি সেই যুবতীর কোলে গিয়া আর কাঁদে না । মেয়েটি কি ভাবিয়াছিল বলিতে পারি না—বোধ হয় এই যুবতীকে ফুলকুমতুলা স্নানদী দেখিয়া মা মনে করিয়াছিল । বোধ হয় উননের তাপের আঁচ মেয়েটাকে একবার লাগিয়াছিল তাই সে একবার কাঁদিল । কান্না শুনিবামাত্র জীবানন্দ বলিলেন “ ও নিমি ও পোড়ারমুখি ও হনুমানি তোর এখনও দুধ জ্বাল হলো না । ” নিমি বলিল, “ হয়েছে । ” এই বলিয়া সে পাথর বাটীতে দুধ ঢালিয়া জীবানন্দের নিকট আনিয়া উপস্থিত করিল । জীবানন্দ কৃত্রিম কোপ প্রকাশ করিয়া বলিলেন “ ইচ্ছা করে যে এই তপ্ত দুধের বাটী তোর গায়ে ঢালিয়া দিই—তুই কি মনে করেছিস আমি খাব না কি ? ”

নিমি জিজ্ঞাসা করিল, “ তবে কে খাবে ? ”

জীবা । ঐ মেয়েটা খাবে দেখছিস্‌নে, ঐ মেয়েটাকে দুধ খাওয়া ।

নিমি তখন আসনপিড়ি হইয়া বসিয়া মেয়েকে কোলে

শোয়াইয়া ঝিনুক লইয়া তাহাকে ছুধ খাওয়াইতে বসিল। সহসা তাহার চক্ষু হতে ফেঁটাকতক জল পড়িল। তাহার একটা ছেলে হইয়া মরিয়া গিয়াছিল, তাহারই ঐ ঝিনুক ছিল। নিমি তখনই হাত দিয়া জল মুছিয়া হাসিতে হাসিতে জীবানন্দকে জিজ্ঞাসা করিল,

“হ্যাঁ দাদা, কার মেয়ে দাদা ?”

জীবানন্দ বলিল, “তোমার কিরে পোড়ারমুখী।”

নিমি বলিল, “আমায় মেয়েটা দেবে।”

জীবানন্দ বলিল, “তুই মেয়ে নিয়ে কি করবি।”

নিমি। “আমি মেয়েটিকে ছুধ খাওয়াব, কোলে করিব, মালুষ করিব—” বলতে বলতে ছাই পোড়ার চক্ষের জল আবার আসে, আবার নিমি হাত দিয়া মুছে, আবার হাসে।

জীবানন্দ বলিল, “তুই নিয়ে কি করবি, তোমার কত ছেলে মেয়ে হবে।”

নিমি। তা হয় হবে, এখন এ মেয়েটা দাও, এর পর না হয় নিয়ে যেও।

জীবা। তা নে, নিয়ে মরগে যা। আমি এসে মধ্যে মধ্যে দেখে যাব। উটি কায়েতের মেয়ে, আমি চল্লুম এখন—

নিমি। সে কি দাদা, খাবে না! বেলা হয়েছে যে, আমার মাথা খাও, ছুটি খেয়ে যাও।

জীবা। তোমার মাথাও খাব, আবার ছুটি খাব, তুই ত পেরে উঠবো না দিদি। মাথা রেখে ছুটি ভাত দে।

নিমি তখন মেয়ে কোলে করিয়া ভাত বাড়িতে ব্যতিব্যস্ত হইল।

নিমি পিড়ি পাতিয়া জলছড়া দিয়া, জায়গা মুছিয়া মল্লিকা-ফুলের মত পরিষ্কার অন্ন, কাঁচা কলাইয়ের দাল, জম্বুলে ডুমুরের

দালনা, পুকুরের কইমাছের মুড়োর ঝোল, এবং দুগ্ধ আনিয়া জীবানন্দকে থাইতে দিল। থাইতে বসিয়া জীবানন্দ বলিলেন,

“নিমাই দিদি, কে বলে মন্বন্তর, তোদের গাঁয়ে বুঝি মন্বন্তর আসে নি?”

নিমি বলিল, “মন্বন্তর আসবে না কেন, বড় মন্বন্তর, তা আমরা ছটা মাহুঘ ঘরে যা আছে, লোককে দি থুই ও আপনারা থাই। আমাদের গাঁয়ে বৃষ্টি হইয়াছিল, মনে নাই?—তুমি যে সেই বলিয়া গেলে, বনে বৃষ্টি হয়। তা আমাদের গাঁয়ে কিছু কিছু ধান হয়েছিল—আর সবাই নগরে বেচে এলো—আমরা বেচি নাই।”

জীবানন্দ বলিল, “বোনাই কোথা?”

নিমি ঘাড় হেঁট করিয়া চুপি চুপি বলিল, “সের ছুই তিন চাল লইয়া কোথায় বেরিয়েছেন, কে নাকি চাল চেয়েছে।”

এখন জীবানন্দের অদৃষ্টে এরূপ আহার অনেক কাল হয় নাই। জীবানন্দ আর বৃথা বাক্যব্যয়ে সময় নষ্ট না করিয়া গপ্গপ্ টপ্‌টপ্‌ মপ্‌সপ্‌ প্রভৃতি নানাবিধ শব্দ করিয়া অতি অল্প কাল মধ্যে অন্নব্যঞ্জনাদি শেষ করিলেন। এখন শ্রীমতী নিমাইমণি শুধু আপনার ও স্বামীর জন্য রাখিয়াছিলেন, আপনার ভাতগুলি দাদাকে দিয়াছিলেন, পাথর শূন্য দেখিয়া অপ্রতিভ হইয়া স্বামীর অন্নব্যঞ্জনগুলি আনিয়া ঢালিয়া দিলেন। জীবানন্দ ক্রক্ষেপ না করিয়া সে সকলই উদরনামক বৃহৎ গর্তে প্রেরণ করিলেন। তখন নিমাইমণি বলিল, “দাদা আর থাকে কিছু?”

জীবানন্দ বলিল, “আর কি আছে?”

নিমাইমণি বলিল, “একটা পাকা কাঁটাল আছে।”

নিমাই সে পাকা কাঁটাল আনিয়া দিল—বিশেষ কোন

আপত্তি না করিয়া জীবানন্দ গোস্বামী কাঁটালটাকেও সেই ধ্বংস-
পুরে পাঠাইলেন । তখন নিমাই হাসিয়া বলিল,

“ দাদা আর কিছু নাই । ”

দাদা বলিলেন, “ তবে যা, আর একদিন আসিয়া থাইব । ”

অগত্যা নিমাই জীবানন্দকে আঁচাইবার জল দিল । জল
দিতে দিতে নিমাই বলিল, “ দাদা, আমার একটা কথা
রাখিবে ? ”

জীবা । কি ?

নিমি । আমার মাথা খাও ।

জীবা । কি বল্ না পোড়ারমুখী ।

নিমি । কথা রাখিবে ?

জীবা । কি আগে বল্ না ।

নিমি । আমার মাথা খাও পায়ে পড়ি ।

জীবা । তোরা মাথাও খাই—তুই পায়েও পড়, কিন্তু কি
বল ?

নিমাই তখন এক হাতে আর এক হাতের আঙুলগুলি
টিপিয়া, ঝাড় হেঁট করিয়া, সেইগুলি নিরীক্ষণ করিয়া, একবার
জীবানন্দের মুখপানে চাহিয়া একবার মাটিপানে চাহিয়া, শেষ
মুখ ফুটিয়া বলিল, “ একবার বউকে ডাকবো ? ”

জীবানন্দ আঁচাইবার গাড়ু তুলিয়া নিমির মাথায় মারিতে
উদ্যত ; বলিলেন, “ আমার মেয়ে ফিরিয়ে দে, আর আমি
একদিন তোরা চাল দাল ফিরিয়া দিয়া যাইব । তুই বাদরী,
তুই পোড়ারমুখী, তুই যা না বলবার তাই আমাকে বলিস্ । ”

নিমাই বলিল, “ তা হউক, আমি বাদরী, আমি পোড়ার-
মুখী । একবার বৌকে ডাকবো ? ”

জীবা । আমি চল্লম, এই বলিয়া জীবানন্দ হনহন্ করিয়া

বাহির হইয়া যায়,—নিমাই গিয়া দ্বারে দাঁড়াইল, দ্বারের কপাট কঁকরু করিয়া দ্বারে পিঠ দিয়া বলিল, “আগে আমায় মেরে ফেল, তবে তুমি যাও । বোয়ের সঙ্গে না দেখা করে তুমি যেতে পারবে না ।”

জীবানন্দ বলিল, যে “আমি কত লোক মারিয়া ফেলিয়াছি তা তুমি জানিস্ ?”

এইবার নিমি রাগ করিল, “বলিল, বড় কীর্ত্তিই করেছে—স্বীত্যাগ করবে, লোক মারবে, আমি তোমায় ভয় করবো, তুমিও যে বাপের সন্তান, আমিও সেই বাপের সন্তান—লোক মারা যদি বড়াইয়ের কথা হয়, আমায় মেরে বড়াই করা ।”

জীবানন্দ হাসিল, “ডেকে নিয়ে আয়—কোন পাণ্ডিত্যকে ডেকে নিয়ে আস্বে নিয়ে আয়, কিন্তু দেখ্ ফের যদি এমন কথা বল্বে, তোকে কিছু বলি না বলি সেই শালার ভাই শালাকে মাথা মুড়াইয়া দিয়া ঘোল ঢেলে উণ্টা গাধায় চড়িয়ে দেশের বারু করে দিব ।”

নিমি মনে মনে বলিল, “আমিও তা হলে বাচি ।” এই বলিয়া হাসিতে হাসিতে নিমি বাহির হইয়া গেল, নিকটবর্ত্তী এক পর্ণকুটীরে-গিয়া প্রবেশ করিল । কুটীর মধ্যে শতগ্রন্থযুক্ত বহনপরিধানা রুম্মকেশা এক স্ত্রীলোক বসিয়া চরকা কাটিতে-ছিল । নিমাই গিয়া বলিল, “বো শিগ্গির শিগ্গির !” বো বলিল, “শিগ্গির কি নো ! ঠাকুরজামাই তোকে মেরেছে নাকি, ঘায়ে তেল মাখিয়ে দিতে হবে ?”

নিমি । কাছাকাছি বটে, তেল আছে ঘরে ?

সে স্ত্রীলোক তৈলের ভাণ্ড বাহির করিয়া দিল । নিমাই ভাণ্ড হইতে তাড়াতাড়ি অঞ্জলি অঞ্জলি তৈল লইয়া সেই স্ত্রীলোকের মাথায় মাখাইয়া দিল । তাড়াতাড়ি একটা চণন-

সই খোঁপা বাঁধিয়া দিল। তার পর তাহাকে এক কীল মারিয়া বলিল, “তোরা সেই ঢাকাই কোথা আছে বল।” সে জীলোক কিছু বিশ্ণিতা হইয়া বলিল, “কি লো তুই কি খেপেছিস্ নাকি ?”

নিমাই ছুঁ করিয়া তাহার পিঠে এক কীল মারিল, বলিল, “শাড়ী বের কর।”

রঙ্গ দেখিবার জন্য সে জীলোক শাড়ীখানি বাহির করিল। রঙ্গ দেখিবার জন্য, কেন না এত ছুঁথেও রঙ্গ দেখিবার যৈ বৃত্তি তাহা তাহার হৃদয়ে লুপ্ত হয় নাই। নবীন যৌবন; ফুল-কমলতুলা তাহার নববয়সের সৌন্দর্য্য তৈল বিনা—বেশ বিনা—আহার বিনা—সেই প্রদীপ্ত, অনন্তমেয় সৌন্দর্য্য সেই শতগ্রন্থি-যুক্ত বসনমধ্যে লুকায়িত। বর্ণে ছায়ালোকের চাকুলা, নয়নে কটাক্ষ, অধরে হাসি, হৃদয়ে দৈর্ঘ্য। আহার নাই—তবু শরীর লাবণ্যময়, বেশ ভূষা নাই, তবু সে সৌন্দর্য্য সম্পূর্ণ অভিব্যক্ত। যেমন মেঘমধ্যে বিছাৎ, যেমন মনোমধ্যে প্রতিভা, যেমন অগতের শব্দমধ্যে সঙ্গীত, যেমন মরণের ভিতর স্মৃতি, তেমনি সে রূপরাশিতে অনির্বচনীয় কি ছিল! অনির্বচনীয় মাধুর্য্য, অনির্বচনীয় উন্নতভাব, অনির্বচনীয় গ্রোম, অনির্বচনীয় ভক্তি। সে হাসিতে হাসিতে (কেহ সে হাসি দেখিল না,) হাসিতে হাসিতে সেই ঢাকাই শাড়ী বাহির করিয়া দিল। বলিল, “কি লো নিমি, কি হইবে?” নিমাই বলিল, “তুই পরবি?” সে বলিল, “আমি পরিলে কি হইবে?” তখন নিমাই তাহার কমনীয় কণ্ঠে আপনার কমনীয় বাহু বেষ্টন করিয়া বলিল, “দাদা এসেছে, তোকে যেতে বলেছে।” সে বলিল, “আমায় যেতে বলেছেন! ত ঢাকাই শাড়ী কেন, চল না এমনি বাই।” নিমাই তার গালে এক চড় মারিল—সে নিমাইয়ের

কাঁধে হাত দিয়া তাহাকে কুঠীরের বাহির করিল। বলিল, “চল এই ন্যাকড়া পরিয়া তাহাকে দেখিয়া আসি।” কিছুতেই কাপড় বদলাইল না, অগত্যা নিমাই রাজি হইল। নিমাই তাহাকে সঙ্গে লইয়া আপনার বাড়ীর দ্বার পর্য্যন্ত গেল, গিয়া তাহাকে ভিতরে প্রবেশ করাইয়া দ্বার রুদ্ধ করিয়া আপনি দ্বারে দাঁড়াইয়া রহিল।

ষোড়শ পরিচ্ছেদ।

সে স্ত্রীলোকের বয়স প্রায় পঁচিশ বৎসর, কিন্তু দেখিলে নিমাইয়ের অপেক্ষা অধিকবয়স্ক বলিয়া বোধ হয় না। মলিন গ্রন্থিবৃত্ত বসন পরিয়া সেই গৃহমধ্যে প্রবেশ করিলে, বোধ হইল যেন গৃহ আলো হইল। বোধ হইল পাতায় ঢাকা কোন গাছে কত ফুলের কুঁড়ি ছিল, হঠাৎ ফুটিয়া উঠিল; বোধ হইল যেন কোথায় গোলাবজলের কার্কা মুখ আঁটা ছিল, কে কার্কা ভাঙ্গিয়া ফেলিল। যেন কে অলস্ত অগ্নিতে ধূপ ধূনা গুগ্গুল ফেলিয়া দিল। সে রূপসী গৃহমধ্যে প্রবেশ করিয়া ইতস্ততঃ স্বামীর অব্বেষণ করিতে লাগিল, প্রথমে ত দেখিতে পাইল না। তার পর দেখিল, গৃহপ্রাঙ্গণে একটা ক্ষুদ্র বৃক্ষ আছে, আশ্রয় কাণ্ডে মাথা রাখিয়া জীবানন্দ কাঁদিতেছেন। সেই রূপসী তাঁহার নিকটে গিয়া ধীরে ধীরে তাঁহার হস্তধারণ করিল। বলি না যে তাহার চক্ষে জল আসিল না, জগদীশ্বর জানেন, যে তাহার চক্ষে যে স্রোতঃ আসিয়াছিল, বহিলে তাহা জীবানন্দকে ভাসাইয়া দিত; কিন্তু সে তাহা বহিতে দিল না। জীবানন্দের হাত হাতে লইয়া বলিল, “ছি, কাঁদিও না, আমি স্থানি তুমি

আমার জন্য কঁাদিতেছ, আমার জন্য তুমি কঁাদিও না—তুমি যেপ্রকারে আমাকে রাখিয়াছ, আমি তাহাতেই সুখী ।”

জীবানন্দ মাথা তুলিয়া চক্ষু মুছিয়া স্ত্রীকে জিজ্ঞাসা করিলেন,

“শান্তি ! তোমার এ শতগ্রন্থি মলিনবস্ত্র কেন ? তোমার ত ধনের অভাব নাই, সে বিষয়ে ত আমি তোমাকে কষ্ট দিই না ।”

শান্তি বলিল, “তুমি যে ধন দিয়াছ, তাহা তোমারই জন্য আছে। আমি টাকা লইয়া কি করিতে হয় তাহা জানি না, বখন তুমি আসিবে, বখন তুমি আমাকে আবার গ্রহণ করিবে—”

জীবা । গ্রহণ করিব—শান্তি ! আমি কি তোমায় ত্যাগ করিয়াছি ?

শান্তি । ত্যাগ নহে—যবে তোমার ব্রত সঙ্গ হইবে, যবে আবার আমায় ভালবাসিবে—

কথা শেষ না হইতেই জীবানন্দ শান্তিকে গাঢ় আলিঙ্গন করিয়া তাহার কাঁধে মাথা রাখিয়া অনেকক্ষণ নীরব হইয়া রহিলেন । দীর্ঘনিশ্বাস ত্যাগ করিয়া শেষে বলিলেন,

“কেন দেখা করিলাম !”

শান্তি । কেন করিলে—তোমার ত ব্রত ভঙ্গ করিলে ?

জীবা । ব্রতভঙ্গ হউক—প্রায়শ্চিত্ত আছে । তাহার জন্য ভাবি না, কিন্তু তোমায় দেখিয়া ত আর ফিরিয়া যাইতে পারিতেছি না । আমি এই জন্য নিমাইকে বলিয়াছিলাম যে, দেখায় কাজ নাই । তোমায় দেখিলে আমি ফিরিতে পারি না । একদিকে ধর্ম, অর্থ, কাম, মোক্ষ, জগৎসংসার একদিকে ব্রত হোম ষাগ যজ্ঞ ; সবই একদিকে, আর একদিকে তুমি । একা তুমি । আমি সকল সময়ে বুঝিতে পারি না যে, কোন দিক

ভারি হয়। দেশ ত শান্তি, দেশ লইয়া আমি কি করিব? দেশের এক কাঠা ভূঁই পেলে তোমায় লইয়া আমি স্বর্গ প্রস্তুত করিতে পারি, আমার দেশে কাজ কি? দেশের লোকের দুঃখ, যে তোমা হেন স্ত্রী পাইয়া ত্যাগ করিল—তাহার অপেক্ষা দেশে আর কে দুঃখী আছে? যে তোমার অঙ্গে শতগ্রহি বস্ত্র দেখিল, তাহার অপেক্ষা অতুর দেশে আর কে আছে? আমার সকল ধর্মের সহায় তুমি। সে ধর্ম যে ত্যাগ করিল, তার কাছে আবার সনাতনধর্ম কি? আমি কোন্ ধর্মের জন্য দেশে দেশে, বনে বনে, বন্দুক ঘাড়ে করিয়া, প্রাণিহত্যা করিয়া এই পাপের ভার সংগ্রহ করি? পৃথিবী সন্তানদের আয়ত্ত হইবে কি না জানি না; কিন্তু তুমি আমার আয়ত্ত, তুমি পৃথিবীর অপেক্ষা বড়, তুমি আমার স্বর্গ। চল গৃহে বাই—আর আমি কিরিব না।

শান্তি কিছুকাল কথা কহিতে পারিল না। তার পর বলিল। “ছি—তুমি বীর। আমার পৃথিবীতে বড় স্মৃথ যে, আমি বীরপত্নী। তুমি অধম স্ত্রীর জন্য বীরধর্ম ত্যাগ করিবে? তুমি আমার ভালবাসিও না—আমি সে স্মৃথ চাহি না—কিন্তু তুমি তোমার বীরধর্ম কখন ত্যাগ করিও না। দেখ—আমাকে একটা কথা বলিয়া যাও—এ ব্রতভঙ্গের প্রায়শ্চিত্ত কি?”

জীবানন্দ বলিলেন, “প্রায়শ্চিত্ত—দান—উপবাস—২২ কাহন কড়ি।”

শান্তি দ্বৈবৎ হাসিল। বলিল, “প্রায়শ্চিত্ত কি তা আমি জানি। এক অপরাধে যে প্রায়শ্চিত্ত—শত অপরাধে কি তাই?”

জীবানন্দ বিস্মিত ও বিষণ্ণ হইয়া জিজ্ঞাসা করিল,

“এ সকল কথা কেন?”

শান্তি । এক ভিক্ষা আছে । আমার সঙ্গে আবার দেখা না হইলে প্রায়শ্চিত্ত করিও না ।

জীবানন্দ তখন হাসিয়া বলিল, “সে বিষয়ে নিশ্চিত থাকিও । তোমাকে না দেখিয়া আমি মরিব না । মরিবার তত তাড়াতাড়ি নাই । আর আমি এখানে থাকিব না, কিন্তু চোখ ভরিয়া তোমাকে দেখিতে পাইলাম না, একদিন অবশ্য সে দেখা দেখিব । একদিন অবশ্য আমাদের মনস্কামনা সফল হইবে । আমি এখন চলিলাম, তুমি আমার এক অনুরোধ রক্ষা করিও । এ বেশভূষা ত্যাগ কর । আমার পৈতৃক ভিটায় গিয়া বাস কর ।

শান্তি জিজ্ঞাসা করিল, “তুমি এখন কোথায় যাইবে ?”

জীবা । এখন মঠে ব্রহ্মচারীর অনুরোধে যাইব । তিনি যে ভাবে নগরে গিয়াছেন, তাহাতে কিছু চিন্তাযুক্ত হইয়াছি ; দেউলে তাঁহার সন্ধান না পাই নগরে যাইব ।

সপ্তদশ পরিচ্ছেদ ।

ভবানন্দ মঠের ভিতর বসিয়া হরিগুণ গান করিতেছিলেন । এমন সময়ে বিষমমুখে ধীরানন্দ তাঁহার কাছে আসিয়া উপস্থিত হইলেন । ভবানন্দ বলিলেন, “গোসাই, মুখ অত ভারি কেন ?”

ধীরানন্দ বলিলেন, “কিছু গোলযোগ বোধ হইতেছে । কালিকার কাণ্ডটার জন্য নেড়েরা গেক্কা কাপড় দেখিতেছে, আর ধরিতেছে । অপরাপর সন্তানগণ আজ সকলেই গৈরিক বসন ত্যাগ করিয়াছে । কেবল সত্যানন্দ প্রভু গেক্কা পরিয়া

একা নগরাভিমুখে গিয়াছেন। কি জানি, যদি তিনি মুসলমানের হাতে পড়েন।”

ভবানন্দ বলিলেন, “তঁাহাকে আটক রাখে এমন মুসলমান বীরভূমে নাই। তথাপি আমি একবার নগর বেড়াইয়া আসি। তুমি মঠ রক্ষা করিও।”

এই বলিয়া ভবানন্দ এক নিভৃত কক্ষে গিয়া একটা বড় মিলুক হইতে, কতকগুলি বস্ত্র বাহির করিলেন। সহস্রা ভবানন্দের রূপান্তর হইল। গেরুয়া বসনের পরিবর্তে চুড়িদার পায়েজামা, মেরজাই, কাবা, মাথায় জামামা, এবং পায়ে নাগরা শোভিত হইল। মুখ হইতে ত্রিপুণ্ড্রাদি চন্দনচিহ্ন সকল বিলুপ্ত করিলেন। ভ্রমরকৃষ্ণগুচ্ছশোভিত সুন্দর মুখ-মণ্ডল অপূর্ণশোভা পাইল। তৎকালে তঁাহাকে দেখিয়া মোগলজাতীয় যুবাপুরুষ বলিয়া বোধ হইতে লাগিল।

ভবানন্দ এইরূপে মোগল সাজিয়া সশস্ত্র হইয়া মঠ হইতে নিষ্কান্ত হইলেন। সেখান হইতে ক্রোশেক দূরে দুইটা অতি অল্প পাহাড় ছিল। সেই পাহাড়ের উপর জঙ্গল উঠিয়াছে। সেই দুইটা পাহাড়ের মধ্যে একটা নিভৃত স্থান ছিল। তথায় অনেকগুলি অশ্ব রক্ষিত হইয়াছিল। মঠবাদীদিগের অশ্বশালা এইখানে। ভবানন্দ তাহার মধ্য হইতে একটা অশ্ব উন্মোচন করিয়া তৎপূর্বে আরোহণপূর্বক নগরাভিমুখে ধাবমান হইলেন।

যাইতে যাইতে সহস্রা তাঁহার গতিরোধ হইল। সেই পশ্চিমার্শে কলনাদিনী ভরঙ্গিনীকূলে গগনদ্রষ্ট নক্ষত্রের ন্যায়, কাদম্বিনীচ্যুত বিছাতের ন্যায়, দীপ্ত স্ত্রীমুষ্টি শয়ান দেখিলেন। দেখিলেন জীবনলক্ষণ কিছু নাই—শূন্য বিষের কোটা পড়িয়া আছে। ভবানন্দ বিস্মিত, ফ্রুঙ্ক, ভীত হইলেন। জীবানন্দে

ন্যায়, ভবানন্দও মহেন্দ্রের জীকন্যাকে দেখেন নাই। জীবানন্দ যে সকল কারণে সন্দেহ করিয়াছিলেন যে এ মহেন্দ্রের জীকন্যা হইতে পারে—ভবানন্দের কাছে সে সকল কারণ অনুপস্থিত। তিনি ব্রহ্মচারী ও মহেন্দ্রকে বন্দীভাবে নীত হইতে দেখেন নাই—কন্যাটিও সেখানে নাই। কোঁটা দেখিয়া বুঝিলেন কোন জীলোক বিষ খাইয়া মরিয়াছে। ভবানন্দ সেই শবের নিকট বসিলেন, বসিয়া কপোলে কর লগ্ন করিয়া অনেকক্ষণ ভাবিলেন। মাথায়, বগলে, হাতে, পায়ে হাত দিয়া দেখিলেন; অনেক প্রকার অপরের অপরিজ্ঞাত পরীক্ষা করিলেন। তখন মনে মনে বলিলেন, এখনও সময় আছে, কিন্তু বাঁচাইয়া কি করিব? এইরূপ ভবানন্দ অনেকক্ষণ চিন্তা করিলেন, চিন্তা করিয়া বনমধ্যে প্রবেশ করিয়া একটা বৃক্ষের কতকগুলি পাতা লইয়া আসিলেন। পাতাগুলি হাতে পিষিয়া রস করিয়া সেই শবের গুঁঠ দন্ত ভেদ করিয়া অঙ্গুলি দ্বারা কিছু মুখে প্রবেশ করাইয়া দিলেন, পরে চক্ষে ও নাসিকায় কিছু কিছু রস দিলেন—অঙ্গে সেই রস মাখাইতে লাগিলেন। পুনঃ পুনঃ এইরূপ করিতে লাগিলেন, মধ্য মধ্য নাকের কাছে হাত দিয়া দেখিতে লাগিলেন, যে নিশ্বাস বহিতেছে কি না। বোধ হইল যেন যন্ত্র বিফল হইতেছে। এইরূপ বহুক্ষণ পরীক্ষা করিতে করিতে ভবানন্দের মুখ কিছু প্রফুল্ল হইল—অঙ্গুলীতে নিশ্বাসের কিছু ক্ষীণ প্রবাহ অনুভব করিলেন। তখন আরও পত্ররস নিষেক করিতে লাগিলেন। ক্রমে নিশ্বাস প্রথরতর বহিতে লাগিল। নাড়ীতে হাত দিয়া ভবানন্দ দেখিলেন, নাড়ীর গতি হইয়াছে। শেষে অল্পে অল্পে পূর্বদিকের প্রথম প্রভাতরাগবিকাশের ন্যায়, প্রভাতপদ্মের প্রথমোন্মেষের ন্যায়, প্রথম প্রেমাহুতবের ন্যায় কলাপী চক্ষুরম্মীলন করিতে লাগিলেন। দেখিয়া ভবানন্দ

সেই অর্দ্ধজীবিত দেহ অশ্বপৃষ্ঠে তুলিয়া লইয়া দ্রুতবেগে অশ্ব
চাঁলাইয়া নগরে গেলেন ।

অষ্টাদশ পরিচ্ছেদ ।

সন্ধ্যা না হইতেই সন্তানসম্প্রদায় সকলেই জানিতে পারি-
য়াছিল, যে সতানন্দ ব্রহ্মচারী আর মহেন্দ্র দুই জনে বন্দী
হইয়া নগরের কারাগারে আবদ্ধ আছে । তখন একে একে
দুয়ে দুয়ে, দশে দশে, শতে শতে, সন্তানসম্প্রদায় আসিয়া সেই
দেবালয় বেষ্টনকারী অরণ্য পরিপূর্ণ করিতে লাগিল । সকলেই
সশস্ত্র । নয়নে রোষাঘি, মুখে দন্ত, অধরে প্রতিজ্ঞা । প্রথমে
শত, পরে সহস্র, পরে দ্বিসহস্র । এইরূপে লোকসংখ্যা বৃদ্ধি
হইতে লাগিল । তখন মঠের দ্বারে দাঁড়াইয়া তরবারহস্তে
ভবানন্দ উচ্চৈঃস্বরে বলিতে লাগিল—“আমরা অনেক দিন
হইতে মনে করিয়াছি যে এই বাবুইয়ের বাসা ভাঙ্গিয়া, এই
যবনপুরী ছারখার করিয়া অজয়ের জলে ফেলিয়া দিব । এই
শুয়ারের খোঁয়াড় আগুনে পোড়াইয়া মাতা বসুমতীকে আবার
পবিত্র করিব । ভাই, আজ সেই দিন আসিয়াছে । আমাদের
গুরু গুরু পরম গুরু, যিনি অনন্ত জ্ঞানময়, সর্বদা শুদ্ধাচার,
যিনি লোকহিতৈষী, যিনি দেশহিতৈষী, যিনি সনাতন ধর্মের
পুনঃ প্রচার জন্য শরীরপাতনপ্রতিজ্ঞা করিয়াছেন—বাহাকে
বিষ্ণুর অবতারস্বরূপ মনে করি, যিনি আমাদের মুক্তির উপায়,
তিনি আজ মুসলমানের কারাগারে বন্দী । আমাদের তরবারে
কি ধার নাই ?” হস্ত প্রসারণ করিয়া, ভবানন্দ বলিল, “এ
বাহতে কি বল নাই ?”—বক্ষে করাঘাত করিয়া বলিল, “এ

হৃদয়ে কি সাহস নাই ?—ভাই ডাক, হরে মুরারে মধুকৈটু-
ভারে !—যিনি মধুকৈটু বিনাশ করিয়াছেন—যিনি হিরণ্য-
কশিপু, কংস, দম্ভবক্র, শিশুপাল প্রভৃতি দুর্জয় অস্ত্ররগণের
নিধন সাধন করিয়াছেন—বাহার চক্রের স্বর্ঘরনির্ঘোষে মৃত্যুঞ্জয়
শব্দ, ভীত হইয়াছিলেন—যিনি অজের, রণে জয়দাতা, আমরা
তঁার উপাসক, তঁার বলে আমাদের বাহতে অনন্ত বল—তিনি
ইচ্ছাময়, ইচ্ছা করিলেই আমাদের রণজয় হইবে। চল আমরা
সেই যবনপুরী ভাঙ্গিয়া ধূলিগুড়ি করি। সেই শূকরনিবাস
অগ্নিমংস্কৃত করিয়া অজয়ে ফেলিয়া দিই। সেই বাবুইয়ের
বাসা ভাঙ্গিয়া খড়্‌ খুটা বাতাসে উড়াইয়া দিই। বল—হরে
মুরারে মধুকৈটুভারে।” তখন সেই কানন হইতে অতি ভীষণ
নাদে সহস্র সহস্র কর্ণে একেবারে শব্দ হইল, “হরে মুরারে
মধুকৈটুভারে।” সহস্র অসি একেবারে ঝনঝন শব্দ করিল।
সহস্র বল্লম ফলকসহিত উল্কে উথিত হইল। সহস্র বাহুর
আক্ষাটে বজ্রনিবাদ হইতে লাগিল। সহস্র ঢাল যোদ্ধবর্গের
কর্কশপৃষ্ঠে তড়বড় শব্দ করিতে লাগিল। মহাকোলাহলে
গুপ্ত সকল ভীত হইয়া কানন হইতে পলাইল। পক্ষী
সকল ভয়ে উচ্চরব করিয়া গগনে উঠিয়া গগন আচ্ছন্ন
করিল। সেই সময়ে শত শত জয়চক্ৰ একেবারে নিনাদিত
হইল। তখন “হরে মুরারে মধুকৈটুভারে” বলিয়া কানন
হইতে শ্রেণীবদ্ধ সন্তানের দল নির্গত হইতে লাগিল।
ধীর, গম্ভীর পদবিক্ষেপে মুখে উচ্চৈঃস্বরে হরিনাম করিতে
করিতে তাহারা সেই অন্ধকার রাত্রে নগরাভিমুখে চলিল।
বস্ত্রের মর্ম্মর শব্দ, অস্ত্রের ঝনঝনা শব্দ, কর্ণের অক্ষুট
নিনাদ, মধ্যে মধ্যে তুমুলরবে হরিবোল। ধীরে, গম্ভীরে,
সরোৎসবে, সতেজে, সেই সন্তানবাহিনী নগরে আসিয়া নগর

বিজ্ঞপ্ত করিয়া ফেলিল। অকস্মাৎ এই বজ্রাঘাত দেখিয়া নাগরিকেরা কে কোথায় পলাইল, তাহার ঠিকানা নাই। নগর-রক্ষীরা হতবুদ্ধি হইয়া নিশ্চেষ্ট হইয়া রহিল।

এদিকে সন্তানেরা প্রথমেই রাজকারাগারে গিয়া কারাগার ভাঙ্গিয়া রক্ষিবর্গকে মারিয়া ফেলিল। এবং সত্যানন্দ, মহেন্দ্রকে মুক্ত করিয়া মৃতকে তুলিয়া নৃত্য আরম্ভ করিল। তখন অতিশয় হরিবালের গোলযোগ পড়িয়া গেল। সত্যানন্দ মহেন্দ্রকে মুক্ত করিয়াই তাহারা যেখানে মুসলমানের গৃহ দেখিল আগুন ধরাইয়া দিতে লাগিল। কিন্তু এই সকল কার্যে তাহাদের অধিক সময় নষ্ট হইল। ইত্যবসরে নগরের রাজা আসজলজমান বাহাদুর নগরস্থ সৈন্য সকল সংগ্রহ করিলেন, এবং কামান, গোলা, বন্দুক লইয়া সন্তানসম্প্রদায়ের সম্মুখীন হইলেন। সন্তানদিগের অস্ত্র কেবল ঢাল তরবারি ও বল্লম। কামান, গোলা, বন্দুক দেখিয়া তাহারা কিছু ভীত হইল। তোপের মুখে অসংখ্য সন্তান মরিতে লাগিল। তখন সত্যানন্দ বলিলেন, “ফিরিয়া চল, অনর্থক বৈষ্ণববধে প্রয়োজন নাই।” তখন পরাজিত হইয়া সন্তানেরা স্তানমুখে নগর ত্যাগ করিয়া পুনর্বার জঙ্গলে প্রবেশ করিল।

উনবিংশ পরিচ্ছেদ।

জীবানন্দ চলিয়া গেলে পর শান্তি নিমাইয়ের দাওয়ার উপর গিয়া বসিল। নিমাই মেয়ে কোলে করিয়া তাহার নিকটে আসিয়া বসিল। শান্তির চোখে আর জল নাই, শান্তি চোখ মুছিয়াছে, মুখ প্রফুল্ল করিয়াছে, একটু একটু হাসিতেছে। কিছু গভীর, কিছু চিন্তাযুক্ত, অন্যমনা। নিমাই বুঝিয়া বলিল,

“তবুতো দেখা হলো।”

শান্তি কিছু উত্তর করিল না, চুপ করিয়া রহিল। নিমাই দেখিল শান্তি মনের কথা কিছু বলিবে না। শান্তি মনের কথা বলিতে ভাল বাসে না তাহা নিমাই জানিত। স্নতরাং নিমাই চেষ্টা করিয়া অন্য কথা পাড়িল—বলিল,

“দেখ দেখি বউ কেমন মেয়েটা।”

শান্তি বলিল,

“মেয়ে কোথা পেলি—তোর মেয়ে হলো কবে লো?”

নিমাই। মরণ আর কি—তুমি যমের বাড়ী যাও—এ যে দাদার মেয়ে।

নিমাই শান্তিকে আলাইবার জন্য এ কথাটা বলে নাই। “দাদার মেয়ে” অর্থাৎ দাদার কাছে যে মেয়েটা পাইয়াছি। শান্তি তাহা বুঝিল না : মনে করিল, নিমাই বুঝি হুচ ফুটাইবার চেষ্টা করিতেছে। অতএব শান্তি উত্তর করিল,

“আমি মেয়ের বাপের কথা জিজ্ঞাসা করি নাই—মার কথাই জিজ্ঞাসা করিয়াছি।”

নিমাই উচিত শান্তি পাইয়া অপ্রতিভ হইয়া জিজ্ঞাসা করিল।

“কার মেয়ে কি জানি ভাই, দাদা কোথা থেকে কুড়িয়ে মুড়িয়ে এনেছে, তা জিজ্ঞাসা করবার তো অবসর হলো না ! তা এখন মনস্তরের দিন, কত লোক ছেলে পিলে পথে ঘাটে ফেলিয়া দিয়া যাইতেছে ; আমাদের কাছেই কত মেয়ে ছেলে বেচিতে আনিয়াছিল—তা পরের মেয়ে ছেলে কে আবার, নেয় ? (আবার সেই চক্ষে সেইরূপ জল আসিল—নিমি চক্ষের জল মুছিয়া আবার বলিতে লাগিল)

“মেয়েটা দিবা সুন্দর, নাহস হুহস চাঁদপানা দেখে দাদার কাছে চেয়ে নিয়েছি।”

তার পর শাস্তি অনেকক্ষণ ধরিয়া নিমাইয়ের সঙ্গে নানা-
বিধ কথোপকথন করিল। পরে নিমাইয়ের স্বামী বাড়ী
ফিরিয়া আসিল দেখিয়া শাস্তি উঠিয়া আপনার কুটীরে গেল।
কুটীরে গিয়া দ্বার রুদ্ধ করিয়া উননের ভিতর হইতে কতকগুলি
ছাই বাহির করিয়া তুলিয়া রাখিল। অবশিষ্ট ছাইয়ের উপর,
নিজের অন্য যে ভাত রান্না ছিল, তাহা ফেলিয়া দিল। তার
পরে দাঁড়াইয়া দাঁড়াইয়া অনেকক্ষণ চিন্তা করিয়া আপনা
আপনি বলিল, “এতদিন যাহা মনে করেছিলাম, আজ তাহা
করিব। যে আশায় এতদিন করি নাই তাহা সফল হইয়াছে।
সফল কি নিষ্ফল—নিষ্ফল! এ জীবনই নিষ্ফল! যাহা সংকল্প
করিয়াছি তাহা করিব। একবারেও যে প্রায়শ্চিত্ত, শতবারেও
তাই।”

এই ভাবিয়া শাস্তি ভাত গুলি উননে ফেলিয়া দিল। বন
হইতে গাছের ফল পাড়িয়া আনিল। আগ্নের পরিবর্তে তাহাই
ভোজন করিল। তার পর তাহার যে ঢাকাই শাড়ীর উপর
নিমাইমণির চোট তাহা বাহির করিয়া তাহার পাড় ছিড়িয়া
ফেলিল। বস্ত্রের যেটুকু অবশিষ্ট রহিল গেরিমাটিতে তাহা
বেশ করিয়া রঙ করিল। বস্ত্র রঙ করিতে, শুকাইতে সন্ধ্যা
হইল। সন্ধ্যা হইলে দ্বার রুদ্ধ করিয়া, অতি চমৎকার ব্যাপারে
শাস্তি ব্যাপ্ত হইল। মাথার রুক্ষ আঙুলফলস্বিত কেশদামের
কিয়দংশ কাঁচি দিয়া কাটিয়া পৃথক করিয়া রাখিল। অবশিষ্ট
যাহা মাথায় রহিল তাহা বিনাইয়া বিনাইয়া জটা তৈয়ারি
করিল। রুক্ষ কেশ অপূর্ব বিন্যাসবিশিষ্ট জটাভারে পরিণত
হইল। তার পর সেই গৈরিক বসন খানি অন্ধেক ছিড়িয়া
খড়া করিয়া চারু অঙ্গে শাস্তি পরিধান করিল। অবশিষ্ট অন্ধেকে
হৃদয় আচ্ছাদিত করিল। কিন্তু কিছুইতো ঢাকিল না। সে

হৃদয়ের অপূর্ণ গঠন-শোভা বস্ত্রের উপর হইতে সম্পূর্ণ অনুমেয়
 রহিল। ঘরে একখানি ক্ষুদ্র দর্পণ ছিল, বহুকালের পর শান্তি
 সেখানি বাহির করিল; বাহির করিয়া দর্পণে আপনার বেশ
 আপনি দেখিল। দেখিয়া বলিল “হায়! কি করিয়া কি
 করি।” তখন দর্পণ ফেলিয়া দিয়া, যে চুলগুলি কাটা
 পড়িয়াছিল তাহা লইয়া শ্রদ্ধা গুচ্ছ রচিত করিল। চাঁদমুখ
 খানি নবীন দাড়ি গোঁপে শোভা পাইতে লাগিল। তার পর
 ঘরের ভিতর হইতে এক বৃহৎ হরিণচৰ্ম্ম বাহির করিয়া কণ্ঠের
 উপর গ্রহি দিয়া কণ্ঠ হইতে জালু পর্য্যন্ত শরীর আবৃত করিল।
 যদি কোন কবি সে রূপ দেখিত, তাহা হইলে এই নবীন
 “কৃষ্ণদ্ব্যংগ গ্রন্থমতীং দধানাকে” দেখিয়া এবার মন্থথের
 বিনাশ দূরে থাকুক, পুনরুজ্জীবনের শঙ্কা করিত। এইরূপে
 সজ্জিত হইয়া সেই নূতন সন্ন্যাসী গৃহমধ্যে ধীরে ধীরে চারি-
 দিক্ নিরীক্ষণ করিল। নিরীক্ষণ করিয়া কেহ কোথায় নাই
 নিশ্চিত বুঝিয়া, অতি গোপনে সংরক্ষিত একটি পোটকা খুলিল।
 খুলিয়া তাহা হইতে একটি মোট বাহির করিল। মোট খুলিয়া
 তাহার ভিতর যাহা ছিল তাহা মাটির উপরে সাজাইল। কতকগুলি
 তুলটের পুথি। ভাবিল “এগুলি কি করি, সঙ্গে লইয়া গিয়া
 কি হইবে? এত বা বহিব কি প্রকারে? রাখিয়া গিয়াই বা
 কি হইবে? রাখাই বা আর প্রয়োজন কি—দেখিয়াছি জানেতে
 আর স্মৃথ নাই, ও ভগ্নরাশিমাত্র—ও ভগ্ন ভগ্নই হোক।”—
 এই বলিয়া শান্তি সেই গ্রন্থগুলি একে একে জ্বলন্ত অগ্নিতে
 নিক্ষেপ করিলেন। কাব্য, সাহিত্য, অলঙ্কার, ব্যাকরণ, আর
 কি কি তাহা এখন বলিতে পারি না, পুড়িয়া ভস্মাবশিষ্ট হইল।
 রাত্রি দ্বিতীয় প্রহর হইলে শান্তি সেই সন্ন্যাসীবেশে দ্বারো-
 দ্যাটন, পূৰ্ব্বক অন্ধকারে একাকিনী গভীর বনমধ্যে প্রবেশ

করিলেন । গ্রামবাসীগণ সেই নিশীথ কাননমধ্যে অপূৰ্ণ গীতধ্বনি শ্রবণ করিল ।

গীত । *

“দড় বড়ি ঘোড় চড়ি কোথা তুমি যাওরে ।”

সমরে চলিহু আমি হামে না ফিরাও রে ।

হরি হরি হরি হরি বলি রণ রঙ্গে,

ঝাপ দিব প্রাণ আজি সমর তরঙ্গে,

“তুমি কার, কে তোমার, কেন এসো সঙ্গে,

রমণীতে নাহি সাধ, রণজয় গাও রে ॥”

২

“পায়ে ধরি প্রাণনাথ আমাছেড়ে যেওনা ।”

“ওই শুন বাজে ঘন রণজয় বাজনা ।

নাচিছে তুরঙ্গ মোর রণ করে কামনা,

উড়িল আমার মন, ঘরে আর রবনা,

রমণীতে নাহি সাধ রণজয় গাওরে ।”

বিংশ পরিচ্ছেদ ।

পরদিন আনন্দ মঠের ভিতর নিভৃত কক্ষে বসিয়া ডগ্গোং-

সাহ সন্তাননায়ক তিন জন কথোপকথন করিতেছিলেন । জীবানন্দ সত্যানন্দকে জিজ্ঞাসা করিলেন, “মহারাজ! দেবতা ঐমাদিগের প্রতি এমন অগ্রসর কেন? কি দোষে আমরা মুসলমানের নিকট পরাভূত হইলাম?”

সত্যানন্দ বলিলেন, “দেবতা অগ্রসর নহেন । যুদ্ধে জয়

* রাগিনী বাগীশ্বরী—ভাল আড়া ।

পরাজয় উভয়ই আছে। সে দিন আমরা জয়ী হইয়াছিলাম, আজ পরাভূত হইয়াছি। শেষ জয়ই জয়। আমার নিশ্চিত ভরসা আছে, যে যিনি এতদিন আমাদিগকে দয়া করিয়াছেন, সেই শঙ্খ-চক্র-গদা-পদ্মধারী বনমালী আবার পুনর্বার দয়া করিবেন। তাহার পাদ স্পর্শ করিয়া যে মহাত্মতে আমরা ব্রতী হইয়াছি, অবশ্য সে ব্রত আমাদিগকে সাধন করিতে হইবে। বিমুখ হইলে আমরা অনন্ত নরক ভোগ করিব। আমাদের ভাবী মঙ্গলের বিষয়ে আমার সন্দেহ নাই। কিন্তু যেমন দৈবানুগ্রহ ভিন্ন কোন কার্য সিদ্ধ হইতে পারে না, তেমনি পুরুষকারও চাই। আমরা যে পরাভূত হইলাম, তাহার কারণ এই, যে আমরা নিরস্ত্র। গোলাগুলি বন্দুক কামানের কাছে লাটি সোঁটা বল্লমে কি হইবে। অতএব আমাদিগের পুরুষকারের লাঘব ছিল বলিয়াই এই পরাভব হইয়াছে। এক্ষণে আমাদের কর্তব্য, যাহাতে আমাদিগেরও ঐরূপ অস্ত্রের অপ্রতুল না হয়।”

জীব। সে অতি কঠিন ব্যাপার।

সত্য। কঠিন ব্যাপার জীবানন্দ? সন্তান হইয়া তুমি এমন কথা মুখে আনিলে? সন্তানের পক্ষে কঠিন কাজ আছে কি?

জীব। কিপ্রকারে তাহার সংগ্রহ করিব আজ্ঞা করুন।

সত্য। সংগ্রহের জন্য আমি অদ্য রাত্রে তীর্থযাত্রা করিব। বতদিন না ফিরিয়া আসি, তত দিন তোমরা কোন গুরুতর ব্যাপারে হস্তক্ষেপণ করিও না। কিন্তু সন্তানদিগের একতা রক্ষা করিও। তাহাদিগের গ্রাসাচ্ছাদন যোগাইও, এমং নীর রণজয়ের জন্য অর্থভাণ্ডার পূর্ণ করিও। এই ভার তোমাদিগের দুই জনের উপর রহিল।

ভবানন্দ বলিল, “তীর্থযাত্রা করিয়া এ সকল সংগ্রহ করি-

বেন কি প্রকারে? গোলাগুলী বন্দুক কামান কিনিয়া পাঠাইতে বড় গোলামাল হইবে। আর এত পাইবেন বা কোথা, বেঁচিবে বা কে, আনিবে বা কে?”

সত্য। কিনিয়া আনিয়া আমরা কন্ম নির্বাহ করিতে পারিব না। আমি কারিগর পাঠাইয়া দিব, এইখানে প্রস্তুত করিতে হইবে।

জীব। সে কি? এই আনন্দ মঠে?

সত্য। তাও কি হয়? ইহার উপায় আমি বহুদিন হইতে চিন্তা করিতেছি। ঈশ্বর অদ্য তাহার স্ববোগ করিয়া দিয়াছেন। তোমরা বলিতেছিলে, ভগবান্ প্রতিকূল। আমি দেখিতেছি তিনি অলুকূল।

ভব। কোথায় কারখানা হইবে?

সত্য। পদচিহ্নে।

জীব। সে কি? সেখানে কি প্রকারে হইবে?

সত্য। নহিলে কি জন্য আমি মহেন্দ্র সিংহকে এ মহাব্রত গ্রহণ করাইবার জন্য এত আকিঞ্চন করিয়াছি?

ভব। মহেন্দ্র কি ব্রত গ্রহণ করিয়াছেন?

সত্য। ব্রত গ্রহণ করে নাই, করিবে। আজ রাত্রে তাহাকে দীক্ষিত করিব।

জীব। কই, মহেন্দ্র সিংহকে ব্রত গ্রহণ করাইবার জন্য ক্রি আকিঞ্চন হইয়াছে, তাহা আমরা দেখি না। তাহার স্ত্রী কন্যার কি অবস্থা হইয়াছে? কোথায় তাহাদিগকে রাখিল? আমি আজ একটি কন্যা নদীতীরে পাইয়া, আমার ভগিনীর নিকট রাখিয়া আসিয়াছি। সেই কন্যার নিকট একটি সুন্দরী স্ত্রীলোক মরিয়া পড়িয়াছিল। সে তো মহেন্দ্রের স্ত্রী কন্যা নয়? আমার তই বোধ হইয়াছিল।

সত্য। সেই মহেন্দ্রের স্ত্রী কন্যা।

ভবানন্দ চমকিয়া উঠিলেন। তখন তিনি বুঝিলেন যে, যে স্ত্রীলোককে তিনি ঔষধবলে পুনর্জীবিত করিয়াছিলেন সেই মহেন্দ্রের স্ত্রী কন্যাণী। কিন্তু এক্ষণে কোন কথা প্রকাশ করা আবশ্যিক বিবেচনা করিলেন না।

জীবানন্দ বলিল, “মহেন্দ্রের স্ত্রী মরিল কিসে?”

সত্য। বিষ পান করিয়া।

জীব। কেন সে বিষ খাইল?

সত্য। ভগবান্ তাহাকে প্রাণত্যাগ করিতে স্বপ্নাদেশ করিয়াছিলেন।

ভব। সে স্বপ্নাদেশ কি সন্তানের কার্যোদ্ধারের জন্যই হইয়াছিল?

সত্য। মহেন্দ্রের কাছে সেইরূপই শুনিলাম। এক্ষণে সায়াহ্নকাল উপস্থিত, আমি সায়াংকৃত্যাদি সমাপনে চলিলাম। তৎপরে নূতন সন্তানদিগকে দীক্ষিত করিতে প্রবৃত্ত হইব।

ভব। সন্তানদিগকে? কেন মহেন্দ্র বাতীত আর কেহ আপনার নিজ শিষ্য হইবার স্পর্ধা রাখে না কি?

সত্য। হাঁ, আর একটা নূতন লোক। পূর্বে আমি তাহাকে কখন দেখি নাই। আজ নূতন আমার কাছে আসিয়াছে। সে অতি তরুণবয়স্ক যুবা পুরুষ। আমি তাহার আকারেজিতে ও কথা বার্তায় অতিশয় প্রীত হইয়াছি। খাঁটি সোপা বলিয়া তাহাকে বোধ হইয়াছে। তাহাকে সন্তানের কার্যশিক্ষা করাইবার ভার, জীবানন্দের প্রতি রহিল। কেন না জীবানন্দ, লোকের চিন্তাকর্ষণে বড় সূক্ষ্ম। আমি চলিলাম, তোমাদের প্রতি আমার একটা উপদেশ বাকি আছে।

অতিশয় মনঃসংযোগ পূর্বক তাহা শ্রবণ কর।

তখন উভয়ে যুক্ত-কর হইয়া নিবেদন করিল, আঞ্জা করুন ।

সত্যানন্দ বলিলেন “তোমরা দুই জনে যদি কোন অপরাধ করিয়া থাক, অথবা আমি ফিরিয়া আসিবার পূর্বে কর, তবে তাহার প্রায়শ্চিত্ত আমি না আসিলে করিও না । আমি আসিলে, প্রায়শ্চিত্ত অবশ্য কর্তব্য হইবে ।”

এই বলিয়া সত্যানন্দ স্বস্থানে প্রস্থান করিলেন । ভবানন্দ এবং জীবানন্দ উভয়ে পরস্পরের মুখ চাওয়াচাওয়ি করিল ।

ভবানন্দ বলিল “তোমার উপর নাকি ?”

জীব । বোধ হয় । ভগিনীর বাড়ীতে মহেন্দ্রের কথা রাখিতে গিয়াছিলাম ।

ভব । তাতে দোষ কি, সেটা তো নিষিদ্ধ নহে । ব্রাহ্মণীর সঙ্গে সাক্ষাৎ করিয়া আসিয়াছ কি ?

জীব । বোধ হয়, গুরুদেব তাই মনে করেন ।

একবিংশ পরিচ্ছেদ ।

সাম্যাকৃত্য সমাপনান্তে মহেন্দ্রকে ডাকিয়া সত্যানন্দ আদেশ করিলেন,

“তোমার কথা জীবিত আছে ।”

মহে । কোথায় মহারাজ ?

সত্য । তুমি আমাকে মহারাজ বলিতেছ কেন ?

মহে । সকলেই বলে তাই । মঠের অধিকারীদিগকে রাজসম্বোধন করিতে হয় । আমার কথা কোথায় মহারাজ !

সত্য। তা শুনিবার আগে, একটা কথা'র স্বরূপ উত্তর দাও। তুমি সন্তানধর্ম গ্রহণ করিবে?

মহে। তাহা নিশ্চিত মনে মনে স্থির করিয়াছি।

সত্য। তবে কথা কেথায় শুনিতো চাহিও না।

মহে। কেন মহারাজ!

সত্য। যে এ ব্রত গ্রহণ করে, তাহার স্ত্রী, পুত্র, কন্যা, স্বজনবর্গ কাহারও সঙ্গে সম্বন্ধ রাখিতে নাই। স্ত্রী, পুত্র, কন্যার মুখ দেখিলেও প্রায়শ্চিত্ত আছে। যত দিন না সন্তানের মানস সিদ্ধ হয়, তত দিন, তুমি কন্যার মুখ দেখিতে পাইবে না। অতএব যদি সন্তানধর্ম গ্রহণ স্থির হইয়া থাকে, তবে কন্যার সন্ধান জানিয়া কি করিবে? দেখিতে ত পাইবে না।

মহে। এ কঠিন নিয়ম কেন প্রভু?

সত্য। সন্তানের কাজ অতি কঠিন কাজ। যে সর্ব-ত্যাগী, সে ভিন্ন অপর কেহ এ কাজের উপযুক্ত নহে। মায়ারজুতে ঘাহার চিত্ত বদ্ধ থাকে, লকে বাধা ঘুড়ির মত সে কখন মাটি ছাড়িয়া স্বর্গে উঠিতে পারে না।

মহে। মহারাজ, কথা ভাল বুঝিতে পারিলাম না। যে স্ত্রী পুত্রের মুখ দর্শন করে, সে কি কোন গুরুতর কার্য্যের অধিকারী নহে?

সত্য। পুত্র কলত্রের মুখ দেখিলেই আমরা দেবতার কাজ ভুলিয়া যাই। সন্তানধর্মের নিয়ম এই যে, যে দিন প্রয়োজন হইবে, সেই দিন সন্তানকে প্রাণত্যাগ করিতে হইবে। তোমার কন্যার মুখ মনে পড়িলে তুমি কি তাহাকে রাখিয়া মরিতে পারিবে?

মহে। তাহাকে না দেখিলেই কি কন্যাকে ভুলিব?

সত্য। না ভুলিতে পার এ ব্রত গ্রহণ করিও না।
মহে। সন্তান মাঝেই কি এইরূপ পূজ কনডকে
বিস্মৃত হইয়া ব্রত গ্রহণ করিয়াছে? তাহা হইলে সন্তা-
নেরা সংখ্যায় অতি অল্প।

সত্য। সন্তান দ্বিবিধ, দীক্ষিত আর অদীক্ষিত।
যাহারা অদীক্ষিত, তাহারা সংসারী বা ভিখারী। তাহারা
কেবল যুদ্ধের সময় আসিয়া উপস্থিত হয়, লুটের ভাগ বা
অন্য পুরস্কার পাইয়া চলিয়া যায়। যাহারা দীক্ষিত
তাহারা সর্বভাগী। তাহারাই সম্প্রদায়ের কর্তা। তো-
মাকে অদীক্ষিত সন্তান হইতে অনুরোধ করি না, যুদ্ধের
জন্য লাঠী সড়কীওয়ালা অনেক আছে। দীক্ষিত না
হইলে তুমি সম্প্রদায়ের কোন গুরুতর কার্যের অধিকারী
হইবে না।

মহে। দীক্ষা কি? দীক্ষিত হইতে হইবে কেন?
আমি ত ইতিপূর্বেই মন্ত্র গ্রহণ করিয়াছি।

সত্য। সে মন্ত্র ত্যাগ করিতে হইবে। আমার নিকট
পুনর্বার মন্ত্র লইতে হইবে।

মহে। মন্ত্র ত্যাগ করিব কি প্রকারে?

সত্য। আমি সে পদ্ধতি বলিয়া দিতেছি।

মহে। নূতন মন্ত্র লইতে হইবে কেন?

সত্য। সন্তানেরা বৈষ্ণব।

মহে। ইহা বুঝিতে পারি না। সন্তানেরা বৈষ্ণব কেন?
বৈষ্ণবের অহিংসাই পরম ধর্ম।

সত্য। সে চৈতন্যদেবের বৈষ্ণব। নাস্তিক বৌদ্ধধর্মের
অনুকরণে যে অপ্রকৃত বৈষ্ণবতা উৎপন্ন হইয়াছিল, এ তাহারই
লক্ষণ। প্রকৃত বৈষ্ণবধর্মের লক্ষণ দুষ্ঠের দমন, ধূরিত্রীর

উদ্ধার । কেন না, বিষ্ণুই সংসারের পালনকর্তা । দশবার শরীর ধারণ করিয়া পৃথিবী উদ্ধার করিয়াছেন । কেশী, হিরণ্য কশিপু, মধুকৈটভ, মুর, নরক প্রভৃতি দৈত্যগণকে, রাবণাদি রাক্ষসগণকে, কংস, শিশুপাল প্রভৃতি রাজগণকে তিনিই যুদ্ধে ধ্বংস করিয়াছিলেন । তিনিই জ্যোতা, জয়দাতা, পৃথিবীর উদ্ধার-কর্তা, আর সন্তানের ইষ্টদেবতা । চৈতন্যদেবের বৈষ্ণবধর্ম প্রকৃত বৈষ্ণবধর্ম নহে—উহা অর্দ্ধেক ধর্ম মাত্র । চৈতন্যদেবের বিষ্ণু প্রেমময়—কিন্তু ভগবান্ কেবল প্রেমময় নহেন—তিনি অনন্ত শক্তিময় । চৈতন্য দেবের বিষ্ণু শুধু প্রেমময়—সন্তানের বিষ্ণু শুধু শক্তিময় । আমরা উভয়েই বৈষ্ণব—কিন্তু উভয়েই অর্দ্ধেক বৈষ্ণব । কথাটা বুঝিলে ?

মহে । না । এ যে কেমন নূতন নূতন কথা শুনিতেছি । কাশিমবাজারে একটা পাদরির সঙ্গে আমার দেখা হইয়াছিল—সে ঐ রকম কথা সকল বলিল—অর্থাৎ ঈশ্বর প্রেমময়—তোমরা যীশুকে প্রেম কর—এ যে সেই রকম কথা ।

সত্য । যে রকম কথায় আমাদের চতুর্দশ পুরুষ বুঝিয়া আসিতেছে, সেই রকম কথায় আমি তোমায় বুঝাইতেছি । ঈশ্বর ত্রিগুণাত্মক তাহা শুনিয়াছ ?

মহে । হাঁ । সত্ত্ব, রজঃ, তমঃ—এই তিন গুণ ।

সত্য । ভাল । এই তিনটি গুণের পৃথক পৃথক উপাসনা ।

সত্ত্ব গুণ হইতে তাঁহার দয়াদাক্ষিণ্যাদির উৎপত্তি, তাহার উপাসনা ভক্তির দ্বারা করিবে । চৈতন্যের সম্প্রদায় তাহা করে । আর রজোগুণ হইতে তাঁহার শক্তির উৎপত্তি ; ইহার উপাসনা যুদ্ধের দ্বারা—দেবদেবীদিগের নিধন দ্বারা—আমরা তাহা করি । আর তমোগুণ হইতে ভগবান্ শরীরী—চতুর্ভূজাদি রূপ ইচ্ছাক্রমে ধারণ করিয়াছেন । শ্রক্ চন্দনাদি

উপহারের দ্বারা সে গুণের পূজা করিতে হয়—সর্বসাধারণে তাহা করে। এখন বুঝিলে?

মহে। বুঝিলাম। সন্তানেরা তবে উপাসক সম্প্রদায় মাত্র?

সত্য। তাই। আমরা রাজ্য চাহি না—কেবল মুসলমানেরা ভগবানের বিদ্বেরী বলিয়া তাহাদের সবংশে নিপাত করিতে চাই।

দ্বাবিংশ পরিচ্ছেদ।

সত্যানন্দ কথাবার্তা সমাপনান্তে মহেন্দ্রের সহিত সেই মঠস্থ দেবালয়াভ্যন্তরে, যেখানে সেই অপূর্ণ শোভাময় প্রকাণ্ডাকার চতুর্ভুজমূর্তি বিরাজিত, তথায় প্রবেশ করিলেন। সেখানে তখন অপূর্ণ শোভা। রজত, স্বর্ণ ও রত্নে রঞ্জিত বহুবিধ প্রদীপে, মন্দির আলোকিত হইয়াছে। রাশি রাশি পুষ্প স্তূপাকারে শোভা করিয়া মন্দির আয়োদিত করিতেছিল। মন্দিরে আর একজন উপবেশন করিয়া মুছ মুছ “হরে মুরারে” শব্দ করিতেছিল। সত্যানন্দ মন্দির মধ্যে প্রবেশ করিবামাত্র সে গাত্রোত্থান করিয়া প্রণাম করিল। ব্রহ্মচারী জিজ্ঞাসা করিলেন,

“তুমি দীক্ষিত হইবে?”

সে বলিল, “আমাকে অনুগ্রহ করুন।”

তখন তাহাকে ও মহেন্দ্রকে সম্বোধন করিয়া সত্যানন্দ বলিলেন, “তোমরা যথাবিধ ঋত, সংযত, এবং অনশন আছ ত?”

উত্তর। আছি।

সত্য। তোমরা এই ভগবৎসাক্ষাৎ প্রতিজ্ঞা কর। সন্তান-
ধর্মের নিয়ম সকল পালন করিবে ?

উত্তরে। করিব।

সত্য। যত দিন না মাতার উদ্ধার হয়, তত দিন গৃহধর্ম
পরিত্যাগ করিবে ?

উত্ত। করিব।

সত্য। মাতা পিতা ত্যাগ করিবে ?

উত্ত। করিব।

সত্য। ভ্রাতা ভগিনী ?

উত্ত। ত্যাগ করিব।

সত্য। দারাসুত ?

উত্ত। ত্যাগ করিব।

সত্য। আত্মীয়-স্বজন ? দাস দাসী ?

উত্ত। সকলই ত্যাগ করিলাম।

সত্য। ধন—সম্পদ—ভোগ ?

উত্ত। সকলই পরিত্যজ্য হইল।

সত্য। ইন্দ্রিয় জয় করিবে ? স্ত্রীলোকের সঙ্গে কখন একা-
সনে বসিবে না ?

উত্ত। বসিব না। ইন্দ্রিয় জয় করিব।

সত্য। ভগবৎ সাক্ষাৎকার প্রতিজ্ঞা কর, আপনার জন্য
বা স্বজনের জন্য অর্থোপার্জন করিবে না ? যাহা উপার্জন
করিবে তাহা বৈষ্ণব ধনাগারে দিবে ?

উত্ত। দিব।

সত্য। সনাতন ধর্মের জন্য স্বয়ং অস্ত্র ধরিয়া যুদ্ধ
করিবে ?

উভ। করিব ?

সত্য। রণে কখন ভঙ্গ দিবে না ?

উভ। না।

সত্য। যদি প্রতিজ্ঞা ভঙ্গ হয় ?

উভ। অনন্ত চিন্তায় প্রবেশ করিয়া অথবা বিষ পান করিয়া প্রাণত্যাগ করিব।

সত্য। আর এক কথা—জাতি। তোমরা কি জাতি ?
মহেন্দ্র কায়স্থ জানি। অপরটি কি জাতি ?

অপর ব্যক্তি বলিল “আমি ব্রাহ্মণকুমার।”

সত্য। উত্তম। তোমরা জাতিত্যাগ করিতে পারিবে ?
সকল সন্তান একজাতীয়। এ মহা ব্রতে ব্রাহ্মণ শূদ্র বিচার
নাই। তোমরা কি বল ?

উভ। আমরা সে বিচার করিব না। আমরা সকলেই
এক মায়ের সন্তান।

সত্য। তবে তোমাদিগকে দীক্ষিত করিব। তোমরা যে
সকল প্রতিজ্ঞা করিলে তাহা ভঙ্গ করিও না। মুরারি স্বয়ং
ইহার সাক্ষী। যিনি রাবণ, কংস, হিরণ্যকশিপু, জরাসন্ধ,
শিশুপাল প্রভৃতি বিনাশহেতু, যিনি সর্বাস্ত্রার্থামী, সর্বজয়ী,
সর্বশক্তিমান ও সর্বনিয়ন্তা, যিনি ইন্দ্রের বজ্রে ও মার্কজারের
নখে তুল্যরূপে বাস করেন, তিনি প্রতিজ্ঞাভঙ্গকারীকে বিনষ্ট
করিয়া অনন্ত নরকে প্রেরণ করিবেন।

উভ। তথাস্তু।

সত্য। তোমরা গাও “বন্দে মাতরং।”

উভয়ে সেই নিভৃত মন্দিরমধ্যে মাতৃস্তোত্র গীত করিল।
ব্রহ্মচারী তখন তাহাদিগকে যথাবিধি দীক্ষিত করিলেন।

ত্রয়োবিংশ পরিচ্ছেদ ।

দীক্ষা সমাপনান্তে সত্যানন্দ, মহেন্দ্রকে অতি নিভৃত স্থানে লইয়া গেলেন । উভয়ে উপবেশন করিলে সত্যানন্দ বলিতে লাগিলেন,

“দেখ বৎস! তুমি যে এই মহাব্রত গ্রহণ করিলে, ইহাতে ভগবান্ আমাদের প্রতি অনুকূল বিবেচনা করি । তোমার দ্বারা মার স্বমহৎ কার্য্য অনুষ্ঠিত হইবে । তুমি যত্নে আমার আদেশ শ্রবণ কর । তোমাকে জীবানন্দ, ভবানন্দের সঙ্গে বনে বনে ফিরিয়া যুদ্ধ করিতে বলি না । তুমি পদচিহ্নে ফিরিয়া যাও । স্বধামে থাকিয়াই তোমাকে সন্ন্যাস-ধর্ম্ম পালন করিতে হইবে ।”

মহেন্দ্র শুনিয়া বিস্মিত ও বিমর্ষ হইলেন । কিছু বলিলেন না । ব্রহ্মচারী বলিতে লাগিলেন, “এক্ষণে আমরা দিগের আশ্রয় নাই, এমন স্থান নাই যে প্রবল সেনা আসিয়া আমাদের বিরোধ করিলে আমরা খাদ্য সংগ্রহ করিয়া, দ্বার রুদ্ধ করিয়া দশ দিন নির্বিরে থাকি । আমরা দিগের গড় নাই । তোমার অট্টালিকা আছে, তোমার গ্রাম তোমার অধিকার । আমার ইচ্ছা সেইখানে একটি গড় প্রস্তুত করি । পশ্চিমা প্রাচীরের দ্বারা পদচিহ্ন বেষ্টিত করিয়া মাঝে মাঝে তাহাতে ঘাঁটি বসাইয়া দিলে, আর বাঁধের উপর কামান বসাইয়া দিলে উত্তম গড় প্রস্তুত হইতে পারিবে । তুমি গৃহে গিয়া বাস কর, ক্রমে ক্রমে ছই হাজার সন্তান সেখানে গিয়া উপস্থিত হইবে । তাহাদিগের দ্বারা গড়, ঘাঁটির বাঁধ এই সকল তৈয়ার করিতে থাকিবে । তুমি সেখানে উত্তম লৌহনির্ম্মিত এক ঘর প্রস্তুত করাইবে । সেখানে সন্তানদিগের অর্থের ভাণ্ডার হইবে ।

সুবর্ণে পূর্ণ সিন্দুক সকল তোমার কাছে একে একে প্রেরণ করিব। তুমি সেই সকল অর্থের দ্বারা এই সকল কার্য্য নিৰ্ব্বাহ করিবে। আর আমি নানা স্থান হইতে রুতকস্মা শিল্পী সকল আনাইতেছি। শিল্পী সকল আসিলে তুমি পদটিছে কারখানা স্থাপন করিবে। সেখানে কামান, গোলা, বারুদ, বন্দুক প্রস্তুত করাইবে। এই জন্য তোমাকে গৃহে যাইতে বলিতেছি।”

মহেন্দ্র স্বীকৃত হইল।

চতুর্বিংশ পরিচ্ছেদ।

মহেন্দ্র সত্যানন্দের পাদবন্দনা করিয়া বিদায় হইলে, তাহার সঙ্গে যে দ্বিতীয় শিষ্য, সেই দিন দীক্ষিত হইয়াছিলেন, তিনি আসিয়া সত্যানন্দকে প্রণাম করিলেন। সত্যানন্দ আশীর্ব্বাদ করিয়া কৃষ্ণাজিনের উপর বসিতে অনুমতি করিলেন। পরে অন্যান্য মিষ্ট কথার পর বলিলেন, “কেমন কৃষ্ণে তোমার গাঢ় ভক্তি আছে কি না?”

শিষ্য বলিল, “কি প্রকারে বলিব। আমি যাহাকে ভক্তি মনে করি, হয় ত সে ভগামী, নয় ত আত্ম-প্রতারণা।”

সত্যানন্দ সন্তুষ্ট হইয়া বলিলেন, “ভাল বিবেচনা করিয়াছ। যাহাতে ভক্তি দিন দিন প্রগাঢ় হয়, সেই অনুষ্ঠান করিও। আমি আশীর্ব্বাদ করিতেছি, তোমার বন্ধ সফল হইবে। কেন না তুমি অতি নবীনবয়ঃ। বৎস, তোমায় কি বলিয়া ডাকিব, তাহা এ পর্য্যন্ত জিজ্ঞাসা করি নাই।”

নূতন সন্তান বলিল, “আপনার বাহা অভিরুচি, আমি বৈষ্ণবের দাসানুদাস।”

সত্য। তোমার নবীন বয়স দেখিয়া তোমায় নবীনানন্দ বলিতে ইচ্ছা করে—অতএব এই নাম তুমি গ্রহণ কর। কিন্তু একটা কথা জিজ্ঞাসা করি, তোমার পূর্বের কি নাম ছিল? যদি বলিতে কোন বাধা থাকে, তথাপি বলিও। আমার কাছে বলিলে কর্ণাস্তরে প্রবেশ করিবে না। সন্তান-ধর্মের মর্ম এই—যে যাহা অবাচ্য, তাহাও গুরুর নিকট বলিতে হয়। বলিলে কোন ক্ষতি হয় না।

শিষ্য। আমার নাম শান্তিরাম দেবশর্মা।

সত্য। তোমার নাম শান্তিমণি পাপিষ্ঠা। এই বলিয়া সত্যানন্দ, শিষ্যের কাল কুচকুচে দেড় হাত লম্বা দাড়ি বাম হাতে জড়াইয়া ধরিয়া এক টান দিলেন। আল দাড়ি খসিয়া পড়িল।

সত্যানন্দ বলিলেন,

“ছি মা! আমার সঙ্গে প্রতারণা—আর যদি আমাকেই ঠকাবে, ত এ বয়সে দেড় হাত দাড়ি কেন? আর দাড়ি খাট করিলেও কণ্ঠের স্বর—ও চখের চাহনি, এ বুড়োর কাছে কি লুকাতে পার? যদি এমন নির্দোষই হইতাম, তবে কি এত বড় কাজে হাত দিতাম?”

শান্তি পোড়ারমুখী, তখন দুই হাতে দুই চোক ঢাকা দিয়া কিছু ক্ষণ অধোবদনে বসিল। পরক্ষণেই হাত নামাইয়া বুড়োর মুখের উপর বিলোল কটাক্ষ নিক্ষেপ করিয়া, বলিল “প্রভু, দোষই বা কি করিয়াছি। জী-বাহতে কি কখন বল থাকে না?”

সত্য। গোপ্পদে যেমন জল।

শান্তি। সন্তানদিগের বাহুবল কি আপনি কখন পরীক্ষা করিয়া থাকেন?

সত্য। থাকি।

এই বলিয়া সত্যানন্দ, এক ইম্পাতের ধনুক, আর লোহার কতকটা তার আনিয়া দিলেন, বলিলেন যে “এই ইম্পাতের ধনুকে এই লোহার তারের গুণ দিতে হয়। গুণের পরিমাণ ছুই হাত। গুণ দিতে দিতে ধনুক উঠিয়া পড়ে, যে গুণ দেয় তাকে ছুড়িয়া ফেলিয়া দেয়। যে গুণ দিতে পারে সেই প্রকৃত বলবান্।”

শান্তি ধনুক ও তার উত্তমরূপে পরীক্ষা করিয়া বলিল “সকল সম্ভান কি এই পরীক্ষায় উত্তীর্ণ হইয়াছে?”

সত্য। না, ইহা দ্বারা তাহাদিগের বল বুঝিয়াছি মাত্র।

শান্তি। কেহ কি এ পরীক্ষায় উত্তীর্ণ হয় নাই?

সত্য। দুই জন মাত্র।

শান্তি। জিজ্ঞাসা করিব কি, কে কে?

সত্য। নিষেধ কিছু নাই। এক জন আমি।

শান্তি। দ্বিতীয়?

সত্য। জীবানন্দ।

শান্তি ধনুক লইল, তার লইল, অবহেলে তাহাতে গুণ দিয়া, সত্যানন্দের চরণতলে ফেলিয়া দিল।

সত্যানন্দ বিস্মিত, ভীত এবং স্তম্ভিত হইয়া রহিলেন। কিয়ৎক্ষণ পরে বলিলেন, “এ কি? তুমি দেবী না মানবী?”

শান্তি করযোড়ে বলিল, “আমি সামান্য মানবী। কিন্তু আমি ব্রহ্মচারিণী।”

সত্য। তাই বা কিসে? তুমি ভৈরবী নও, বক্ষবী নও, তবে কি বালবিধবা? না বালবিধবারও এত বল হয় না, কেন না তাহার একাহারী।

শান্তি । আমি সধবা ।

সত্য । তোমার স্বামী নিরুদ্ভিষ্ট ?

শান্তি । উদ্ভিষ্ট । তাঁহার উদ্দেশ্যেই আসিয়াছি ।

সহসা মেঘভাঙ্গা রৌদ্রের ন্যায় স্মৃতি সত্যানন্দের চিত্তকে প্রভাসিত করিল । তিনি বলিলেন, “মনে পড়িয়াছে, জীবানন্দের স্ত্রীর নাম শান্তি । তুমি কি জীবানন্দের ব্রাহ্মণী ?”

এবার জটাভারে নবীনান্দ মুখ ঢাকিল । যেন কতকগুলি হাতীর শুঁড়, রাজীবরাজীর উপর পড়িল । সত্যানন্দ বলিতে লাগিলেন “কেন এ পাপাচার করিতে আসিলে ?”

শান্তি সহসা জটাভার পৃষ্ঠে বিক্ষিপ্ত করিয়া উন্নত মুখে বলিল,

“পাপাচরণ কি প্রভু ? পত্নী স্বামীর অনুসরণ করে সে কি পাপাচরণ ? সন্তানধর্মশাস্ত্র, যদি একে পাপাচরণ বলে, তবে সন্তানধর্ম অধর্ম । আমি তাঁহার সহধর্মিণী, তিনি ধর্ম্যাচরণে প্রবৃত্ত, আমি তাঁহার সঙ্গে ধর্ম্যাচরণ করিতে আসিয়াছি ।”

শান্তির তেজস্বিনী বাণী শুনিয়া, উন্নত গ্রীবা, ক্ষীত বক্ষ, কম্পিত অধর এবং উজ্জ্বল অথচ অশ্রুপূর্ণ চক্ষু দেখিয়া সত্যানন্দ প্রীত হইলেন । বলিলেন

“তুমি সাধবী । কিন্তু দেখ মা—পত্নী কেবল গৃহধর্ম্মেই সহধর্ম্মিণী—বীর-ধর্ম্মে রমণী কি ?”

শান্তি । কোন্ মহাবীর অপত্নীক হইয়া, বীর হইয়াছেন ? রাম সীতা নহিলে কি বীর হইতেন ? অর্জুনের কতগুলি বিবাহ গণনা করুন দেখি ? ভীমের যত বল ততগুলি পত্নী । কত ধলিব ? আপনাকে বলিতেই বা কেন হইবে ?

সত্য। কথা সত্য, কিন্তু রণক্ষেত্রে কোন্ বীর জায়া লুইয়া আইসে?

শান্তি। অর্জুন যখন বাদবীসেনার সহিত অন্তরীক্ষ হইতে যুদ্ধ করিয়াছিলেন কে তাঁহার রথ চালাইয়াছিল? দ্রৌপদী সঙ্গে না থাকিলে পাণ্ডব কি কুরুক্ষেত্রের যুদ্ধে যুঝিত?

সত্য। তা হউক, সামান্য মনুষ্য দিগের মন জীলোকে আসক্ত এবং কাৰ্য্যবিরত করে। এই জন্ত সন্তানের ব্রতই এই, যে রমণীজাতির সঙ্গে, একাসনে উপবেশন করিবে না। জীবানন্দ আমার দক্ষিণ হস্ত। তুমি আমার ডান হাত ভাঙ্গিয়া দিতে আসিয়াছ?

শান্তি। আমি আপনার দক্ষিণ হস্তে বল বাড়াইতে আসিয়াছি। আমি ব্রহ্মচারিণী, প্রভুর কাছে ব্রহ্মচারিণীই থাকিব। আমি কেবল ধর্মাচরণের জন্ত আসিয়াছি; স্বামী-সন্দর্শনের জন্ত নয়। বিরহ-যন্ত্রণায় আমি কাতরা নই। স্বামীর ধর্ম্মচ্যুতির ভয়ে আমি কাতরা। বৃষ্টির অভাবে মহান্ মহীৰুহও শুক হয়, আমি মহান্ মহীৰুহতলে বৃষ্টি করিব। আপনি নিশ্চিন্ত থাকুন।

সত্য। সে কি? মহান্ মহীৰুহের অনাবৃষ্টির ভয়? জীবানন্দের ধর্ম্মচ্যুতি?

শান্তি। যাহা ঘটয়াছে তাহা আবার ঘটিতে পারে।

সত্য। কি ঘটয়াছে? জীবানন্দের ধর্ম্মচ্যুতি ঘটয়াছে? হিমালয় গহ্বরে ডুবিয়াছে?

শান্তি। কেবল সহধর্ম্মিণী-সাহায্যের অভাবে।

সত্য। কি বলিতেছ, আমি কিছুই বুঝিতেছি না।

শান্তি। কাল মধ্যাহ্নে তিনি আমার সঙ্গে সাক্ষাৎ করিয়াছিলেন। ব্রত ভঙ্গ হইয়াছে।

এবার সেই পলিতকেশ ব্রহ্মচারী চক্ষু ঢাকিয়া কাদিতে বসিল। সত্যানন্দকে আর কেহ কখন কাদিতে দেখে নাই।

শান্তি বলিল “প্রভু, আপনার চক্ষে জল কেন ?”

সত্য। প্রায়শ্চিত্ত কি জান ?

শান্তি। জানি, আব্রহত্যা।

সত্য। তাই কাদিতেছি। জীবানন্দের শোকে কাদিতেছি।

শান্তি। আমিও তাই আসিয়াছি; বাহাতে জীবানন্দ না মরে, সেই জন্য আসিয়াছি।

সত্য। বৎসে, তোমার অভীষ্ট সিদ্ধ হউক। তোমার সকল অপরাধ মার্জনা করিলাম। তুমি সন্তানমধ্যে পরিগণিত হইলে। আমি এতক্ষণ তোমার মর্ম্ম বুঝি নাই, তাই তিরস্কার করিতেছিলাম ? আমি কি বুঝিব ? বনচারী ব্রহ্মচারী বৈ ত নই। স্ত্রীলোকের তুল্য হইব কি প্রকারে ? জীবানন্দ মরিবে, আমিও রাখিতে পারিব না, তুমিও রাখিতে পারিবে না। জীবানন্দ আমার প্রাণাধিক প্রিয়, কিন্তু দেখ দক্ষিণ হস্ত গেলে দেবতার কার্য্য করিতে পারিব না। যত দিন পার, জীবানন্দকে পৃথিবীতে রাখিও। সঙ্গে সঙ্গে আপনার ব্রহ্মচর্য্যা রাখিও। তুমি আমার প্রিয় শিষ্য হইলে। সন্তান মাত্রই আমার আনন্দ। এই জন্য সন্তানেরা সকলে আনন্দ নাম ধারণ করে। এ আনন্দমঠ। তুমিও আনন্দ নাম ধারণ কর। তোমার নাম নবীনানন্দই রহিল।

শান্তি বলিলেন, “আনন্দমঠে আমি থাকিতে পাইব কি ?”

সত্য। আজ আর কোথা যাইবে ?

শান্তি। তার পর ?

সত্য। মা ভবানীর মত তোমার ও ললাটে আগুন আছে.

সন্তানসম্প্রদায় কেন দাহ করবে? এই বলিয়া পরে আশীর্বাদ করিয়া সত্যানন্দ শান্তিকে বিদায় করিলেন ।

শান্তি মনে মনে বলিল “র বেটা বুড়ো ! আমার ললাটে আগুন ! আমি গোড়া কপালি না, তোর মা গোড়া কপালি !” বস্তুত সত্যানন্দের সে অভিপ্রায় নহে—চক্ষের বিছাতের কথাই তিনি বলিয়াছিলেন, কিন্তু তা কি বলা যায় ?

পঞ্চবিংশ পরিচ্ছেদ ।

সে রাত্রি শান্তি মঠে থাকিবার অনুমতি পাইয়াছিলেন । অতএব ঘর খুঁজিতে লাগিলেন । অনেক ঘর খালি পড়িয়া আছে । গোবর্দ্ধন নামে এক জন পরিচারক, সেও ক্ষুদ্র দয়ের সন্তান, প্রদীপ হাতে করিয়া ঘর দেখাইয়া বেড়াইতে লাগিল । “কোনটাই শান্তির পছন্দ হইল না । হতাশ হইয়া গোবর্দ্ধন ফিরিয়া সত্যানন্দের কাছে শান্তিকে লইয়া চলিল । শান্তি বলিল ।

“ভাই সন্তান, এই দিকে যে কয়টা ঘর রহিল, এতো দেখা হইল না ?”

গোবর্দ্ধন বলিল, “ও সব খুব ভাল ঘর বটে, কিন্তু ও সকলে লোক আছে ।”

শান্তি । কারা আছে ?

গোব । বড় বড় সেনাপতি আছে ।

শান্তি । বড় বড় সেনাপতি কে ?

গোব । ভবানন্দ, জীবানন্দ, ধীরানন্দ, জ্ঞানানন্দ । আনন্দমঠ আনন্দময় ।

শান্তি । ঘর গুলো দেখি চল না ।

গোবর্দ্ধন শান্তিকে প্রথমে ধীরানন্দের ঘরে লইয়া গেল ।
ধীরানন্দ মহাভারতের দ্রোণপর্ব পড়িতেছিলেন । অভিমুখ্য
কি প্রকার সপ্তরথীর সঙ্গে যুদ্ধ করিয়াছিল, তাহাতেই মন
নিবিষ্ট—তিনি কথা কহিলেন না । শান্তি সেখান হইতে বিনা
বাক্যব্যয়ে চলিয়া গেল ।

শান্তি পরে ভবানন্দের ঘরে প্রবেশ করিল । ভবানন্দ
তখন উর্দ্ধদৃষ্টি হইয়া, একখানা মুখ ভাবিতেছিলেন । কাহার
মুখ, তাহা জানি না, কিন্তু মুখখানা বড় সুন্দর, কৃষ্ণ কৃষ্ণিত
সুগন্ধি অলকারাশি আকর্ষণকারি জয়ুগের উপর পড়িয়া আছে ।
মধ্যে অনিন্দ্য ত্রিকোণ ললাটদেশে মৃত্যুর করাল কাল ছায়া
গাহমান হইয়াছে । যেন সেখানে মৃত্যু ও মৃত্যুঞ্জয় দ্বন্দ্ব
করিতেছে । নয়ন মুদিত, জয়ুগ স্থির, ওষ্ঠ নীল, গণ্ড
পাণ্ডুর, নাসা শীতল, বক্ষ উন্নত, বায়ু বসন বিক্ষিপ্ত করি-
তেছে । তার পর যেমন করিয়া, শরশ্লোঘ-বিলুপ্ত চন্দ্রমা
ক্রমে ক্রমে মেঘদল উদ্ভাসিত করিয়া, আপনার সৌন্দর্য্য
বিকাশিত করে, যেমন করিয়া প্রভাতসূর্য্য তরঙ্গাকৃত মেঘ-
মালাকে ক্রমে ক্রমে সূর্য্যকৃত করিয়া আপনি প্রদীপ্ত হয়,
দিশুগুল আলোকিত করে, স্থল জল কীট পতঙ্গ প্রফুল্ল করে,
তেমনি সেই শব্দেহে জীবনের শোভা সঞ্চার হইতেছিল ।
আহা কি শোভা ! ভবানন্দ তাই ভাবিতেছিল, সেও কথা
কহিল না । কল্যাণীর রূপে তাহার হৃদয় কাতর হইয়াছিল,
শান্তির রূপের উপর সে দৃষ্টিপাত করিল না ।

শান্তি তখন গৃহান্তরে গেল । জিজ্ঞাসা করিল, “এটা
কার ঘর ?”

গোবর্দ্ধন বলিল “জীবানন্দ ঠাকুরের ।”

শান্তি । সে আবার কে ? কৈ কেউতো এখানে নেই ।

গোব । কোথায় গিয়াছেন, এখন আসবেন ।

শান্তি । এই ঘরটা সকলের ভাল ।

গোব । তা এই ঘরটা ত হবে না ।

শান্তি । কেন ?

গোব । জীবানন্দ ঠাকুর এখানে থাকেন ।

শান্তি । তিনি না হয় আর একটা ঘর খুঁজে নিন ।

গোব । তাকি হয় ? যিনি এ ঘরে আছেন, তিনি কর্তা
বলেই হয়, যা করেন তাই হয় ।

শান্তি । আচ্ছা তুমি যাও, আমি স্থান না পাই, গাছ তলায়
থাকিব ।

এই বলিয়া গোবর্দ্ধনকে বিদায় দিয়া শান্তি সেই ঘরের
ভিতর প্রবেশ করিল । প্রবেশ করিয়া জীবানন্দের অধিকৃত
কৃষ্ণাজিন বিস্তারণ পূর্বক, তত্পরি শয়ন করিল ।

কিছুক্ষণ পরে জীবানন্দঠাকুর প্রত্যাগত হইলেন । হরিণ
চর্মের উপর একটা মানুষ শুইয়া আছে, ক্ষীণ প্রদীপালোকে
অতটা ঠাণ্ড হইল না । জীবানন্দ তাহারই উপর উপবেশন
করিতে গেলেন । উপবেশন করিতে গিয়া শান্তির হাঁটুর উপর
বসিলেন । হাঁটু অকস্মাৎ উচু হইয়া জীবানন্দকে ফেলিয়া
দিল ।

জীবানন্দের একটু লাগিল । জীবানন্দ উঠিয়া একটু জুড়
হইয়া বলিলেন, “কে হে তুমি বেদ্বিক ?”

শান্তি । আমি বেদ্বিক না, তুমি বেদ্বিক । মানুষের
হাঁটুর উপর কি বসবার জায়গা ?

জীব । তা কে জানে যে তুমি আমার ঘরে চুরি করিয়া
এসে শুইয়া আছ ?

শান্তি। তোমার ঘর কিসের ?

জীব। কার ঘর ?

শান্তি। আমার ঘর।

জীব। মন্দ নয়, কে হে তুমি ?

শান্তি। তোমার বনাই।

জীব। তুমি আমার হও না হও, আমি তোমার বোধ হইতেছে। তোমার গলার সঙ্গে আমার ব্রাহ্মণীর গলার একটু সাদৃশ্য আছে।

শান্তি। বহুদিন তোমার ব্রাহ্মণীর সঙ্গে আমার একাত্ম-ভাব ছিল, সেই জন্য বোধ হয় গলার আওয়াজ একরকম হয়ে গেছে।

জীব। তোর যে বড় জোর জোর কথা দেখতে পাই ? মঠের ভিতর না হতো তো এক ঘুষোর দাঁতগুলো ভেঙ্গে দিতুম।

শান্তি। দাঁত ভেঙ্গেছে অনেক সাঙাত। কাল রাজনগরে কটা দাঁত ভেঙ্গেছিলে, হিসাব দাও দেখি। বঁড়াইয়ে কাজ নেই, আমি এখানে ঘুমুই। তোমরা সন্তানের দল, লেজ গুটিয়ে, বামুনঠাকুরগণদের আঁচলের ভিতর হুকোওগে।

এখন জীবানন্দ ঠাকুর কিছু ফাঁপরে পড়িলেন। মঠের ভিতর সন্তানে সন্তানে মারামারি করা সত্যানন্দের নিষেধ। কিন্তু এরও বড় মুখের দৌড়, ছাড়া না দিলেও নয়। রাগে সর্কশরীর জ্বলিতে লাগিল। অথচ গলার আওয়াজটা মধ্যে মধ্যে বড় মিঠে লাগিতেছে, যেন কি মনে হয়, যেন কে স্বর্গের দ্বার খুলিয়া ডাকিতেছে, আর বলিতেছে এলেই ঠ্যাঙে লাঠী মারবে। জীবানন্দের উঠিতেও ইচ্ছা করিতেছিল না, বসিতেও পারেন না। ফাঁপরে পড়িয়া বসিলেন,

“মহাশয় এ ঘর আমার, চিরকাল ভোগ দখল করিতেছি, আপনি বাহিরে যান।”

শান্তি । এ ঘর আমার, অর্দ্ধ দণ্ড ভোগ দখল করিতেছি । আপনি বাহিরে যান ।

জীব । মঠের ভিতর মারামারি করিতে নাই বলিয়াই লাথি মারিয়া তোমায় নরককুণ্ডে ফেলিয়া দিই নাই, কিন্তু এখনি মহারাজের অহুমতি আনিয়া তোমায় তাড়াইয়া দিতে পারি ।

শান্তি । আমি মহারাজের অহুমতি আনিয়াই তোমায় তাড়াইয়া দিতেছি । তুমি দূর হও ।

জীব । তাহা হইলে এ ঘর তোমার । মহারাজকে কেবল জিজ্ঞাসা করিয়া আসিতেছি ; আগে বল তোমার নাম কি ?

শান্তি । আমার নাম নবীনন্দ গোস্বামী, তোমার নাম কি ?

জীব । আমার নাম জীবানন্দ গোস্বামী ।

শান্তি । তুমিই জীবানন্দ গোস্বামী ! তাই এমন ?

জীব । তাই কেমন !

শান্তি । লোকে বলে, আমি কি করবো ।

জীব । লোকে কি বলে ?

শান্তি । তা আমার বলতে ভয়ই কি ? লোকে বলে

জীবানন্দ ঠাকুর বড় গণ্ডমূৰ্খ ।

জীব । গণ্ডমূৰ্খ, আর কি বলে ?

শান্তি । মোটা বুদ্ধি ।

জীব । আর কি বলে ?

শান্তি । যুদ্ধে কাপুরুষ ।

জীবানন্দের সৰ্ব্ব শরীর রাগে গর গর করিতে লাগিল, বলিলেন, “আর কিছু আছে ?”

শান্তি । আছে অনেক কথা—নিমাই বলে আপনার একটি ভগিনী আছে ।

জীব । তুমি বড় বেল্লিক হে—

শান্তি । তুমি ভল্লুক হে ।

জীব । তুমি উল্লুক, অর্দ্ধাচীন, নাস্তিক, বিধর্মী, ভণ্ড, পামর !

শান্তি । তুমি—যলারবায়াবোচীচঃ—তুমি শু শ্চুতি শ্চু-
শাং—তুমি ঠু ভিষ্টু মাদান্তটোঃ ।

জীব । বের শালা এখান থেকে—তোর দাড়ি ছিঁড়িব ।

শান্তি তখন গলিল প্রমাদ ! দাড়ি ধরিলেই মুস্থিল ।
পরচুলা ধসিয়া পড়িবে । শান্তি সহসা রলে ভঙ্গ দিয়া পলা-
য়নে তৎপর হইল ।

জীবানন্দ পিছু পিছু ছুটিল । মনে মনে ইচ্ছা, ভণ্ডটা
মঠের বাহিরে গেলে ছুই খা দিব । শান্তি যাই হউক স্ত্রী-
লোক—দৌড়ধাপে অনভ্যস্ত । জীবানন্দ এ সকল কাজে
সুশিক্ষিত । শীঘ্র গিয়া শান্তিকে ধরিল । এবং তাহাকে
ভূতলে ফেলিয়া প্রহার করিবে বলিয়া তাহাকে কায়দা করিয়া
জাপটাইয়া ধরিতে গেল । স্পর্শ মাത്രেই জীবানন্দ চম-
কিয়া শান্তিকে ছাড়িয়া দিল । কিন্তু শান্তি বাহ দ্বারা জীবা-
নন্দের গলা জড়াইয়া ধরিল ।

জীবানন্দ বলিল, “এ কি ! তুমি যে স্ত্রীলোক ! ছাড় !
ছাড় ! ছাড় !” কিন্তু শান্তি সে কথায় কর্ণপাত না করিয়া
চীৎকার করিয়া ডাকিতে লাগিল “ওগো, তোমরা দেখ গো !
একজন গোসাই জোর করিয়া স্ত্রীলোকের স্বতীত্ব নষ্ট
করিতেছে ।”

জীবানন্দ তাহার মুখে হাত দিয়া বলিল, “সর্বনাশ ! সর্ব-

নাশ! অমন কথা যুখে এনোনা। ছাড়! ছাড়! আমার ঘাট হয়েছে, ছাড়!”

শান্তি ছাড়ে না; আরও চেষ্টায়, শান্তির কাছে জোর করিয়া ছাড়ানও সহজ নয়। জীবানন্দ যোড়হাত করিয়া বলিতে লাগিল “তোমার পায়ে পড়ি, ছাড়!” শেষ জ্বীলোকের আর্তনাদে অরণ্য পরিপূরিত হইয়া গেল।

এ দিকে মঠের গোসাইরা জ্বীলোকের প্রতি অত্যাচার হইতেছে শুনিয়া, অনেকে ধুতুরি ভিতর প্রদীপ জ্বালিয়া লাঠি সোঁটা লইয়া বাহির হইলেন। দেখিয়া জীবানন্দ থর থর কাঁপিতে লাগিল। শান্তি বলিল, “অত কাঁপিতেছ কেন?” তুমি ত বড় ভীত পুরুষ! আবার লোকে তোমাকে বলে মহাবীর?”

গোসাইরা আলো লইয়া নিকটবর্তী হইল দেখিয়া জীবানন্দ সকাতরে বলিলেন, “আমি অতিশয় কাপুরুষ, তুমি আমার ছাড়, আমি পলাই।”

শান্তি। জোর করিয়া ছাড়াও না।

জীবানন্দ লজ্জায় স্বীকার করিতে পারিলেন না যে তিনি জ্বীলোকের জোরে পারিতেছেন না। বলিলেন,

“তুমি বড় পাপিষ্ঠা।”

শান্তি তখন মুচকি হাসিয়া, বিলোল কটাক্ষ ফেপণ করিয়া বলিল,

“প্রাণাধিক! আমি তোমার প্রতি অতিশয় আসক্ত। তোমার দাসী হইব বলিয়াই এখানে আসিয়াছি, আমায় গ্রহণ করিবে, স্বীকার কর, ছাড়িয়া দিতেছি।”

জীব। দূর হ পাপিষ্ঠা! দূর হ পাপিষ্ঠা! অমন কথা আমাকে কাণে শুনিতে নাই।

শান্তি । আমি পাপিষ্ঠা, তাতে সন্দেহ নাই ; নহিলে
জীজাতি হইয়া পুরুষের কাছে প্রেম ভিক্ষা চাইতে যাইব
কেন—আমার কথাটি রাখিবে ? ছাড়িয়া দিতেছি ।

জীব । ছি ! ছি ! ছি ! আমি ব্রহ্মচারী—আমাকে এমন
কথা বলিতে নাই—তুমি আমার—

শান্তি সভয়ে বলিল “চুপ কর ! চুপ কর ! চুপ কর !
আমি শান্তি ।”

এই বলিয়া শান্তি জীবানন্দকে ছাড়িয়া তাঁহার পায়ের ধূলি
মাথায় লইল । পরে যোড়হাত করিয়া বলিল, “প্রভু ! অপরাধ
নিও না । কিন্তু ছি ! পুরুষমাত্ম্যের ভালবাসার ভাণ্ড করাকে
ধিক্ ! আনাকে চিনিতেই পারিলে না !”

তখন জীবানন্দের মনে সকল কথা প্রস্ফুট হইল । শান্তি
নহিলে এ কার্য আর কার ? শান্তি নহিলে এ রঙ্গ আর কে
জানে ? শান্তি নহিলে কার বাহতে এত বল ? তখন আনন্দিত
হইয়া, অপ্রতিভ হইয়া জীবানন্দ কি বলিতে যাইতেছিলেন—
কিন্তু অবকাশ পাইলেন না, গৌসাইয়েরা আসিয়া পড়িয়াছিল ।
ধীরানন্দ আগে আগে । ধীরানন্দ এই সময়ে জীবানন্দকে
জিজ্ঞাসা করিলেন, “গোলমাল কিসের ?”

জীবানন্দ ফাঁপরে পড়িলেন, কি উত্তর দিবেন ? শান্তি সেই
সময়ে চুপি চুপি তাঁহাকে বলিল,

“কেমন বলিয়া দিই—তুমি আমার ধরিয়াছিলে ?”

এই বলিয়া দীর্ঘ হাসিয়া শান্তি, ধীরানন্দের কথার উত্তর
দিল—বলিল,

“গোলমাল—একটা জীলোকে চোঁচাইতেছিল । ‘আমার
সতীত্ব নষ্ট করিল ! আমার সতীত্ব নষ্ট করিল’ বলিয়া চোঁচা-
ইতেছিল । কিন্তু কই ? জীবানন্দঠাকুর এত খুঁজিলেন আমি

এত খুঁজিলাম, দেখিতে পাইলাম না। এই বনটার ভিতর আপনারা একবার দেখুন দেখি—ওদিকে শব্দ শুনিয়াছিলাম।”

গৌসাইদিগকে শাস্তি অরণ্যের নিবিড় অংশ দেখাইয়া দিল। জীবানন্দ শাস্তিকে চুপি চুপি জিজ্ঞাসা করিলেন,

“বৈষ্ণবদিগকে এত ছুঃখ দিয়া তোমার কি ফল? ও বনে গেলে কি ওরা ফিরিবে? সাপেই থাক্, কি বাঘেই থাক্।”

শাস্তি। যখন বৈষ্ণব জীলোকের নাম শুনেছে, তখন একটু কষ্ট না পেলে ফিরিবে না। তা না হয় ফিরাইতেছি।

এই বলিয়া শাস্তি গৌসাইজিদের ডাকিয়া বলিলেন, “আপনারা একটু সতর্ক থাকিবেন। কি জানি ভৌতিক মায়াও হইতে পারে।”

শুনিয়া একজন গৌসাই বলিল, “তাই সম্ভব। নহিলে জীলোক কোথা হইতে আসিবে?”

গৌসাইয়েরা সকলেই এই মতে মত দিল। ভৌতিক মায়া স্থির করিয়া সকলেই মঠে ফিরিল। জীবানন্দ বলিল “এসো, আমরা এইখানে বসি—এ ব্যাপার টা আমাদের বুঝাইয়া বল—তুমি এখানে কেন—কি প্রকারে আসিলে—এ বেশই বা কেন? এত রঙ্গই বা কোথায় শিখিলে?” শাস্তি বলিল “আমি কেন আসিলাম?—তোমার জন্য আসিয়াছি। কি প্রকারে আসিলাম?—হাঁটিয়া। এ বেশ কেন? আমার শক। আর এত রঙ্গ শিখিলাম কোথায়? একটি পুরুষমানুষের কাছে। সব তোমায় ভাঙ্গিয়া বলিব। কিন্তু এখানে বনে বসিব কেন? চল তোমার কুঞ্জে যাই।”

জীব। আমার কুঞ্জ কোথায়?

শাস্তি। মঠে।

জীব। সেখানে জীলোক যাইতে আসিতে নিষেধ।

শান্তি । আমি কি স্ত্রীলোক ?

জীব । আমি মহারাজের নিয়ম লঙ্ঘন করিব না ।

শান্তি । আমার প্রতি মহারাজের অনুমতি আছে । কুঞ্জেই চল, সব বলিতেছি । বিশেষ ঘরের ভিতর না গেলে আমার দাড়ি খুলিব না । দাড়ি না খুলিলে তুমি এ পোড়ার মুখ চিনিতে পারিবে না । ছি ! পুরুষ এমন !

দ্বিতীয় খণ্ড ।



প্রথম পরিচ্ছেদ ।

কাল ৭৬ সাল ঈশ্বর রূপায় শেষ হইল। বাঙ্গালার ছয় আনা রকম মনুষ্যকে, কত কোটি তা কে জানে, যম-পুরে প্রেরণ করাইয়া সেই দুর্ভবৎসর নিজে কালগ্রাসে পতিত হইল। ৭৭ শালে ঈশ্বর সুপ্রসন্ন হইলেন। সূর্য্যুষ্টি হইল, পৃথিবী শস্যশালিনী হইল, যাহারা বাঁচিয়াছিল তাহরা পেট ভরিয়া থাইল। অনেকে অনাহারে বা অন্নাহারে রুগ্ন হইয়া ছিল, পূর্ণ আহার একেবারে সহ্য করিতে পারিল না। অনেকে তাহাতেই মরিল। পৃথিবী শস্যশালিনী কিন্তু জনশূন্য। গ্রামে গ্রামে থালি বাড়ি পড়িয়া, গবাদির বিশ্রামভূমি এবং প্রেতভয়ের কারণ হইয়া উঠিয়াছিল। গ্রামে গ্রামে শত শত উর্ব্বরা ভূমিখণ্ড সকল অকর্ষিত, অলুৎপাদক হইয়া পড়িয়া রহিল, অথবা জঙ্গলে পুরিয়া গেল। দেশ জঙ্গলময় হইল। যেখানে হস্তময় শ্রামল শস্যরাশি বিরাজ করিত, যেখানে অসংখ্য গো মহিষাদি বিচরণ করিত, যে সকল উদ্যান গ্রাম্য যুবক যুবতীর প্রমোদভূমি ছিল, সে সকল ক্রমে ঘোরতর জঙ্গল হইতে লাগিল। এক বৎসর, দুই বৎসর, তিন বৎসর গেল, জঙ্গল বাড়িতে লাগিল। যেস্থান মনুষ্যের স্মৃতির স্থান ছিল, সেখানে নরমাংসলোলুপ ব্যাঘ্র আদিয়া হরিণাদির প্রতি ধাবমান হইতে লাগিল। যেখানে

সুন্দরীর দল অলঙ্কারিত চরণে চরণভ্রমণ ধ্বনিত করিতে করিতে, বয়স্যার সঙ্গে ব্যঙ্গ করিতে করিতে, উচ্চ হাসি হাসিতে হাসিতে যাইত, সেই খানে ভল্লুকে বিবর প্রস্তুত করিয়া শাবকাদি লালন পালন করিতে লাগিল। যেখানে শিশু সকল নবীন বয়সে সন্ধ্যাকালের মল্লিকাকুসুমতুল্য উৎকল হইয়া হৃদয়তৃপ্তিকর হাস্ত হাসিত, সেই খানে আজি যুখে যুখে বহুহস্তী সকল মদমত্ত হইয়া বৃক্ষের কাণ্ডসকল বিদীর্ণ করিতে লাগিল। যে খানে জুর্গোৎসব হইত, সেই খানে শৃগালের বিবর, দোলমঞ্চে পেচকের আশ্রয়, নাট-মন্দিরে বিষধর সর্প সকল দিবসে ভেকের অন্বেষণ করে। বাঙ্গালায় শস্ত জন্মে, খাইবার লোক নাই; বিক্রয় জন্মে কিনিবার লোক নাই; চাসায় চাস করে টাকা পায় না, জমীদারের খাজনা দিতে পারে না; জমীদারেরা রাজার খাজনা দিতে পারে না, রাজা জমীদারী কাড়িয়া লওয়ায় জমীদারসম্প্রদায় হত-স্বর্কস্ব হইয়া দরিদ্র হইতে লাগিল। বহুমতী সুপ্রসবিনী হইলেন তবু আর ধন জন্মে না। কাহারও ঘরে ধন নাই। যে যাহার পায় কাড়িয়া খায়। চোর ভাকাতেরা মাথা তুলিল, মাধু ভীত হইয়া ঘরের মধ্যে লুকাইল।

• এ দিকে সম্মানসম্প্রদায় নিত্য সচন্দন তুলসীদলে বিষ্ণুপাদ-পদ্ম পূজা করে, যার ঘরে বন্দুক পিস্তল আছে কাড়িয়া আনে। ভবানন্দ বলিয়া দিয়াছিলেন “ভাই! যদি এক দিকে এক ঘর মণি মাণিক্য হীরক প্রবালাদি দেখ আর একদিকে একটা ভাঙ্গা বন্দুক দেখ, মণি-মাণিক্য হীরক প্রবালাদি ছাড়িয়া ভাঙ্গা বন্দুকটা লইয়া আসিবে।”

তার পর, তাহারা গ্রামে গ্রামে ভ্রম পাঠাইতে লাগিল।

চর গ্রামে গিরা যেখানে হিন্দু দেখে, বলে ভাই বিষ্ণুপূজা করবি? এই বলিয়া ২০।২৫ জন জড় করিয়া মুসলমানের গ্রামে আসিয়া পড়িয়া মুসলমানদের ঘরে আগুন দেয়। মুসলমানেরা প্রাণবন্ধ্য বাতিবাস্ত হয়, সন্তানেরা তাহাদের সর্ব্ব স্ব লুণ্ঠ করিয়া নূতন বিষ্ণুভক্তদিগকে বিতরণ করে। লুণ্ঠের ভাগ পাইয়া গ্রাম্য লোকে প্রীত হইলে বিষ্ণুমন্দিরে আনিয়া বিগ্রহের পাদস্পর্শ করাইয়া তাহাদিগকে সন্তান করে। লৌকে দেখিল সন্তানহে বিলক্ষণ লাভ আছে। বিশেষ মুসলমান-রাড়োর অরাক্কতায় ও অশাসনে সকলে মুসলমানের উপর বিরক্ত হইয়া উঠিয়াছিল। হিন্দুধর্ম্মের বিলোপে অনেক হিন্দুই হিন্দুত্ব স্থাপনের জন্ত আগ্রহচিত্ত ছিল। অতএব দিনে দিনে সন্তানসংখ্যা বৃদ্ধি হইতে লাগিল। দিনে দিনে শত শত, মাসে মাসে সহস্র সহস্র সন্তান আসিয়া ভবানন্দ জীবানন্দের পাদপদ্মে প্রণাম করিয়া দলবদ্ধ হইয়া দিগ্দিগন্তরে মুসলমানকে শাসন করিতে বাহির হইতে লাগিল। যেখানে রাজপুরুষ পায়, ধরিয়া মার পিট করে, কখন কখন প্রাণবধ করে, যেখানে সরকারী টাকা পায় লুণ্ঠিয়া লইয়া ঘরে আনে, যেখানে মুসলমানের গ্রাম প্রায় দগ্ধ করিয়া ভস্মাবশেষ করে।

তখন নগরের মহারাজাধিরাজের চৈতন্য হইল। সন্তানদিগের শাসনার্থে তিনি ভূরি ভূরি সৈন্য প্রেরণ করিতে লাগিলেন কিন্তু এখন সন্তানেরা দলবদ্ধ শস্ত্রযুক্ত এবং মহাদস্তশালী। তাহাদিগের দর্পে সম্মুখে মুসলমান সৈন্য অগ্রসর হইতে পারে না। যদি অগ্রসর হয়, অমিতবলে সন্তানেরা তাহাদিগের উপর পড়িয়া তাহাদিগকে ছিন্ন ভিন্ন করিয়া হরিধ্বনি করিতে থাকে। যদি কখনও কোন সন্তা-

নের দলকে যবনসৈনিকেরা পরাস্ত করে, তখনই আর এক দল সন্তান কোথা হঠাৎ আসিয়া বিজেতাদিগের মাথা কাটিয়া ফেলিয়া দিয়া হরি হরি বলিতে বলিতে চলিয়া যায়। রাজা আসদ-উলজমান বড় বিভ্রাটে পড়িলেন। অনেকগুলি গোলা, কামান, হাতী, ঘোড়া পাঠাইলেন, কিছুতেই সন্তানদিগের “জয় জগদীশ হরে” শব্দের নিবারণ নাই। আসদউলজমান দেখিলেন যে রাজ্যচ্যুত হই।

তখন তিনি কাতরে ইংরেজকে চিঠি লিখিলেন। লিখিলেন যে, কোন মতে আমি আর রাজস্ব সংগ্রহ করিতে পারি না বা পাঠাইতে পারি না; আপনারা রক্ষা করেন তবেই খাজনা আদায় করিব, নচেৎ আপনারা আসিয়া আদায় করুন। ইংরেজেরা পূর্ব হইতে নিজে কতক কতক খাজনা আদায় করিতে ছিলেন কিন্তু এখন তাঁহাদিগেরও যত্ন বিকল হইতে লাগিল। এই সময়ে প্রথিতনামা ভারতীয় ইংরেজকূলের প্রাতঃসূর্য্য ওয়ারন হেষ্টিংস সাহেব ভারতবর্ষের গবর্নর জেনারেল। কলিকাতায় বসিয়া লোহার সিকল গড়িয়া তিনি মনে মনে বিচার করিলেন, যে এই সিকলে আমি সদ্ধীপা সমাগরা ভারতভূমিকে বাধিব। একদিন জগদীশ্বর সিংহাসনে বসিয়া নিঃসন্দেহ বলিয়াছিলেন তথাস্ত। কিন্তু সে দিন এখনও দূরে। আজিকার দিনে সন্তানদিগের ভীষণ হরিধ্বনিতে ওয়ারন হেষ্টিংসও বিকম্পিত হইলেন।

ওয়ারন হেষ্টিংস প্রথমে ফৌজদারী সৈন্যের দ্বারা বিদ্রোহ নিবারণের চেষ্টা করিয়াছিলেন কিন্তু ফৌজদারী সিপাহীর এমনি অবস্থা হইয়াছিল যে তাহারা কোন বৃদ্ধ স্ত্রীলোকের মুখেও হরিনাম শুনিলে পলায়ন করিত। অতএব নিরুপায় দেখিয়া ওয়ারন হেষ্টিংস কাপ্তেন টমাস নামক একজন সুদক্ষ সৈনিককে

অধিনায়ক করিয়া এক দল কোম্পানীর সৈন্য বিদ্রোহ নিবারণ জন্য বীরভূম প্রদেশে প্রেরণ করিলেন।

কাপ্তেন টমাস বীরভূমে পৌঁছিয়া বিদ্রোহ নিবারণের অতি উত্তম বন্দোবস্ত করিতে লাগিলেন। রাজার সৈন্য ও জমীদারদিগের সৈন্য চাহিয়া লইয়া কোম্পানীর সুশিক্ষিত সদস্যযুক্ত অত্যন্ত বলিষ্ঠ দেশী বিদেশী সৈন্যের সঙ্গে মিলাইলেন। পরে সেই মিলিত সৈন্য দলে দলে বিভক্ত করিয়া সে সকলের আধিপত্যে উপযুক্ত যোদ্ধবর্গকে নিযুক্ত করিলেন। পরে সেই সকল যোদ্ধবর্গকে দেশ ভাগ করিয়া দিলেন; বলিয়া দিলেন তুমি অমুক প্রদেশ জেলিয়ার মত জাল দিয়া ছাঁকিতে ছাঁকিতে যাইবে। যেখানে বিদ্রোহী দেখিবে পিপীলিকার মত তাহার প্রাণ সংহার করিবে। কোম্পানির সৈনিকেরা কেহ গাঁজা, কেহ রম মারিয়া বন্দুকে সঙ্গীন চড়াইয়া সন্তানবধে ধাবিত হইল। কিন্তু সন্তানেরা এখন অসংখ্য অজেয়, কাপ্তেন টমাসের সৈন্যদল চাসার কাস্তের নিকট শস্যের মত কর্তৃত হইতে লাগিল। হরি হরি ধ্বনিতে কাপ্তেন টমাসের কর্ণ বধির হইয়া গেল। এইরূপে ১১৮০ সাল বীরভূমে সন্তান নাম কীর্ত্তিত করিতে লাগিল।

দ্বিতীয় পরিচ্ছেদ ।

তখন কোম্পানির অনেক রেশমের কুঠী ছিল। শিবগ্রামে ঐরূপ এক কুঠী ছিল। ডনিওয়ার্থ সাহেব সেই কুঠীর ফ্যাক্টর অর্থাৎ অধ্যক্ষ ছিলেন। তখনকার কুঠী সকলের রক্ষার জন্য সুব্যবস্থা ছিল। ডনিওয়ার্থ সাহেব সেই জন্য কোন প্রকারে প্রাণরক্ষা করিতে পারিয়াছিলেন, কিন্তু তাঁহার স্ত্রী কন্যাদিগকে

কলিকাতায় পাঠাইয়া দিতে বাধ্য হইয়াছিলেন এবং তিনি স্বয়ংও সন্তানদিগের দ্বারা উৎপীড়িত হইয়াছিলেন। সেই প্রদেশে এই সময়ে কাপ্তেন টমাস সাহেব দুই চারি ব্যাটেলিয়ন ফৌজ লইয়া তশরিফ আনিয়াছিলেন। এখন জন কতক চোয়াড়, হাড়ি, ডোম, বাগ্‌দী, বুনো, সন্তানদিগের উৎসাহ দেখিয়া পরজব্যাপহরণে উৎসাহী হইয়াছিল। তাহারা কাপ্তেন টমাসের রসদ আক্রমণ করিল। কাপ্তেন টমাসের সৈন্যের জন্য গাড়ী গাড়ী বোঝাই হইয়া উত্তম ঘি, ময়দা, মুরগী, চাল যাইতেছিল—দেখিয়া ডোম বাগ্‌দীর দল লোভ সঞ্চার করিতে পারে নাই। তাহারা গিয়া গাড়ী আক্রমণ করিল, কিন্তু কাপ্তেন টমাসের সিপাহীদের হস্তস্থিত বন্দুকের দুই চারিটা গুলি খাইয়া ফিরিয়া আসিল। কাপ্তেন টমাস তৎক্ষণেই কলিকাতায় রিপোর্ট পাঠাইলেন যে আজ ১৫৭ জন সিপাহী লইয়া ১৪,৭০০ বিদ্রোহী পরাজয় করা গিয়াছে। বিদ্রোহীদিগের মধ্যে ২১৫৩ জন মরিয়াছে আর ১২৩৩ জন আহত হইয়াছে। ৭ জন বন্দী হইয়াছে। কেবল শেষ কথাটাই সত্য। কাপ্তেন টমাস, বেনহিম বা রসবাকের মত দ্বিতীয়-যুদ্ধ জয় করিয়াছি মনে করিয়া গোপ দাড়ী চুমরাইয়া নির্ভয়ে ইতস্তত বেড়াইতে লাগিলেন। এবং ডনিওয়ার্থ সাহেবকে পরামর্শ দিতে লাগিলেন যে, আর কি, এক্ষণে বিদ্রোহ নিবারণ হইয়াছে, তুমি জী পুত্রদিগকে কলিকাতা হইতে লইয়া আইস। ডনিওয়ার্থ সাহেব বলিলেন, “তা হইবে, আপনি দশকিন এখানে থাকুন, দেশ আর একটু স্থির হউক, জী পুত্র লইয়া আসিব।” ডনিওয়ার্থ সাহেবের ঘরে পালা মটন মুরগী ছিল। পানীরও তাঁহার ঘরে অতি উত্তম ছিল। নানাবিধ বন্যপক্ষী তাঁহার টেবিলের শোভা সম্পাদন করিত। অক্ষয়ান বাবুটি

দ্বিতীয় দ্রোপদী। স্তূতরাং বিনা বাকাব্যয়ে কাপ্তেন টমাস সেখানে অবস্থিতি করিতে লাগিলেন।

এদিকে ভবানন্দ মনে মনে গর গর করিতেছে, ভাবিতেছে কবে এই কাপ্তেন টমাস সাহেব বাহাজুরের মাথাটি কাটিয়া, দ্বিতীয় সম্বরারি বলিয়া উপাধি ধারণ করিবে। ইংরেজ যে ভারতবর্ষের উদ্ধারসাধন জন্য আসিয়াছিল, সম্ভাবনায় তাহা তখন বুঝে নাই। কি প্রকারে বুঝিবে? কাপ্তেন টমাসের সমসাময়িক ইংরেজরাও তাহা জানিতেন না। তখন কেবল বিধাতার মনে মনেই একথা ছিল। ভবানন্দ ভাবিতেছিল এ অস্তুরের বংশ একদিনে নিপাত করিব, সকলে জমা হউক, একটু অসতর্ক হউক, আমরা এখন একটু তফাত থাকি। স্তূতরাং তাহারা একটু তফাত রহিল। কাপ্তেন টমাস সাহেব নিকটক হইয়া সাঁওতাল-কুমারীদিগের গুণগ্রহণে মনোবোণ দিলেন। তখনকার ভারতীয় ইংরেজেরা এখনকার ইংরেজদিগের ন্যায় পরিচরিত ছিলেন না।

সাহেব বাহাজুর শিকার বড় ভাল বাসেন, মধ্যে মধ্যে শিবগ্রামের নিকটবর্তী অরণ্যে মৃগয়ায় বাহির হইতেন। এক দিন ডনিওয়ার্থ সাহেবের সঙ্গে অস্বারোহণে কতকগুলি শিকারী লইয়া কাপ্তেন টমাস শিকারে বাহির হইয়াছিলেন। বলিতে কি, টমাস সাহেব অসমসাহসিক, বলবীর্য্যে ইংরেজজাতির মধ্যেও অতুল্য। সেই নিবিড় অরণ্য ব্যাঘ্র, মহিষ, ভল্লুকাদিতে অতিশয় ভয়ানক। বহুদূর আসিয়া শিকারীরা আর যাইতে অস্বীকৃত হইল, বলিল ভিতরে আর পথ নাই, আমরা আর যাইতে পারিব না। ডনিওয়ার্থ সাহেবও সেই অরণ্যমধ্যে এমন ভয়ঙ্কর ব্যাঘ্রের গর্জন অনেক দিন শুনিয়াছিলেন যে, তিনিও আর যাইতে অনিচ্ছুক হইলেন। তাহারা সকলে

ফিরিতে চাহিলেন । কাপ্তেন টমাস বলিলেন “তোমরা ফেরো ফেরো, আমি ফিরিব না ।” এই বলিয়া কাপ্তেন সাহেব নিবিড় অরণ্যমধ্যে প্রবেশ করিলেন ।

বস্তুতঃ অরণ্যমধ্যে পথ ছিল না । অশ্ব প্রবেশ করিতে পারিল না ; কিন্তু সাহেব ঘোড়া ছাড়িয়া দিয়া কাঁধে বন্দুক লইয়া একা অরণ্যমধ্যে প্রবেশ করিলেন । প্রবেশ করিতে করিতে ইতস্ততঃ ব্যাঘ্রের অন্বেষণ করিতে করিতে ব্যাঘ্র দেখিলেন না । কি দেখিলেন ? এক বৃহৎ বৃক্ষতলে প্রক্ষুটিত ফুলকুম্বযুক্ত লতাগুচ্ছাদিতে বেষ্টিত হইয়া বসিয়া ও কে ? বাঘ কি ?—বাঘ তো নয়, এক নবীন সন্ন্যাসী, রূপে বন আলো করিয়াছে । প্রক্ষুটিত ফুল যেন সেই স্বর্গীয় বপুর সংসর্গে অধিকতর সুগন্ধ-যুক্ত হইয়াছে । কাপ্তেন টমাস সাহেব বিস্মিত হইলেন, বিস্ময়ের পরেই তাঁহার ক্রোধ উপস্থিত হইল । তিনি শুনিয়াছিলেন কতক দেখিয়াও ছিলেন, যে, বিদ্রোহীরা অনেক সময়ে সন্ন্যাসীর বেশ ধরিয়া প্রচ্ছন্ন ভাবে বেড়াইত । কাপ্তেন সাহেব দেশীভাষা বিলক্ষণ জানিতেন, বলিলেন, “তুমি কে ?”

সন্ন্যাসী বলিল “আমি সন্ন্যাসী ।”

কাপ্তেন বলিলেন “তুমি বিদ্রোহী ।”

সন্ন্যাসী । না হয় তাই হলেম ।

• কাপ্তেন । তবে তোমায় গুলি করিয়া মারিব ।

সন্ন্যাসী । মার ।

কাপ্তেন একটু মনে সন্দেহ করিতেছিলেন যে, গুলি মারিবেন কি না, এমন সময় বিছাৎবেগে সেই নবীন সন্ন্যাসী তাঁহার উপর পড়িয়া তাঁহার হাত হইতে বন্দুক কাড়িয়া লইল । সন্ন্যাসী বক্ষাবরণচর্মা খুলিয়া ফেলিয়া দিল । একটানে দাড়ি, গোপ, জটা, খুলিয়া ফেলিল ; কাপ্তেন টমাস

সাহেব দেখিলেন অপূৰ্ণ সুন্দরী স্ত্রীমূৰ্ত্তি । সুন্দরী হাসিতে হাসিতে বলিল “সাহেব, আমি স্ত্রীলোক, কাহাকেও আঘাত করি না । তোমাকে একটা কথা জিজ্ঞাসা করিতেছি, হিন্দু মোছলমানে মারামারী হইতেছে তোমরা মাঝখানে কেন ? আপনার ঘরে ফিরিয়া যাও ।”

সাহেব । তুমি কে ?

শান্তি । দেখিতেছ সন্ন্যাসিনী । বাহাদের সঙ্গে লড়াই করিতে আসিয়াছ তাহাদের কাহারও স্ত্রী ।

সাহেব । তুমি আমার ঘরে থাকিবে ?

শান্তি । কি ? তোমার উপপত্নী স্বরূপ ?

সাহেব । স্ত্রীর মতই থাকিতে পার, তবে বিবাহ হইবে না ।

শান্তি । আমারও একটা জিজ্ঞাসা আছে ; আমাদের ঘরে একটা রূপী বাদর ছিল, সেটা সম্প্রতি মরে গেছে ; কোটর খালি পড়ে আছে । কোমরে ছেকল দেবো, তুমি সেই কোটরে থাকিবে ? আমাদের বাগানে বেশ মৰ্ত্তমান কলা হয় ।

সাহেব । তুমি ভাল মেয়ে মানুষ, তোমার সাহসে আমি খুসী হইয়াছি । তুমি আমার ঘরে চল । তোমার স্বামী যুদ্ধে মরিয়া যাইবে । তখন তোমার কি হইবে ?

শান্তি । তবে তোমায় আমার একটা কথা থাক । যুদ্ধ ত ছুদিন চারিদিনে হবেই । যদি তুমি জেত তবে আমি তোমার উপপত্নী হইয়া থাকিব স্বীকার করিতেছি, যদি বাচিয়া থাকি । আর আমার যদি জিতি, তবে তুমি আসিয়া, আমাদের সেই কোটরে বাদর সঙ্গে কলা খাবে ত ?

সাহেব । কলা খাইতে উত্তম জিনিষ । এখন আছে ?

শান্তি । নে তোর বন্দুক নে । এমন বুনা জেতের সঙ্গেও কেউ কথা কয় !

শান্তি বন্দুক ফেলিয়া দিয়া হাসিতে হাসিতে চলিয়া গেল ।

তৃতীয় পরিচ্ছেদ ।

শান্তি সাহেবকে ত্যাগ করিয়া হরিণীর আয় দ্বিপ্রচরণে বনমধ্যে কোথায় প্রবিষ্ট হইল । সাহেব কিছু পরে গুনিতে পাইলেন স্ত্রীকণ্ঠে গীত হইতেছে ;—

এ যৌবন জলতরঙ্গ রোধিবে কে ?

হরে মুরারে ! হরে মুরারে !

আবার কোথায় শারঙ্গের মধুর নিকনে বাজিল তাই ;—

এ যৌবন জলতরঙ্গ রোধিবে কে ?

হরে মুরারে ! হরে মুরারে !

তাহার সঙ্গে পুরুষকণ্ঠ মিলিয়া গীত হইল ;—

এ যৌবন জলতরঙ্গ রোধিবে কে ?

হরে মুরারে ! হরে মুরারে !

তিন স্বরে এক হইয়া গানে বনের লতা সকল কাঁপাইয়া তুলিল । শান্তি গাইতে গাইতে চলিল ।

“এই যৌবন জলতরঙ্গ রোধিবে কে ?

হরে মুরারে ! হরে মুরারে !

জলেতে তুফান হয়েছে,

আমার নূতন তরী, ভাসল স্রুথে,

মাঝিতে হাল ধরেছে,

হরে মুরারে ! হরে মুরারে !

ভেঙ্গে বালির বাধ, পুরাই মনের সাধ,

জোয়ার গাঙ্গে জল ছুটেছে, রাখিবে কে ?

হরে মুরারে ! হরে মুরারে !”
 সারঙ্গেও ঐ বাজিতেছিল,
 জোয়ার গাঙ্গে জল ছুটেছে রাখিবে কে ?
 হরে মুরারে ! হরে মুরারে !

যেখানে অতি নিবিড় বন, ভিতরে কি আছে বাহির হইতে
 একেবারে অদৃশ্য, শাস্তি তাহারই মধ্যে প্রবেশ করিলেন।
 সেইখানে সেই শাখাপল্লবরাশির মধ্যে লুক্কায়িত একটি ক্ষুদ্র
 কুটীর আছে। ডালের বাঁধন, পাতার ছাওয়া, কাঠের মেজে,
 তার উপরে মাটি ঢালা। তাহারই ভিতরে লতাধার মোচন
 করিয়া শাস্তি প্রবেশ করিল। সেখানে জীবানন্দ বসিয়া সারঙ্গ
 বাজাইতেছিলেন।

জীবানন্দ শাস্তিকে দেখিয়া জিজ্ঞাসা করিলেন।

“এত দিনের পর জোয়ার গাঙ্গে জল ছুটেছে কি ?”

শাস্তিও হাসিয়া উত্তর করিল। “নালা ডোবায় কি জোয়ার
 গাঙ্গে জল ছুটে ?”

জীবানন্দ বিষয় হইয়া বলিলেন, “দেখ শাস্তি ! একদিন
 আমার ব্রত ভঙ্গ হওয়ায় আমার প্রাণ ত উৎসর্গই হইয়াছে।
 যে পাপ তাহার প্রায়শ্চিত্ত করিতেই হইবে। এত দিন এ
 প্রায়শ্চিত্ত করিতাম, কেবল তোমার অহুরোধেই করি নাই।
 কিন্তু একটা ঘোরতর যুদ্ধের আর বিলম্ব নাই। সেই যুদ্ধের
 ক্ষেত্রে, আমার সে প্রায়শ্চিত্ত করিতে হইবে। এ প্রাণ পরি-
 ত্যাগ করিতেই হইবে। আমার মরিবার দিন পর্যাণ্তই কি—”

শাস্তি বলিল “আমি তোমার ধর্মপত্নী, সহধর্মিণী, ধর্মে
 সহায়। তুমি অতিশয় গুরুতর ধর্ম গ্রহণ করিয়াছ। সেই
 ধর্মের সহায়তার জন্যই আমি গৃহত্যাগ করিয়া আসিয়াছি।
 দুই জনে একত্রে সেই ধর্মচরণ করিব বলিয়া গৃহত্যাগ করিয়া

আসিয়া বনে বাস করিতেছি। তোমার ধর্ম বৃদ্ধি করিব।
ধর্মপত্নী হইয়া, তোমার ধর্মের বিঘ্ন করিব কেন? বিবাহ
ইহকালের জন্য, এবং বিবাহ পরকালের অন্ত। ইহকালের
জন্য যে বিবাহ, মনে কর তাহা আমাদের হয় নাই। আমাদের
বিবাহ কেবল পরকালের জন্য। পরকালে বিগুণ ফল
ফলিবে। হায় প্রভু! তুমিই আমার গুরু, আমি কি তোমায়
ধর্ম শিখাইব? তুমি বীর, আমি কি তোমায় বীরব্রত
শিখাইব?”

জীবানন্দ আত্মলাদে গদগদ হইয়া বলিল, “শিখাইলে ত।
আমিও শিখিলাম। তুমিই স্ত্রীকূলে ধন্যা।”

শান্তি প্রকল্পচিন্তে বলিতে লাগিল, “আরও দেখ গৌসাই,
ইহকালেই কি আমাদের বিবাহ নিষ্ফল? তুমি আমায় ভাল
বাস, আমি তোমায় ভাল বাসি, ইহা অপেক্ষা ইহকালে আর
কি গুরুতর ফল আছে? বল বন্দে মাতরং।” তখন দুইজনে
গলা মিলাইয়া “বন্দে মাতরং” গাইল। গাইতে গাইতে দুই
জনেই কাঁদিয়াছিল।

চতুর্থ পরিচ্ছেদ ।

ভবানন্দ গোস্বামী একদা রাজনগরে গিয়া উপস্থিত হই-
লেন। প্রশস্ত রাজপথ পরিত্যাগ করিয়া একটা অন্ধকার
গলির ভিতর প্রবেশ করিলেন। গলির দুই পার্শ্বে উচ্চ অট্টা-
লিকাশ্রেণী; সূর্য্যদেব মধ্যাহ্নে এক একবার গলির ভিতর
উকি মারেন মাত্র। তৎপরে অন্ধকারেরই অধিকার। গলির
পার্শ্বের একটা দোতালা বাড়ীতে, ভবানন্দ ঠাকুর প্রবেশ করি-

লেন। নিয়তলে একটি ঘরে, যেখানে অর্দ্ধবয়স্ক একটি স্ত্রীলোক পাক করিতে ছিল, সেই থানে গিয়া ভবানন্দ মহাপ্রভু দর্শন দিলেন। স্ত্রী লোকটি অর্দ্ধবয়স্ক, মোটা মোটা কালো কালো, ঠেঁটি পরা, কপালে উজ্জ্বল, সীমস্ত প্রদেশে কেশদাম চূড়াকারে শোভা করিতেছে। ঠন্ ঠন্ করিয়া হাঁড়ির কানায় ভাতের কাটি বাজিতেছে, ফর ফর করিয়া অলকদামের কেশ-গুচ্ছ উড়িতেছে, গল গল করিয়া মাগী আপনা আপনি বকিতেছে, আর তার মুখ ভঙ্গীতে তাহার মাথার চূড়ার নানাপ্রকার টলুনি টালুনির বিকাশ হইতেছে। এমন সময় ভবানন্দ মহাপ্রভু গৃহমধ্যে প্রবেশ করিয়া বলিলেন ;—

“ ঠাকুরণ দিদি প্রাতঃপ্রণাম ! ”

ঠাকুরণ দিদি ভবানন্দকে দেখিয়া, শশব্যস্তে বস্ত্রাদি সামলাইতে লাগিলেন। মস্তকের মোহন চূড়া খুলিয়া ফেলিবেন ইচ্ছা ছিল, কিন্তু সুবিধা হইল না, কেন না সকড়ি হাত ! নিবেকমস্তক সেই চিকুরজাল—হায় তাহাতে পূজার সময় একটি বকফুল পড়িয়াছিল !—বস্ত্রাঞ্চলে ঢাকিতে যত্ন করিলেন ; বস্ত্রাঞ্চল ঢাকিতে সক্ষম হইল না, কেন না ঠাকুরণটি একখানি পাঁচ হাত কাপড় পরিয়াছিলেন। সেই পাঁচ হাত কাপড় প্রথমে গুরুভার প্রণত উদরপ্রদেশ বেঁটন করিয়া আসিতে প্রায় নিঃশেষ হইয়া পড়িয়াছিল, তার পরে দুঃসহ ভারগ্রস্ত হৃদয়মণ্ডলেরও কিছু আবদ্ধ পর্দা রক্ষা করিতে হইয়াছে। শেষে মাথায় পৌছিয়া বস্ত্রাঞ্চল জবাব দিল। কাণের উপর উঠিয়া বলিল আর যাইতে পারি না। অগত্যা পরম স্ত্রীভাবতী গৌরী ঠাকুরাণী কথিত বস্ত্রাঞ্চলকে কাণের কাছে ধরিয়া রাখিলেন। এবং ভবিষ্যতে আট হাত কাপড় কিনিবার জন্য মনে মনে দৃঢ় প্রতিজ্ঞাবদ্ধ হইয়া বলিলেন “ কে গোসাই ঠাকুর ? ”

এস এস ! আমায় আবার প্রাতঃপ্রণাম কেন ভাই ? ”

ভব । তুমি ঠান্দিদি যে !

গৌরী । আদর করে বল বলিয়া । তোমরা হলে গোঁসাই মানুষ, দেবতা ! তা করেছ করেছ, বেঁচে থাক । তা করলেও করতে পার, হাজার হোক আমি বয়সে বড় ।

এখন ভবানন্দের অপেক্ষায় গৌরী দেবী মহাশয়া বছর পাঁচিশের বড়, কিন্তু স্ত্রুচতুর ভবানন্দ উত্তর করিলেন, “ সে কি ঠান্দিদি ! রসের মানুষ দেখে ঠান্দিদি বলি । নইলে যখন হিসাব হয়েছিল, তুমি আমার চেয়ে ছয় বছরের ছোট হইয়াছিলে মনে নাই ? আমাদের বৈষ্ণবের সব রকম আছে জান, আমার মনে মনে ইচ্ছা মঠধারী ব্রহ্মচারীকে বলিয়া তোমায় সাদ্ধা করে ফেলি । সেই কথাটাই বলতে এসেছি । ”

গৌরী । সেই কথা ছি ! অমন কথা কি বলতে আছে ! আমরা হলাম বিধবা ।

ভব । তবে সাদ্ধা হবে না কি ?

গৌরী । তা ভাই, যা জান তা কর । তোমরা হলে পণ্ডিত, আমরা মেয়ে মানুষ কি বুঝি ? তা, কবে হবে ?

ভবানন্দ অতি কষ্টে হাস্য সম্বরণ করিয়া বলিলেন “ সেই ব্রহ্মচারীটার সঙ্গে একবার দেখা হইলেনই হয় । আর—সে কেমন আছে ? ”

গৌরী বিষন্ন হইল । মনে মনে সন্দেহ করিল সাদ্ধার কথাটা তবে বুঝি তামাসা । বলিল, “ আছে আর কেমন, যেমন থাকে । ”

ভব । তুমি গিয়া একবার দেখিয়া আইস কেমন আছে, বলিয়া আইস আমি আসিয়াছি একবার সাদ্ধাৎ করিব ।

গৌরী দেবী তখন ভাতের কাটি ফেলিয়া, হাত ধুইয়া বড়

বড় ধাপের সিঁড়ি ভাঙ্গিয়া, দোতালার উপর উঠিতে লাগিল ।
 একটা ঘরে মলিন শয্যার উপর বসিয়া, এক অপূর্ণ সুন্দরী ।
 কিন্তু সৌন্দর্যের উপর, একটা ঘোরতর ছায়া আছে । মধ্যাহ্নে
 কুলপরিধাৱিনী প্রসন্নমলিনা বিপুলজলকম্বোলিনী শ্রোত-
 স্বতীর বন্ধের উপর অতি নিবিড় মেঘের ছায়ার ন্যায় কিসের
 ছায়া আছে । নদীহৃদয়ে তরঙ্গ বিক্ষিপ্ত হইতেছে, তীরে
 কুম্মিত তরুণুল বায়ুতরে হেলিতেছে, ঘন পুষ্পতরে নমি-
 তেছে, অট্টালিকাশ্রেণীও শোভিতেছে । তরণীশ্রেণী-তাড়নে
 জল আন্দোলিত হইতেছে । কাল মধ্যাহ্ন, তবু সেই কাদম্বিনী-
 নিবিড় কালো ছায়ায় সকল শোভাই কালিমাময় । এণ্ড তাই ।
 সেই পূর্বের মত চারু চিকণ চঞ্চল নিবিড় অলকদাম, পূর্বের
 মত সেই প্রশস্ত পরিপূর্ণ ললাটভূমে পূর্বমত অতুল তুলিকা-
 লিখিত জুহু, পূর্বের মত বিস্ফারিত সম্মল উজ্জ্বল কৃষ্ণতার
 বৃচ্ছকু, তত কটাক্ষময় নয়, তত লোলতা নাই, কিছু নয় ।
 অধরে তেমনি রাগ রঙ্গ, হৃদয় তেমনি স্বাসানুগামী পূর্ণতার
 ঢল ঢল, বাহু তেমনি বনালতাছাপা কোমলতাবৃত্ত । কিন্তু
 আজ সে দীপ্তি নাই, সে উজ্জলতা নাই, সে প্রখরতা নাই, সে
 চঞ্চলতা নাই, সে রস নাই । বলিতে কি, বৃষ্টি সে ঘোবন
 নাই । আছে কেবল সেই সৌন্দর্য আর সে মাধুর্য । নূতন
 হইরাছে ধৈর্য্য গান্ধীৰ্য্য । ইহাকে পূর্বে দেখিলে মনে হইত,
 মনুবালাকে অতুলনীয় সুন্দরী, এখন দেখিলে বোধ হয়,
 হুঁনি দেবলোকে শাপগ্রস্তা দেবী । ইহার চারি পার্শ্বে ছই তিন
 খানা ভূলাটের পুথি পড়িয়া আছে । দেওয়ালের গায়ে হরি-
 নামের মালা টাঙ্গান আছে, আর মধ্যে মধ্যে জগন্নাথ, বলরাম,
 সুভদ্রার পট, কালীয় দমন, নবনারী কুঞ্জর, বস্ত্রহরণ, গোবর্দ্ধন
 ধারণ প্রভৃতি ব্রহ্মলীলার চিত্র রঞ্জিত আছে । চিত্রগুলির নীচে

লেখা আছে, “চিত্র না বিচিত্র ?” সেই গৃহমধ্যে ভবানন্দ প্রবেশ করিলেন ।

ভবানন্দ জিজ্ঞাসা করিলেন, “কেমন কল্যাণি শারীরিক মঙ্গল ত ?”

কল্যাণী । এ প্রশ্ন কি আপনি ত্যাগ করিবেন না ? আমার শারীরিক মঙ্গলে আপনারই কি ইষ্ট, আর আমারই বা কি ইষ্ট ?

ভব । যে বৃক্ষ রোপণ করে, সে তাহাতে নিত্য ফল দেয় । গাছ বাড়িলেই তাহার সুখ । তোমার মৃত দেহে আমি জীবন রোপণ করিয়াছিলাম, বাড়িতেছে কি না, জিজ্ঞাসা করিব না কেন ?

ক । বিষবৃক্ষের কি ফল আছে ?

ভব । জীবন কি বিষ ?

ক । না হলে অমৃতসিঞ্ঝনে আমি তাহা ধ্বংস করিতে চাহিয়াছিলাম কেন ?

ভব । সে কথা অনেক দিন জিজ্ঞাসা করিব মনে ছিল, সাহস করিয়া জিজ্ঞাসা করিতে পারি নাই । কে তোমার জীবন বিষময় করিয়াছিল ?

কল্যাণী স্থিরভাবে উত্তর করিলেন, “আমার জীবন কেহ বিষময় করে নাই । জীবনই বিষময় । আমার জীবন বিষময়, আপনার জীবন বিষময়, সকলেরই জীবন বিষময় ।”

ভব । সত্য কল্যাণি আমার জীবন বিষময় । যে দিন অবধি—তোমার ব্যাকরণ শেষ হইয়াছে ?

ক । সকলি শেষ হইয়াছে । কেবল দ্বিতীয় শেষ হয় নাই ।

ভব । অভিধান ?

ক। স্বর্গ বর্গ বুঝিতে পারিলাম না। আপনি বুঝাইয়া দিতে পারেন ?

ভব। যাহা আপনি বুঝি না, তাহা বুঝাইতে পারি না। সাহিত্য পূর্ব্বমত পড়া হইতেছে ?

ক। পূর্ব্বাপর বুঝি না। কুমারসম্ভব পরিত্যাগ করিয়া হিতোপদেশ পড়িতেছি।

ভব। কেন কল্যাণি ?

কল্যাণী। কুমারে দেবচরিত্র, হিতোপদেশে পশুচরিত্র।

ভব। দেবচরিত্র ছাড়িয়া, পশুচরিত্রে এ অমুরাগ কেন ?

ক। চিত্ত বশ নহে বলিয়া। আমার স্বামীর সন্বাদ কি প্রভু ?

ভব। বার বার সে সন্বাদ কেন জিজ্ঞাসা কর ? তিনি তো তোমার পক্ষে মৃত।

ক। আমি তাঁর পক্ষে মৃত, তিনি আমার পক্ষে নন।

ভব। তিনি তোমার পক্ষে মৃতবৎ হইবেন বলিয়াই ত তুমি মরিলে। বার বার সে কথা কেন কল্যাণি ?

ক। মরিলে কি সম্বন্ধ যায় ? তিনি কেমন আছেন ?

ভব। ভাল আছেন।

ব। কোথায় আছেন ? পদচিহ্নে ?

ভব। সেই থানেই আছেন।

ক। কি কাজ করিতেছেন ?

ভব। যাহা করিতেছিলেন। হুর্গনির্মাণ, অস্ত্রনির্মাণ। তাঁহারই নির্মিত অস্ত্রে সহস্র সহস্র সন্তান সজ্জিত হইয়াছে। তাঁহার কল্যাণে কামান, বন্দুক, গোলা, গুলী, বাক্রদের আমাদের আর অভাব নাই। সন্তানমধ্যে তিনিই শ্রেষ্ঠ। তিনি আমাদের মহৎ উপকার করিতেছেন। তিনি আমাদের দক্ষিণ বাহু।

ক। আমি প্রাণ ত্যাগ না করিলে কি এত হইত? যার বুকে কাদা পোরা কলগী বাঁধা সে কি ভবসমুদ্রে সাঁতার দিতে পারে? যার পায়ে লোহার শিকল সে কি দৌড়ায়? কেন সন্ন্যাসী তুমি এ ছার জীবন রাখিয়াছিলে?

ভব। জী স্বেধর্শিণী, ধর্মের সহায়।

ক। ছোট ছোট ধর্ম। বড় বড় ধর্ম কণ্টক। “কণ্টকে-নৈব কণ্টকঃ” আমি বিষ কণ্টকের দ্বারা তাঁহার অধর্ম কণ্টক উদ্ধৃত করিয়াছিলাম। ছি! ছরাচার পামর ব্রহ্মচারী! এ প্রাণ তুমি ফিরাইয়া দিলে কেন?

ভব। ভাল, যা দিয়াছি তা না হয় আমারই আছে। কল্যাণি! যে প্রাণ তোমার দিয়াছি, তাহা কি তুমি আমায় দিতে পার?

ক। আপনি কিছু সম্বাদ রাখেন কি, আমার স্নকুমারী কেমন আছে?

ভব। অনেক দিন সে সম্বাদ পাই নাই। জীবানন্দ অনেক দিন সে দিকে যান নাই।

ক। সে সম্বাদ কি আমার আনাইয়া দিতে পারেন না? স্বামীই আমার ত্যাজ্য, বাচিলাম ত কন্যা কেন ত্যাগ করিব? এখনও স্নকুমারীকে পাইলে এ জীবনে কিছু সুখ সম্ভাবিত হয়। কিন্তু আমার জ্ঞাত আপনি কেন এত করিবেন?

ভব। করিব কল্যাণি। তোমার কন্যা আনিয়া দিব। কিন্তু তার পর?

ক। তার পর কি ঠাকুর?

ভব। স্বামী?

ক। ইচ্ছা পূর্বক ত্যাগ করিয়াছি।

ভব। যদি তার রত সম্পূর্ণ হয় ?

ক। তবে তাঁর পায়ে লুটাইব। আমি যে বাঁচিয়া
আছি তিনি কি জানেন ?

ভব। না।

ক। আপনার সঙ্গে কি তাঁহার সাক্ষাৎ হয় না।

ভব। হয়।

ক। আমার কথা কি কিছু বলেন না ?

ভব। না, যে স্ত্রী মরিয়া গিয়াছে তাহার সঙ্গে স্বামীর
আর সম্বন্ধ কি ?

ক। কি বলিতেছেন ?

ভব। তুমি আবার বিবাহ করিতে পার, তোমার পুন-
র্জন্ম হইয়াছে।

ক। আমার কন্যা আনিয়া দাও।

ভব। দিব, তুমি আবার বিবাহ করিতে পার।

ক। তোমার সঙ্গে নাকি ?

ভব। বিবাহ করিবে ?

ক। তোমার সঙ্গে নাকি ?

ভব। যদি তাই হয় ?

ক। সন্তানধর্ম কোথায় থাকিবে ?

ভব। অতল জলে।

ক। পরকাল ?

ভব। অতল জলে।

ক। মহাব্রত ? এই ভবানন্দ নাম ?

ভব। অতল জলে।

ক। কিসের জন্য এসব অতল জলে ডুবাইবে ?

ভব। তোমার জন্য। দেখ, মহুষা হউন, শ্বষি হউন,

সিদ্ধ হউন, দেবতা হউন, চিত্ত অবশ; সম্ভানধর্ম আমার প্রাণ, কিন্তু আজ প্রথম বলি তুমি আমার প্রাণাধিক প্রাণ। যে দিন তোমায় প্রাণদান করিয়াছিলাম, সেই দিন হইতে আমি তোমার পাদমূলে বিক্রীত। আমি জানিতাম না, যে সংসারে এ রূপরাশি আছে। এমন রূপরাশি আমি কখন চক্ষে দেখিব জানিলে, কখন সম্ভানধর্ম গ্রহণ করিতাম না। এ ধর্ম এ আগুনে পুড়িয়া ছাই হয়। ধর্ম পুড়িয়া গিয়াছে, প্রাণ আছে। আজি চারি বৎসর প্রাণও পুড়িতেছে, আর থাকে না! দাহ! কল্যাণী দাহ! জ্বালা! কিন্তু জ্বলিবে যে ইন্ধন তাহা আর নাই। প্রাণ যায়। চারি বৎসর সহ্য করিয়াছি আর পারিলাম না। তুমি আমার হইবে?

ক। তোমারি মুখে শুনিয়াছি যে সম্ভান ধর্মের এই এক নিয়ম যে, যে ইচ্ছিয় পরবশ হয় তার প্রায়শ্চিত্ত মৃত্যু। একথা কি সত্য?

ভব। এ কথা সত্য।

ক। তবে তোমার প্রায়শ্চিত্ত মৃত্যু?

ভব। আমার একমাত্র প্রায়শ্চিত্ত মৃত্যু।

ক। আমি তোমার মনস্কামনা সিদ্ধ করিলে, তুমি মরিবে?

ভব। নিশ্চিত মরিব।

ক। আর যদি মনস্কামনা সিদ্ধ না করি?

ভব। তথাপি মৃত্যু আমার প্রায়শ্চিত্ত; কেন না চিত্ত আমার ইচ্ছিয়ের বশ হইয়াছে।

ক। আমি তোমার মনস্কামনা সিদ্ধ করিব না। তুমি কবে মরিবে?

ভব। আগামী যুদ্ধ।

ক। তবে তুমি বিদায় হও। আমার কন্যা পাঠাইয়া দিবে কি ?

ভবানন্দ সাক্ষরলোচনে বলিল, “দিব। আমি মরিয়া গেলে আমার মনে রাখিবে কি ?”

কল্যাণী বলিল “রাখিব। ব্রতচ্যুত অধর্মী বলিয়া মনে রাখিব।”

ভবানন্দ বিদায় হইল, কল্যাণী পুথি পড়িতে বসিল।

পঞ্চম পরিচ্ছেদ ।

ভবানন্দ ভাবিতে ভাবিতে মঠে চলিলেন। যাইতে যাইতে রাত্রি হইল। পথে একাকী যাইতেছিলেন। বন-মধ্যে একাকী প্রবেশ করিলেন। দেখিলেন বনমধ্যে আর এক ব্যক্তি তাঁতার আগে আগে যাইতেছে। ভবানন্দ জিজ্ঞাসা করিলেন, “কে হে বাও ?”

অগ্রগামী ব্যক্তি বলিল, “জিজ্ঞাসা করিতে জানিলে উত্তর দিই—আমি পথিক।”

ভব। বন্দে।

অগ্রগামী ব্যক্তি বলিল, “মাতরং।”

ভব। আমি ভবানন্দ গোস্বামী।

অগ্রগামী। আমি ধীরানন্দ।

ভব। ধীরানন্দ, কোথায় গিয়াছিলে ?

ধীর। আপনারই সন্ধানে।

ভব। কেন ?

ধীর। একটা কথা বলিতে।

ভব । কি কথা ?

ধীর । নির্জনে বক্তব্য ।

ভব । এইখানেই বল না, এ অতি নির্জনস্থান ।

ধীর । আপনি নগরে গিয়াছিলেন ?

ভব । হাঁ ।

ধীর । গৌরী দেবীর গৃহে ?

ভব । তুমিও নগরে গিয়াছিলে না কি ?

ধীর । সেখানে একটা পরম সুন্দরী যুবতী বাস করে ?

ভবানন্দ কিছু বিস্মিত, কিছু ভীত হইলেন । বলিলেন—

“এ সকল কি কথা ?”

ধীর । আপনি তাহার সহিত সাক্ষাৎ করিয়াছিলেন ?

ভব । তার পর ?

ধীর । আপনি সেই কামিনীর প্রতি অতিশয় অমুরক্ত ।

ভব । (কিছু ভাবিয়া) ধীরানন্দ, কেন এত সন্ধান লইলে ? দেখ ধীরানন্দ তুমি যাহা বলিতেছ, তাহা সকলই সত্য । তুমি ভিন্ন আর কয়জন এ কথা জানে ?

ধীর । আর কেহ না ।

ভব । তবে তোমাকে বধ করিলেই আমি কলঙ্ক হইতে মুক্ত হইতে পারি ?

ধীর । পার ।

ভব । আইস তবে এই বিজন স্থানে দুই জনে যুদ্ধ করি । হয় তোমাকে বধ করিয়া আমি নিষ্কটক হই, নয় তুমি আমাকে বধ করিয়া আমার সকল জালা নির্দ্বাপন কর । অস্ত্র আছে ?

ধীর । আছে—শুধু হাতে কার সাধ্য তোমার সঙ্গে এ সকল কথা কয় । যুদ্ধই যদি তোমার মত হয়, তবে অবশ্য করিব । সন্তানে সন্তানে বিরোধ নিষিদ্ধ কিন্তু আত্মরক্ষার জন্য

কাহারও সঙ্গে বিরোধ নিবদ্ধ নহে। কিন্তু বাহা বলিবার জন্য আমি তোমাকে খুঁজিতেছিলাম তাহা সবটা শুনিয়া যুদ্ধ করিলে ভাল হয় না ?

ভব। ক্ষতি কি—বল না।

ভবানন্দ তরবারি নিষ্কাশিত করিয়া ধীরানন্দের স্বন্ধে স্থাপিত করিলেন। ধীরানন্দ না পলায়।

ধীর। আমি এই বলিতেছিলাম,—তুমি কল্যাণীকে বিবাহ কর—

ভব। কল্যাণী তাও জান ?

ধীর। বিবাহ কর না কেন ?

ভব। তাহার যে স্বামী আছে।

ধীর। বৈষ্ণবের সেরূপ বিবাহ হয়।

ভব। সে নেড়া বৈরাগীর—সন্তানের নহে। সন্তানের বিবাহই নাই।

ধীর। সন্তানধর্ম কি অপরিহার্য—তোমার যে প্রাণ যায়। ছি! ছি! আমার কাঁধ যে কাটিয়া গেল? (বাস্তবিক এবার ধীরানন্দের স্বন্ধ হইতে রক্ত পড়িতেছিল।)

ভব। তুমি কি অভিপ্রায়ে আমাকে অধর্ম্যে মতি দিতে আসিয়াছ? অবশ্য তোমার কোন স্বার্থ আছে।

ধীর। তাহাও বলিবার ইচ্ছা আছে—তরবার বসাইও না—বলিতেছি। এই সন্তান ধর্ম্যে আমার হাড় অর অর হইয়াছে, আমি ইহা পরিত্যাগ করিয়া জীপুত্রের মুখ দেখিয়া দিনপাত করিবার জন্য বড় উতলা হইয়াছি। আমি এ সন্তানধর্ম্য পরিত্যাগ করিব। কিন্তু আমার কি বাড়ী গিয়া বসিবার ঘো আছে? বিদ্রোহী বলিয়া আমাকে অনেকে চিনে। ঘরে গিয়া বসিলেই হয় রাজপুরুষে মাথা কাটিয়া লইয়া বাইবে, নয়

সন্তানেরাই বিশ্বাসঘাতী বলিয়া মারিয়া ফেলিয়া, চলিয়া যাইবে। এই জন্য তোমাকে আমার পথে লইয়া যাইতে চাই।

ভব। কেন, আমার কেন ?

ধীর। সেইটী আসল কথা। এই সন্তানসেনা তোমার আজ্ঞাধীন—সন্তানন্দ এখন এখানে নাই, তুমি ইহার নায়ক। তুমি এই সেনা লইয়া যুদ্ধ কর, তোমার জয় হইবে, ইহা আমার দৃঢ় বিশ্বাস। যুদ্ধজয় হইলে তুমি কেন স্বনামে রাজ্যস্থাপন কর না, সেনা ত তোমার আজ্ঞাকারী। তুমি রাজা হও—কল্যাণী তোমার মন্দোদরী হউক, আমি তোমার অনুচর হইয়া জীপুত্রের মুখাবলোকন করিয়া দিনপাত করি, আর আশীর্বাদ করি। সন্তান ধর্ম্ম অতল জলে ডুবাইয়া দাও।

ভবানন্দ, ধীরানন্দের স্বপ্ন হইতে তরবারি ধীরে ধীরে নামাইলেন। ধীরানন্দও সরিয়া গেল। ভবানন্দ কিছুক্ষণ অন্যমনা ছিলেন, যখন খুঁজিলেন তখন আর তাহাকে দেখিতে পাইলেন না।

যষ্ঠ পরিচ্ছেদ ।

মঠে না গিয়া, ভবানন্দ গভীর বনমধ্যে প্রবেশ করিলেন। সেই জঙ্গল মধ্যে এক স্থানে এক প্রাচীন অটালিকার ভগ্নাবশেষ আছে। ভগ্নাবশিষ্ট ইষ্টকাদির উপর, লতাশৃঙ্খল কটকাদি অতিশয় নিবিড় ভাবে জন্মিয়াছে। সেখানে অসংখ্য সর্পের বাস। ভগ্ন প্রকোষ্ঠের মধ্যে একটা অপেক্ষাকৃত অভয় ও পরিত্রুত ছিল, ভবানন্দ গিয়া তাহার উপরে উপবেশন করিলেন। উপবেশন করিয়া ভবানন্দ চিন্তা করিতে লাগিলেন।

রজনী অতি ঘোর তমোময়ী। তাহাতে সেই অরণ্য অতি
 বিস্তৃত, একেবারে জনশূন্য, অতিশয় নিবিড়, বৃক্ষলতায়
 ছর্ভেদ্য, বন্যাপশুরও গমনাগমনের বিরোধী। বিশাল,
 জনশূন্য, অন্ধকার, ছর্ভেদ্য, নীরব! রবের মধ্যে দূরে ব্যাঘ্রের
 হুকার অথবা অন্য স্থাপদের ক্ষুধা ভীতি বা আফালনের বিকট
 শব্দ। কদাচিৎ কোন বৃহৎ পক্ষীর পক্ষকম্পন, কদাচিৎ
 তাড়িত এবং তাড়নকারী, বধ্য এবং বধকারী পশুদিগের দ্রুত-
 গমন শব্দ। সেই বিজনে অন্ধকারে ভগ্ন অট্টালিকার উপর
 বসিয়া একা ভবানন্দ। তাঁহার পক্ষে তখন যেন পৃথিবী নাই,
 অথবা কেবল ভয়ের উপাদানময়ী হইয়া আছেন। সেই
 সময়ে ভবানন্দ কপালে হাত দিয়া ভাবিতেছিল; স্পন্দ নাই,
 নিশ্বাস নাই, ভয় নাই, অতি প্রগাঢ় চিন্তায় নিমগ্ন। মনে মনে
 বলিতেছিলেন, “যাহা ভবিষ্য তাহা অবশ্য হইবে। আমি
 ভাগীরথীজলতরঙ্গসমনীপে ক্ষুদ্র গজদেহ! স্থাপন করিয়া কি
 করিব? ইহা আমাকে করিতে হইয়াছে, অদৃষ্টে যাহা থাকে
 হইবে। আপনাদিগের ওজন আপনি না বুঝিয়া মাগদেও আমি
 তুলিত হইতে উঠিয়াছিলাম। যে লোভী, যে পাপিষ্ঠ, যে
 ইন্দ্রিয়পরবশ, যে অধর্মী তাহার আবার ধর্ম কি? তাহার
 আবার সত্য কি? পাপে আমার ভয় কি? অনন্ত নরক আমার
 কুপালে নিশ্চিত। ইহজীবন ধ্বংসের সম্ভাবনা, এই ইহজীবন
 ধ্বংসে আমার ভয় কি? অতএব যাহাই কপালে ঘটুক, আমি
 এ ছক্ষু করিব। এদিকেও প্রাণ যায়, সে দিকেও প্রাণ
 যাইবে। যে বিপদ দূরবর্তী তাহাকে উপেক্ষা করিয়া যে বিপদ
 নিকটবর্তী তাহা হইতে আপনাকে উদ্ধার করিতে হয়। আমি
 ধীরানন্দের পরামর্শ শুনিব।—না! ধর্মই সর্বাপেক্ষা গুরু, এ
 জীবন হয় তো এই মুহূর্ত্তেই সর্বদংশনে শেষ হইতে পারে,

কিন্তু জন্মান্তরের তো শেষ নাই। এ জীবনে আমি যদি সুখী হই, সে দুই দিনের জন্য, পরলোকে যদি আমি দুঃখী হই, সে অনন্তকালের জন্য।” এমন সময়ে পেচক মাথার উপর মুঠু গম্ভীর শব্দ করিল। ভবানন্দ তখন মুক্তকণ্ঠে বলিতে লাগিলেন “ও কি শব্দ? কাণে যেন গেল, যেন যম আমার ডাকিতেছে। আমি জানি না কে শব্দ করিল, কে আমার ডাকিল, কে আমার বিধি দিল, কে আমার নিষেধ করিল। পুণ্যময়ি অনন্তে! তুমি শব্দময়ী, কিন্তু তোমার শব্দের তৌ মৰ্ম্ম আমি বুঝিতে পারিতেছি না। আমার ধৰ্ম্মে মতি দাও, আমার পাপ হইতে নিরত কর। ধৰ্ম্মে, হে গুরুদেব! ধৰ্ম্মে যেন আমার মতি থাকে।”

তখন সেই ভীষণ কাননমধ্যা হইতে অতি মধুর অথচ গম্ভীর, মৰ্ম্মভেদী মনুষ্যকণ্ঠ শ্রুত হইল; কে বলিল “ধৰ্ম্মে তোমার মতি থাকিবে—আশীর্বাদ করিলাম।”

ভবানন্দের শরীরে রোমাঞ্চ হইল। “একি এ? এ যে গুরুদেবের কণ্ঠ। মহারাজ কোথায় আপনি! এ সময়ে দাসকে দর্শন দিন।”

কিন্তু কেহ দর্শন দিল না—কেহ উত্তর করিল না। ভবানন্দ পুনঃ পুনঃ ডাকিলেন—উত্তর গাইলেন না। এ দিক শব্দিক খঁজিলেন—কোথাও কেহ নাই।

যখন রজনী প্রভাতে প্রাতঃ সূর্য্য উদিত হইয়া বৃহৎ অরণ্যের শিরঃস্থ শ্যামল পত্ররাশিতে প্রতিভাসিত হইতেছিল তখন ভবানন্দ মঠে আসিয়া উপস্থিত হইলেন! কর্ণে প্রবেশ করিল—“হরে মুরারে! হরে মুরারে।” চিনিলেন সত্যানন্দের কণ্ঠ। বুঝিলেন, প্রভু প্রত্যাগমন করিয়াছেন।

সপ্তম পরিচ্ছেদ।

জীবানন্দ কুটীর হইতে বাহির হইয়া গেলে পর, শাস্তিদেবী
আবার সারঙ্গ লইয়া মুহু মুহু রবে গীত করিতে লাগিলেন।

“ প্রলয়পয়োবিজলে, ধৃতবানসি বেদং

বিহিত বহিঃ চরিত্র মথেনং

কেশব ধৃত নীন শরীর

জয় জগদীশ হরে। ”

গোস্থামিবিরচিত মধুর স্তোত্র যখন শাস্তিদেবীকণ্ঠনিঃসৃত
হইয়া রাগ তাল লয় সম্পূর্ণ হইয়া সেই অনন্ত কাননের অনন্ত
নীরব বিদীর্ণ করিয়া, পূর্ণ জলোচ্ছ্বাসের সময়ে বসন্তানিল-
তাদিত তরঙ্গ ভঙ্গের ন্যায় মধুর হইয়া আসিল, তখন তিনি
গায়িলেন ;—

নিন্দসি বজ্রবিধেরহহ ঐতিজাতং

সদয় হৃদয় দর্শিত পশুঘাতং

কেশব ধৃত বৃদ্ধ শরীর

জয় জগদীশ হরে।

তখন বাহির হইতে কে অতি গম্ভীর রবে গায়িল, গম্ভীর
মেঘগর্জ্জনবৎ তানে গায়িল ;—

স্নেহ নিবহনিধনে কলয়সি করবালং

ধুমকেতু মিব কিমপি করালং

কেশবধৃত কঙ্কিশরীর

জয় জগদীশ হরে। ”

শাস্তি গলা চিনিল, বলিল “ রহ্ পোড়াকপালীর ছেলে!
বুড়ো বয়সে তুমি মেয়েমানুষের সঙ্গে গায়িতে এসো! ” এই

বলিয়া শাস্তি সারঙ্গের তারগুলি আর একটু চড়াইয়া লইয়া,
কণ্ঠ আর একটু উচুতে তুলিয়া দিয়া, গায়িল ;—

বেদাম্বুধরতে অগস্তি বহতে,

ভূগোলমুদ্রিতে,

দৈত্যং দারয়তে, বলিং ছলয়তে

ক্ষত্রক্ষয়ং কুর্বতে ।

পৌলস্ত্যং অয়তে হলং কলয়তে

কারুণ্যমাতয়তে,

শ্লেচ্ছানুচ্ছ্রয়তে দশাকৃতিকৃতে

কৃষ্ণায় তুভাং নমঃ ।

বলিতে বলিতে সে দীর্ঘ তাল সেই উচ্চৈরব সে গগন-
বিদারক তান ছাড়িয়া দিয়া শাস্তি গায়িল ;—

“স্মিত কমলা কুচমণ্ডল

ধৃত কুণ্ডল কলিত ললিত বনমাল

জয় জয় দেব হরে । ”

বাহির হইতে যে সঙ্গে গায়িতেছিল সে আর সহ্য করিতে
পারিল না । শ্বেত শ্মশ্রু, শ্বেত কাস্তি, শ্বেত বসন, শ্বেত পুষ্পা-
ভরণ গইয়া আসিয়া কুটীরমধ্যে প্রবেশ করিল,—বলিল “ মা
গাও, তোমা হইতে সনাতন ধর্ম উদ্ধার হইবে, গাও ” বলিয়া
অশ্রুনি গাইল,

দিনমণিমণ্ডন, ভবখণ্ডন মুনিন্দ্রন মানস হংস—

শাস্তি ভক্তিভাবে প্রণত হইয়া সত্যানন্দের পদধূলি গ্রহণ
করিল, বলিল “প্রভো ! আমি এমন কি ভাগ্য করিয়াছি
যে, আপনার শ্রীপাদপদ্ম এখানে দর্শন পাই—আজ্ঞা করুন
আমাকে কি করিতে হইবে ” বলিয়া সারঙ্গে সুর দিয়া শাস্তি
আবার গায়িল ;—

“তব চরণপ্রণতা বয়সিতি ভাবয় কুরু কুশলং প্রণতেষু।”

সত্যানন্দ বলিল “মা তোমার কুশলই হইবে।”

শান্তি। কিসে ঠাকুর—তোমার তো আজ্ঞা আছে আমার বৈধব্য ”

সত্যা। তোমারে আমি চিনিতাম না, চিনিলে আমি বলিতাম হে জীবানন্দ ! আমার নিকট শপথ কর যে তুমি পত্নীসহবাস ত্যাগ করিবে না। মা আমার এক ভিক্ষা আছে, তুমি জীবেশ আর গ্রহণ করিও না। সন্তানবেশ গ্রহণ করিয়া অসি চন্দ্র বল্লম গ্রহণ পূর্বক সন্তানসেনা মধ্যে প্রবেশ কর।

শান্তি। প্রভো এ আজ্ঞা আমায় কেন করেন ? আপনার আজ্ঞায় শিবের শত্রু জয় করিয়াছি, বিষ্ণুর শত্রুও জয় করিতে হইবে ? বলিয়া শান্তি গায়িল,

“মধু মুর নরক বিনাশন—

গরুড়াসন সুরকুলকেলিনিদান

অমল কমলদললোচন

ভব মোচন ত্রিভুবন ভবনিধান

জয় জয় দেব হরে।”

বাবা ! আপনি চূপ করিয়া রহিয়াছেন কেন, দেখিতেছেন না কি কাণ্ড হইতেছে ?

সত্যা। কি কাণ্ড হইতেছে ?

শান্তি। আপনি কি জানেন না ?

সত্যা। সকল জানি না।

শান্তি। তবে আমি কাল বলিব। কিন্তু একটা কথা আমার জিজ্ঞাসা করিবার ইচ্ছা আছে—আমার স্বামীর প্রতিজ্ঞা-ভঙ্গের কারণ আমি। ° মৃত্যুদণ্ড ঠাঁহার কপালে বিধান।

তিনি ধর্ম পতিত হইয়াছেন, তাঁহাকে মরিতে হইবে।
সুতরাং আমাকেও মরিতে হইবে। কিন্তু আপনার কার্য
উদ্ধার হইবে কি? কে কার্যোদ্ধার করিবে?”

সত্য। মা! দড়ীর জোর না বুঝিয়া আমি জেয়াদা টানি-
য়াছি, তুমি আমার অপেক্ষা জানী; ইহার উপায় তুমি কর,
জীবানন্দকে বলিও না যে আমি সকল জানি। তোমার
প্রলোভনে তিনি জীবন রক্ষা করিতে পারেন। এতদিন
করিতেছেন। তাহা হইলে আমার কার্যোদ্ধার হইতে
পারে।

সেই বিশাল নীল উৎফুল্ল লোচনে নিদাঘকাদধিনী-বিরা-
জিত বিদ্যাতুল্য ঘোর রোষ কটাক্ষ হইল। শাস্তি বলিল
“কি ঠাকুর! আমি আর আমার স্বামী এক আত্মা, যাহা যাহা
তোমার সঙ্গে কথোপকথন হইল সবই বলিব। মরিতে
হয় তিনি মরিবেন, আমার ক্ষতি কি? আমি তো সঙ্গে সঙ্গে
মরিব। তাঁর স্বর্গ আছে, মনে কর কি আমার স্বর্গ নাই।”

ব্রহ্মচারী বলিল যে “আমি কখন হারি নাই, আজ
তোমার কাছে হারিলাম। মা আমি তোমার পুত্র, সন্তানকে
স্নেহ কর, জীবানন্দের প্রাণরক্ষা কর, আপনার প্রাণরক্ষা
কর, আমার কার্যোদ্ধার হইবে।”

— বিজলি হাসিল। শাস্তি বলিল “আমার স্বামীর ধর্ম
আমার স্বামীর হাতে; আমি তাঁহাকে ধর্ম হইতে বিরত
করিবার কে? ইহলোকে জীব পতি দেবতা, কিন্তু পর-
লোকে সবারই ধর্ম দেবতা—আমার কাছে আমার পতি
বড়, তার অপেক্ষা আমার ধর্ম বড়, তার অপেক্ষা আমার
কাছে আমার স্বামীর ধর্ম বড়। আমার ধর্ম আমার যে
দিন ইচ্ছা জ্বলাঞ্জলি দিতে পারি; আমার স্বামীর ধর্ম

জ্বলাঞ্জলি দিব? মহারাজ! তোমার কথার আমার স্বামী মূর্খিতে হয় মরিবেন, আমি বারণ করিব না।”

ব্রহ্মচারী তখন দীর্ঘনিশ্বাস ত্যাগ করিয়া বলিল “মা মনের কথা সকল তোমায় বলি, জীবানন্দ বল, ভবানন্দ বল, মহানন্দ বল, যে কেহ বল, আমার মনের কথা বুঝিবার যোগ্য তুমি ভিন্ন কেহ নহে। এ ঘোর ব্রতে বলিদান আছে। আমাদের সকলকেই বলি পড়িতে হইবে। আমি মরিব, জীবানন্দ, ভবানন্দ সবাই মরিবে, বোধ হয় মা তুমিও মরিবে; কিন্তু দেখ কাব করিয়া মরিতে হইবে, বিনা কার্য্যে কি মরা ভাল?—আমি কেবল দেশকে মা বলিয়াছি আর কাহাকেও মা বলি নাই, কেন না সেই সূজলা সুফলা ধরণী ভিন্ন আমরা অনন্তমাতৃক। আর তোমাকে মা বলিলাম, তুমি মা হইয়া সন্তানের কায কর, যাহাতে কার্য্যোদ্ধার হয় তাহা করিও, জীবানন্দের প্রাণরক্ষা করিও, তোমার প্রাণরক্ষা করিও।”

এই বলিয়া সত্যানন্দ “হরে মুরারে মধুকৈটভারে” গায়িতে গায়িতে নিশ্বাস্ত হইল।

অষ্টম পরিচ্ছেদ ।

ক্রমে সন্তানসম্প্রদায় মধ্যে সম্বাদ প্রচারিত হইল যে সত্যানন্দ আসিয়াছেন, সন্তানদিগের সঙ্গে কি কথা কহিবেন, এই বলিয়া তিনি সকলকে আহ্বান করিয়াছেন। তখন দলে দলে সন্তানসম্প্রদায় অজয়তীরে আসিয়া সমবেত হইতে লাগিল।

জ্যোৎস্নারাত্রিতে অজয়তৈকত পার্শ্বে বৃহৎ কাননমধ্যে আত্ম,

পনস, তাল, তিস্তিড়ী, অখথ, বেল, বট, শাল্মলী প্রভৃতি বৃক্ষাদি রঞ্জিত মহা গহনে দশ সহস্র সশস্ত্র সন্তান সমবেত হইল। তখন সকলেই পরস্পরের মুখে সত্যানন্দের আগমন-বাক্তী শ্রবণ করিয়া মহা কোলাহলধ্বনি করিতে লাগিল। সত্যানন্দ কি জন্য কোথায় গিয়াছিলেন, তাহা সাধারণে জানিত না। প্রবাদ এই যে তিনি সন্তানদিগের মঙ্গলকামনায় তপস্যার্থ হিমালয়ে প্রস্থান করিয়াছিলেন। আজ সকলে কাণাকাণি করিতে লাগিল “মহারাজের তপঃসিদ্ধি হইয়াছে—আমাদের রাজ্য হইবে।” তখন বড় কোলাহল হইতে লাগিল। কেহ চীৎকার করিতে লাগিল “মার, মার, নেড়ে মার!” কেহ বলিল “জয় জয়! মহারাজ কি জয়” কেহ গায়িল “হরে মুরারে মধুকৈটভারে” কেহ গায়িল “বন্দে মাতরং” কেহ বলে ভাই এমন দিন কি হইবে, তুচ্ছ বাঙ্গালি হইয়া রণক্ষেত্রে এ শরীর পাত করিব? কেহ বলে ভাই এমন দিন কি হইবে মসজিদ ভাঙ্গিয়া রাধামাধবের মন্দির গড়িব? কেহ বলে ভাই এমন দিন কি হইবে আপনার ধন আপনি খাইব? দশ সহস্র নরকণ্ঠের কলকল রব, মধুর বায়ুসস্তাড়িত বৃক্ষপত্ররাশির মর্ম্মর, সৈকতবাহিনী তরঙ্গিনীর মুছ মুছ তর তর রব, নীল আকাশে চল্লি তারা স্বেত মেঘরাশি, শ্যামল ধরণীতলে, হরিৎ কানন, স্বচ্ছ নদী, স্বেত সৈকত, ফুল কুসুমদাম। আর মধ্যে মধ্যে সেই সর্বজন মনোরম “বন্দে মাতরং।” তখন সত্যানন্দ আসিয়া সেই সমবেত সন্তানমণ্ডলীর মধ্যে দাঁড়াইলেন। তখন সেই দশ সহস্র সন্তানমন্তক বৃক্ষবিচ্ছেদপতিত চল্লিকিরণে প্রভাসিত হইয়া শ্যামল তৃণভূমে প্রণত হইল। অতি উচ্চৈঃস্বরে অশ্রুপূর্ণলোচনে উভয় বাহু উর্দ্ধে উত্তোলন করিয়া সত্যানন্দ বলিলেন,

“শঙ্খচক্র গদাপদ্মধারী, বনমালী, বৈকুণ্ঠনাথ, যিনি কেশিমথন
মধুমুর নরক মর্দন লোকপালন তিনি তোমাদের মঙ্গল করুন,
তিনি তোমাদের বাহুতে বল দিন, মনে ভক্তি দিন, ধর্ম্মে মতি
দিন, তোমরা একবার তাহার মহিমা গীত কর।” তখন সেই
সহস্র কণ্ঠে উচ্চৈঃস্বরে গীত হইতে লাগিল।

“জয় জগদীশ হরে

প্রলয়পয়োধিজলে ধৃতবানসি বেদং

বিহিত বহিঃ চরিত্র মথেন্দং

কেশব ধৃত মীন শরীর

জয় জগদীশ হরে।”

সত্যানন্দ তাহাদিগকে পুনরায় আশীর্বাদ করিয়া বলিলেন “হে সন্তানগণ, তোমাদের সঙ্গে আজ আমার বিশেষ কথা আছে। টমাসনামা এক জন বিধর্ম্মী ছুরাঙ্গা বহুতর সন্তান নষ্ট করিয়াছে। আজ রাত্রে আমরা তাহাকে সঠিকন্যে বধ করিব। জগদীশ্বরের আজ্ঞা—তোমরা কি বল?”

ভীষণ হরিধ্বনিতে কানন বিদীর্ণ করিল। “এখনই মারিব—কোথায় তারা দেখাইয়ে দিবে চল” “মার! মার! শত্রু মার!” ইত্যাদি শব্দে দূরস্থ শৈলে প্রতিধ্বনিত হইল। তখন সত্যানন্দ বলিলেন, “সে জন্য আমরাগকে একটু ধৈর্য্যাবলম্বন করিতে হইবে। ইংরেজের কামান আছে—কামান বাতীত ইংরেজের সঙ্গে যুদ্ধ সম্ভবে না। বিশেষ তাহারা বড় বীরজাতি। পদ চিহ্নের জুগ হইতে ১৭টা কামান আসিতেছে—কামান পৌছিলে আমরা যুদ্ধে যাত্রা করিব। ঐ দেখ প্রভাত হইতেছে—বেলা চারিদণ্ড হইলেই—ও কিও”

গুডু—গুডু—গুডু! অকস্মাৎ চারি দিকে বিশাল

কাননে তোপের আওয়াজ হইতে লাগিল। তোপ ইংরেজের। জালনিবদ্ধ মীনদলবৎ কাপ্তেন টামস সন্তানসম্প্রদায়কে এই আত্মকাননে ঘেরিয়া বধ করিবার উদ্যোগ করিয়াছে।

নবম পরিচ্ছেদ ।

“গুডুম্ গুডুম্ গুম্।” ইংরেজের কামান ডাকিল। সেই শব্দ বিশাল কানন কম্পিত করিয়া প্রতিধ্বনিত হইল, “গুডুম্ গুডুম্ গুম্।” অজয়ের বাকে বাকে ফিরিয়া সেই ধ্বনি দূরস্থ আকাশপ্রান্ত হইতে প্রতিক্রিষ্ট হইল। “গুডুম্ গুডুম্ গুম্!” অজয়পারে দূরস্থ কাননাস্তরের মধ্যে প্রবেশ করিয়া সেই ধ্বনি আবার ডাকিতে লাগিল “গুডুম্ গুডুম্ গুম্!” সত্যানন্দ জিজ্ঞাসা করিলেন, তোমরা দেখ কিসের তোপ। কয়েকজন সন্তান তৎক্ষণাৎ অশ্বারোহণ করিয়া দেখিতে ছুটিল, কিন্তু তাহারা কানন হইতে বাহির হইয়া কিছু দূর গেলেই শ্রাবণের ধারার ন্যায় গোলা তাহাদের উপর বৃষ্টি হইল, তাহারা অশ্বসহিত আহত হইয়া সকলেই প্রাণত্যাগ করিল। দূর হইতে সত্যানন্দ তাহা দেখিলেন। বলিলেন “উচ্চ বৃক্ষে উঠ, দেখ কি।” তিনি বলিবার অগ্রেই জীবানন্দ বৃক্ষে আরোহণ করিয়া প্রভাত করণে দেখিতেছিলেন, তিনি বৃক্ষের উপরস্থ শাখা হইতে ডাকিয়া বলিলেন “তোপ ইংরেজের।” সত্যানন্দ জিজ্ঞাসা করিলেন “অশ্বারোহী না পদাতি।”

জীব। দুই আছে।

• সত্যা । কত ?

• জীব । আন্দাজ করিতে পারিতেছি না; এখনও বনের
আড়াল হইতে বাহির হইতেছে ।

সত্যা । গোরা আছে? না কেবল সিপাহী ।

জীব । রাঙামুখ আছে ।

তখন সত্যানন্দ জীবানন্দকে বলিলেন “তুমি গাছ হইতে
নাম ।”

জীবানন্দ গাছ হইতে নামিল ।

সত্যানন্দ বলিলেন “দশ হাজার সন্তান উপস্থিত আছে ;
কি করিতে পার দেখ । তুমি আজ সেনাপতি ।” জীবানন্দ
মশজ্ঞে সজ্জিত হইয়া উল্লম্ফনে অশ্বে আরোহণ করিলেন । এক-
বার নবীনানন্দ গোস্বামীর প্রতি দৃষ্টি করিয়া নয়নেজ্বিতে কি
বলিলেন কেহ তাহা বুঝিতে পারিল না । নবীনানন্দ নয়নে-
জ্বিতে কি উত্তর করিল তাহাও কেহ বুঝিল না, কেবল তারা
জ্বলনই মনে মনে বুঝিল, যে হয় ত এ জন্মের মত এই বিদায় ।
তখন নবীনানন্দ দক্ষিণ বাহ উত্তোলন করিয়া সকলকে বলি-
লেন “ভাই ! এই সময় গাও ‘জয় জগদীশ হরে !’” তখন
সেই দশ সহস্র সন্তান এককণ্ঠে নদী কানন আকাশ
প্রতিধ্বনিত করিয়া, তোপের শব্দ ডুবাইয়া দিয়া সহস্র সহস্র
বাহ উত্তোলন করিয়া গায়িল,

“জয় জয় জগদীশ হরে

• স্নেহনিবহনিধনে কলয়তি করবালা—”

এমন সময়ে সেই ইংরেজের গোলাবৃষ্টি আগিয়া কাননমধ্যে
সন্তানসম্প্রদায়ের উপর পড়িতে লাগিল । কেহ গায়িতে
গায়িতে ছিন্নমস্তক, ছিন্ন বাহ, ছিন্ন-হৃৎ হইয়া মাটিতে পড়িল,
তথাপি কেহ গীত বন্ধ করিল না, সকলে গায়িতে লাগিল,

“জয় জগদীশ হরে” গীত সমাপ্ত হইলে সকলেই একেবারে নিস্তব্ধ হইল। সেই নিবিড় কানন, সেই নদীমৈকত, সেই অনন্ত বিজন একেবারে গভীর নীরবে নিবিষ্ট হইল, কেবল ইংরেজের সেই অতি ভয়ানক কামানের ধ্বনি আর দূরত্রে গোয়ার সমবেত অস্ত্রের ঝঞ্ঝনা ও পদধ্বনি।

তখন সত্যানন্দ সেই গভীর নিস্তব্ধ মধ্যে অতি উচ্চৈঃস্বরে বলিলেন “জগদীশ হরি তোমাদিগকে কৃপা করিবেন এই সময় তোমরা তাঁহার কার্য্য কর—তোপ কতদূর ?”

উপর হইতে একজন বলিল “এই কাননের অতি নিকট, একখানা ছোট মাঠ পার মাত্র।”

সত্যানন্দ বলিল “কে তুমি ?”

উপর হইতে উত্তর হইল “আমি নবীনানন্দ।”

তখন সত্যানন্দ বলিলেন “তোমরা দশ সহস্র সন্তান আছ, তোমাদেরই জয় হইবে, তোপ কাড়িয়া লও।” তখন অগ্রবর্তী অশ্বারোহী জীবানন্দ বলিল “আইস।”

সেই দশ সহস্র সন্তান—অশ্ব ও পদাতি, অতিবেগে জীবানন্দের অগ্রবর্তী হইল। পদাতির স্বল্পে বন্দুক, কটীতে তরবারি হস্তে বল্লম। কানন হইতে নিক্রান্ত হইবামাত্র, সেই অজস্র গোলাবৃষ্টি পড়িয়া তাহাদিগকে ছিন্ন ভিন্ন করিতে লাগিল। বহুতর সন্তান বিনা যুদ্ধেই প্রাণত্যাগ করিয়া ভূমিশায়ী হইল। একজন জীবানন্দকে বলিল “জীবানন্দ, অনর্থক প্রাণহত্যা কর কি।”

জীবানন্দ ফিরিয়া চাভিয়া দেখিল ভবানন্দ—জীবানন্দ উত্তর করিল “কি করিতে বল।”

ভব। বনের ভিতর পাকিয়া বৃক্ষে আশ্রয় হইতে আপনাদিগের প্রাণ রক্ষা কর—তোপের মুখে, পরিকার মাঠে, বিনা

তোপে এ সন্তানসৈন্য এক দণ্ড টিকিবে না ; কিন্তু ঝোপের
জ্বিতর থাকিয়া অনেকক্ষণ যুদ্ধ করা যাইতে পারিবে।”

জীব। তুমি সত্য কথা বলিয়াছ, কিন্তু প্রভু আজ্ঞা করিয়া-
ছেন তোপ কাড়িয়া লইতে হইবে, অতএব আমরা তোপ
কাড়িয়া লইতে যাইব।

ভব। কার সাধ্য তোপ কাড়ে ? কিন্তু যদি যেতেই
হল, তবে তুমি নিরস্ত হও আমি যাইতেছি।

জীব। তা হবে না—ভবানন্দ ! আজ আমার মরিবার
দিন।

ভব। আজ আমার মরিবার দিন।

জীব। আমার প্রায়শ্চিত্ত করিতে হইবে।

ভব। তুমি নিষ্পাপ শরীর—তোমার প্রায়শ্চিত্ত নাই।
আমার চিত্ত কলুষিত—আমাকেই মরিতে হইবে—তুমি থাক,
আমি যাই !

জীব। ভবানন্দ ! তোমার কি পাপ তাহা আমি জানি
না। কিন্তু তুমি থাকিলে সন্তানের কার্যোদ্ধার হইবে। আমি
যাই।

ভবানন্দ নীরব হইয়া শেষে বলিল “মরিবার প্রয়োজন
হয় আজই মরিব, যে দিন মরিবার প্রয়োজন হইবে সেই
দিন মরিব, মৃত্যুর পক্ষে আবার কালাকাল কি ?”

জীব। তবে এসো।

এই বলিয়া ভবানন্দ সকলের অগ্রবর্তী হইল। তখন
দলে দলে ঝাঁকে ঝাঁকে গোলা পড়িয়া সন্তান সৈন্য খণ্ড
বিখণ্ড করিতেছে, ছিঁড়িতেছে, চিরিতেছে, উন্টাইয়া ফেলিয়া
দিতেছে, তাহার উপর ইংরেজের বন্দুকওয়ালা সিপাহী সৈন্য
অব্যর্থ লক্ষ্যে সারি সারি সন্তানদলকে ভুমে পাড়িয়া ফেলি-

তেছে । এমন সময়ে ভবানন্দ বলিল “এই তরঙ্গে আজ সন্তানকে ঝাঁপ দিতে হইবে—কে পার ভাই ? এই সময়ে গাও বন্দে মাতরং” তখন উচ্চ নিনাদে মেঘমল্লার রাগে সেই সহস্রকণ্ঠ সন্তানসেনা তোপের তালে গায়িল “বন্দে মাতরং।”

দশম পরিচ্ছেদ ।

সেই দশ সহস্র সন্তান “বন্দে মাতরং” গায়িতে গায়িতে বল্লাম উন্নত করিয়া অতি দ্রুতবেগে তোপশ্রেণীর উপর গিয়া পড়িল । গোলাবৃষ্টিতে খণ্ড বিখণ্ড বিদীর্ণ উৎপতিত অত্যন্ত বিশৃঙ্খল হইয়া গেল, তথাপি সন্তানসৈন্য ফেরে না । সেই সময়ে কাপ্তেন টমাসের আশ্রয় একদল সিপাহী বন্দুকে সঙ্গীন চড়াইয়া প্রবলবেগে সন্তানদিগের দক্ষিণপার্শ্বে আক্রমণ করিল । তখন দুই দিক্ হইতে আক্রান্ত হইয়া সন্তানেরা একেবারে নিরাশ হইল । মুহূর্ত্তে, শত শত সন্তান বিনষ্ট হইতে লাগিল । তখন জীবানন্দ বলিলেন, “ভবানন্দ তোমারই কথা ঠিক আর বৈষ্ণবধ্বংসের প্রয়োজন নাই ; ধীরে ধীরে ফিরি ।”

—ভব । এখন ফিরিবে কি প্রকারে ? এখন যে পিছন ফিরিবে সেই মরিবে ।

জীবা । সম্মুখে ও দক্ষিণপার্শ্বে হইতে আক্রমণ হইতেছে । বামপার্শ্বে কেহ নাই, চল অগ্নে অগ্নে ঘুরিয়া বামদিক্ দিয়া বেড়িয়া সরিয়া যাউ ।

ভব । সরিয়া কোথায় যাইবে ? সেখানে যে অজয় নদী—নূতন বর্ষায় অজয় যে অতি প্রবল হইয়াছে । তুমি ইংরেজের

গোলা হইতে পলাইয়া এই সন্তানসেনা অজয়ের জলে ডুবাইবে ?

জীবা । অজয়ের উপর একটা পুল আছে আমার স্মরণ হইতেছে ।

ভব । এই দশসহস্র সেনা সেই পুলের উপর দিয়া পার করিতে গেলে এত ভিড় হইবে, যে বোধ হয় একটা তোপেই ভুবলীলাক্রমে সমুদায় সন্তানসেনা ধ্বংস করিতে পারিবে ।

জীবা । এক কক্ষ কর, অল্পসংখ্যক সেনা তুমি সঙ্গে রাখ, এই যুদ্ধে তুমি যে সাহস ও চাতুর্য্য দেখাইলে তোমার অসাধ্য কাজ নাই ! তুমি সেই অল্পসংখ্যক সন্তান লইয়া সন্মুখ রক্ষা কর । আমি তোমার সেনার অন্তরালে অবশিষ্ট সন্তানগণকে পুল পার করিয়া লইয়া যাই, তোমার সঙ্গে বাহা রহিল তাহারা নিশ্চিত বিনষ্ট হইবে, আমার সঙ্গে বাহা রহিল তাহা বাঁচিলে বাঁচিতে পারিবে ।

ভব । আচ্ছা, আমি তাহা করিতেছি ।

তখন ভবানন্দ দুই সহস্র সন্তান লইয়া পুনর্বার “বন্দে মাতরং” শব্দ উত্থিত করিয়া ঘোর উৎসাহসহকারে ইংরেজের গোলন্দাজসৈন্য আক্রমণ করিলেন । সেইখানে ঘোরতর যুদ্ধ হইতে লাগিল, কিন্তু তোপের মুখে সেই ক্ষুদ্র সন্তানসেনা কতক্ষণ টিকে ? ধানকাটার মত তাহাদিগকে ইংরেজেরা ভূমিশায়ী করিতে লাগিল ।

এই অবসরে জীবানন্দ অবশিষ্ট সন্তানসেনার মুখ ঈষৎ ফিরাইয়া বামভাগে কানন বেড়িয়া ধীরে ধীরে চলিল । কাপ্তেন টমাসের একজন সহযোগী লেপ্টেন্যান্ট ওয়াটসন দূর হইতে দেখিলেন, যে এক সম্ভ্রদায় সন্তান ধীরে ধীরে পলাইতেছে, তখন তিনি একদল ফৌজদারী সিপাহী, একদল রাজার :

সিপাহী, আর একদল গোরা লইয়া জীবানন্দের অহুবর্তী হইলেন।

ইহা কাপ্তেন টমাস দেখিতে পাইলেন না। সন্তানসন্ত-
দায়ের মধ্যে প্রধান ভাগ পলাইতেছে দেখিয়া তিনি কাপ্তেন
হে নামা একজন সহযোগীকে বলিলেন, যে “আমি দুই চারি
শত সিপাহী লইয়া এই উপস্থিত ভগ্নবিদ্রোহীদিগকে নিহত
করিতেছি, তুমি তোপগুলি ও অবশিষ্ট গোরা ও সিপাহী লইয়া
উহাদের প্রতি ধাবমান হও, বামদিক্ দিয়া লেপ্টেনান্ট ওয়াট-
সন যাইতেছেন, দক্ষিণদিক্ দিয়া তুমি যাও। আর দেখ,
আগে গিয়া পুলের মুখ বন্ধ করিতে হইবে; তাহা হইলে তিন-
দিক্ হইতে উহাদিগকে বেষ্টিত করিয়া জ্বালের পাখীর মত
মারিতে পারিব। উহারা দ্রুতপদ দেশী ফোজ, সর্ক্সাপেক্স
পলায়নেই সুদক্ষ, অতএব তুমি উহাদিগকে সহজে ধরিতে
পারিবে না, তুমি আগে অশ্বারোহীদিগকে একটু ঘুর পথে
আড়াল দিয়া গিয়া পুলের মুখে দাঁড়াইতে বল, তাহা হইলে
কর্ম্ম সিদ্ধ হইবে”। কাপ্তেন হে তাহাই করিল।

“অতি দর্পে হতা লক্ষ্য।” কাপ্তেন টমাস সন্তানদিগকে অতি-
শয় ঘৃণা করিয়া দুইশত মাত্র পদাতিক ভবানন্দের সঙ্গে যুদ্ধের
জন্য রাখিয়া আর সকল হের সঙ্গে পাঠাইলেন। চতুর ভবা-
নন্দ যখন দেখিলেন ইংরেজের তোপ সকলই গেল, মৈন্যা সব
গেল, বাহা অল্পই রহিল তাহা সহজেই বধা, তখন তিনি নিজ
হতাবশিষ্ট দলকে ডাকিয়া বলিলেন যে “এই কয়জনকে নিহত
করিয়া জীবানন্দের সাহায্যে আমাকে যাইতে হইবে। আর
একবার তোমরা “জয় জগদীশ হরে” বল। তখন সেই অল্প-
সংখ্যক সন্তানসেনা “জয় জগদীশ হরে” বলিয়া বায়্রের ন্যায়
কাপ্তেন টমাসের উপর লাকাইয়া পড়িল। সেই আক্রমণের

উগ্রতা অল্পসংখ্যক ইংরেজ ও তৈলঙ্গীর দল সহ্য করিতে পারিল না, তাহারা বিনষ্ট হইল। ভবানন্দ তখন নিজে গিয়া কাপ্তেন টমাসের চুল ধরিলেন। কাপ্তেন শেষ পর্য্যন্ত যুদ্ধ করিতেছিল। ভবানন্দ বলিলেন, “কাপ্তেন সাহেব তোমায় মারিব না, ইংরেজ আমাদিগের শত্রু নহে। কেন তুমি মুসলমানের সহায় হইয়া আসিয়াছ? আইস—তোমার প্রাণদান দিলাম। আপাততঃ তুমি বন্দী। ইংরেজের জয় ইউক, আমরা তোমাদের স্নহৃদ।” কাপ্তেন টমাস তখন ভবানন্দকে বধ করিবার জন্য সঙ্গীনসহিত একটা বন্দুক উঠাইবার চেষ্টা করিলেন, কিন্তু ভবানন্দ তাহাকে বাঘের মত ধরিয়াছিল, কাপ্তেন টমাস নড়িতে পারিলেন না। তখন ভবানন্দ অহুচর-বর্গকে বলিল যে “ইহাকে বাঁধ।” দুই তিন জন সন্তান আসিয়া কাপ্তেন টমাসকে বাঁধিল। ভবানন্দ বলিল “ইহাকে একটা ঘোড়ার উপর তুলিয়া লও, চল উহাকে লইয়া আমরা জীবানন্দ গোস্বামীর আলুকুল্যে যাই।”

তখন সেই অল্পসংখ্যক সন্তানগণ কাপ্তেন টমাসকে ঘোড়ার উপর বাঁধিয়া লইয়া “বন্দে মাতরং” গায়িতে গায়িতে লেপ্টেন্যান্ট ওয়াটসনকে লক্ষ্য করিয়া ছুটিল।

জীবানন্দের সন্তানসেনা ভগ্নোদ্যম, তাহারা পলায়নে উদ্যত। জীবানন্দ ও ধীরানন্দ, তাহাদিগকে বুঝাইয়া সংযত রাখিলেন, কিন্তু সকলকে পারিলেন না, কতকগুলি পলাইয়া আত্রকাননের আশ্রয় লইল। তাহারা যখন আত্রকাননে প্রবেশ করে, তখন গাছের উপর হইতে একজন বলিল, “গাছে উঠ! গাছে উঠ! নহিলে বনের ভিতর ঢুকিয়া ইংরেজ তোমাদিগকে মারিবে।” ত্রস্ত সন্তানেরা গাছের উপর উঠিল।

গাছের উপর হইতে নবীনানন্দ গোস্বামী কথা কহিতে ছিলেন। সকলে গাছে উঠিলে, নবীনানন্দ বলিলেন, “বন্দুক তৈয়ারি রাখ—এখান হইতে আমরা নিরাপদে শত্রুসংহার করিব।” সকলে বন্দুক তৈয়ারি রাখিল।

একাদশ পরিচ্ছেদ।

লেপ্টেনান্ট ওয়াটসন হুর্কুজিফ্রে আত্মকানন ঘেসিয়া চলিলেন। হুর্কুজিই বা কি, জীবানন্দের দক্ষিণে কাশ্মির হে ঘাইতেছে দেখিয়া ওয়াটসন মনে করিলেন যে, আমি ঠিক বামে গিয়া ঘেরিব, এই ভাবিয়া আত্মকানন ঘেসিয়া চলিলেন। তখন অকস্মাৎ হড় হড় হড় হড় শব্দে গাছের উপর হইতে তাঁহার সৈন্যপৃষ্ঠে বন্দুকের গুলি পড়িতে লাগিল। লেপ্টেনান্ট ওয়াটসন তখন উপরে চাহিয়া দেখিলেন, বলিলেন “আকাশ হইতে গুলি পড়ে না কি!” নিকটস্থ বৃক্ষ হইতে একজন বলিল, “না সাহেব, আমরা গাছ থেকেই মারিতেছি, এখানে দাঁড়াইয়া দাঁড়াইয়া গাছের উপর হুই চারি টা গুলি চালাও না।”

আর এক জন বলিল সাহেব, “এখানে একটু দাঁড়াইয়া দেখ, শুনিয়াছি জীবানন্দ নাকি যৌগুজীষ্ট ভজিবে, ঐ আসছে।”

লেপ্টেনান্ট ওয়াটসন দেখিলেন বেগোছ, ইহাদিগের কিছু করিতে পারিব না। সৈন্যগণকে বলিলেন “তোমরা শীঘ্র অগ্রসর হও, একটু দূরে গেলে, গাছের বাদরে আর কামড়াইতে পারিবেনা।”

তখন গাছের বাদরের বন্দকের দৌড়ের বাহিরে সৈন্য লুইয়া ওয়াটসন দ্রুতবেগে জীবানন্দের আক্রমণে চলিলেন।

শান্তি তখন গাছের উপর হইতে বলিল “ভাই বাদরের দল, একবার লাফাইয়া পড়িয়া ছুটীয়া রাজামুখোদের বাদরের কামড়ের জ্বালাটা দেখাইয়া দিয়া আসিতে হইবে।” শান্তি মনে মনে বলিতে লাগিল যে “যদি মেয়ে মানুষ না হইতাম তো”—সকলটুকু লিখিতে পারিলাম না। আগে নবীনানন্দ গাছ হইতে লাফাইয়া পড়িল, সঙ্গে রূপ ঝাপ করিয়া বৃক্ষস্থ সকল সন্তান লাফাইয়া পড়িল, তখন নবীনানন্দ বলিলেন “ধীরে ভাই, ধীরে, মিলে মিসে, গোল কর না; সার বাঁধ, বন্দুক কাঁধে, বল্লম হাতে, ছুট! দৌড়! বল বন্দে মাতরং।” তখন বন্দে মাতরং গায়িতে গায়িতে তাহার লেপ্টেনান্ট ওয়াটসনের ব্যাটেলিয়নের উপর ধাবমান হইল।

শান্তি পিছাইয়া পড়িল—বলিল “ছি! কি করিতেছি? জ্বীলোক হইয়া যুদ্ধে যাই কেন? আমার ধর্ম ত এ নয়! আমি গাছের বাদর গাছেই থাকি।” এই বলিয়া শান্তি ফিরিয়া আসিয়া গাছের উপর উঠিয়া যুদ্ধ দেখিতে লাগিল।

জীবানন্দ প্রায় পুল পাইয়াছিল, কিন্তু দূর হইতে বন্দে মাতরং কাণে গেল। জীবানন্দ বলিল “ভাই দূর হইতে বন্দে মাতরং শুনিতেছি, ভাই মরি মরবো, পুলে কাজ নাই, চল একবার উহাদের সঙ্গে গিয়া বন্দে মাতরং গাই।” জীবানন্দের সেনার আর প্রাণভয়ে পলান হইল না। বন্দে মাতরং গায়িতে গায়িতে সেই হতাবশিষ্ট পঞ্চসহস্র সন্তানসেনা লেপ্টেনান্ট ওয়াটসনের দিকে ধাবমান হইল এবং বজ্রের মত লেপ্টেনান্ট ওয়াটসনের সেনার উপরে পড়িয়া তাহাদিগকে খণ্ড বিখণ্ড করিল। এক দিকে জীবানন্দের

সৈন্য আর একদিকে নবীনানন্দের প্রেরিত সৈন্য ছই
প্রবল তরঙ্গের আঘাতে দৃঢ়বল পর্ত্ততুল্য ইংরেজ সেনা
ক্ষয়িত হইতে লাগিল। ক্ষয় হয় তবু ভাঙ্গেনা! ইংরেজের
অতুল বল, অতুল সাহস, অতুল অধাবসায়। রাউণ্ডের পর
রাউণ্ড, ফায়ারের পর ফায়ার, বৃষ্টির পর বৃষ্টি, মেঘের উপরে
আরো মেঘ! পৃথিবী অন্ধকার হইল, গগন প্রতিধ্বনিতে বিদা-
রিত হইতে লাগিল, কাননে ঝড় বহিল, পশু পক্ষী ভয়ে বিবরে
লুকাইল, অজস্র তুফান উঠিল। নবীনানন্দ বৃক্ষ হইতে ডাকিল
“মার মার যবন মার। ঐ ওপাশে, এই সেনার পরে জীবানন্দ
আছে, যাও ফৌজদারী বাদসাহী ভেদ করিয়া যাও ভাই।
মার মার ফৌজদারী মার।” তখন দক্ষিণ বামে বিদ্ধ হইয়া,
আহত নিহত বিপ্লুত স্থানচ্যুত বিদ্রাবিত হইয়া লেটেনাট
গুন্ডাটসনের সেনা ছিন্ন ভিন্ন ভাবে দিগ্বিদিকে পলায়ন করিল।
মাঝখানে জীবানন্দের দলে এবং নবীনানন্দের প্রেরিত দলে
দেখা হইল। তখন শান্তি আর থাকিতে পারিল না “ছি!
নারীজন্মেই ধিক্!” এই বলিয়া শান্তি আবার গাছ হইতে
লাফাইয়া পড়িল। যেখানে ছই বিজয়ী সন্তানসেনার সম্মিলন
হইয়াছে সেই খানে কুরঙ্গীর নায় শান্তি ছুটিয়া গিয়া উপস্থিত
হইল। রণক্ষেত্রের মাঝখানে জীবানন্দে নবীনানন্দে দেখা
হইল। দুইজনে দুইজনকে আলিঙ্গন করিল। যখন একটু
অবসর পাইল তখন জীবানন্দ বলিল “শান্তি, আজ তোমার
সমক্ষে মরিলে কি সুখ হইত!”

নবীনানন্দ বলিল “মরিবার এখনও সময় আছে, তুমি
পুরুষ মানুষ তোমার তো বুদ্ধি শুদ্ধি নাই, মরিবার দরকার হলে
আমায় বলিও, আমি পথ দেখাইয়া দিব; যাও দেখি যদি ঐ
পথে মৃত্যু নামে অমূল্যনিধি খুঁজিয়া পাত্ত।” এই বলিয়া শান্তি

কাপ্তেন হের সৈন্য দেখাইয়া দিল। বাইবার সময়ে জীবানন্দের কাণে কাণে বলিয়া দিল, “আজ মরিতে পাইবে না। সত্যানন্দের আদেশ।”

তখন বন্দে মাতরং গায়িতে গায়িতে জীবানন্দ অস্বাভাবিক সৈন্যে কাপ্তেন হের প্রতি ধাবমান হইলেন। শান্তি বিষয়মানে নারীজন্মকে ধিক্কার করিতে করিতে ফিরিয়া আসিয়া গাছে উঠিয়া “গেছো মেয়ে” বলিয়া আপনার নিন্দা করিতে লাগিল। কাপ্তেন হেও দেখিলেন যে, যাহার পলায়ন অবরোধ করিবার জন্য হাইতেছিলেন, সেই স্বয়ং আবার সম্মুখে আসিতেছে। কাপ্তেন হে ফিরিয়া জীবানন্দকে আক্রমণ করিবার জন্য তাহার অভিমুখী হইলেন। যেমন ছুইটা পর্বততিনিঃসৃত নদী বিপরীত দিক হইতে আসিয়া উপত্যকার এক গহবরে পরস্পরকে প্রহত করে—উত্তম তরঙ্গমালার ফেননিচয় আকাশে প্রেরিত করে, শব্দে পর্বতকন্দের বিদীর্ণ করে, তেমনি হেও জীবানন্দের সেনাদ্বয় তুমুল সংগ্রামের সংঘর্ষে সংঘর্ষিত হইল। জয় পরাজয় নাই, শত শত প্রাণী নিহত হইতেছে, একবার ইংরেজসেনা “হুৱে” বলিয়া দৌড়িয়া আসিয়া শত শত সন্তান দলিত করিতেছে। আবার “কলয়সি করবালং” বলিয়া সন্তানের দল ইংরেজের সেনাদলকে দলিত করিতেছে। জয় পরাজয় নাই, কি হয় বলা যায় না। কাপ্তেন হের কাছে ইংরেজের বাছা বাছা সেনা, বিশেষ গোরা অনেক,—পরাজয় কাহাকে বলে তাহারা ইউরোপে বা ভারতবর্ষে কখনও তা জানে না। প্রস্তরনির্মিত প্রাচীরশ্রেণীবৎ তাহারা স্থির দাঁড়াইয়া রহিল। সন্তানেরা যত উদ্যম করিল কিছুতেই গোরার প্রাচীর উল্লঙ্ঘন করিতে পারিল না। তাহারা শত শত সন্তান নিহত করিতেছে কিন্তু একপদ পশ্চাৎগামী হয় না!

ইংরেজের ভাগ্যক্রমে এই সময়ে তাহাদের তোপগুলি দক্ষিণে আসিয়া পৌঁছিল। তখন সন্তানের দল একেবারে হিন্ন হইল, জয়ের আর কোন আশা রহিল না। সন্তানেরা যে যেখানে পাইল পলাইতে লাগিল। জীবানন্দ ধীরানন্দ তাহা-দিগের সংযত এবং একত্রিত করিবার জন্য অনেক চেষ্টা করিলেন কিন্তু কিছুতেই পারিলেন না। সেই সময়ে উচ্চৈঃশব্দ হইল “পুলে যাও, পুলে হাও! ওপারে যাও। নহিলে অজ্ঞে ডুবিয়া মরিবে, ধীরে ধীরে ইংরেজসেনার দিকে মুখ রাখিয়া পুলে যাও।”

জীবানন্দ চাহিয়া দেখিল সম্মুখে ভবানন্দ। ভবানন্দ বলিল “জীবানন্দ পুলে লইয়া যাও, রক্ষা নাই।” তখন ধীরে ধীরে পিছে হঠিতে হঠিতে সন্তানসেনা পুলের দিকে চলিল। পুল নিকটেই ছিল। কিন্তু পুল নিকটে পাইয়া বহুসংখ্যক সন্তান একেবারে পুলের ভিতর প্রবেশ করায় ইংরেজের তোপ স্বেযোগ পাইল। পুল একেবারে ঝাটাইতে লাগিল। সন্তানের দল বিনষ্ট হইতে লাগিল। ভবানন্দ জীবানন্দ ধীরানন্দ একত্র। একটা তোপের দৌরাণ্ডো ভয়ানক সন্তানক্ষয় হইতেছিল। ভবানন্দ বলিল, “জীবানন্দ, ধীরানন্দ, এস তরবারি ঘুরাইয়া আমরা তিন জন এই তোপটা দখল করি।” তখন তিন জনে তরবারি ঘুরাইয়া সেই তোপের নিকটবর্তী গোলন্দাজ সেনা বধ করিল। তখন আর আর সন্তানগণ তাহাদের সাহায্যে আসিল। তোপটা ভবানন্দের দখল হইল। তোপ দখল করিয়া ভবানন্দ তাহার উপর উঠিয়া বসিল। করতালি দিয়া বলিল “বল বন্দে মাতরং।” সকলে গায়িল “বন্দে মাতরং।” ভবানন্দ বলিল, “জীবানন্দ এই তোপ ঘুরাইয়া বেটাদের লুচির ময়দা তৈয়ার করি।” সন্তানেরা সকলে ধরিয়া তোপ

ধুবাইল। তখন তোপ উঠেচন্দে বৈষ্ণবের কর্ণে যেন হরি হুরি শব্দে ডাকিতে লাগিল। বহুতর সিপাহী তাহাতে মরিতে লাগিল। ভবানন্দ সেই তোপ টানিয়া আনিয়া পুলের মুখে স্থাপন করিয়া বলিল “ তোমরা দুইজনে সন্তানসেনা সারি দিয়া পুল পার করিয়া লইয়া যাও, আমি একা এই বাহুমুখ রক্ষা করিব—তোপ চালাইবার জন্য আমার কাছে জন কয় গোলন্দাজ দিয়া যাও ” কুড়িজন বাছা বাছা সন্তান ভবানন্দের কাছে রহিল।

তখন অসংখ্য সন্তান পুল পার হইয়া জীবানন্দ ও দীর্ঘানন্দের আশ্রয়ক্রমে সারি দিয়া পরপারে যাইতে লাগিল। একা ভবানন্দ কুড়িজন সন্তানের সাহায্যে সেই এক কামানে বহুতর সেনা নিহত করিতে লাগিল—কিন্তু ইংরেজসেনা জলোচ্ছাসোখিত তরঙ্গের ন্যায়! তরঙ্গের উপর তরঙ্গ, তরঙ্গের উপর তরঙ্গ!—ভবানন্দকে সংবেষ্টিত, উৎপীড়িত, নিমগ্নের ন্যায় করিয়া তুলিল। ভবানন্দ অশ্রান্ত, অজ্ঞেয়, নির্ভীক—কামানের শব্দে শব্দে কতই সেনা বিনষ্ট করিতে লাগিল। ইংরেজ বাত্যাপীড়িত তরঙ্গাভিঘাতের ন্যায় তাঁহার উপর আক্রমণ করিতে লাগিল কিন্তু কুড়ি জন সন্তান, তোপ লইয়া পুলের মুখ বন্ধ করিয়া রহিল। তাহারা মরিয়াও মরে না—ইংরেজ পুলে ঢুকিতে পায় না। সে বীরেরা অজ্ঞেয়, সে জীবন অবিনশ্বর। অবসর পাইয়া দলে দলে সন্তানসেনা অপর পারে গেল। আর কিছু কাল পুল রক্ষা করিতে পারিলেই সন্তানেরা সকলেই পুলের পারে যায়—এমন সময়ে কোথা হইতে নূতন তোপ ডাকিল—“ গুড়ুম্ গুড়ুম্ বুম্ বুম্। ” উভয়দল কিয়ৎক্ষণ যুদ্ধে ক্ষান্ত হইয়া চাহিয়া দেখিল—কোথায় আবার কামান! দেখিল, বনের তিতর হইতে কতকগুলি কামান

দেশী গোলন্দাজ কর্তৃক চালিত হইয়া নির্গত হইতেছে । নির্গত হইয়া সেই বিরাট কামানের শ্রেণী সপ্তদশ মুখে ধুম উদগীর্ণ করিয়া হে সাহেবের দলের উপর অগ্নিবৃষ্টি করিল । ঘোর শব্দে বন নদ গিরি সকলই প্রতিধ্বনিত হইল । সমস্ত দিনের রণে ক্লান্ত ইংরেজের সেনা প্রাণভয়ে সিহরিল । অগ্নিবৃষ্টিতে তৈলঙ্গী, মুসলমান, হিন্দুস্থানী পলায়ন করিতে লাগিল । কেবল গোয়া খাড়া দাঁড়াইয়া মরিতে লাগিল ।

ভবানন্দ রঙ্গ দেখিতেছিল । ভবানন্দ বলিল, “ভাই, ইংরেজ ভাঙ্গিতেছে, চল একবার উহাদিগকে আক্রমণ করি ।” তখন পিপীলিকাস্রোতোবৎ সন্তানের দল, নূতন উৎসাহে পুলপারে ফিরিয়া আসিয়া ইংরেজদিগকে আক্রমণ করিতে ধাবমান হইল । অকস্মাৎ তাহারা ইংরেজের উপর পড়িল । ইংরেজ যুদ্ধের আর অবকাশ পাইল না—বেমন ভাগীরথীতরঙ্গ সেই দম্ভকারী বৃহৎ পর্বতাকার মত্তহস্তীকে ভাসাইয়া লইয়া গিয়াছিল, সন্তানেরা তেমনি ইংরেজদিগকে ভাসাইয়া লইয়া চলিল । ইংরেজেরা দেখিল পিছনে ভবানন্দের পদাতিক সেনা, সম্মুখে মহেন্দ্রের কামান । তখন হে সাহেবের সর্বনাশ উপস্থিত হইল । আর কিছু টিকিল না—বল, বীর্ঘ্য, সাহস, কৌশল, শিক্ষা, দম্ভ সকলই ভাসিয়া গেল । ফৌজদারী, বাদসাহী, ইংরেজী, দেশী, বিলাতী, কালা, গোরা সৈন্য নিপুতিত হইয়া ভূতলশায়ী হইল । ইংরেজের দল পলাইল । মার মার শব্দে জীবানন্দ, ভবানন্দ, ধীরানন্দ, ইংরেজসেনার পশ্চাতে ধাবমান হইল । ইংরেজের সব তোপ সন্তানেরা কাড়িয়া লইল, বহুতর ইংরেজ ও সিপাহী নিহত হইল । সর্বনাশ হইল দেখিয়া কাপ্তেন হে ও ওয়াটসন ভবানন্দের নিকট বলিয়া পাঠাইল “আমরা সকলে তোমাদিগের নিকট

বন্দী হইতেছি আর প্রাণিহত্যা করিও না।” জীবানন্দ ভবানন্দের মুখপানে চাহিল, ভবানন্দ মনে মনে বলিল “তা হইবে না, আমায় যে আজ মরিতে হইবে।” তখন ভবানন্দ উচ্চৈঃশ্বরে হস্তোত্তোলন করিয়া হরিবোল দিয়া বলিল “মার মার।”

আর এক প্রাণী বাঁচিল না—শেষ এক স্থানে ৫০। ৬০ জন গোরা সৈন্য একত্রিত হইয়া আত্মসমর্পণে কৃতনিশ্চয় হইয়া অতি ঘোরতর রণ করিতে লাগিল। জীবানন্দ বলিল “ভবানন্দ আমাদের রণভয় হইয়াছে, আর কাজ নাই, এই সাগরতুল্য সৈন্যের মধ্যে এই কমলজন বাতীত আর কেহ জীবিত নাই। উহাদিগকে প্রাণদান দিয়া চল আমরা ফিরিয়া যাই।” ভবানন্দ বলিল “একজন জীবিত থাকিতে ভবানন্দ ফিরিবে না—জীবানন্দ তোমায় দিব্য দিয়া বলিতেছি, যে তুমি ত্বকিতে দাঁড়াইয়া দেখ একা আমি এই ৫০ জন ইংরেজকে নিহত করি।”

কাপ্তেন টমাস অশ্বপৃষ্ঠে নিবদ্ধ ছিলেন। ভবানন্দ আজ্ঞা দিলেন “উহাকে আমার সম্মুখে রাখ, আগে ঐ বেটা মরিবে তবে তুমি আমি মরিব।”

কাপ্তেন টমাস বাঙ্গালা বুদ্ধিত, বুদ্ধিরা ইংরেজসেনাকে বলিল “ইংরেজ ! আমি তো মরিয়াছি, প্রাচীন ইংলণ্ডের নাম তোমরা রক্ষা করিও, তোমাদিগকে খ্রীষ্টের দিব্য দিতেছি, আগে আমাকে মার তার পরে এই বিদ্রোহী কাক্রিকে মার।”

তৌ করিয়া একটা বুলেট ছুটিল, একজন আইরিসম্যান কাপ্তেন টমাসকে লক্ষ্য করিয়া বন্দুক ছুড়িয়াছিল। ললাটে নিবিদ্ধ হইয়া কাপ্তেন টমাস প্রাণত্যাগ করিল। ভবানন্দ তখন ডাকিয়া বলিলেন “আমার ব্রহ্মাঙ্গ বার্থ হইয়াছে, কে এমন পার্থ ব্রহ্মোদর নকুল সহস্রাব আছে যে এ সময়ে আমার রক্ষা

করিবে ! দেখ বাণাহত ব্যাঘ্রের ন্যায় গোরা আমার উপর
ঝুকিয়াছে । আমি মরিবার জন্য আসিয়াছি, আমার সঙ্গে মরিতে
চাও এমন সন্তান কি কেহ আছে ? ”

আগে ধীরানন্দ অগ্রসর হইল, পিছে জীবানন্দ—সঙ্গে সঙ্গে
আর ১০ । ১৫ । ২০ । ৫০ জন সন্তান আসিল । ভবানন্দ ধীরা-
নন্দকে দেখিয়া বলিল “তুমিও যে আমাদের সঙ্গে মরিতে
আসিলে ? ”

ধীর । কেন, মরা কি কাহারও ইচ্ছা মাহল নাকি ? এই
বলিতে বলিতে ধীরানন্দ একজন গোরাকে আহত করিলেন ।

ভব । তা নয় । কিন্তু মরিলে ত স্ত্রীপুত্রের মুখাবলোকন
করিয়া দিনপাত করিতে পারিবে না !

ধীর । কালিকার কথা বলিতেছ ? এখন বুঝ নাই ?
(ধীরানন্দ আহত গোরা বধ করিলেন ।)

ভব । না—(এই সময়ে একজন গোরার আঘাতে ভবা-
নন্দের দক্ষিণ বাহু ছিন্ন হইল ।)

ধীর । আমার সাধ্য কি যে তোমার শ্রায় পবিত্রাত্মাকে
সে সকল কথা বলি । আমি সত্যানন্দের প্রেরিত চর হইয়া
গিয়াছিলাম ।

ভব । সে কি ? মহারাজের আমার প্রতি অবিশ্বাস ?
(ভবানন্দ তখন এক হাতে যুদ্ধ করিতেছিলেন ।) ধীরানন্দ,
তাহাকে রক্ষা করিতে করিতে বলিলেন, “কল্যাণীর সঙ্গে
তোমার যে সকল কথা হইয়াছিল তাহা তিনি স্বকর্ণে শুনিয়া-
ছিলেন ।”

ভব । কি প্রকারে ?

ধীর । তিনি তখন স্বয়ং সেখানে ছিলেন । সাবধান
থাকিও ! (ভবানন্দ এক জন গোরা কর্তৃক আহত হইয়া

তাহাকে প্রত্যাহত করিলেন ।) তিনি কল্যাণীকে গীতা পড়া-
ইতেছিলেন এমনত সময় তুমি আসিলে । সাবধান ! (ভবা-
নন্দের বাম বাহও ছিন্ন হইল ।)

ভব । আমার মৃত্যুসংবাদ তাঁহাকে দিও ! বলিও আমি
অবিস্বাসী নহি ।

ধীরানন্দ বাম্পূর্ণলোচনে, যুদ্ধ করিতে করিতে বলিলেন
“তাহা তিনি জানেন । কালি রাজ্রির আশীর্বাদ বাক্য মনে
কর । আর আমাকে বলিয়া দিয়াছেন, “ভবানন্দের কাছে
ধাকিও । আজ সে মরিবে । মৃত্যুকালে তাহাকে বলিও
আমি আশীর্বাদ করিতেছি, পরলোকে তাহার বৈকুণ্ঠপ্রাপ্তি
হইবে ।”

ভবানন্দ বলিলেন “সন্তানের ভয় হউক, ভাই ! আমার
মৃত্যুকালে একবার বন্দে মাতরং শুনাও দেখি ।”

তখন ধীরানন্দের আজ্ঞাক্রমে যুদ্ধোত্তম সকল সন্তান
মহাতেজে “বন্দে মাতরং ” গায়িল । তাহাতে তাহাদিগের
বাহুতে দ্বিগুণ বলসঞ্চার হইয়া উঠিল । সেই ভয়ঙ্কর মুহূর্ত্তে
অবশিষ্ট গোরাসৈন্য নিহত হইল । রণক্ষেত্রে আর শত্রু
রহিল না ।

সেই মুহূর্ত্তে ভবানন্দ মুখে “বন্দে মাতরং ” গায়িতে
গায়িতে, মনে বিষ্ণুপদ ধ্যান করিতে করিতে প্রাণত্যাগ
করিলেন ।

হায় ! রমণীরূপলাবণ্য ! ইহ সংসারে তোমাকেই ধিক্ !

দ্বাদশ পরিচ্ছেদ।

রণজয়ের পর, অজয়তীরে সত্যানন্দকে ঘেরিয়া বিজয়ী বীরবর্গ নানা উৎসব করিতে লাগিলেন। কেবল সত্যানন্দ বিমর্ষ, ভবানন্দের জন্য।

এতক্ষণ বৈষ্ণবদিগের রণবাদ্য অধিক ছিল না, কিন্তু সেই সময় কোথা হইতে সহস্র সহস্র কাড়ানাগরা ঢাক ঢোল কঁাসি সানাই, তুরী ভেরী, রামসিঙ্গা দামামা আসিয়া জুটিল। অয়স্কচবাদ্যে কানন প্রান্তর নদীসকল শব্দ ও প্রতিধ্বনিতে পরিপূর্ণ হইয়া উঠিল। এই রূপে সন্তানগণ অনেকক্ষণ ধরিয়া নানারূপ উৎসব করিলে পর সত্যানন্দ বলিলেন, “জগদীশ্বর আজ কৃপা করিয়াছেন, সন্তানধর্মের জয় হইয়াছে, কিন্তু এক কাজ বাকি আছে। যাহারা আমাদের সঙ্গে উৎসব করিতে পাইল না, যাহারা আমাদের উৎসবের জন্য প্রাণ দিয়াছে, তাহাদিগকে ভুলিলে চলিবে না। যাহারা রণক্ষেত্রে নিহত হইয়া পড়িয়া আছে, চল যাই আমরা গিয়া তাহাদিগের সৎকার করি, বিশেষ যে মাহাত্ম্য আমাদের জন্য এই রণজয় করিয়া প্রাণত্যাগ করিয়াছেন, চল মহান্ উৎসব করিয়া সেই ভবানন্দের সৎকার করি। তখন সন্তানদল বন্দে মাতরং বলিতে বলিতে, নিহতদিগের সৎকারে চলিল। বহুলোক একত্রিত হইয়া হরিবোল দিতে দিতে ভারে ভারে চন্দন কাষ্ঠ বহিয়া আনিয়া ভবানন্দের চিতা রচনা করিল, এবং তাহাতে ভবানন্দকে শায়িত করিয়া, অগ্নি জালিত করিয়া, চিতা বেড়িয়া বেড়িয়া হরে মুরারে গায়িতে লাগিল। ইহারা বিষ্ণুভক্ত, বৈষ্ণব-সম্প্রদায়ভুক্ত নহে, অতএব দাহ করে।

কাননমধ্যে তৎপরে কেবল সত্যানন্দ, জীবানন্দ, মহেন্দ্র, নবীনানন্দ, ও ধীরানন্দ আসীন; গোপনে পাঁচজনে পরামর্শ করিতেছেন। সত্যানন্দ বলিলেন “এত দিন যে জন্য আমরা সর্ব্বধর্ম্ম সর্ব্বভুখ ত্যাগ করিয়াছিলাম, সেই ব্রত সফল হইয়াছে, এ প্রদেশে ইংরেজের সেনা আর নাই, মুসলমানের বাহা অবশিষ্ট আছে, একদণ্ড আমাদের নিকট টেকিবে না, তোমরা এখন কি পরামর্শ দাও।”

জীবানন্দ বলিল “চলুন এই সময়ে গিয়া নগর অধিকার করি।”

সত্য। আমারও সেই মত।

ধীরানন্দ। সৈন্য কোথা?

জীব। কেন এই সৈন্য?

ধীর। এই সৈন্য কই? কাহাকে দেখিতে পাইতেছেন?

জীব। স্থানে স্থানে সব বিশ্রাম করিতেছে, ডঙ্কা দিলে অবশ্য পাওয়া যাইবে।

ধীর। একজনকেও পাইবে না।

সত্য। কেন?

ধীর। সবাই লুটতে বাহির হইয়াছে। গ্রাম সকল এখন অরক্ষিত। মুসলমানের গ্রাম আর রেশমের কুঠি লুটিয়া সকলে ঘরে বাইবে। এখন কাহাকেও পাইবেন না। আমি খুঁজিয়া আনিয়াছি।

সত্যানন্দ বিষণ্ণ হইলেন, বলিলেন, “যাই হোক নগর ভিন্ন সমস্ত বীরভূম আমাদের অধিকৃত হইল। নগরের বাহিরে আর কেহ নাই যে আমাদের প্রতিদ্বন্দ্বী হয়। অতএব বীরভূমিতে তোমরা সম্ভানরাজ্য প্রচার কর। প্রজাদিগের নিকট হইতে কর আদায় কর এবং নগর অধিকার

করিবার জন্য সেনা সংগ্রহ কর। হিন্দুর রাজ্য হইয়াছে শুনিলে, বহুতর সেনা, সন্তানের নিসান উড়াইবে।”

তখন জীবানন্দ প্রভৃতি সত্যানন্দকে প্রণাম করিয়া বলিল “আমরা প্রণাম করিতেছি—হে মহারাজাধিরাজ ! আজ্ঞা হয় ত, আমরা এই কাননেই আপনার সিংহাসন স্থাপিত করি।”

সত্যানন্দ তাহার জীবনে এই প্রথম কোপ প্রকাশ করিলেন। বলিলেন “ছি ! আমায় কি শূন্য কুস্ত মনে কর ? আমরা রাজ্য কেহ নহি—আমরা সন্ন্যাসী। এখন দেশের রাজা বৈকুণ্ঠনাথ স্বয়ং। নগর অধিকার হইলে, যাহার শিরে তোমাদিগের ইচ্ছা হয় রাজমুকুট পরাইও, কিন্তু ইহা নিশ্চিত জানিও যে আমি এই ব্রহ্মচর্য্য ভিন্ন আর কোন আশ্রমই স্বীকার করিব না। এক্ষণে তোমরা স্ব স্ব কর্ম্মে যাও।”

তখন চারি জনে ব্রহ্মচারীকে প্রণাম করিয়া গাত্রোত্থান করিল। সত্যানন্দ তখন অন্যের অলঙ্কিতে ইঙ্গিত করিয়া মহেন্দ্রকে রাখিলেন। আর তিন জন চলিয়া গেল, মহেন্দ্র রহিল। সত্যানন্দ তখন মহেন্দ্রকে বলিলেন, “তোমরা সকলে বিষ্ণুমণ্ডপে শপথ করিয়া সন্তানধর্ম্ম গ্রহণ করিয়াছিলে। ভবানন্দ ও জীবানন্দ দুই জনেই প্রতিজ্ঞা ভঙ্গ করিয়াছে, ভবানন্দ আজ তাহার স্বীকৃত প্রায়শ্চিত্ত করিল, আমার সর্বদা ভয় কোন দিন জীবানন্দ প্রায়শ্চিত্ত করিয়া দেহ বিসর্জন করে। কিন্তু আমার এক ভরসা আছে, কোন নিগূঢ় কারণে সে এক্ষণে মরিতে পারিবে না। তুমি একা প্রতিজ্ঞা রক্ষা করিয়াছ। এক্ষণে সন্তানের কার্য্যোদ্ধার হইল। প্রতিজ্ঞা ছিল যে, যতদিন না সন্তানের কার্য্যোদ্ধার হয়, ততদিন তুমি স্ত্রী কন্যার মুখ দর্শন করিবে না, এক্ষণে কার্য্যোদ্ধার হইয়াছে, এখন আবার সংসারী হইতে পার।”

মহেন্দ্রের চক্ষে দরবিদরিত ধারা বহিল। মহেন্দ্র বলিল “ঠাকুর, সংসারী হইব কাছাকে লইয়া? হ্রী ত আত্মস্বাভিনী হইয়াছেন, আর কন্যা কোথায় যে তাতো জানি না। কোথায় বা সন্ধান পাইব? আপনি বলিয়াছেন জীবিত আছে। ইহাই জানি, আর কিছু জানি না।”

মাথার উপর গাছের ডালে বলিয়া কে বলিল “আমি জানি কন্যা কোথায় আছে।” মহেন্দ্র উন্মুখ হইয়া বলিলেন “তুমি কে?”

সত্যানন্দ একটু রুঠভাবে উন্মুখ হইয়া বলিলেন, “নবীনানন্দ! আমি তোমাকে বিদায় দিয়াছিলাম! তুমি এখনও এখানে কেন?”

শান্তি গাছের উপর হইতে বলিল, “প্রভু, স্বর্গে মর্ত্যে আপনার অধিকার আছে, গাছের ডালে কি?”

এই বলিয়া রূপ করিয়া শান্তি নামিয়া পড়িল। সত্যানন্দ মহেন্দ্রকে বলিলেন, “ইনি নবীনানন্দ গোস্বামী—অতি পবিত্র-চেতা, আমার প্রিয়শিষ্য। ইনি তোমার কন্যার সন্ধান বলিয়া দিবেন।” এই বলিয়া সত্যানন্দ শান্তিকে কিছু ইঙ্গিত করিলেন। শান্তি তাহা বুঝিয়া প্রণাম করিয়া বিদায় হয়, তখন মহেন্দ্র বলিলেন “কোথায় তোমার সঙ্গে সাক্ষাৎ হইবে?”

শান্তি বলিল, “আমার আশ্রমে আসুন।” এই বলিয়া শান্তি আগে আগে চলিল।

তখন মহেন্দ্র ব্রহ্মচারীর পাদবন্দনা করিয়া বিদায় হইলেন। এবং শান্তির সঙ্গে সঙ্গে তাহার আশ্রমে উপস্থিত হইলেন। তখন অনেক রাত্রি হইয়াছে। তথাপি শান্তি বিশ্রাম না করিয়া নগরান্তিমুখে যাত্রা করিল।

সকলে চলিয়া গেলে, ব্রহ্মচারী, একা ভূমে প্রণত হইয়া,

মাটিতে মস্তক স্থাপন করিয়া মনে মনে জগদীশ্বরের ধ্যান করিতে লাগিলেন। রাত্রি গভীর হইয়া আসিল। এমন সময়ে কে আসিয়া তাঁহার মস্তক স্পর্শ করিয়া বলিল “আমি আসিয়াছি।”

ব্রহ্মচারী উঠিয়া চমকিত হইয়া অতি ব্যগ্রভাবে বলিলেন “আপনি আসিয়াছেন? কেন?” যে আসিয়াছিল সে বলিল “দিন পূর্ণ হইয়াছে।” ব্রহ্মচারী বলিলেন, “হে প্রভু! আজ ক্ষমা করুন। আগামী মাঘী পূর্ণিমায় আমি আপনার আজ্ঞা পালন করিব।”

ত্রয়োদশ পরিচ্ছেদ ।

সেই রজনীতে হরিধ্বনিতে বীরভূমি পরিপূর্ণা হইল। সম্ভানেরা দলে দলে যেখানে সেখানে উচ্চৈশ্বরে কেহ “বন্দে মাতরং” কেহ “জগদীশ হরে” বলিয়া গাইয়া বেড়াইতে লাগিল। কেহ শক্রসেনার অন্ত, কেহ বস্ত্র অপহরণ করিতে লাগিল। কেহ মৃতদেহের মুখে পদাঘাত, কেহ অস্ত্র প্রকার উপদ্রব করিতে লাগিল। কেহ গ্রামাভিমুখে, কেহ নগরাভিমুখে ধাবমান হইয়া, পথিক বা গৃবস্থকে ধরিয়া বলে “বল বন্দে মাতরং নহিলে মারিয়া ফেলিবা” কেহ ময়রার দোকানি লুটিয়া খায়, কেহ গোয়ালার বাড়ী গিয়া হাঁড়ি পাড়িয়া দধিতে চুমুক মারে, কেহ বলে “আমরা ব্রজগোপ আসিয়াছি, গোপিনী কই?” সেই এক রাত্রে মধ্য গ্রামে গ্রামে নগরে নগরে মহাকোলাহল পড়িয়া গেল। সকলে বলিল, “ইংরেজ মুসলমান একত্রে পরাভূত হইয়াছে, দেশ আবার হিন্দুর।”

হইয়াছে। সকলে একবার মুক্তকণ্ঠে হরি হরি বল।” গ্রাম্য লোকেরা মুসলমান দেখিলেই তাড়াইয়া ঝাড়িতে যায়। কেহ কেহ সেই রাত্রে দলবদ্ধ হইয়া মুসলমানদিগের পাড়ার গিয়া তাহাদের ঘরে আশুন দিয়া সর্বস্ব লুটয়া লইতে লাগিল। অনেক যবন নিহত হইল, অনেক মুসলমান দাড়ি ফেলিয়া গায়ে মৃত্তিকা মাখিয়া হরিনাম করিতে আরম্ভ করিল, জিজ্ঞাসা করিলে বলিতে লাগিল, “মুই হেঁছ।”

দলে দলে ঐশ্বর্য মুসলমানেরা নগরাভিমুখে ধাবিত হইল। যেখানে মহারাজ বীরভূমাধিপতি আসাদ-উজ্জ-মান বাহাদুর রাজসিংহাসনে স্থখে আগীন, সেই খানেই দারুণ রাজ্য-ধ্বংসসূচক বার্তা পৌছিল। তখন অতি ব্যস্তে চারিদিকে রাজপুরুষেরা ছুটিল, রাজ্যের অবশিষ্ট সিপাহী স্তম্ভজিত হইয়া নগররক্ষার্থে শ্রেণীবদ্ধ হইল। রাজনগরের গড়ের ঘাটে ঘাটে প্রকোষ্ঠ সকলে রক্ষকবর্গ সশস্ত্রে অতি সাবধানে, দ্বাররক্ষায় নিযুক্ত হইল। রাজধানী মধ্যে সমস্ত লোক সমস্তরাজিঙ্গাগরণ করিয়া, কি হয় কি হয় চিন্তা করিতে লাগিল। হিন্দুরা বলিতে লাগিল, “আসুক সন্ন্যাসীরা আসুক, মা ছুঁয়া করুন, হিন্দুর অদৃষ্টে সেই দিন হউক।” মুসলমানেরা বলিতে লাগিল “আল্লা আকবর! এতনা রোজের পর কোরাণসরিক বেবাক কি বুটো হলো; মোরা বে পাঁচু ওয়াজু নমাজ করি, তা এই তেলককাটা হেঁছুর দল ফতে করতে নারলাম। ছুনিয়া সব দ্বাঁকি।” এইরূপে কেহ ক্রন্দন, কেহ হাস্য করিয়া সকলেই ঘোরতর আগ্রহের সহিত রাজি কাটাইতে লাগিল।

এ সকল কথা কল্যাণীর কাণে গেল—আবালবৃদ্ধবনিভ। কাহারও অবদিত ছিল না। কল্যাণী মনে মনে বলিল “জয় জগদীশ্বর! আজ তোমার কার্য সিদ্ধ হইয়াছে। আজ আমি

স্বামিনন্দর্শনে যাত্রা করিব। হে মধুসূদন! আজ আমার সহায় হইও।”

গভীর রাত্রে কল্যাণী শয্যা ত্যাগ করিয়া উঠিয়া, একা খিড়কীর দ্বার খুলিয়া, এদিক ওদিক চাহিয়া, কাহাকে কোথাও না দেখিয়া, ধীরে ধীরে নিঃশব্দে গৌরীদেবীর পুরী হইতে রাজপথে নিষ্ক্রান্ত হইল। মনে মনে ইষ্টদেবতা স্মরণ করিয়া বলিল, “দেখো ঠাকুর, আজ যেন পদচিহ্নে তাঁর সাক্ষাৎ পাই।”

কল্যাণী নগরের ঘাটিতে আসিয়া উপস্থিত। পাহারাওয়াল বলিল “কে যায়?” কল্যাণী ভীতস্বরে বলিল “আমি জীলোক।” পাহারাওয়াল বলিল “যাবার ছকুম নাই।” কথা দফাদারের কাণে গেল। দফাদার বলিল “বাহিরে বাইবার নিষেধ নাই, ভিতরে আসিবার নিষেধ।” শুনিয়া পাহারাওয়াল কল্যাণীকে বলিল “বাও মাগি, যাবার মানা নাই, লেকেন আজ কা রাতমে বড় আফত, কেয়া জানে মাগি তোমার কি হোবে, তুমি কি ডেতেকের হাতে গিরবে, কি থানায় পড়িয়া মরিয়া যাবে, সো তো হাম কিছু জানে না, আজকা রাত মাগি, তুমি বাহার না যাবে।”

কল্যাণী বলিল “বাবা আমি ভিখারিণী—আমার এক কড়া কর্দক নাই, আমার ডাকাতে কিছু বলিবে না।”

পাহারাওয়াল বলিল “বয়স আছে মাগি, বয়স আছে, ছনিয়ামে ওহি তো জেওরাত হ্যায়! বল্কে হামি ডেকেত হতে পারি।” কল্যাণী দেখিল বড় বিপদ, কিছু কথা না কহিয়া, ধীরে ধীরে ঘাটি এড়াইয়া চলিয়া গেল। পাহারাওয়াল দেখিল মাগি রসিকতাটা বুঝিল না, তখন মনের জুখে গাঁজায় দম মারিয়া ঝিঝিট থাখাজে সোরির টপ্পা ধরিল। কল্যাণী চলিয়া গেল।

সে রাত্রে পথে দলে দলে পথিক, কেহ মার মার শব্দ

করিতেছে, কেহ পলাও পলাও শব্দ করিতেছে, কেহ কান্দিতেছে, কেহ হাসিতেছে, যে বাহাকে দেখিতেছে, সে তাহাকে ধরিতে যাইতেছে। কল্যাণী অতিশয় কষ্টে পড়িলেন। পথ মনে নাই, কাহাকে জিজ্ঞাসা করিবার যো নাই, সকলে রণোন্মুখ, কেবল লুকাইয়া লুকাইয়া অন্ধকারে পথ চলিতে হইতেছে। লুকাইয়া লুকাইয়া যাইতেও এক দল অতি উদ্ধত উন্মত্ত বিজোহীর হাতে তিনি পড়িয়া গেলেন। তাহারা ঘোর চীৎকার করিয়া তাঁহাকে ধরিতে আসিল। কল্যাণী তখন উর্দ্ধ্বাসে পলায়ন করিয়া জঙ্গলমধ্যে প্রবেশ করিলেন। সেখানেও সঙ্গে সঙ্গে দুই একজন দস্যু তাঁহার পশ্চাতে ধাবিত হইল। একজন গিয়া তাঁহার অঞ্চল ধরিল, বলিল “তবে চাঁদ!” সেই সময়ে আর একজন অকস্মাৎ আসিয়া অত্যাচারকারী পুরুষকে এক ঘা লাঠি মারিল। সে আহত হইয়া গাছু হটিয়া গেল। এই ব্যক্তির সন্ন্যাসীর বেশ—কৃষ্ণাজিনে বস্ত্রাবৃত—বয়স অতি অল্প। সে কল্যাণীকে বলিল “তুমি ভয় করিও না, আমার সঙ্গে আইস—কোথায় যাইবে?”

ক। পদচিহ্নে।

আগন্তুক বিস্মিত ও চমকিত হইল, বলিল “সে কি, পদচিহ্নে?” এই বলিয়া আগন্তুক কল্যাণীর দুই ক্ষুদ্র হস্ত স্থাপন করিয়া মুখ পানে সেই অন্ধকারে অতি যত্নের সহিত নিরীক্ষণ করিতে লাগিল।

কল্যাণী অকস্মাৎ পুরুষস্পর্শে রোমাঞ্চিত, ভীত, ক্ষুব্ধ, বিস্মিত অশ্রুবিপ্লুত হইল—এমন সাধ্য নাই যে পলায়ন করে, ভীতিবিহ্বল হইয়া গিয়াছিল। আগন্তুকের নিরীক্ষণ শেষ হইলে সে বলিল “হরে মুরারে! চিনেছি যে, তুমি পোড়ার মুখী কল্যাণী!”

কল্যাণী ভীতা হইয়া জিজ্ঞাসা করিল “আপনি কে ?”

আগন্তুক বলিল “আমি তোমার দাসাহুদাস—হে সুন্দরি!
আমার প্রতি প্রসন্ন হও ।”

কল্যাণী অতি দ্রুতবেগে সেখান হইতে সরিয়া গিয়া, তর্জুন
পর্জন করিয়া বলিল “এই অপমান করিবার জন্যই কি আপনি
আমাকে রক্ষা করিলেন ? দেখিতেছি ব্রহ্মচারীর বেশ, ব্রহ্মচা-
রীর কি এই ধর্ম ? আমি আজ নিঃসহায়, নহিলে তোমার
মুখে আমি নাথি মারিতাম ।”

ব্রহ্মচারী বলিল, “অগ্নি স্মিতবদনে ! আমি বহুদিবসাবধি,
তোমার ঐ বরবপুর স্পর্শ কামনা করিতেছি ।” এই বলিয়া
ব্রহ্মচারী দ্রুতবেগে ধাবমান হইয়া কল্যাণীকে ধরিয়া গাঢ়
আলিঙ্গন করিল । তখন কল্যাণী খিল খিল করিয়া হাসিল,
বলিল, “ও পোড়া কপাল ! আগে বলতে হয় ভাই, যে আমারও
ঐ দশা ।” শান্তি বলিল “ভাই মহেশ্বরের খোঁজে চলিয়াছ ?”

কল্যাণী বলিল । “তুমি কে, তুমি যে সব জ্ঞান দেখিতেছি ।”

শান্তি বলিল, “আমি ব্রহ্মচারী—সন্তানসেনার অধিনায়ক—
ঘোরতর বীর পুরুষ । আমি সব জানি । আজ পথে সিপাহী আর
সন্তানের যে দৌরাঙ্গ্য তুমি আজ পদচিহ্নে যাইতে পারিবে না ।”

কল্যাণী কাঁদিতে লাগিল ।

শান্তি চোখ ঘুরাইয়া বলিল “ভয় কি ? আমরা নয়নবাণে
সহস্র শত্রু বধ করি । চল পদচিহ্নে যাই ।”

কল্যাণী এক্রপ বুদ্ধিমতী স্ত্রীলোকের সহায়তা পাইয়া যেন
হাত বাড়াইয়া স্বর্গ পাইল । বলিল, “তুমি যেখানে লইয়া
যাইবে সেইখানে যাইব ।”

শান্তি তখন তাহাকে সঙ্গে করিয়া বন্যপথে লইয়া চলিল ।

চতুর্দশ পরিচ্ছেদ।

যখন শান্তি আপন আশ্রম ত্যাগ করিয়া গভীর রাত্রে নগরাভিমুখে যাত্রা করে, তখন জীবানন্দ আশ্রমে উপস্থিত ছিলেন। শান্তি জীবানন্দকে বলিল “আমি নগরে চলিলাম। মহেন্দ্রের জীকে লইয়া আসিব। তুমি মহেন্দ্রকে বলিয়া রাখ যে উহার জী আছে।”

জীবানন্দ ভবানন্দের কাছে কল্যাণীর জীবন রক্ষা বৃত্তান্ত সকল অবগত হইয়াছিল—এবং তাহার বর্তমান বাসস্থানও সর্বস্থানবিচারিণী শান্তির কাছে শুনিয়াছিল। জন্মে ক্রমে সকলে মহেন্দ্রকে শুনাইতে লাগিল।

মহেন্দ্র প্রথমে বিশ্বাস করিলেন না। শেষে আনন্দে অভিভূত হইয়া মুগ্ধ প্রায় হইলেন।

সেই রজনী প্রভাতে শান্তির সাহায্যে মহেন্দ্রের সঙ্গে কল্যাণীর সাক্ষাৎ হইল। নিস্তন্ধ কাননমধ্যে, ঘনবিন্যস্ত শালতরুশ্রেণীর অন্ধকার ছায়ামধ্যে, পশু পক্ষী ভগ্ননিদ্র হইবার পূর্বে, তাহাদিগের পরস্পরের দর্শনলাভ হইল। সাক্ষী কেবল সেই নীল গগনবিহারী স্নানকিরণ আকাশের নক্ষত্রনিচয়, আর সেই নিবাত নিঃস্পন্দ অনন্ত শালতরুশ্রেণী। দূরে কোন শীলাসংঘর্ষণনাদিনী, মধুর কল্লোলিনী, সংকীর্ণ নদীর তর তর শব্দ, কোথাও প্রাচীসমুদিত উষাহুকুটজ্যোতিঃ সন্মূর্শনে আচ্ছাদিত এক কোকিলের রব।

বেলা এক প্রহর হইল। সেখানে শান্তি জীবানন্দ আসিয়া দেখা দিল। কল্যাণী শান্তিকে বলিল—“আমরা আপনার কাছে বিনা মূল্যে বিক্রিত। আমাদের কন্যাটির সুস্থান বলিয়া দিয়া এ উপকার সম্পূর্ণ করুন।”

শান্তি জীবানন্দের মুখের প্রতি চাহিয়া বলিল “আমি ঘুমাইব। অষ্ট প্রহরের মধ্যে বসি নাই—হুই রাজ ঘুমাই নাই—আমি বাই পুরুষ!”

কল্যাণী দ্রবং হাসিল। জীবানন্দ মহেন্দ্রের মুখপানে চাহিয়া বলিলেন, “সে ভার আমার উপর রহিল। আপনারা পদটিহুে গমন করুন—সেইখানে কন্যাকে পাইবেন।”

জীবানন্দ ভরুইপুরে নিমাইয়ের নিকট হইতে মেয়ে আনিতে গেলেন—কাজটা বড় সহজ বোধ হইল না।

তখন নিমাই প্রথমে চোক গিলিল, একবার এদিক তদিক চাহিল। তার পর একবার তার ঠোঁট নাক ফুলিল। তার পর সে কাঁদিয়া ফেলিল। তার পর বলিল “আমি মেয়ে দিব না।”

নিমাই, গোল হাতখানি উল্টাপিট চোখে দিয়া ঘুরাইয়া ঘুরাইয়া চক্ষু মুছিলে পর জীবানন্দ বলিল, “তা দিদি কাঁদ কেন, এমন দূর ও তো নয়—তাদের বাড়ী তুমি না হয় গেলে, মধ্যে মধ্যে দেখে এলে।”

নিমাই ঠোঁট ফুলাইয়া বলিল, “তা তোমাদের মেয়ে তোমরা নিয়ে যাও না কেন? আমার কি?” নিমাই এই বলিয়া স্কুমারীকে আনিয়া রাগ করিয়া ছম করিয়া জীবানন্দের কাছে ফেলিয়া দিয়া পা ছড়াইয়া কাঁদিতে বলিল। স্তরং জীবানন্দ তখন আর কিছু না বলিয়া এদিক ওদিক বাজে কথা কহিতে লাগিলেন। কিন্তু নিমাইয়ের রাগ পড়িল না। নিমাই উঠিয়া গিয়া স্কুমারীর কাপড়ের বোচকা, অলঙ্কারের বাক্স, চুলের দড়ি, খেলার পুতুল বুপঝাপ করিয়া আনিয়া জীবানন্দের সম্মুখে ফেলিয়া দিতে লাগিল। স্কুমারী সে সকল আপনি

গুচুহিতে লাগিল। সে নিমাইকে জিজ্ঞাসা করিতে লাগিল
 “হাঁ মা—কোথায় যাব মা?” নিমাইয়ের আর সহ হইল
 না। নিমাই তখন অকুকে কোলে লইয়া কাঁদিতে কাঁদিতে
 চলিয়া গেল।

পঞ্চদশ পরিচ্ছেদ ।

পদচিহ্নে নূতন দুর্গমধ্যে, আজ স্নেহে সমবেত, মহেন্দ্র,
 কল্যাণী, জীবানন্দ, শান্তি, নিমাই, নিমাইয়ের স্বামী, স্নকু-
 মারী। সকলে স্নেহে সম্মিলিত। শান্তি নবীনানন্দের বেশে
 আসিয়াছিলেন। কল্যাণীকে যে রাত্রে আপন কুটীরে
 আনেন, সেই রাত্রে বারণ করিয়াছিলেন, যে নবীনানন্দ যে
 জীলোক এ কথা কল্যাণী স্বামীর সাক্ষাতে প্রকাশ না করেন।
 একদিন কল্যাণী তাঁহাকে অন্তঃপুরে ডাকিয়া পাঠাইলেন।
 নবীনানন্দ অন্তঃপুরমধ্যে প্রবেশ করিলেন। ভৃত্যগণ বারণ
 করিল, শুনিলেন না।

শান্তি কল্যাণীর নিকট আসিয়া জিজ্ঞাসা করিল, “ডাকি-
 যাছ কেন?”

ক। পুরুষ সাজিয়া কতদিন থাকিবে? দেখা হয়
 না,—কথা कहিতেও পাই না। আমার স্বামীর সাক্ষাতে
 তোমায় প্রকাশ হইতে হইবে।

নবীনানন্দ বড়চিন্তিত হইয়া রহিলেন, অনেকক্ষণ কথা
 कहিলেন না। শেষ বলিলেন, “তাঁহাতে অনেক বিষ
 কল্যাণি।”

তাইজনে সেই কথাবার্তা হইতে লাগিল। এদিকে যে

ভূতাবর্গ নবীনানন্দের অন্তঃপুরে প্রবেশ নিষেধ করিয়াছিল, তাহারা গিয়া মহেন্দ্রকে সংবাদ দিল, যে নবীনানন্দ জোর করিয়া অন্তঃপুরে প্রবেশ করিল, নিষেধ মানিল না। কৌতূহলী হইয়া মহেন্দ্রও অন্তঃপুরে গেলেন। কল্যাণীর শয়নঘরে গিয়া দেখিলেন, যে নবীনানন্দ গৃহমধ্যে দাঁড়াইয়া আছে, কল্যাণী তাহার গায়ে হাত দিয়া বাঘছালের গ্রন্থি খুলিয়া দিতেছে। মহেন্দ্র অতিশয় বিস্ময়াপন্ন হইলেন— অতিশয় রুষ্ট হইলেন।

নবীনানন্দ তাঁহাকে দেখিয়া হাসিয়া বলিল, “কি গোঁসাই! সন্তানে সন্তানেও অবিশ্বাস?”

মহেন্দ্র বলিলেন, “ভবানন্দ ঠাকুর কি বিশ্বাসী ছিলেন?”

নবীনানন্দ চোখ ঘুরাইয়া বলিল, “কল্যাণী কি ভবানন্দের গায়ে হাত দিয়া বাঘছাল খুলিয়া দিত?” বলিতে বলিতে শাস্তি কল্যাণীর হাত টিপিয়া ধরিল, বাঘছাল খুলিতে দিল না।

ম। তাতে কি?

নবী। আমাকে অবিশ্বাস করিতে পারেন—কল্যাণীকে অবিশ্বাস করেন কোন্ হিসাবে?

এবার মহেন্দ্র বড় অপ্রতিভ হইলেন। বলিলেন,

“কই কিসে অবিশ্বাস করিলাম?”

নবী। নহিলে আমার পিছু পিছু অন্তঃপুরে আসিয়া উপস্থিত কেন?

ম। কল্যাণীর সঙ্গে আমার কিছু কথা ছিল; তাই আসিয়াছি।

ন। তবে এখন যান। কল্যাণীর সঙ্গে আমারও কিছু কথা আছে। আপনি সরিয়া যান, আমি আগে কথা কই।

আপনার ঘর বাড়ী, আপনি সর্বদা আসিতে পারেন, আমি কটে একবার আসিয়াছি।

মহেন্দ্র বোকা হইয়া রহিল। কিছুই বুঝিতে পারিতেছে না। এ সকল কথা ত অপরাধীর কথাবার্তার মত নহে। 'কল্যাণীরও ভাব বিচিত্র। সেও ত অবিশ্বাসিনীর মত পলাইল না, ভীতা হইল না, লজ্জিতা নহে—কিছুই না বরং মুহু মুহু হাসিতেছে। আর কল্যাণী—যে সেই বুদ্ধতলে অনায়াসে বিষ ভোজন করিয়াছিল সে কি অপরাধিনী হইতে পারে? মহেন্দ্র এই সকল ভাবিতেছেন এমন সময়ে অভাগিনী শান্তি, মহেন্দ্রের দুরবস্থা দেখিয়া দ্রব্য হাসিয়া, কল্যাণীর প্রতি এক বিলোল কটাক্ষ নিক্ষেপ করিল। সহসা তখন অন্ধকার ঘুচিল—মহেন্দ্র দেখিল, এ যে রমণীকটাক্ষ। সাহসে ভর করিয়া, যা থাকে কপালে বলিয়া, নবীনানন্দের দাড়ি ধরিয়া মহেন্দ্র এক টান দিল—কৃত্রিম দাড়ি গোপ খসিয়া আসিল। সেই সময়ে অবসর পাইয়া, কল্যাণী বাঘছালের গ্রন্থি খুলিয়া ফেলিল—বাঘছালও খসিয়া পড়িল। ধরা পড়িয়া শান্তি অবনতমুখী হইয়া রহিল।

মহেন্দ্র তখন শান্তিকে জিজ্ঞাসা করিল, “তুমি কে?”

শা। শ্রীমান্ নবীনানন্দ গোস্বামী।

ম। সে ত জুয়াচুরি; তুমি জীলোক?

শা। এখন কাজে কাজেই।

ম। তবে একটা কথা জিজ্ঞাসা করি—তুমি জীলোক হইয়া

সর্বদা জীবানন্দ ঠাকুরের সহবাস কর কেন?

শা। সে কথা আপনাকে নাই বলিলাম।

ম। তুমি যে জীলোক জীবানন্দ ঠাকুর তা কি জানেন?

শা। জানেন।

শুনিয়া, বিস্ময়াত্মক মনে অতিশয় বিষন্ন হইলেন। দেখিয়া, কল্যাণী আর থাকিতে পারিল না, বলিল, “ইনি জীবানন্দ গোস্বামীর ধর্মপত্নী শান্তিদেবী।”

মূর্ত্ত জন্য মহেন্দ্রের মুখ প্রফুল্ল হইল। আবার সে মুখ অন্ধকারে ঢাকিল। কল্যাণী বুঝিল, বলিল, “ইনি ব্রহ্মচারিণী।”

মহেন্দ্র বিষন্নভাবে বলিল, “হউক—তথাপি প্রায়শ্চিত্ত আছে।” পরে শান্তির মুখপানে চাহিয়া বলিল, “কি প্রায়শ্চিত্ত আপনি জানেন?”

শান্তি বলিল, “মৃত্যু। কোন্ সন্তানে না জানে? আগামী মাঘী পূর্ণিমায় সে প্রায়শ্চিত্ত হইবে স্থির হইয়াছে। আপনি নিশ্চিত থাকুন।”

এই বলিয়া শান্তি সেখান হইতে চলিয়া গেল। মহেন্দ্র আর কল্যাণী বজ্রাহতের ন্যায় দাঁড়াইয়া রহিল।

ষোড়শ পরিচ্ছেদ ।

বীরভূমি ইংরেজ মুসলমানের হাত ছাড়া হইয়াছে। ইংরেজ মুসলমান কেহই এ কথা মানেন না—মনকে চোখ ঠারেন—বলেন কতকগুলো লুণ্ঠেরাতে বড় দৌরাশ্ব্য করিতেছে—শাসন করিতেছি। এইরূপ কতকাল যাইত বলা যায় না কিন্তু এই সময়ে ভগবানের নিয়োগে ওয়ারেন হেষ্টিংস কলিকাতার গবর্নর জেনেরল। ওয়ারেন হেষ্টিংস মনকে চোক ঠারিবার লোক নহেন—তার সে বিদ্যা থাকিলে

আজ ভারতে ব্রিটিশ সাম্রাজ্য কোথায় থাকিত ? অর্গোনে
বীড়ভূমি শাসনার্থ উড নামা দ্বিতীয় সেনাপতি নূতন সেনা
‘লইয়া উপস্থিত হইলেন ।

“ উড দেখিলেন এ ইউরোপীয় যুদ্ধ নহে । শত্রুদিগের
‘সেনা নাই, নগর নাই, রাজধানী নাই, দুর্গ নাই, অথচ
সকলই তাহাদের অধীন । যে দিন যেখানে ব্রিটিশ সেনার
শিবির, সেই দিনের জন্য সেস্থান ব্রিটিশ সেনার অধীন—তার
পর দিন ব্রিটিশ সেনা চলিয়া গেল ত অমনি চারিদিকে “বন্দে
মাতরং” গীত হইতে লাগিল । উড সাহেব খুঁজিয়া পান না
কোথা হইতে ইহারা পিপীলিকার মত এক এক রাঙে নির্গত
হইয়া যে গ্রাম ইংরেজের বশীভূত হয় তাহা দাহ করিয়া যায়,
অথবা অল্পসংখ্যক ব্রিটিশ সেনা পাইলে তৎক্ষণাৎ সংহার করে ।
অনুসন্ধান করিতে করিতে উড সাহেব জানিলেন যে, পদচিহ্নে
ইহারা দুর্গনির্মাণ করিয়া সেইখানে আপনাদিগের অস্ত্রাগার ও
ধনাগার রক্ষা করিতেছে । অতএব সেই দুর্গ অধিকার করা
বিধেয় বলিয়া স্থির করিলেন ।

চরের দ্বারা তিনি সম্বাদ লইতে লাগিলেন যে, পদচিহ্নে
কত সম্বাদ থাকে । যে সম্বাদ পাইলেন তাহাতে তিনি সহসা
দুর্গ আক্রমণ করা বিধেয় বিবেচনা করিলেন না । মনে মনে
এক অপূর্ণ কৌশল উদ্ভাবন করিলেন ।

মাঘী পূর্ণিমা সম্মুখে উপস্থিত । জাঁহার শিবিরের অদূর-
বর্তী কেন্দুবিলগ্রামে জয়দেব গোস্বামীর মেলা হইবে । এবার
মেলায় বড় ঘট । সহজে মেলায় লক্ষ লোকের সমাগম
হইয়া থাকে । এবার বৈষ্ণবের রাজ্য হইয়াছে, বৈষ্ণবেরা
মেলায় আসিয়া বড় জাঁক করিবে সংকল্প করিয়াছে । অতএব
ষাবতীয় সম্ভানগণের, পূর্ণিমার দিন কেন্দুবিল্লতে একত্র সমাগম

হইবে, এমন সম্ভাবনা। মেজর উড বিবেচনা করিলেন যে পদচিহ্নের রক্ষকেরাও সকলেই মেলায় আসিবার সম্ভাবনা। সেই সময়েই সহসা পদচিহ্নে গিয়া ভ্রূর্গ অধিকৃত করিবেন।

এই অভিপ্রায় করিয়া, মেজর উড ঘটনা করিলেন, যে তিনি মেলার দিবস কেন্দ্রবিন্দু আক্রমণ করিবেন। এক ঠাই সকল বৈষ্ণব পাইয়া, একদিনে শত্রু নিঃশেষ করিবেন। বৈষ্ণবের মেলা হইতে দিবেন না।

এ সম্বাদ গ্রামে গ্রামে প্রচারিত হইল। তখন যেখানে যে সম্ভ্রামসম্প্রদায়ভুক্ত ছিল, সে তৎক্ষণাৎ অস্ত্র গ্রহণ করিয়া মেলা রক্ষার জন্য কেন্দ্রবিন্দু অভিমুখে প্রাবিত হইল। সকল সম্ভ্রামই কেন্দ্রবিন্দু আসিয়া মাঘী পূর্ণিমায় মিলিত হইল। মেজর উড বাহা ভাবিয়াছিলেন তাহাই ঠিক হইল। ইংরেজের সৌভাগ্যক্রমে মহেন্দ্রও ফাঁদে পা দিলেন, মহেন্দ্র পদচিহ্নের ভ্রূর্গে অল্পমাত্র সৈন্য রাখিয়া অধিকাংশ সৈন্য লইয়া কেন্দ্রবিন্দু যাত্রা করিলেন।

এ সকল কথা হইবার আগেই জীবানন্দ ও শান্তি পদচিহ্ন হইতে বাহির হইয়া গিয়াছিল। তখন যুদ্ধের কোন কথা হয় নাই, যুদ্ধে তাহাদের তখন মন ছিল না। মাঘী পূর্ণিমায়, পুণ্যদিনে, শুভক্ষণে, জয়দেব গোস্বামীর তীর্থে, অজয়ের পবিত্র জলে প্রাণ বিসর্জন করিয়া, প্রতিজ্ঞাতঙ্গ মহাপ্রাণের প্রায়শ্চিত্ত করিবে, ইহাই তাহাদের অভিপ্রেতি। কিন্তু পথে যাইতে যাইতে তাহারা শুনিল যে কেন্দ্রবিন্দু সমবেত সম্ভ্রামদিগের সঙ্গে ইংরেজদিগের মহাযুদ্ধ হইবে। তখন জীবানন্দ বলিল, “তবে যুদ্ধেই মরিব, শীঘ্র চলা।”

তাহারা শীঘ্র শীঘ্র চলিল। পথ এক স্থানে একটা টিলার উপর দিয়া গিয়াছে। টিলায় উঠিয়া, বীরদম্পতী দেখিতে

পাইল—যে নিম্নে কিছু দূরে ইংরেজশিবির। শাস্তি বলিল,
“মরার কথা এখন থাক—বল “বন্দে মাতরং।”

সপ্তদশ পরিচ্ছেদ ।

তখন দুই জনে কানে কানে কি পরামর্শ করিল। পরামর্শ
করিয়া জীবানন্দ এক বনে লুকাইল। শাস্তি আর এক বনে
প্রবেশ করিয়া এক অদ্ভুত রহস্যে প্রবৃত্ত হইল।

শাস্তি মরিতে যাইতেছিল, কিন্তু মৃত্যুকালে জীববেশ ধরিবে
ইহা স্থির করিয়াছিল। তাহার এই পুরুববেশ জুয়াচুরি,
মহেন্দ্র বলিয়াছে। জুয়াচুরি করিতে করিতে মরা হইবে না।
সুতরাং ঝাঁপি টেপারিটি সঙ্গে আনিয়াছিল। তাহাতে তাহার
সজ্জা সকল থাকিত। এখন নবীনানন্দ ঝাঁপি টেপারি
খুলিয়া বেশপরিবর্তনে প্রবৃত্ত হইল।

চিকন রকম রসকলির উপর খয়েরের টিপ কাটিয়া, তৎ-
কালপ্রচলিত ফুর ফুরে কোঁকড়া কোঁকড়া কতকগুলো ঝাঁপটার
গোছায় চাঁদমুখ থানি ঢাকিয়া, শাস্তি একটি সারঙ্গ হস্তে বৈষ্ণবী
বেশে, ইংরেজশিবিরে দর্শন দিল। দেখিয়া ভ্রমরকৃষ্ণশ্রাবুজ
সিপাহীরা বড় মাতিয়া গেল। কেহ টপ্পা, কেহ গজল, কেহ
শ্যামাবিষয়, কেহ কৃষ্ণবিষয়, ফরমাস করিয়া শুনিল। কেহ চাল
দিল, কেহ দাল দিল, কেহ মিষ্ট দিল, কেহ পয়সা দিল, কেহ
সিকি দিল। বৈষ্ণবী তখন শিবিরের অবস্থা স্বচক্ষে সর্বেশেষ
দেখিয়া, চলিয়া যায়, সিপাহীরা জিজ্ঞাসা করিল “আবার কবে
আসিবে। বৈষ্ণবী বলিল “তা জানি না, আমার বাড়ী
ঢের দূর।” সিপাহীরা জিজ্ঞাসা করিল “কত দূর?” বৈষ্ণবী

বলিল “আমার বাড়ী পদচিহ্নে ।” এখন সেই দিন মেজর উড্ পদচিহ্নের কিছু খবর লইতেছিলেন । একজন সিপাহী তাহা জানিত । বৈষ্ণবীকে ডাকিয়া কাপ্তেন সাহেবের কাছে লইয়া গেল । কাপ্তেন সাহেব তাহাকে মেজর উডের কাছে লইয়া গেল । মেজর উডের কাছে গিয়া বৈষ্ণবী মধুর হাসি হাসিয়া, মর্ম্মভেদী কটাফে উড সাহেবের মাথা ঘুরাইয়া দিয়া, খঞ্জনীতে আঘাত করিয়া, গান ধরিল ।

স্নেহনিবহনিধনে, কলয়সি করবালং ।

উড সাহেব জিজ্ঞাসা করিলেন, “তোমার বাড়ী কোথা বিবি ।”

বিবি বলিল, “আমি বিবি নই, বৈষ্ণবী । বাড়ী পদচিহ্নে ।”

উড । Well that is Padsin ! Padsin is it ?

“হঁয়া একটো গর হ্যায় ?”

বৈষ্ণবী বলিল “ঘর ?—কত ঘর আছে ।”

উড । গর নেই,—গর নেই,—গর,—গর ।—

শান্তি । সায়েব তোমার মনের কথা বুঝেছি । গড় ?

উড । ইয়েস্ ইয়েস, গর ! গর ! হ্যায় ?

শান্তি । গড় আছে । ভারি কেলা ।

উড্ । কেটে আড়মি ।

শান্তি । গড়ে কত লোক থাকে ? বিশ পঞ্চাশ হাজার ।

উড্ । নন্দেন্দ । একটো কেলেমে ডো চার হাজার রহে শক্তা । হঁয়া পর আবি হ্যায় ? ইয়া নিকেল গিয়া ?

শান্তি । আবার নেক্লাবে কোথা ?

উড । মেলামে—কিয়া বোল্টা হ্যায় । কিণ্ডেল—

শান্তি । কেঁহুলী—কেঁহুলীর মেলাম তারা যাবে না ।

উড্ । টোমি কব আয়া হ্যায় হঁয়াসে ।

শান্তি। কাল এসেছি সায়েব।

উড। ও লোক আজ নিকেল গিয়া হোগা।

শান্তি মনে মনে ভাবিতেছিল যে, “তোমার বাপের শ্রাদ্ধের চাঁদ যদি আমি না চড়াই, তবে আমার রসকলি কাটাই বৃথা। কতক্ষণে শিয়ালে তোমার মুণ্ড খাবে আমি দেখুবো!” প্রকাশ্যে বলিল, “তা সাহেব হতে পারে, আজ বেরিয়ে গেলে যেতে পারে। অত খবর আমি জানি না, বৈষ্ণবী মাহু, গান গেয়ে ভিক্ষা শিক্ষা করে খাই, অত খবর রাখিনে। বকে বকে গলা শুকিয়ে উঠলো, পয়সাটা মিকেটা দাও উঠে চলে যাই। আর ভাল করে বক্শিশ দাও তো না হয় পরশু এসে বলে যাব।”

উড সাহেব ঝগাৎকরিয়া একটা নগদ টাকা ফেলিয়া দিয়া, বলিল—“পরশু নেহি বিবি।”

শান্তি বলিল, “দূর বেটা! বৈষ্ণবী বল্; বিবি কি?”

উড। পরশু নেহি, আজ রাংকো হাম্কে। খবর মিলনা চাহিয়ে।

শান্তি। বন্দুক মাথায় দিয়ে সরাপ টেনে সরসের তেল নাকে দিয়ে ঘুমোও। আজ আমি দশ কোশ রাস্তা যাব আসুবো ওঁকে খবর এনে দেব! ছুঁচো বেটা কোথাকার।

উড। ছুঁচো বেটা কেসা কয়তা হ্যায়।

শান্তি। যে বড় বীর—ভারিজাঁদরেল।

উড। Great General হাম হোশক্তা হ্যায়—ক্লাইবকা মাফিক। লেকেন্ আজ হাম্কে। খবর মিল্নে চাহিয়ে। শও রুপেয়া বখসিয় দেঙ্গে।

শান্তি। শই দাও আর হাজারই দাও, বিশক্রোশ এ ছুখানা চৈঙ্গে হবে না।

উড। ঘোড়ে পর।

শান্তি। ঘোড়ায় চড়তে জান্লে আর তোমার তাঁবুতে এসে সারেক বাজিয়ে ভিক্ষে করি।

উড। গদি পর লেয়ায়েগা।

শান্তি। কোলে বসিয়ে নিয়ে যাবে? আমার লজ্জা নাই?

উড। ক্যা মুস্তিল, পান্সো রূপেয়া দেঙ্গে।

শান্তি। কে যাবে, তুমি নিজে যাবে?

উড তখন অঙ্গুলিনির্দেশ পূর্বক সম্মুখে দণ্ডায়মান লিঙলে নামক, এক জন যুবা এন্সাইনকে দেখাইয়া, তাহাকে বলিলেন “লিঙলে তুমি যাবে?” লিঙলে শান্তির রূপ যৌবন দেখিয়া বলিল “আহ্লাদ পূর্বক।”

তখন ভারি একটা আরবী ঘোড়া সজ্জিত হইয়া আসিলে লিঙলেও তৈয়ার হইল। শান্তিকে ধরিয়া ঘোড়ায় তুলিতে গেল। শান্তি বলিল “ছি, এত লোকের মাজখানে? আমার কি আর কিছু লজ্জা নাই। আগে চল ছাউনী ছাড়াই।”

লিঙলে ঘোড়ায় চলিল। ঘোড়া ধীরে ধীরে হাঁটাইয়া হাঁটাইয়া লইয়া চলিল। শান্তি পশ্চাৎ পশ্চাৎ হাঁটিয়া চলিল। এইরূপে তাহারা শিবিরের বাহিরে আসিল।

শিবিরের বাহিরে আসিলে নির্জন প্রান্তর পাইয়া, শান্তি লিঙলের পায়ের উপর পা দিয়া এক লাফে ঘোড়ায় চড়িল। লিঙলে হাসিয়া বলিল, “তুমি যে পাকা ষোড় সওয়ার।”

শান্তি বলিল, “আমরা এমন পাকা ঘোড়সওয়ার, যে তোমার সঙ্গে চড়িতে লজ্জা করে। ছি! রেকাব পায়ে দিয়ে ঘোড়ায় চড়া?”

একবার বড়াই করিবার জন্য লিঙলে রেকাব হইতে পা লুইল। শান্তি অমনি নির্বোধ ইংরেজের গলদেশে হস্তা-
র্পণ করিয়া ঘোড়া হইতে ফেলিয়া দিল। শান্তি তখন
অশ্বপৃষ্ঠে রীতিমত আসন গ্রহণ করিয়া ঘোড়ার পেটে মলের
বা মারিয়া, বায়ুবেগে আরবীকে ছুটাইয়া দিল। শান্তি
চারিবেংসর সন্তান সৈন্যের সঙ্গে সঙ্গে ফিরিয়া অশ্বারোহণ-
বিদ্যাও শিখিয়াছিল। তা না শিখিলে জীবানন্দের সঙ্গে
কি বাস করিতে পারিত? লিঙলে মাথা ভাঙ্গিয়া পড়িয়া
রহিলেন। শান্তি বায়ুবেগে অশ্বপৃষ্ঠে চলিল।

যে বনে জীবানন্দ লুকাইয়াছিল, শান্তি সেই খানে গিয়া,
জীবানন্দকে সকল সন্বাদ অবগত করাইল। জীবানন্দ বলিল,
“তবে আমি শীঘ্র গিয়া, মহেন্দ্রকে সতর্ক করি। তুমি কেন্দু
বিলে গিয়া সতানন্দকে খবর দাও। তুমি ঘোড়ায় বাও—
‘প্রভু যেন শীঘ্র সন্বাদ পান।’ তখন দুই জনে দুই দিকে
ধাবিত হইল। বলা বৃথা শান্তি আবার নবীনানন্দ হইল।

অষ্টাদশ পরিচ্ছেদ ।

উড়্ পাকা ইংরেজ। ঘাটিতে ঘাটিতে তাহার লোক
ছিল। শীঘ্র তাহার নিকট খবর পৌছিল, যে সেই বৈষ্ণবীটা
লিঙলে সাহেবকে যমালয় নামক খারাপ যায়গায় পাঠাইয়া
দিল। আপনি ঘোড়ায় চড়িয়া কোথায় চলিয়া গিয়াছে।
সুনিয়াই মেজর উড়্ বলিলেন “An imp of Satan!
Strike the tents.”

তখন ঠক্ ঠক্ খটা খটু তাসুর খোটায় মুণ্ডরের ঘা পড়িতে
লাগিল। মেঘরচিত অমরাবতীর ন্যায় বঙ্গনগরী অন্তর্হিত।

হইল। মাল গাড়িতে বোঝাই হইল। মানুষ বোড়ায় অথবা আপনার পায়ে। হিন্দু মুসলমান মাদরাজী গোরা বন্দুক ঘাড়ে, মস্ মস্ করিয়া চলিল। কামানের গাড়ি ঘড়োয় ঘড়োর করিতে করিতে চলিল।

এদিকে মহেন্দ্র সন্তানসেনা লইয়া ক্রমে কেন্দুবিল্লের পথে অগ্রসর। সেই দিন বৈকালে মহেন্দ্র ভাবিল বেলা পড়িয়া আসিল। শিবির সংস্থাপন করা যাক।

তখন শিবির সংস্থাপন উচিত বোধ হইল। বৈষ্ণবের তাঁবু নাই। গাছ তলায় গুণ চট বা কাঁথা পাতিয়া, শয়ন করে। একটু হরিচরণমৃত খাইয়া রাত্রি যাপন করে। ক্ষুধা যে টুকু বাকি থাকে, স্বপ্নে বৈষ্ণবী ঠাকুরাদীর অধরামৃত পান করিয়া পরিপূরণ করে। শিবিরোপযোগী নিকটে একটা স্থান ছিল। একটা বড় বাগান—আম কাঁঠাল বাবলা তেতুল। মহেন্দ্র আজ্ঞা দিলেন “এই স্থানেই শিবির কর।” তারি পাশে একটা পাহাড় ছিল, উঠিতে বড় বন্ধুর, মহেন্দ্র একবার ভাবিলেন এ পাহাড়ের উপর শিবির করিলেও হয়। স্থানটা দ্রুতগতিয়া আসিবেন মনে করিলেন।

এই ভাবিয়া মহেন্দ্র অশ্ব আরোহণ করিয়া ধীরে ধীরে পর্বতশিখরে উঠিতে আরম্ভ করিলেন। তিনি কিছু দূর উঠিলে পর এক যুবা যোদ্ধা বৈষ্ণবসেনামধ্যে প্রবিষ্ট হইয়া বলিল, “চল, পর্বতে চড়।” নিকটে যাহারা ছিল তাহারা বিস্মিত হইয়া বলিল “কেন?”

যোদ্ধা এক শিলাখণ্ডের উপর উঠিয়া দাঁড়াইয়া বলিল, চল এই “জ্যোৎস্নারাজ্যে ঐ পর্বতশিখরে, নূতন বসন্তের নূতন ফুলের গন্ধ শুঁকিতে শুঁকিতে আজ আমাদের ইংরেজের সঙ্গে যুদ্ধ করিতে হইবে।” সন্তানেরা দোঁপিল সেনাপতি জীবানন্দ

তখন হরে মুরারে উচ্চ শব্দ করিয়া যাবতীর সন্তানসেনা
বল্লমে ভর করিয়া উচু হইয়া উঠিল । এবং সেই সেনা জীবা-
নের অনুকরণ পূর্বক, বেগে পর্বতশিখরে আরোহণ করিতে
লাগিল । একজন সজ্জিত অশ্ব আনিয়া জীবানন্দকে দিল ।
দূর হইতে মহেন্দ্র দেখিয়া বিস্মিত হইল । ভাবিল একি এ ?
না বলিতে ইহারা আসে কেন ?

এই ভাবিয়া মহেন্দ্র ঘোড়ার মুখ ফিরাইয়া ঘোড়ার পিঠে
চাবকের ঘায়ের ধোঁয়া উঠাইয়া দিয়া পর্বত অবতরণ করিতে
লাগিলেন । সন্তানবাহিনীর অগ্রবর্তী জীবানন্দের সাফাৎ
পাইয়া, জিজ্ঞাসা করিলেন । “এ আবার কি আনন্দ ।”

জীবানন্দ হাসিয়া বলিল । “আজ বড় আনন্দ ।
পাহাড়ের ওপিঠে ইংরেজ । যে আগে উপরে উঠবে তারি
জিত ।”

তখন জীবানন্দ সন্তানসৈন্যের প্রতি ডাকিয়া বলিলেন ;

“চেন তোমরা ! আমি জীবানন্দ গোস্বামী । অক্ষয়-
তীরে সহস্র ইংরেজের প্রাণবধ করিয়াছি ।”

তুমুল নিনাদে পর্বত কন্দর কানন প্রান্তর সব ধ্বনিত
করিয়া শব্দ হইল “চিনি আমরা ! তুমি জীবানন্দ গোস্বামী ।”

জীব । বল হরে মুরারে !

পর্বত কন্দর কানন প্রান্তর সহস্র সহস্র কর্তে ধ্বনিত
হইল, “হরে মুরারে !”

জীব । পাহাড়ের ওপিঠে ইংরেজ । আজ এই পর্বত-
শিখরে, এই নীলাশ্বরী যামিনী সাফাৎকার, ইংরেজে সন্তানে
রণ হইবে । দ্রুত আইস, যে আগে শিখরে উঠিবে, সেই
জিতবে । বল, বন্দে মাতরং ।

তখন পর্বত কন্দর কানন প্রান্তর ধ্বনিত করিয়া গীত

ধ্বনি উঠিল বন্দে মাতরং। ধীরে ধীরে সন্তানসেনা পর্বত-
শিখর আরোহণ করিতে লাগিল; কিন্তু তাহারা সহসা সভরে
দেখিল, মহেন্দ্র সিংহ অতি দ্রুতবেগে পর্বত অবতরণ করিতে
করিতে তৃষানিনাদ করিতেছে। দেখিতে দেখিতে পর্বত,
শিখরদেশে নীলাকাশ পটে কামানশ্রেণীসহিত, ইংরেজের
গোলন্দাজ সেনা শোভিত হইয়াছে। উচ্চৈঃস্বরে বৈষ্ণবী সেনা
গায়িল,

তুমি বিদ্যা তুমি ভক্তি,

তুমি না বাহতে শক্তি

স্বং হি প্রাণাঃ শরীরে।

কিন্তু ইংরেজের কামানের গুড়ুম গুড়ুম গুম শব্দে, সে
মহাগীতি শব্দ ভাসিয়া গেল। শত শত সন্তান হত আহত
হইয়া, অশ্রু সহিত, পর্বতসান্নিধ্যদেশে শয়ান হইল। আবার
গুড়ুম গুম, দশিচির অদিকে ব্যঙ্গ করিয়া সমুদ্রের তরঙ্গভঙ্গকে
তুচ্ছ করিয়া, ইংরেজের বজ্র গড়াইতে লাগিল। চাসার কর্ত্তনী
সম্মুখে সুপক্ব ধানোর ন্যায় সন্তানসেনা খণ্ডবিখণ্ড হইয়া ধরা-
শায়ী হইতে লাগিল। বুণায় জীবানন্দ, বুণায় মহেন্দ্র যত্ন
করিতে লাগিল। পতনশীল শিলারাশির ন্যায় সন্তানসেনা
পর্বতসান্নিধ্য হইতে ফিরিতে লাগিল। কে কোথায় পলায়
ঠিকানা নাই। তখন একেবারে সকলের বিনাশসাধনের জন্য
হররে! হররে! শব্দ করিতে করিতে গোঁরা পল্টন পাহাড়
হইতে নামিল। সঙ্গীন উচু করিয়া অতি দ্রুতবেগে, পর্বত-
দিম্বুক্ত বিশালতটিনীপ্রপাতবৎ, দুর্দমনীয় অলজ্বা অজেয়,
ব্রিটিশসেনা, পলায়নপর সন্তানসেনার পশ্চাৎ ধাবিত হইল।
জীবানন্দ একবার মাত্র মহেন্দ্রের সাফাৎ পাইয়া বলিলেন,
“আজ শেষ। এস এই খানে মরি।”

মহেন্দ্র বলিল, “মরিলে যদি রণজয় হইত তবে মরিতাম।
বুধা মৃত্যু বীরের ধর্ম নহে।”

জীব। আমি বুধাই মরিব। তবু যুদ্ধে মরিব। তখন
পাছু ফিরিয়া, উচ্চৈঃস্বরে জীবানন্দ ডাকিল, “কে হরিনাম
করিতে করিতে মরিতে চাও, আমার সঙ্গে আইস।”

অনেকে অগ্রসর হইল। জীবানন্দ বলিল, “অমন নহে।
হরিসাক্ষাৎ শপথ কর, জীবন্তে ফিরিবে না।”

যাহারা আগু হইয়াছিল, ভাহারা পিছাইল। জীবানন্দ
বলিলেন,

“কেহ আসিবে না? তবে আমি একা চলিলাম।”

জীবানন্দ অশ্বপৃষ্ঠে উঠু হইয়া বহুদূর পশ্চাতস্থিত মহেন্দ্রকে
ডাকিয়া বলিলেন, “ভাই! নবীনানন্দকে বলিও আমি চলি-
লাম। লোকান্তরে সাক্ষাৎ হইবে।”

এই বলিয়া সেই বীরপুরুষ লোকবৃষ্টি মধ্যে বেগে অশ্বচালনা
করিলেন। বামহস্তে বজ্রা, দক্ষিণে বন্দুক, মুখে হরে
মুরারে! হরে মুরারে! হরে মুরারে! যুদ্ধের সজ্জাবনা নাই।
এ সাহসে কোন ফল নাই—তথাপি হরে মুরারে! হরে মুরারে!
গায়িতে গায়িতে জীবানন্দ শত্রুবাক্রমধ্যে প্রবেশ করিলেন।

পলায়নপর সন্তানদিগকে মহেন্দ্র ডাকিয়া বলিল “দেখ,
একবার তোমরা ফিরিয়া জীবানন্দ গোঁসাইকে দেখ। দেখিলে
মরিবে না।”

ফিরিয়া কতকগুলি সন্তান জীবানন্দের অমাত্যবী কীর্তি
দেখিল। প্রথমে বিস্মিত হইল, তার পর বলিল “জীবানন্দ
মরিতে জানে, আমরা জানি না? চল জীবানন্দের সঙ্গে
আমরাও বৈকুণ্ঠে যাই।”

এই কথা শুনিয়া, কতকগুলি সন্তান ফিরিল। তাহাদের

দেখাদেখি আর কতকগুলি ফিরিল, তাহাদের দেখাদেখি আরও কতকগুলি ফিরিল। বড় একটা গুপ্তগোল উপস্থিত হইল। জীবানন্দ শত্রুবাহ প্রবেশ করিয়াছিলেন; সন্তানেরা আর কেহই তাঁহাকে দেখিতে পাইল না।

এ দিকে সমস্ত রণক্ষেত্র হইতে সন্তানগণ দেখিতে পাইল, যে কতক সন্তানেরা আবার ফিরিতেছে। সকলেই মনে করিল সন্তানের ভয় হইয়াছে; সন্তান ইংরেজকে তাড়াইয়া যাইতেছে। তখন সমস্ত সন্তানসৈন্য মার মার শব্দে ফিরিয়া ইংরেজসৈন্যের উপর ধাবিত হইল।

এদিকে ইংরেজসৈন্যের মধ্যে একটা ভারি হুলস্থূল পড়িয়া গেল। সিপাহীরা যুদ্ধে আর যত্ন না করিয়া ছুই পাশ দিয়া পলাইতেছে; গোরারাও ফিরিয়া সঙ্গীন খাড়া করিয়া শিখরাভিমুখে ধাবমান হইতেছে। ইত্যন্তঃ নিরীক্ষণ করিয়া মহেন্দ্র দেখিলেন, পর্কতশিখরে অসংখ্য সন্তানসৈন্য দেখা যাইতেছে। তাহারা বীরদর্পে অবতরণ করিয়া, ইংরেজসৈন্য আক্রমণ করিতেছে। তখন ডাকিয়া সন্তানগণকে বলিলেন,

“সন্তানগণ! ঐ দেখ পর্কত শিখরে প্রভু সত্যানন্দ গোস্বামীর ধ্বজা দেখা যাইতেছে। আজ স্বয়ং মুরারি মধু-কৈটভ নিহদন কংস-কেশি-বিনাশন, রণে অবতীর্ণ, লক্ষ সন্তান পর্কতপৃষ্ঠে। বল হরে মুরারে! হরে মুরারে! উঠ! মুসলমানের বুক পিঠে চাপিয়া মার। লক্ষ সন্তান পর্কত পিঠে।”

তখন হরে মুরারের ভীষণ ধ্বনিতে পর্কত কন্দর কানন, প্রান্তর মণ্ডিত হইতে লাগিল। সকল সন্তান মাঠে মাঠে: রবে ললিত-তাল ধ্বনি সহলিত অন্তের ঝঞ্ঝনায় সর্ব জীব বিমোহিত করিল। তেজে মহেন্দ্রের বাহিনী পর্কত আরোহণ করিতে লাগিল। শিলাপ্রতিঘাতপ্রতিপ্রেরিত নিখরিশ্রীবৎ

ইংরেজের সেনা বিলোড়িত, স্তম্ভিত, ভীত হইল। সেই সময়ে পঞ্চ বিংশতি সহস্র সন্তানসেনা লইয়া স্বয়ং সত্যানন্দ ব্রহ্মচারী পৰ্ব্বত শিখর হইতে, সমুদ্র প্রপাতবৎ ইংরেজ সেনার উপর বিক্ষিপ্ত হইলেন। তুমুল যুদ্ধ হইল।

যেমন দুই খণ্ড প্রকাণ্ড প্রস্তরের সজ্জবর্ষে ক্ষুদ্র মক্ষিকা নিষ্পেষিত হইয়া যায়, তেমনি দুই সন্তানসেনা সজ্জবর্ষে সেই বিশাল ইংরেজসৈন্য, পৰ্ব্বত সাহুদেশে, নিঃশেষ নিষ্পেষিত হইল।

ওয়ারেন হেষ্টিংসের কাছে সংবাদ লইয়া যায়, এমন লোক রহিল না।

উনবিংশ পরিচ্ছেদ ।

পূর্ণিমার রাজি !—সেই ভীষণ রণক্ষেত্র এখন স্থির। সেই ঘোড়ার দড়বড়ি, বন্দুকের কড়কড়ি, কামানের গুম্—সৰ্বব্যাপীধুম, আর কিছুই নাই। কেহ হুর্বে বলিতেছে না—কেহ হরিধ্বনি করিতেছে না। শব্দ করিতেছে—কেবল শূগল, কুঙ্কর, গধিনী। সর্বোপরি আহত ব্যক্তির ক্ষণিক আর্ন্তনাদ। কেহ ছিন্নহস্ত, কেহ তগ্নমস্তক, কাহারও পা ভাঙ্গি রাখে, কাহারও পঞ্জরবিদ্ধ হইয়াছে, কেহ ঘোড়ার নীচে পড়িয়াছে। কেহ ডাকিতেছে মা ! কেহ ডাকিতেছে বাপ ! কেহ চায় জল, কাহারও কামনা মৃত্যু। বাঙ্গালী, হিন্দুস্থানী, ইংরেজ, মুসলমান, একত্রে জড়াজড়ি ; জীবন্তে মৃত ; দহুষো অশ্ব, মিশামিশি ঠেসাঠেসি হইয়া পড়িয়া রহিয়াছে। সেই মাঘ মাসের পূর্ণিমার রাত্রে, দারুণ শীতে, উজ্জল জ্যোৎস্নালোকে সেই রণভূমি অতি ভয়ঙ্কর দেখাইতেছিল। সেখানে আসিতে কাহারও সাহস হয় না।

কাহারও সাহস হয় না, কিন্তু নিশীথকালে, এক রমণী সেই অগম্য রণক্ষেত্রে বিচরণ করিতেছিল। একটা মশাল জালিয়া সেই শবরাশির মধ্যে সে কি খুঁজিতেছিল। প্রত্যেক মৃত-দেহের মুখের কাছে মশাল লইয়া মুখ দেখিয়া, আবার অন্য শবের কাছে মশাল লইয়া যাইতেছিল। কোথাও, কোন নরদেহ মৃত অশ্বের নীচে পড়িয়াছে; সেখানে যুবতী, মশাল মাটিতে রাখিয়া, অশ্বটী দুই হাতে সবাইয়া নরদেহ উদ্ধার করিতেছিল। তার পর যখন দেখিতে পায়, যে যাকে খুঁজিতেছি সে নয়, তখন মশাল তুলিয়া লইয়া সরিয়া যায়। এইরূপ অনুসন্ধান করিয়া, যুবতী সকল মাঠ ফিরিল—যা খুঁজে তা কোথাও পাইল না। তখন মশাল ফেলিয়া, সেই শব-রাশিপূর্ণ রুদ্ধরক্ত ভূমিতে লুঠাইয়া পড়িয়া কাদিতে লাগিল। সে শাস্তি, জীবানন্দের দেহ খুঁজিতেছিল।

শাস্তি লুঠাইয়া পড়িয়া কাদিতে লাগিল, এমন সময়ে এক অতি মধুর স্কন্ধধ্বনি তাহার কর্ণরঞ্জে প্রবেশ করিল। কে যেন বলিতেছে, “উঠ মা! কাদিও না।” শাস্তি চাহিয়া দেখিল—দেখিল সম্মুখে জ্যোৎস্নালোকে দাঁড়াইয়া, এক অপূর্বদৃশ্য প্রকাণ্ডাকার জটাজুটধারী মহাপুরুষ।

শাস্তি উঠিয়া দাঁড়াইল। যিনি আসিয়াছিলেন তিনি বলিলেন, “কাদিও না মা! জীবানন্দের দেহ আমি খুঁজিয়া দিতেছি। তুমি আমার সঙ্গে আইস।”

তখন সেই পুরুষ শাস্তিকে রণক্ষেত্রের মধ্যস্থলে লইয়া গেলেন; সেখানে অসংখ্য শবরাশি উপর্যুপরি পড়িয়াছে। শাস্তি তাহা সকল নাড়িতে পারে নাই। সেই শবরাশি নাড়িয়া, সেই মহাবলরান পুরুষ এক মৃতদেহ বাহির করিলেন। শাস্তি চিনিল সেই জীবানন্দের দেহ। সর্বদা ক্ষত-

বিক্ষিত, কুণ্ঠিত, পরিপ্লবিত। শান্তি, সামান্য জীলোকের ন্যায় উচ্চৈশ্বরে কাদিতে লাগিল।

আবার তিনি বলিলেন, “কাদিও না মা! জীবানন্দ কি ‘বরিয়াছে’? স্থির হইয়া উহার দেহ পরীক্ষা করিয়া দেখ। আগে নাড়ী দেখ।”

শান্তি শবের নাড়ী টিপিয়া দেখিল, কিছু মাত্র গতি নাই। তিনি বলিলেন, “বুকে হাত দিয়া দেখ।

যেখানে হৃৎপিণ্ড, শান্তি সেই খানে হাত দিয়া দেখিল, কিছু মাত্র গতি নাই; সব শীতল।

সেই পুরুষ আবার বলিলেন, “নাকের কাছে হাত দিয়া দেখ—কিছু মাত্র নিঃশ্বাস বহিতেছে কি?”

শান্তি দেখিল, কিছু মাত্র না।

তিনি বলিলেন, “আবার দেখ, মুখের ভিতর আঙ্গুল দিয়া দেখ—কিছু মাত্র উষ্ণতা আছে কি না?” শান্তি আঙ্গুল দিয়া দেখিয়া বলিল, “বুঝিতে পারিতেছি না।” শান্তি আশামুগ্ধ হইয়াছিল।

মহাপুরুষ, বামহস্তে জীবানন্দের দেহ স্পর্শ করিলেন। বলিলেন, “তুমি ভয়ে হতাশ হইয়াছ! তাই বুঝিতে পারিতেছ না—শরীরে কিছু তাপ এখনও আছে বোধ হইতেছে। আবার দেখ দেখি।”

শান্তি তখন আবার নাড়ী দেখিল, কিছু গতি আছে। বিস্মিত হইয়া হৃৎপিণ্ডের উপর হাত রাখিল—একটু ধক্ ধক্ করিতেছে। নাকের আগে আঙ্গুল রাখিল—একটু নিঃশ্বাস বহিতেছে। মুখের ভিতর অঙ্গ উষ্ণতা পাওয়া গেল। শান্তি বিস্মিত হইয়া বলিল, “প্রাণ ছিল কি? না আবার আসি-
‘রাছে?’”

তিনি বলিলেন, “তাও কি হয় মা ! তুমি উহাকে বহিরা পুষ্করিণীতীরে আনিতে পারিবে ? আমি চিকিৎসক, উহার চিকিৎসা করিব।”

শান্তি অনায়াসে জীবানন্দকে কোলে তুলিয়া পুকুরের দিকে লইয়া চলিল। চিকিৎসক বলিলেন, “তুমি ইহাকে পুকুরে লইয়া গিয়া, রক্ত সকল ধুইয়া দাও। আমি ঔষধ লইয়া যাইতেছি।”

শান্তি জীবানন্দকে পুষ্করিণীতীরে লইয়া গিয়া রক্ত ধৌত করিল। তখনই চিকিৎসক বন্য লতা পাতার প্রলেপ লইয়া আসিয়া সকল ক্ষতমুখে দিল। তার পর, বারম্বার জীবানন্দের সর্বাঙ্গে হাত ব্লাইল। তখন জীবানন্দ এক দীর্ঘনিঃশ্বাস ছাড়িয়া উঠিয়া বসিল। শান্তির মুখপানে চাহিয়া জিজ্ঞাসা করিল, “যুদ্ধে কার জয় হইল ?”

শান্তি বলিল, “তোমারই জয়। এই মহাত্মাকে প্রণাম কর।”

তখন উভয়ে দেখিল কেহ কোথাও নাই ! কাহাকে প্রণাম করিবে ?

নিকটে বিজয়ী সন্তানসেনার বিষম কোলাহল শুনা যাইতেছিল, কিন্তু শান্তি বা জীবানন্দ কেহই উঠিল না—সেই পূর্ণচন্দ্রের কারণে সমুজ্জ্বল পুষ্করিণীর সোপানে বসিয়া রহিল। জীবানন্দের শরীর ঔষধের গুণে, অতি অল্প সময়েই সুস্থ হইয়া আসিল। তিনি বলিলেন, “শান্তি ! সেই চিকিৎসকের ঔষধের আশ্চর্য্যগুণ ! আমার শরীরে আর কোন বেদনা বা গ্লানি নাই—এখন কোথায় যাইবে চল। ঐ সন্তানসেনার জয়ের উৎসবের গোল শুনা যাইতেছে !”

শান্তি বলিল “আর ওখানে না। মার কার্য্যোদ্ধার হই;

গীছে—এ দেশ সন্তানের হইয়াছে। আমরা রাজ্যের ভাগ চাহি না—এখন আর কি করিতে বাইব ?”

জী। যা কাড়িয়া লইয়াছি, তা বাহুবলে রাখিতে হইবে।

শা। রাখিবার জন্য মহেন্দ্র আছেন, সত্যানন্দ স্বয়ং আছেন। তুমি প্রায়শ্চিত্ত করিয়া সন্তানধর্মের জন্য দেহ ত্যাগ করিয়াছিলে; এ পুনঃপ্রাপ্ত দেহে সন্তানের আর কোন অধিকার নাই। আমরা সন্তানের পক্ষে মরিয়াছি। এখন আমাদের দেখিলে সন্তানেরা বলিবে জীবানন্দ যুদ্ধের সময়ে প্রায়শ্চিত্তভয়ে লুকাইয়াছিল, জয় হইয়াছে দেখিয়া রাজ্যের ভাগ লইতে আসিয়াছে।

জী। সে কি শাস্তি? লোকের অপবাদ ভয়ে আপনার কাজ ছাড়িব? আপনার কাজ মাতৃসেবা; যে যা বলুক না কেন, আমি মাতৃসেবাই করিব।

শা। তাহাতে তোমার আর অধিকার নাই—কেন না তোমার দেহ মাতৃসেবার জন্য পরিত্যাগ করিয়াছ। যদি আবার মার সেবা করিতে পাইলে, তবে তোমার প্রায়শ্চিত্ত কি হইল? মাতৃসেবায় বঞ্চিত হওয়াই, এ প্রায়শ্চিত্তের প্রধান অংশ। নহিলে শুধু তুচ্ছ প্রাণ পরিত্যাগ কি বড় একটা তারি কাজ?

জী। শাস্তি! তুমিই সার বুদ্ধিতে পার। আমি এ প্রায়শ্চিত্ত অসম্পূর্ণ রাখিব না। আমার সুখ সন্তানধর্মে—সে সুখে আপনাকে বঞ্চিত করিব। কিন্তু বাইব কোথায়? মাতৃসেবা ত্যাগ করিয়া, গৃহে গিয়া ত সুখভোগ করা হইবে না।

শা। তা কি আমি বলিতেছি? ছি! আমরা আর গৃহী নহি; এমনই দুইজনে সম্যাসীই থাকিব—চিরব্রহ্মচর্য পালন

করিব। চল, এখন গিয়া আমরা দেশে দেশে তীর্থদর্শন করিয়া বেড়াই।

জী। তার পর ?

শ্য। তার পর—হিমালয়ের উপর কুটীর প্রস্তুত করিয়া, দুই জনে দেবতার আরাধনা করিব—যাতে মার মঙ্গল হয়, সেই বর মাগিব।

তখন দুইজনে উঠিয়া, হাত ধরাধরি করিয়া জ্যোৎস্নায় নিশীথ অনন্তে অন্তর্হিত হইল।

হায় ! আবার আসিবে কি ? মা ! জীবানন্দের ন্যায় পুত্র, শাস্তির ন্যায় কন্যা, আবার গর্ভে ধরিবে কি ?

বিংশ পরিচ্ছেদ ।

সত্যানন্দ ঠাকুর, রণক্ষেত্র হইতে কাহাকে কিছু না বলিয়া,° আনন্দমঠে চলিয়া আসিলেন। সেখানে গভীর রাত্রে, বিষ্ণু-মণ্ডপে বসিয়া ধ্যানে প্রবৃত্ত। এমত সময়ে, সেই চিকিৎসক সেখানে আসিয়া দেখা দিলেন। দেখিয়া, সত্যানন্দ উঠিয়া প্রণাম করিলেন।

চিকিৎসক বলিলেন “সত্যানন্দ, আজ মাঘী পূর্ণিমা।”

সত্য। চলুন—আমি প্রস্তুত। কিন্তু হে মহাত্মন !—আমার এক সন্দেহ ভঞ্জন করুন। আমি যে মুহূর্ত্তে যুদ্ধ আরম্ভ করিয়া আধ্যাত্মিক নিষ্কটক করিলাম—সেই সময়েই আশ্বর্য প্রতি এ প্রত্যাখ্যানের আদেশ কেন হইল ?

বিনি আসিয়াছিলেন তিনি বলিলেন, “তোমার কার্য্য সিদ্ধ হইয়াছে ; মুসলমানরাজ্য ধ্বংস হইয়াছে। আর তোমার এখন কোন কার্য্য নাই। অনর্থক প্রাণিহত্যার প্রয়োজন নাই।”

সত্য। মুসলমান রাজ্য ধ্বংস হইয়াছে কিন্তু হিন্দুরাজ্য স্থাপিত হয় নাই—এখনও কলিকাতায় ইংরেজ প্রবল।

‘তিনি। হিন্দুরাজ্য এখন স্থাপিত হইবে না—তুমি থাকিলে এখন অনর্থক নরহত্যা হইবে। অতএব চল।’

‘শুনিয়া সত্যানন্দ তীব্র মর্ম্মপীড়ায় কাতর হইলেন। বলিলেন “হে প্রভু! যদি হিন্দুরাজ্য স্থাপিত হইবে না, তবে কে রাজ্য হইবে? আবার কি মুসলমান রাজ্য হইবে?”’

‘তিনি বলিলেন, “না, এখন ইংরেজ রাজ্য হইবে।”’

সত্যানন্দের দুই চক্ষে জলধারা বহিতে লাগিল। তিনি উপরিস্থিতা, মাতৃরূপা জন্মভূমি প্রতিমার দিকে ফিরিয়া, ঘোড়া-হাতে, বাস্পনিকুল্লস্বরে বলিতে লাগিলেন, “হায় মা! তোমার উদ্ধার করিতে পারিলাম না—আবার তুমি স্নেহের হাতে পড়িবে। সম্বানের অপরোধ লইও না। হায় মা! কেন আজ রণক্ষেত্রে আমার মৃত্যু হইল না!”

চিকিৎসক বলিলেন, “সত্যানন্দ! কাতর হইও না। বাহা হইবে, তাহা ভালই হইবে। ইংরেজ আগে রাজ্য না হইলে আর্য্যধর্ম্মের পুনরুদ্ধারের সম্ভাবনা নাই। মহাপুরুষেরা ধেরূপ বুঝিয়াছেন, এ কথা আমি তোমাকে সেইরূপ বুঝাই। মনোযোগ দিয়া শুন। তেত্রিশ কোটি দেবতার পূজা আর্য্য-ধর্ম্ম নহে, সে একটা লৌকিক অপকৃষ্ট ধর্ম্ম; তাহার প্রভাবে প্রকৃত আর্য্যধর্ম্ম—স্নেহেরা যাহাকে হিন্দুধর্ম্ম বলে, তাহা লোপ পাইয়াছে। প্রকৃত হিন্দুধর্ম্ম জ্ঞানাত্মক, কর্ম্মাত্মক নহে। সেই জ্ঞান দুই প্রকার, বহির্কর্ম্মবয়ক ও অন্তর্কর্ম্মবয়ক। অন্তর্কর্ম্মবয়ক বে জ্ঞান, সেই আর্য্যধর্ম্মের প্রধান ভাগ। কিন্তু বহির্কর্ম্মবয়ক জ্ঞান আগে না জন্মিলে অন্তর্কর্ম্মবয়ক জ্ঞান জন্মিবার সম্ভাবনা নাই। স্থূল কি তাহা না জানিলে, সূক্ষ্ম কি তাহা জানা যায়

না। এখন এদেশে অনেক দিন হইতে বহির্বিষয়ক জ্ঞান বিলুপ্ত হইয়া গিয়াছে—কাজেই প্রকৃত আৰ্য্যধর্মও লোপ পাইয়াছে। আৰ্য্যধর্মের পুনরুদ্ধার করিতে গেলে, আগে বহির্বিষয়ক জ্ঞানের প্রচার করা আবশ্যিক। এখন এদেশে বহির্বিষয়ক জ্ঞান নাই—শিক্ষায় এমন লোক নাই; আমরা লোকশিক্ষায় পটু নহি। অতএব ভিন্ন দেশ হইতে বহির্বিষয়ক জ্ঞান আনিতে হইবে। ইংরেজ বহির্বিষয়ক জ্ঞানে অতি সুপণ্ডিত; লোকশিক্ষায় বড় সুপটু। সুতরাং ইংরেজকে রাজা করিব। ইংরেজ শিক্ষায় এদেশীয় লোক বহিস্তরে সুশিক্ষিত হইয়া, অস্বস্তিতে বৃত্তিতে সক্ষম হইবে। তখন আৰ্য্যধর্ম প্রচারের আর বিঘ্ন থাকিবে না। তখন প্রকৃত ধর্ম আপনা আপনি পুনরুদ্ধার হইবে। যত দিন না তা হয়, যতদিন না হিন্দু আবার জ্ঞানবান্ গুণবান্ আর বলবান্ হয়, ততদিন ইংরেজ রাজা অক্ষয় থাকিবে। অতএব হে বুদ্ধিমন্—ইংরেজের সঙ্গে যুদ্ধে নিরস্ত হইয়া আমার অনুসরণ কর।”

সত্যানন্দ বলিলেন, “হে মহাশয়! যদি ইংরেজকে রাজা করাই আপনাদের অভিপ্রায়, যদি এ সময়ে ইংরেজের রাজ্যই দেশের পক্ষে মঙ্গলকর, তবে আমরাগকে এই নৃশংস যুদ্ধ-কার্য্যে কেন নিযুক্ত করিয়াছিলেন?”

মহাপুরুষ বলিলেন, “ইংরেজ এক্ষণে বণিক্—অর্থসংগ্রহেই মন, রাজ্য শাসনের ভার লইতে চাহে না। এই সন্তান বিদ্রোহের কারণে, তাহার রাজ্য শাসনের ভার লইতে বাধ্য হইবে, কেন না রাজ্যশাসন ব্যতীত অর্থসংগ্রহ হইবে না। ইংরেজ রাজ্যে অভিযুক্ত হইবে বলিয়াই সন্তানবিদ্রোহ উপস্থিত হইয়াছে। এক্ষণে আইস—জ্ঞান লাভ করিয়া তুমি স্বয়ং সকল কথা বৃত্তিতে পারিবে।”

সত্যানন্দ । হে মহাত্মন—আমি জ্ঞানলাভের আকাঙ্ক্ষা রাখি না—জ্ঞানে আমার কাজ নাই—আমি যে ব্রতে ব্রতী হইয়াছি ইহাই পালন করিব । আশীর্বাদ করুন আমার মাতৃভক্তি অচলা হউক ।

মহাপুরুষ । ব্রত সফল হইবে না—কেন তুমি নিরর্থক নরশোণিতে পৃথিবী প্লাবিতা করিতে চাও ? যুদ্ধবিগ্রহ পরিত্যাগ কর, লোকে কৃষিকার্য্যে নিযুক্ত হউক, পৃথিবী শস্যশালিনী হউন, লোকের ঐশ্বর্য্য হউক ।

সত্যানন্দের চক্ষু হইতে অশ্রুক্ষলিঙ্গ নির্গত হইল । তিনি বলিলেন, “শত্রুশোণিতে লিপ্ত করিয়া মাতাকে শস্যশালিনী করিব ।”

মহাপুরুষ । তুমি আর কিছু করিতে পারিবে না—তোমার দুই বাহু ছিন্ন হইয়াছে—তোমারও আর পরমাণু নাই ।

সত্যানন্দ । না থাকে, এইখানে, এই মাতৃপ্রতিমা সম্মুখে দেহত্যাগ করিব ।

মহাপুরুষ । অজ্ঞানে ? চল জ্ঞান লাভ করিয়া দেহ ত্যাগ করিবে চল । হিমালয়শিখরে মাতৃমন্দির আছে, সেইখান হইতে মাতৃমূর্ত্তি দেখাইব ।

এই বলিয়া মহাপুরুষ সত্যানন্দের হাত ধরিলেন । কি অপূৰ্ণ শোভা ! সেই গম্ভীর বিষুমন্দিরে প্রকাণ্ড চতুর্ভুজ মূর্ত্তির সম্মুখে, ক্ষীণালোকে সেই মহাপ্রতিভাপূর্ণ দুই পুরুষ-মূর্ত্তি শোভিত—একে অন্যের হাত ধরিয়াছেন । কে কাহাকে ধরিয়াছে ? জ্ঞান আসিয়া ভক্তিকে ধরিয়াছে—ধর্ম্ম আসিয়া কর্ম্মকে ধরিয়াছে ; বিসর্জন আসিয়া প্রতিষ্ঠাকে ধরিয়াছে ; কল্যাণী আসিয়া শান্তিকে ধরিয়াছে । এই সত্যানন্দ শান্তি ;

এই মহাপুরুষ কল্যাণী। সত্যানন্দ প্রতিষ্ঠা ; মহাপুরুষ
বিসর্জন ।

বিসর্জন আসিয়া প্রতিষ্ঠাকে লইয়া গেল । বিষ্ণুমণ্ডপ
জনশূন্য হইল । তখন সহসা সেই বিষ্ণুমণ্ডপের দীপ, উজ্জলতল
হইয়া জলিয়া উঠিল ; নিবিল না । সত্যানন্দ যে আগুন
জালিয়া গিয়াছিলেন তাহা সহজে নিবিল না । পারি ত সে
কথা পরে বলিব ।

সমাপ্ত ।